

唐于闐國三藏沙門實叉難陀 譯經

唐太原方山長者李通玄 造論

唐福州開元寺沙門志寧 釐經合論

新華嚴經合論

冊上

財團法人佛陀教育基金會 印贈

梵書華嚴字母輪相



華嚴經四十二字觀想儀軌云。修瑜伽者。應觀自心。圓明皎潔。成大月輪。量等虛空。無有邊際。於月輪內。右旋布列四十二梵字。悉皆金色。放大光明。照徹十方。分明顯現。一一光中。見無量刹海。有無量諸佛。有無量衆前後圍繞。坐菩提座。成等正覺。智入三際。身徧十方。轉大法輪。度脫群品。悉令現證無住涅槃。復應悟入般若波羅蜜四十二字門。了一切法皆無所得。能觀正智。所觀法界。悉皆平等。無異無別。若能與是旋陀羅尼觀行相應。即能現證毗盧遮那如來智身。於諸法中。得無障礙圓明字輪。

大方廣佛新華嚴經合論〔上〕目錄

大方廣佛華嚴經總科	9
大周新譯大方廣佛華嚴經序	3
大方廣佛華嚴經合論序	5
大方廣佛華嚴經合論序	8
釋大方廣佛新華嚴經論主李長者事迹	1
大方廣佛新華嚴經合論卷第一	5
大方廣佛新華嚴經合論卷第二	9
大方廣佛新華嚴經合論卷第三	3
大方廣佛新華嚴經合論卷第四	2
大方廣佛新華嚴經合論卷第五	3
大方廣佛新華嚴經合論卷第六	6
大方廣佛新華嚴經合論卷第七	4

大方廣佛新華嚴經合論卷第八	1	9	1
大方廣佛新華嚴經合論卷第九	2	0	9
大方廣佛新華嚴經合論卷第十	2	3	1
大方廣佛新華嚴經合論卷第十一	2	4	9
大方廣佛新華嚴經合論卷第十二	2	7	2
大方廣佛新華嚴經合論卷第十三	2	9	3
大方廣佛新華嚴經合論卷第十四	3	1	5
大方廣佛新華嚴經合論卷第十五	3	3	4
大方廣佛新華嚴經合論卷第十六	3	5	4
大方廣佛新華嚴經合論卷第十七	3	7	5
大方廣佛新華嚴經合論卷第十八	3	8	9
大方廣佛新華嚴經合論卷第十九	4	0	9
大方廣佛新華嚴經合論卷第二十	4	3	1
大方廣佛新華嚴經合論卷第二十一	4	5	2

大方廣佛新華嚴經合論卷第二十二	4	7	4
大方廣佛新華嚴經合論卷第二十三	4	9	2
大方廣佛新華嚴經合論卷第二十四	5	1	5
大方廣佛新華嚴經合論卷第二十五	5	3	5
大方廣佛新華嚴經合論卷第二十六	5	5	7
大方廣佛新華嚴經合論卷第二十七	5	7	8
大方廣佛新華嚴經合論卷第二十八	6	0	3
大方廣佛新華嚴經合論卷第二十九	6	2	8
大方廣佛新華嚴經合論卷第三十	6	5	2
大方廣佛新華嚴經合論卷第三十一	6	7	2
大方廣佛新華嚴經合論卷第三十二	6	9	3
大方廣佛新華嚴經合論卷第三十三	7	1	7
大方廣佛新華嚴經合論卷第三十四	7	3	6
大方廣佛新華嚴經合論卷第三十五	7	6	2

大方廣佛新華嚴經合論卷第三十六	7
大方廣佛新華嚴經合論卷第三十七	8
大方廣佛新華嚴經合論卷第三十八	3
大方廣佛新華嚴經合論卷第三十九	6
大方廣佛新華嚴經合論卷第四十	8
	8
	0

華嚴經合論〔上〕目錄

世主妙嚴品第一	191
如來現相品第二	389
普賢三昧品第三	421
世界成就品第四	431
華藏世界品第五	452
毘盧遮那品第六	515
佛名號品第七	535
四聖諦品第八	578
光明覺品第九	588
菩薩問明品第十	608
淨行品第十一	631
賢首品第十二	644

昇須彌山頂品第十三	679
須彌頂上偈讚品第十四	687
十住品第十五	708
梵行品第十六	736
初發心功德品第十七	741
明法品第十八	775
昇夜摩天宮品第十九	802
夜摩天宮偈讚品第二十	809
十行品第二十一	824
十無盡藏品第二十二	862
昇兜率天宮品第二十三	880

大方廣佛華嚴經總科

沙門成法灌頂集

夫聖人設教。必有其漸。將命微言。先彰由致。故受之以序分。由致既彰。當機受法。故受之以正宗。正宗既陳。務於開濟。非但篤於時會。復令末葉傳芳。永耀法燈。明明無盡。故受之以流通。非唯一部。當會當品等皆有。故依三分。

初序分 從經初盡世主妙嚴一品。爲序分。卷一至五。

二正宗分 從如來現相品已下。至入法界品初。爲正宗分。自第六卷至六十一卷中。

三流通分 從入法界品初。文殊從善住樓閣出已下。至盡經爲流通分。起第六十一卷末至八十卷終。

大經文富。覽者昧其源流。疏記義繁。披者倦於章句。是以撮其樞要。收束總科。未暇檢尋。先知大意。

將釋此經大分爲四

△初舉果勸樂生信分^三

初教起因緣^一

二說法儀式^二

三正陳所說^二

△二修因契果生解分^三

初答所依果問^三

二答所修因問^六

初未信者令信

說十信^三

二已信者令解

說十住^二

三已解者令行

說十行^三

即世主妙嚴品。十

初如來現相品。明遠方便

二普賢三昧品。爲近方便

初二品明果^二

二一品明因^一

初如來名號品。身名差別

二四聖諦品。言教周徧

三光明覺品。光輪窮照

初菩薩問明品。正解理觀

二淨行品。隨緣願行

三賢首品。德業該收

初二品方便發起^二

後四品當會正說^二

初二品當會由致^二

初總顯已聞 | 二標主時處

三別明時分 | 四別顯處嚴

五教主難思 | 六衆海雲集

七相揚贊德 | 八座內衆流

九天地徵祥 | 十結通無盡

初世界成就品。通辯生佛刹海

二華藏世界品。別明遮那所嚴

即毗盧遮那品。明佛本事

初升須彌頂品。化主赴機

二須彌偈贊品。助化贊佛

初三品當位行德^三

初十住品。辯位

二梵行品。辯行

三發心功德品。明德

四已行者令起願

二十行品。當會正說

二明法品。勝進趣求

說十迴向^二

三十無盡藏品。明勝進

初升夜摩天品。明感應道交

五已起願者令證

初二品當會由致^二

二夜摩偈贊品。歎德顯陳

說十地^一

二十迴向品。當會正說

初升兜率天品。化主赴機

六已證入者令等佛

即十地品。

二兜率偈贊品。助化贊德

說等覺^三

初三品答前所問^二

初二品業用廣大^二

三答所成果問^二

後三品勝德深廣^三

初十定品。就定明業用

△三托法進修行分^一

初三品明妙覺果法^三

二十通品。顯通明業用

△四依人證入成德分^一

後二品明平等因果^二

二十忍品。智慧深玄

即入法界品。^二

即離世間品^十

初阿僧祇品。勝德無數

一本會^十

初序分

初序分

二如來壽量品。明盡一切時

二末會五

二請分

二三昧分

三菩薩住處品。明徧一切處

初寄位修行相

三三昧分

三發起分

初不思議法品。總舉佛德

即善財童子所參

四遠集新衆

四啓分

二十身相海品。顯德相

大方廣佛華嚴經總科

文殊菩薩下四十人

二會緣入實相^二

一總相會緣

即摩耶夫人

二別相會緣

即天主光女下十人

五舉失顯德

六偈頌贊德

七普賢開發

八毫光照益

九文殊述德

十無涯大用

五請分

六說分^六

七結勸分

八現瑞分

九證成分

十重顯分

三隨好光明品。明德業

初普賢行品。平等因

二如來出現品。平等果

初答前十信問

二答十住問

三答十行問

四答十迴向問

五答十地問

六答因圓果滿

三攝德成因相

四智照無二相

五顯因廣大相

彌勒菩薩彈指開大莊嚴樓閣

文殊菩薩遙申右手摩善財頂

普賢菩薩於佛會中說法圓滿

大周新譯大方廣佛華嚴經序

天冊金輪聖神皇帝製

蓋聞造化權輿之首。天道未分。龜龍繫象之初。人文始著。雖萬八千歲。同臨有截之區。七十二君。詎識無邊之義。由是人迷四忍。輪迴於六趣之中。家纏五蓋。沒溺於三塗之下。及夫鷲巖西峙。象駕東驅。慧日法王。超四大而高視。中天調御。越十地以居尊。包括鐵圍。延促沙劫。其爲體也。則不生不滅。其爲相也。則無去無來。念處正勤。三十七品爲其行。慈悲喜捨。四無量法運其心。方便之力難思。圓對之機多緒。混太空而爲量。豈算數之能窮。入纖芥之微區。匪名言之可述。無得而稱者。其唯大覺歟。朕曩劫殖因。叨承佛記。金仙降旨。大雲之偈先彰。玉宸披詳。寶雨之文後及。加以積善餘慶。俯集微躬。遂得地平天成。河清海晏。殊禎絕瑞。既日至而月書。貝葉靈文。亦時臻而歲洽。踰海越漠。獻琛之禮備焉。架險航深。重譯之詞罄矣。大方廣佛華嚴經者。斯乃諸佛之密藏。如來之性海。視之者莫識其指歸。挹之者罕測其涯際。有學無學。志絕窺

觀。二乘三乘。寧希聽受。最勝種智。莊嚴之跡既隆。普賢文殊。願行之因斯滿。一句之內。包法界之無邊。一毫之中。置刹土而非隘。摩竭陀國。肇興妙會之緣。普光法堂。爰敷寂滅之理。緬惟奧義。譯在晉朝。時逾六代。年將四百。然一部之典。纔獲三萬餘言。唯啓半珠。未窺全寶。朕聞其梵本。先在于闐國中。遣使奉迎。近方至此。既觀百千之妙頌。乃披十萬之正文。粵以證聖元年。歲次乙未。月旅姑洗。朔惟戊申。以其十四日辛酉。於大徧空寺。親受筆削。敬譯斯文。遂得甘露流津。預夢庚申之夕。膏雨灑潤。後覃壬戌之辰。式開實相之門。還符一味之澤。以聖歷二年歲次己亥。十月壬午朔。八日己丑。繕寫畢功。添性海之波瀾。廓法界之疆域。大乘頓教。普被於無窮。方廣真詮。遐該於有識。豈謂後五百歲。忽奉金口之言。娑婆境中。俄啓珠函之祕。所冀闡揚沙界。宣暢塵區。並兩曜而長懸。彌十方而永布。一窺寶偈。慶溢心靈。三復幽宗。喜盈身意。雖則無說無示。理符不二之門。然因言顯言。方闡大千之義。輒申鄙作。爰題序云。

大方廣佛華嚴經合論序

宋沙門慧研奉 王旨撰

夫法界之眞源也。濬十重之藏海。涌萬德之華王。體用齊彰。身刹互含於影像。果因相入。智悲交煥於靈眞。原其無性妙光。若金波而粲影。幻生齊應。同衆水以分形。良由譬循一照之精明。燄晦千光之圓鑒。返認創成於心體。雲點太清。依心發動於輪迴。波搖玉海。故我毗盧遮那如來。愍乎寢惑。布以身雲。於一切法而坐道場。於一切智而成正覺。說此大方廣佛華嚴經也。繇是即閻浮之境界。統華藏之莊嚴。星羅於五位神天。鏡寫於十方刹海。彤宮紺殿。含莫限之勞生。玉樹金臺。誕微塵之佛子。一念未移於蓮座。九天同發於雷音。神光開十會法門。寶澤潤三周因果。故此經初。世主雲集。同心默請。有三十七問。備陳體用因果法門。則一部雄文之宗極也。謂藏身爲體。行海爲用。以體起用。斷習爲因。以用全體。習盡爲果。中有神通之義。心境互彰者。則明因果相入。體用一揆。是以從心念法。明體起用。則菩薩神通。從境宣音。明用全體。則佛神通。咸諸妙

門。同躋此問。若夫法無宗旨。人莫准憑。爰彰古佛之果因。以顯今人之證信。是以初會世尊光騰皓齒。海衆雲舒。則示乎果也。次乃玉毫相中。誕諸佛子。則示乎因也。後以普賢承威。宣華藏海。則因全果也。然以毗盧印之。則明古佛果因。總答前法。又以智海無性。因覺妄而成凡。達妄原虛。即凡心而見佛。故第二會普光明殿。以佛果爲凡心信因。三會妙峰山。凡心相盡成佛住。四會夜摩天。以智從用成佛行。五會兜率天。智行相入成佛迴向。六會他化天。自他同體成佛地。七會三禪天。智行清淨成佛華。八會普光明殿。自因成果爲佛出現。九會普光明殿。因果圓融即普賢常行。十會給孤園。諸位齊明同彰法界。此則發心因果。總答前法。次復圓悟一眞。恐迷修進。不盡千門之惑習。焉成萬行之智慧。故以善財。特行軌範。初參文殊。佛智信因。南詢諸友。發行治習。入慈氏閣。習盡成果。再面文殊。因果同時。便見普賢。法界原行。此顯修道行門一周因果。良以三周十會之玄稱。三十七義之指歸。一字法門。書海墨而無盡。三乘權學。諒涯涘而莫窮。故此教。非貝巖所編。乃文殊結集。總三部。一部有十三千大千世界微塵數偈。一四天下微塵數品。一部有四十九萬八千八百偈。一千二百品。一

部有十萬偈。四十八品。隱乎龍藏。未擅閻浮。逮從正法光餘。年將五百。則第十四代祖師龍樹。運神海藏。觀前二部。非世人所及。乃誦後部。歸於五天。傳布千年。方垂華夏。東晉初譯。地涌靈泉。唐朝次翻。天降甘露。玄宗開元中。太原有逸士李通玄者。聞代淨名也。而神鑒物表。陶情釋氏。因閱華嚴義疏。歎云。大教弘芳。多家繁製。勞文白首。豈暇進修。遂窮八十卷之真詮。總括四十軸之玄論。夜驅神筆。舒玉齒之祥光。日探幽玄。感天童之給饋。張皇教海。羅列義天。大中載。無諸有高僧志寧。緬思後進之披尋。難測法門之豐富。遂合經論。文旨相須。然其義類繁衍。未圓品藻。慧研因參雲水。叨覽指歸。敢搵牋毫。整斯漏略。列經論以標舉。彰教理而相收。義朗文清。不假貌臺而抱帙。神輝智發。何勞鷲嶺以尋師。總圓一部一百二十卷。粵有報恩光教道場。正覺空慧禪師永安。傳心祖印。味道華嚴。仰聞王旨以傾金。開印傳通而廣益。慧研虔膺制命。俾序真文。輒述大綱。深慙麗則。所冀長光佛日。將兩曜以齊明。永贊金輪。等二儀而遠大。時龍集乾德。歲旅丁卯。蕤賓之月。望日序。

大方廣佛華嚴經合論序

唐福州開元寺沙門志寧述

邈矣曠古。太素爲混沌之先。存而不論。道爲一生之始。洪儒之子。浴歸沂水之濱。周聖孔明。樂在先王之道。安有得於太空之量。現法界於一塵之中。耘除始終。蔑彼生滅。太虛不能齊量。無爲猶是假名。常用而常無。居有而非有。華嚴經者。蓋非羅漢結集。亦非小聖傳持。大本華嚴。非佛不能知見。中本華嚴。住地菩薩乃能知之。小本華嚴。即十萬之偈。今之所傳。只獲四萬五千餘偈。即八十卷經是也。（此准華嚴經纂靈記中說也）經云。此經不入二乘人手。若無大心凡夫。此之法門即當散滅。經有十玄六相。義如結綰衆絲。帝網天珠。重重各有條貫。談端舉一。則萬類齊歸。義海千殊。爛如星布。以緣生爲旨。以法界性爲宗。法身與報化同時。體用別無二相。以華嚴爲遊履。以菩提心爲家。以萬德萬行爲家業。以文殊爲種智。以普賢爲行華。以毗盧遮那爲結果之身。以四十二位而爲眷屬。演則彌綸法界。卷則巨海毛端。會萬象雖以云多。入塵毛尙有餘地。

圓融行布。理事互參。行布圓融。主伴交現。如斷金之杖。一即是多。如斷杖之金。多即是一。隨觀一境。四種法界圓頓現前。一地初登。百門妙義聯綿俱集。證趣七地。功用方休。八地定力轉深。起智還由諸佛。風帆既便。任運而行。其勢不停。直至法雲之地。會中十地普眼。初遊未見普賢。佛前大智十大聲聞。不覩逝多之勝事。良由發心既小。大願未圓。等覺妙覺現前。爾乃二愚方盡。此經法界無始無終。佛身非有成與不成。大智無滅無生。常以利人爲本。普慧二百大問。普賢二千法訓。法界性本如如。出沒卷舒自在。（經云。如人化心化作佛。化與不化等無異。一切諸佛成菩提。成與不成無差別。）善財童子。成道只在一生。六千比丘。發智不由多劫。白牛之駕將悟。即以超於大乘。金色世界現前。文殊之智全證。法華龍女成佛。只在剎那。妙峰見佛光明。初住便登正覺。但隨圓見。罔取漸修。頓悟只在剎那。如牛食肥膩之草。大唐忻代之間。有長者姓李號通玄。其實異人。莫知來處。造斯經論四十卷成。彼有記云。猛虎馱經引於巖下。下筆之後。常得天人餉食。乃至論終。身亦去世。後人獲其藁本。傳寫流行。其論所明。與諸家疏義稍有差別。經有十處十會。義搜瓔珞經文。（瓔珞經兩卷

是)四十品之妙文。文在第三禪說。十十以爲圓數。豈合只有三十九品之文。恐是梵本翻譯之時有所流落。今尋經見義。又似貫花。甘露澤流。猶如瓶寫。去聖懸遠。誰復證明。十萬之途。孰能往檢。亦如生公忍死。清辯留身。後若勘同。方知義在。普光明殿三會。豈乃成三。善財福城之東。良亦成其會數。志寧雖不親觀造論。皆憑人世盛傳。覽此論文。稍似得其大意。今見此方君子好善之流。以論與經難爲和會。志寧不揆衰邁。才無能爲。今將論文注於經下。使後之覽者。無費乃心。纔始開經。便得見論。稽首諸佛毗盧遮那。一切聖賢。願垂加護。論從第八卷起註入經。兼論與經。共成一百二十卷。願諸達士。罔有怪焉。論有會釋七卷。不入註文。今亦寫附於初矣。

釋大方廣佛新華嚴經論主李長者事迹

李長者諱通玄。莫詳所自。或有詢其本者。但言滄州人。開元二十七年三月望日。曳策荷笈。至於太原孟縣西四十里同穎鄉。村名大賢。有高山奴者。尙德慕士。延納無倦。長者徑詣其門。山奴諦瞻神儀。知非常器。遂罄折禮接。請歸安居。每旦唯食棗十顆。柏葉餅子如七大者一枚。自爾不交外人。掩室獨處。含毫臨紙。曾無虛時。如是者三稔。一旦捨山奴南去。五六里至馬氏古佛堂。自構土室寓於其側。端居寡默。於茲十年。後復囊挈經書遵道而去。二十里餘次韓氏別業。即今冠蓋村焉。忽逢一虎。當塗馴伏。如有所待。長者語之曰。吾將著論釋華嚴經。可與吾擇一棲止處。言畢虎起。長者徐而撫之。遂將所挈之囊挂於虎背。任其所止。於是虎望神福山原。直下三十餘里。當一土龕前。便自蹲駐。長者旋收囊裝置於龕內。虎乃屢顧安尾而去。其龕瑩潔圓迴。廣袤尋丈。自然有。非人力成。龕之四旁舊無泉澗。長者始來之夕。風雷暴作。拔去一古松。高三百餘尺。及旦。松根之下。化爲一潭。深極數尋。迴還五十餘步。甘逾瑞露。色奪

瑠璃。時人號爲長者泉。至今澄明。未曾增減。憇陽之歲。祈之必應。長者製論之夕。心窮玄奧。口出白光。照耀龕中以代燈燭。居山之後。忽有二女子。容華絕世。皆可笄年。俱衣大布之衣。悉以白巾幪首。姓氏居處一無所言。常爲長者汲水焚香。供給紙筆。卯辰之際。輒具淨饌。甘珍畢備。置長者前。齋罷撤器。莫知所止。歷於五祀。曾不闕時。及其著論將終。遂爾絕迹。謹按華嚴舊傳。東晉三藏佛馱跋陀羅。於江都謝司空寺譯經。有二青衣童子。忽自庭沼而出。承事梵僧。麝香添餅。不離座右。每欲將夕。還潛沼中。日日皆然。率爲常事。及譯畢寫淨。沈默無迹。長者感通。事符曩昔。長者身長七尺二寸。廣眉朗目。丹唇紫肥。長髯美茂。脩臂圓直。髮彩紺色。毛端右旋。質狀無倫。風姿特異。殊妙之相。靡不具足。首冠樺皮之冠。身披麻衣。長裙博袖。散腰而行。亦無韋帶。居常跣足。不務將迎。放曠人天。無所拘制。忽一日出山。訪舊止之里。適值野人聚族合樂。長者徧語之曰。汝等好住。吾將欲歸。衆乃罷樂。驚惶相顧。咸皆惻愴。必謂長者卻還滄州。揮涕同詞。懇請留止。長者曰。縱在百年。會當歸去。於是舉衆卻送長者入山。至其龕所。復語之曰。去住常然耳。汝等可各還家。及

衆旋踵之頃。嵐霧四起。景物不分。行路之人。咸共駭異。翌日。長叟結徒登山禮候。但見姿容端儼。已坐化於龕中矣。時當三月二十八日。報齡九十六。有一巨蛇蟠當龕外。張目呀口。不可向近。衆乃歸誠致祝。某等今欲收長者全身。將營殯藏。乞潛威靈。願得就事。蛇因攝形不現。耆舊潛泣輦荷。擇地於大山之陰。累石爲墳。蓋取堅淨。即神福山逝多蘭若。今方山是也。初長者隱化之日。及成墳之時。煙雲凝布。巖谷震蕩。有二白鶴哀唳當空。二鹿相叫連夕。其餘飛走悲鳴滿山。鄉原之人相率變服。追攀孺慕。若喪所天。每當建齋。即墳上雲起。七七如是。良足異夫。長者平昔之時。每年常於三月末間。設十方賢聖淨會。不以女人造食。貴使觸事精誠。至於棗核米泔。不許輒棄。齋畢任用。犬彘徧落。如斯之會。遵承到今。未曾廢絕。至大歷九年二月六日。有僧廣超。於逝多蘭若。獲長者所著論二部。一是大方廣佛新華嚴經論四十卷。一是十二緣生解迷顯智成悲十明論一卷。傳寫揚顯。徧於并汾。廣超門人道光。能繼師志。肩負二論。同遊燕趙。昭示淮泗。使後代南北學人。悉得參閱論文。宗承長者。皆超光二僧流布之功耳。其爲論也。統貫經意。標表法身。廓性海於無邊。歷剎塵而不動。分

泮衆教。極彼源流。融鎔上乘。會此華藏。俾迷徑者獲道。滯教者忘機。可謂毗盧之指歸。華嚴之日月矣。若非聖人。愍世降生。開導昏冥。孰能條釋大典。指授大心歟。長者行止玄微。固難遐究。虛空不可等度。況擬求邊際耶。比歲僧元覘。特抵方山。求長者遺迹。初禮石墳。次尋龜址。龜前有松三株。一已查立。俱是長者手植。長者將化之月。一株遂枯。至今二株。常有靈鶴結巢於頂。又於壽陽南界解愁村。遇李士源者。乃傳論僧廣超之猶子也。示長者真容圖。瞻禮而迴。斯爲滿願矣。向之云云。蓋在據實。枝葉華藻。無所務焉。雲居散人馬支纂錄。

大方廣佛新華嚴經合論卷第一

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

夫以有情之本。依智海以爲源。含識之流。總法身而爲體。只爲情生智隔。想變體殊。達本情亡。知心體合。今此大方廣佛華嚴經者。明衆生之本際。示諸佛之果源。其爲本也。不可以功成。其爲源也。不可以行得。功亡本就。行盡源成。源本無功。能隨緣自在者。即此毘盧遮那也。以本性爲先。智隨根應。大悲濟物。以此爲名。依本如是。設其教澤。滂流法界。以潤含生。於是寄位四天。示形八相。菩提場內。現蘭若以始成。普光法堂。處報身之大宅。普賢長子。舉果德於藏身。文殊小男。創啓蒙於金色。以海印三昧。周法界而降靈。用普眼之法門。覩塵中之刹海。依正二報。身土交參。因果兩門。體用相徹。以釋天之寶網。彰十刹以重重。取離垢之摩尼。明十身而隱隱。無邊刹境。自他不隔於毫端。

十世古今。始終不移於當念。其爲廣也。以虛空而爲量。其爲小也。處極微而無跡。十方無卷。匪虧於小相之中。纖塵不舒。含十方而非礙。於智海果德。殊分於五位之門。常住法堂。示進修於九天之上。此方如是。十刹同然。聖衆如雲。海會相入。智凡不礙。狀多鏡以納衆形。彼此無妨。若干燈而共一室。此經總有四十品之勝典。玄開果德之門。百萬億之妙言。咸舉佛華之行海。十身十會。闡十十之法門。十處十方。啓十通而疏十辯。出現品內。示因果以結始終。給孤獨園。利人天之明法界。目連鷲子。隔視聽於對顏。六千比丘。啓十明於路上。覺城東際。五衆咸臻。古佛廟前。同登十智。善財發明導首。用彰來衆齊然。又成五位法門。具德行其軌範。令使啓蒙易達。解行無疑。還信首文殊之前。正證妙峰之頂。經過五衆。成一百一十之法門。至慈氏之園。結會一生之佛果。返示文殊之初友。明以果同因。後入普賢之妙身。彰體用圓極。此經名大方廣佛華嚴經者。大以無方爲義。方以理智爲功。廣則毫刹相含。佛乃體用無作。華喻行門可樂。能敷理事之功。嚴即依正莊嚴。經即貫穿縫綴。世主妙嚴品者。菩薩示生。皆爲世主。同臻海會。故號妙嚴。品者。類會同流法門均隔爲品。此經總有四十

品之勝典。此品建初。故稱第一。是故言大方廣佛華嚴經。世主妙嚴品第一。

釋此一部之經。總作十門分別。第一明依教分宗。第二明依宗教別。第三明教義差別。第四明成佛同別。第五明見佛差別。第六明說教時分。第七明淨土權實。第八明攝化境界。第九明因果延促。第十明會教始終。

第一明依教分宗。

夫如來成道。體應眞源。理事二門。一多相徹。智境圓寂。何法不周。只爲器有差殊。軌儀各異。始終漸頓。隨根不同。設法應宜。大小全別。時分因果。延促不同。化佛本身。施詮各異。國土淨穢。增減不同。地位果因。自有投分。創學之流。未諳教跡。執權成實。迷不進修。若不咸舉衆宗。類其損益。無以了其迷滯者矣。今略分十法。以辯闡猷。使得學者知宗。遷權就實。不滯其行。速證菩提。第一小乘戒經。爲情有爲宗。第二菩薩戒。爲情有及眞俱示爲宗。第三般若教。說空彰實爲宗。第四解深密經。爲不空不有爲宗。第五楞伽經。五法三自性八識二無我爲宗。第六維摩經。以會融染淨二見。現不思議爲宗。第七法華經。會權就實爲宗。第八大集經。以守護正法爲宗。第九涅槃經。明佛性爲宗。

第十名大方廣佛華嚴經。以此經名一切諸佛根本智慈。因圓果滿。一多相徹。法界理事。自在緣起。無礙佛乘爲宗。已上分宗。皆是承前先德所立宗旨。設有少分增減不同。爲見解各別。大意名目亦多相似。如西域及此方諸德各立宗教。後當更明。

第一小乘戒經。爲情有爲宗者。爲如來創爲凡夫造業處說。是應作。是不應作。捨者善。不捨者不善。如此立教。未爲實有。如此有教。且約凡情虛妄之處。橫計諸惡。以教制之。令生人天。是故戒序云。若欲生天上。及生人中者。常常護戒足。勿令有毀損。衆生有爲。作業虛妄。非實得故。生人天無常。虛妄非實。未得法身智身。非爲實有宗。且爲情有宗。於小乘中。爲軌持教也。如華嚴經持戒即不然。經云。身是梵行耶。身業四威儀。乃至佛法僧。十衆七遮。和尚羯磨壇場等。是梵行耶。如是諦觀。求梵行者。了不可得。是故名爲清淨梵行。如梵行品說。如是清淨行者。名持佛性戒。得佛法身故。乃至初發心時。便成正覺。以持佛性戒故。與佛體齊。理事平等。混眞法界。如是持戒。不見自身能持戒者。不見他身有破戒者。非凡夫行。非賢聖行。不見自身發菩提心。不見諸佛成等正

覺。若好若惡。若有少法可得。不名菩提。不名淨行。當如是觀。如是性戒。即法身也。法身者。即如來智慧也。如來智慧者。即正覺也。是故不同小乘有取捨故。

第二如梵網經菩薩戒。爲情有及真俱示爲宗者。如來爲凡夫之中。有大心衆生。樂行慈悲。有忻求佛果者。說盧舍那佛爲本身。千百億爲化身。頓令識末還本故。經言。如是千百億。各接微塵衆。俱來至我所。又言。若人受佛戒。即入諸佛位。位同大覺已。真是諸佛子。即爲性戒故。即爲真宗。此乃爲大心衆生。頓示法身性戒。下劣者得漸。一教應二根。如是千百億。各接微塵衆。俱來至我所。明捨權而就實。此爲實有教。當教之內。頓示權實故。不同小乘。前亦無常。後亦無常。爲但生人天故。雖然立實有宗。不同華嚴經毘盧遮那所說也。此經仍隨化身所化方。來至本身也。圓教之宗。一下頓示本身。本法界大智報身。因果理事齊彰。又如華嚴經中世界量。與梵網經中蓮華形量。亦不同。廣狹全別。廣如下文所說。

第三般若教。爲說空彰實爲宗者。爲如來初爲人天凡夫。說二乘教。繫著理

事俱實。不能離障。爲說空教。破所繫著故。般若經中。說十八種空法。世間三寶四諦三世等。一切皆空。空亦空。廣如經說。此乃空卻無明諸障等業。無明總盡。障業皆無。自性涅槃。自然顯著。此爲真有。不名空宗。雖然爲真有。所說教門。多有成壞故。未可爲圓。如華嚴經。具報相好莊嚴。能虛能實。當部之內。當品之中。十十菩薩等。上下自相輪貫。空有之法。不獨孤行。又以普賢文殊。上下交參。理事相徹。互相交映。一部之典。品品相徹。句句相參。一品之中。四十品經同入。一言之內。十萬頌之齊靡。一成即一切成。一壞即一切壞。總以性齊時齊行齊故。如上等齊。說法亦齊。如是齊故。如今成佛。與三世佛齊成佛故。爲無三世故。爲無時故。不同彼教成壞別時故。因果前後故。

第四解深密經。爲不空不有宗者。如來說於有教空教之後。說此一部之教。和會有無二見。爲不空不有。即說九識爲純淨無染識。如瀑水流。生多波浪。諸波浪等。以水爲依。五六七八等識。皆以阿陀那識爲依故。如彼波浪。以水爲依。如深密經云。如善鏡面。若有一影。生緣現前。唯一影起。若二若多影。生緣現前。有多影起。非此鏡面轉變爲影。亦無受用滅盡可得。此明五六七八識所依第

九淨識處也。又云。如是菩薩。雖由法住。智爲依止。爲建立故。此經意欲令於識處。便明識體。本唯眞智故。如彼瀑流。不離水體而生波浪。又如明鏡。依彼淨體。無所分別。含多影像。不礙有而常無故。如是自心所現識相。不離本體無作淨智。所現影相。都無自他內外等執。任用隨智。無所分別。以破空有二繫。爲不空不有故。深密經頌曰。阿陀那識甚深細。一切種子如瀑流。我於凡愚不開演。恐彼分別執爲我。阿陀那識甚深細者。引彼凡流。就識成智。不同二乘及漸始學菩薩。破相成空。不同凡夫。繫而實有。不同彼故。不空不有。何法不空。爲智能隨緣。照機利物故。何法不有。爲智正隨緣時。無性相故。無生住滅故。以是義故。名不空不有。此經雖復如是。於心識之處。令知空有無二。華嚴經則不然。但彰本身法界一眞之根本智佛體用故。混眞性相法報之海。直爲上上根人。頓示佛果德一眞法界本智。以爲開示悟入之門。不論隨妄而生識等。法華經。以佛智慧示悟衆生。使得清淨故。出現於世故。不爲餘乘若二若三。又三乘之人。於佛性相之法。如來不許彼知解故。法華經云。種種性相義。我及十方佛。乃能知是事。舍利弗。辟支佛及不退諸菩薩。皆悉不能知。以法華經會。三乘權學。

來歸佛乘實法界故。門前三駕。且受權乘。露地白牛。方明實德。以此義故。於中有少分義意。與華嚴經相符。龍女即是所乘白牛之乘。又與善財同其所得。是故華嚴教門。直彰本體用法界佛果門。直授上根凡夫。令其悟入。不同深密經中。安立五六七八九識。施設權門。如深密經。權施第九阿陀那識。意有異途。爲二乘之人。久厭患生死。修空滅識。直趣空寂。又第二時說般若等教。爲迴二乘。及漸學菩薩。多說空破有。以六波羅蜜爲行所乘。於中二乘。雖少分迴心。及漸學菩薩。樂空增勝。爲彼權學菩薩初對治門。還與小乘初對治門。少分相似。但有一分慈悲增勝。未證法身佛性根本智等道理。但以空門而爲所乘。六波羅蜜而爲行相。初對治門。還同二乘無常不淨白骨微塵等觀。方入空觀二乘趣滅。菩薩留生。以空無我等觀。折伏我法。不令增長。元來未是法身佛性根本智。爲見未真故。樂空增勝。以是義故。解深密經。方便安六七八識外。別說九識爲純淨識。云七八識。以淨識爲依止故。未即直爲說第八種子識爲如來藏者。爲彼學徒畏苦習故。若說業種恆真。生怖難信故。是故權且安立第九阿陀那識爲淨識故。欲令不滅識性。長大菩提。是故維摩經云。未具佛法。亦不滅受而取證也。受既不滅。

想識亦然。如楞伽經。直爲根熟者。說第八識業種。爲如來藏。下文更明。維摩經云。塵勞之疇。爲如來種等。夫修道之士。品類異途。解行差殊。千端萬別。除二乘之外。菩薩之乘。有四品不同。一修空無我菩薩。二漸見佛性菩薩。三頓見佛性菩薩。四以如來自性清淨智。以五位加行起差別智。滿普賢行。成大慈悲菩薩。究竟不出剎那際。充滿十方佛果門。此略示名目。下文廣明。如華嚴經說。有一類菩薩。經百千億那由他劫。行六波羅蜜。不生佛家。猶名假名菩薩。廣會在下文。以雖見佛性。未彰智業。猶名假名菩薩。

第五楞伽經。以五法三自性八識二無我爲宗者。彼經於南海中楞伽山說。如來於此山下過。羅婆那夜叉王。與摩諦菩薩。乘華宮殿。來請如來。於此山上說法。其山高峻。下瞻大海。傍無門戶。得神通者。堪能昇往。乃表心地法門。無修無證者。方能昇也。下瞻大海。表其心海。本自清淨。因境風所轉。識浪波動。欲明達境自空。心海自寂。心境俱寂。事無不照。猶如大海無風。日月參羅。煥然明現。彼經意。直爲根熟菩薩。頓說種子業識。爲如來藏。異彼二乘滅識趣寂者故。亦爲異彼般若修空菩薩。樂空增勝者故。直明識體。本性全眞。便成智用。

故。如彼大海無風。即境界更明。心海法門。亦復如是。了真即識成智。此經異彼深密經意。別立九識。接引初根。漸令留惑。長大菩提故。不令其心植種於空。亦不令其心如彼敗種。解深密經。乃是入惑之初門。楞伽維摩。直示惑之本實。楞伽即明八識爲如來藏。淨名即觀身實相。觀佛亦然。淨名與楞伽略同。深密經文。與此二部少別也。如華嚴經不爾。佛身及境界法門行相。懸自不同。說彼楞伽經。即是化身所說。境界即是穢土山峰所居。法門說識境界爲真。問答即以大慧菩薩爲首。化身明教是權。大慧且論簡擇。如華嚴經教。佛身即是本眞法報。境界即是華藏所居。法門即是佛果法界爲門。問答即是文殊普賢理事智之妙用。五位行相。因果互融。十刹十身。體徹相入。若論同別。未可具言。更待下文。依位廣辯。

第六維摩經。不思議爲宗者。維摩經與華嚴。十種別。一種同。別者。一淨土莊嚴別。二佛身諸相報化別。三不思議德神通別。四所設法門對根別。五諸有聞法來衆別。六設教安立法門別。七淨名菩薩建行別。八所闡法門處所別。九常隨佛衆部從別。十所付法藏流通別。一同者。入道方便法門略同。一淨土莊嚴別

者。如維摩經中。所說淨土。如來以足指按地。即三千大千世界。若干百千珍寶嚴飾。譬如寶莊嚴佛。無量功德寶莊嚴土。一切大眾。歎未曾有。而皆自見坐寶蓮華。而未說無盡佛刹莊嚴等事。在一毫塵中。如華嚴經中。具說十佛毘盧遮那境界。十蓮華藏世界海。一一世界海。有無盡世界海重重相入。一塵之內。有無盡世界海。圓滿十方。佛境界。衆生境界。互相涉入。不相障礙。衆寶莊嚴。如光如影。廣如經說。不但獨言三千大千世界之所嚴淨。二佛身諸相報化別者。說此維摩經。是三十二大人之相化佛所說。說華嚴經佛。是九十七大人之相。及十華藏世界海微塵數大人之相。實報如來之所說也。三不思議德神通別者。如維摩經。說菩薩神通。以須彌之高廣。內芥子中。能以四大海水。入一毛孔。又小室之內。能容三萬二千師子之座。各各高八萬四千由旬。八千菩薩。五百聲聞。百千天人。維摩詰置其右手掌。擎其大眾。往詣庵園。又以手斷取東方妙喜佛國。來至此土。示於大眾。送還本處。如是神變。且爲權學三乘聲聞菩薩等衆。現如斯事。何以故。爲權教聲聞菩薩等。見道未實。自他未亡。所現神變。依根所見。皆有往來分割限量。又是一時之間聖意。以神力變化。起諸小根。令漸增進故。

非是法爾力故。如華嚴經中。以本法力。法如是故。能以一塵之內。含容十方一切佛刹。衆生刹。總在塵中。世界不小。微塵不大。十方世界。所有微塵。一一塵中。總皆如是。如經所說。菩薩於一小衆生身中。成等正覺。廣度衆生。其小衆生。不知不覺。當知佛以權教。引小根故。身外見佛。現神通力。而有來去。實教之中。以自本覺。自覺本心。身心性相。與佛無異。無有內外往來諸見。是故毘盧遮那佛。不移本處。而身徧坐一切道場。十方來衆。不移本處。而隨化往。都無來去。亦無神力所致。是故經言。法如是故。經中每言。以佛神力。及法如是力者。以佛神力。推佛爲尊。法如是故。推其本德。都無變化。一一國刹。身心性相。以依本故。不隨妄故。大小諸境。皆如光如影。互相映徹。周徧十方。都無往來。都無分限。即一一衆生身諸毛孔之內。周徧十方。不同權教。以其神力。分劑往來。擎來送去。致斯妄見。違本法身。障眞菩提本覺性智。是故淨名菩薩。現斯神變已。方陳實教。維摩經云。觀身實相。觀佛亦然。我觀如來。前際不來。後際不去。今則不住。如阿閼佛品廣明。是故權教小見。樂欲希奇。菩薩稱根。巖施接引。令生樂學。方授實門。不可以執化成眞。恆迷智眼。識權就

實。遷入法界之門。有作之法難成。隨緣無作易辦。作者勞而無功。不作隨緣自就。無功之功。功不虛棄。有功之功。功皆無常。多劫積修。終歸敗壞。不如一念緣起無生。超彼三乘權學等見。四所設法門對根別者。彼維摩經。對二乘根。令迴向菩提。入大乘故。又對大乘中滯淨菩薩。悲智未滿者。令進修故。即如衆香世界。諸來菩薩衆。欲還本土。請佛世尊願賜少法。如來依根。見彼菩薩滯於淨土。悲智心劣。便爲說法。令學有盡無盡解脫門。下文云。不離大慈。不捨大悲。深發一切智心。而不忽忘。教化衆生。終不厭倦。於四攝法。常念順行。在諸禪定。如地獄想。於生死中。如園觀想。見來求者。如善師想。廣如維摩經說。彼經對二乘三乘悲智未滿。令且漸修。增長悲智。未即一下頓示佛門。未即說言十住初心便成正覺。未即示其廣大妙事。皆有分劑故。五諸有來衆聞法別者。如維摩經中。所有來衆。除文殊慈氏等大菩薩衆。舍利弗等影響聲聞。餘外來衆。總是三乘之中。權學之衆。設有於中菩薩。生於諸趣。同類俱來。皆欲成就三乘權學。漸令增進。未說圓滿諸佛本乘。如華嚴經中。所有來衆。皆是乘如來乘。佛智果德。自體法身。具普賢行。而隨影現十方刹海一切道場。還成如來所乘本

法。無有一箇三乘根機。設有三乘根機。如盲如聾。不知不覺。猶如盲人。對於日月。猶如聾人。聽天樂音。如業貧人。對天寶藏。如大福德。處於地獄。亦如餓鬼。臨大海邊。三乘之器。道力未窮。未迴心者。常居法界海中。諸佛境界。與佛同德同身。終不能信。不覺不知。別求佛見。如華嚴經云。佛子。設有菩薩。於無量百千億那由他劫。行六波羅蜜。修習種種菩提分法。若未聞此如來不思議功德法門。或時間已。不信不解。不順不入。不得名爲真實菩薩。以不能生如來家故。當知聞法衆全別。維摩經中。娑婆之衆。彼此未亡。香積諸徒。垢淨全在。當知此類。並是見解未真。守一方之淨刹。雖名菩薩。諦道未圓。如是之徒。未詳佛意。雖有忻菩提之志願。滯淨刹以居心。彼與法身智身懸隔。是故法華經云。不退諸菩薩。其數如恆沙。亦復不能知。即如華嚴之衆。自身與佛身無別。自智與佛智無差。性相含容。一多同別。居法界海之智水。示作魚龍。住涅槃之大宅。現陰陽而化物。主伴自在。交映相參。師弟互融。因果通徹。並是如斯之衆也。六設教安立法門別者。彼維摩經。以淨名居士。現少許不思議之通變。令二乘迴心。又處於生死。現身有疾。令知染淨無二。又表菩薩大悲有疾。菩薩具陳不二

之門。建定慧觀智。用彰不求之法最要。故云。夫求法者。於一切法應無所求。然未似華嚴經。具陳十住。十行。十迴向。十地。等覺。五位。六位。行相因果同別法門。七淨名菩薩示行別者。淨名爲表大悲。示入生死。現其病行。華嚴經毘盧遮那。以大悲示入生死。成正覺行。彰大智能出世故。八所闡法門處所別者。說維摩經。在毘耶離城庵羅園。及在淨名之室。說華嚴經。在摩竭國菩提場中。及一切世界。及一切塵中說。九常隨佛衆別者。說維摩經時。聲聞爲常隨佛衆。但具五百。說華嚴經時。總是一乘大菩薩衆。爲常隨佛衆。具十佛刹微塵大衆。總是具普賢文殊體用等衆。十所付法藏流通別者。彼維摩經囑累品中說。佛告彌勒菩薩言。彌勒。我今以是無量億阿僧祇劫。所集阿耨多羅三藐三菩提法。付囑於汝故。即以其經。付囑已成菩薩。已生佛家者。華嚴經如來出現品中。付囑流通。即以其經法。付囑凡夫初心。始能見道。生在佛家者。何以然。此經難入。許人能證。以自證故。方堪能說。表三乘是權。但以聖勸修證。所有得法。未成實故。所有說法者。亦未實故。華嚴經云。此經珍寶。不入一切餘衆生手。唯除如來法王眞子。生如來家。種如來種諸善根者。佛子。若無此等佛之眞子。如是

法門。不久散滅。問曰。若計佛之眞子。即十方世界。無盡無邊。以世界微塵。莫知其數。何須慮此經。若無眞子。即便散滅。答曰。此經意者。付囑凡夫。令覺悟入此法門故。令生佛家。使其轉教。佛種不斷。即凡夫令得入眞之境。若囑累諸大菩薩。凡夫無緣。諸聖自明。無凡夫修學者。凡夫道中。佛種即斷。此經散滅。以此義故。付囑凡夫令修。不付已前大菩薩舊見道者。一入道方便同者。維摩經云。夫求法者。於一切法應無所求。乃至觀身實相。觀佛亦然。我觀如來。前際不來。後際不去。今則無住等。是初觀智門略同。於入道行相。門戶次第。軌則全別。廣如下明。

第七法華經。會權入實爲宗者。此經引彼三根之人。歸一乘實教故。引衆流而歸大海。攝三末而還源。藏法師等。前諸大德。會爲共教一乘。爲三乘同聞故。華嚴經爲別教一乘。爲不與三乘同聞故。參詳此理。會此二門。法華經引權器以歸眞。華嚴者頓示大根而直受。雖一乘名合。法事略同。論其軌範。有多差別。今欲備舉。事廣難周。略舉十門。用知綱目。十門者。一者教主別。二放光別。三國土別。四請法主別。五大會莊嚴眞化別。六序分之中列衆別。七龍女轉身成

佛別。八龍女成佛所居國土別。九六千之衆發心別。十受諸聲聞遠記別。一教主別者。說此法華經。即是化身佛說。還過去滅度多寶佛來。證成此經。三世諸佛。同共宣說。如華嚴經即不然。教主。即是毘盧遮那爲教主故。即是法報理智眞身。具無量相海功德之身之所莊嚴。三世諸佛。同爲一際一時一法界。報相重重。無有障礙。古今一際。非三世故。舊佛非過去。今佛非新出。爲根本智。性相齊理。事不異故。如是本佛說本法。頓受大根故。不是化佛故。不似法華經。有舊佛滅度多寶如來。今佛出世說法華經。以是義故。言教主別。二放光明別者。說法華經。雖放眉間毫相果光。所照境界。但言萬八千土。皆如金色。仍有限量。不稱無邊無量無盡故。但彰果法。不彰因位。華嚴一部經典。教行因果。表法光明。始終具十。後當更明。三國土別者。說法華經時。三變世界。令成淨土。移諸天人置於他土。然後安置他方來衆。變此穢境令成淨刹。說華嚴經時。即此娑婆世界。即是蓮華藏世界。一一世界。互相含入。經云。一一世界滿十方。十方入一亦無餘。世界不增亦不減。無比功德故如是。又云。諸佛成道。在一小衆生身中。化無量衆。其彼小衆生。不知不覺。只爲凡聖同體。無移轉相。纖塵之內。自他

同體。不同法華之會。移轉人天。方明淨刹。此是對權根。乃分自他滯見者之所建立。是故今明國土別也。四請法主別者。說法華經時。請法主者。即是舍利弗。以爲勸請之首。說華嚴經時。佛令文殊普賢隨位菩薩。各自說自位法門。爲說法首。佛表果法。舉果爲因。起大悲行。成根本智。果體自成。故無言不說也。以大悲行。從無作根本智起故。文殊普賢表因位。可說佛果法示悟衆生。阿僧祇品。世間數法。廣大難量。唯佛究竟。不屬五位中因果門故。是佛自位內法門。還佛自說。隨好光明功德品。即是如來自成因果後。自說佛法法爾之力。恆常福智光明之法門。亦不屬五位之內行相因果故。佛亦自說。此明佛果無二愚也。除此二品經外。諸餘三十八品。皆是五位之內行相法門。是故佛不自說。總令十信十住十行等。當位之內菩薩自說。佛但放光表之。其所放光表法之相。後當廣明。當說華嚴經時。一無聲聞及小菩薩爲請法主。皆佛果位內諸大菩薩。自相問答。安立佛果法門行相。爲悟大根者故。頓將佛果直受爲因。因即以果爲因。果即以因爲果。如種種子等。以定慧力。思之可見。是故今言請法主別。五大會莊嚴眞化別者。如法華會。令三千大千世界清淨莊嚴。其諸化衆。亦皆充滿。所來諸佛。

皆云是化。華嚴經即不爾。即有十處十會衆。皆滿十方。不移本處而充法界。一身相及身毛孔。國刹重重。菩薩佛身。互相徹入。雜類衆生。亦皆無礙。身土相徹。如影含容。所來之衆。不壞法身而隨相好。法身相好。一際無差。即相全真無有化也。不同餘教說化說真。有相參會。是故今言大會別也。六序分之中列衆別者。法華會中。先列聲聞衆。萬二千人俱。次列摩訶波闍波提。與眷屬六千人俱。此爲姨母六千人俱。次列耶輸陀羅比丘尼。此是佛爲太子時夫人。佛爲太子時。有三夫人。一名瞿夷。二名耶輸。三名摩奴舍。瞿夷是善財童子十地法雲地善知識。表十地法悅能慈故。爲法利生。法悅身心。是其妻義。次列菩薩。八萬人俱。次列諸天龍鬼等。華嚴經即不然。先列菩薩上首。有十佛世界微塵數。不論其從者。次列執金剛神衆。已後諸神龍天等衆部類。總有五十五衆。一一部從各別。各各部從。各有佛世界微塵數衆。或有部從。直言無量。且於初會。通菩提場衆。有五十五部衆。其於十會之衆。後當更明。大意論之。佛身衆海。無邊法界以重重。一一諸身普含容而無際。一身即以法界爲量。自他之境都亡。法界即自身徧周。能所之情見絕。約略論之如是。十會列衆。後當更明。從初至八

會。都不聞聲聞之名。九會之中。始有比丘三衆。至位方明行相。七龍女轉身成佛別者。如法華經。龍女於剎那之際。即轉女身。具菩薩行。南方成佛。如華嚴經即不然。但使自無情見。大智逾明。即萬法體真。無轉變相。如維摩經中。舍利弗謂天女曰。何故不轉女身。天女謂舍利弗。我十二年來。求女人相了不可得。當何所轉。如庵提遮女謂舍利弗。自男生我女。當知萬法。本自體如。有何可轉。如華嚴經入法界品中。善財童子善知識。文殊。普賢。比丘。比丘尼。長者。童子。優婆夷。童女。仙人。外道。五十三人。各各自具菩薩行。自具佛法。隨諸衆生。見身不同。不云有轉。若以法眼觀。無俗不真。若以世間肉眼觀。無真不俗。以法華經。對權教三根見未盡者。令成信種。且將女相速轉成佛。令生奇特。方始發心。趣真知見。不堪本法。而起善根。此明且引三權。令歸一實。又破彼時劫。定執三僧祇。令於剎那證三世性。本來一際。無始無終。稱法平等。裂三乘之見網。撤菩薩之草庵。令歸法界之門。入佛真實之宅。故令龍女成佛。明非過去久修。年始八歲。又表今非舊學。轉女時分。不逾剎那。具行佛果。無虧毫念。法本如是。自體無時。權學三根。自將見隔。自迷實法。返稱爲化。不知躬

已本事如斯。全處宅中。猶懷滯見。云何界外。懸指僧祇。此見不離。定乖永劫。迴心見謝。方始舊居。何如今時。滅諸見業。徒煩多劫。苦困方迴。如華嚴經法界緣起門。明凡聖一眞。猶存見隔。見在即凡。情亡即佛。稱性緣起。俯仰進退。屈身謙敬。皆菩薩行。無有一法。可轉變相。有生住滅。是故不同龍女轉身成佛。八龍女成佛所居國土別者。即言南方無垢世界。非此娑婆。解云。心得應眞。故稱無垢。正順本覺。故號南方。爲南北爲正故。又南爲明爲虛。南爲離。離中虛。八卦中。離法心。心虛無故則明。還依世俗八卦表之。餘方雖無八卦之名。其方法是一法也故。雖然理如是。有理即有事。故還須有國。衆所歸依。若有別住南方。自他彼此猶隔。此乃猶順三乘。分引權根。而生信解。還就佛乘故。爲三乘餘執勢分難摧。且有一分迴心。自他之情未絕。頓印法界之體。不同華嚴自他相徹。一一微塵之內。住因陀羅網之門。是故今言所居國土別。九六千之衆發心別者。如法華經云。龍女成佛時。娑婆世界。菩薩聲聞。舉衆皆遙見龍女成佛。普爲時會人天說法。心大歡喜。悉遙敬禮。又下文娑婆世界。三千衆生。住不退地。三千衆生。發菩提心。而得受記。智積菩薩。及舍利弗。一切衆會。默然信受。

雖智積菩薩。及舍利弗。而爲智士。寄在迷流。爲利啓蒙。故遣教行。益濟凡學。令成軌躅。既娑婆之衆皆遙敬禮。六千發意。彼此未亡。但順三乘權學有爲菩提。未得普門法界本覺菩提。自他同體。以此義故。故有遙敬禮。華嚴經即不然。即以普門法界。普見法門。如來藏身三昧之境。因陀羅網莊嚴法門。世界海漩。重重妙智。一時同得。爲一證一切證。一斷一切斷故。即自身之內。有十身諸佛刹海莊嚴。佛身之內。即自身之境。重重隱現十方世界。法爾如斯。猶如衆流。歸於大海。雖未入海。潤性無差。若入大海。皆同鹹味。一切衆生。亦復如是。迷之與悟。雖然有殊。本來佛海。元本不異。云何法華經中。娑婆之衆。有遙敬禮。以此事儀法則。與華嚴全別。只如法界品內。六千之衆。剎那十眼逾明。五百小童。一生十身咸證。餘衆皆爾。善財南詢諸友。佛果文殊慈氏已圓。復入普賢之身。海漩漩門總備。理事齊互。無法不彰。法界既處塵中。何得有遙敬禮。是故今言六千之衆發心別。十授聲聞遠記別者。爲法華之中。龍女雖復頓印法界無時之門。全彰佛果。三乘權學。雖有信順之心。餘風未殄。未能頓證。遠劫方登。故受遠記。不同華嚴。迷即處凡。悟即是佛。設有餘習。以佛知見而用治之。無

佛知見。但成折伏。不得入佛駛水之流。還經遠劫。方能入也。爲三乘之初心。信根下劣故。不能離縛。籠繫煩多。樂著生死。雖求出世。根器下劣。滯住退還。如來於是以生老病死。無常。不淨。剎那滅壞。念念不住。如是等觀。使令觀之。令生厭離。捨厭心成。心居淨穢。如來於化教之中。爲此根故。雖復勸修悲智。以求佛果。仍推淨土在於餘方。爲彼三乘見分未亡。見此娑婆恆常是穢。說因說果。破彼疑心。暫化令淨。卻攝神力。還當見穢。三乘教印。自有明文。則因斯無常觀智。習性難迴。龍女雖頓示佛乘。雖信未能即證。以是義故。法華會內。所受記別。皆蒙遠劫。法華漸引來歸。華嚴當時直授。發心即佛故。以此義故。行相不同。其此一部之經。同門有二。一乘如來乘。直至道場。如來乘者。即一乘也。如華嚴經賢首品云。一切世間群生類。鮮有欲求聲聞乘。求緣覺者轉復少。求大乘者甚希有。求大乘者猶爲易。能信此法甚爲難。又經云。若有諸衆生。其心饜沒者。爲說聲聞道。令離於衆苦。若復有衆生。其心少明利。爲說因緣法。令得辟支佛。若復有衆生。樂學慈悲心。廣饒益衆生。爲說菩薩道。若復有衆生。決定樂大事。轉無盡佛法。爲說一乘道。此乃華嚴經中。分四乘義也。如法華經

中。門前三駕。且示權門。露地白牛。方明正教。佛乘唯有一。無二亦無三。二。三門外之權宗。方明露地之實教。四乘契會。二教共同。施設化儀。各有差殊。又法華云。唯此一事實。餘二則非真。准此一文。似立三乘。論其契會。還成四法。唯此一事實者。即佛乘事實。餘二者。即菩薩大乘。通緣覺聲聞。是餘二。爲緣覺聲聞。厭苦相似故。足爲龜鏡。可以明鑑。二龍女一剎那之際。印三世性。又從凡夫即聖。不移毫分。此乃與善財童子。解行入道法門略同。善財一生成佛者。不離剎那際。證三世性。古今總齊。還與龍女一剎那際。轉身具行成佛。一時總畢。皆稱本法。法如是故。立時劫者。衆生情塵也。善財證此。名爲一生。爲三世時劫既盡。更有何生。故名爲一生。諸餘施設。十種不同。前已論訖。龍女轉身。善財不變。爲轉無所轉有異故。

大方廣佛新華嚴經合論卷第一終

大方廣佛新華嚴經合論卷第二

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

第八大集經。以守護正法爲宗者。爲此經。在於欲界上色界向下。安立寶坊。集諸人天上下二界天人魔梵。及八部鬼神龍等。及他方菩薩。皆就寶坊。諸鬼神等有不往者。四天王放熱鐵輪逐之。令往至佛所。如來悉敕令守護正法。衆魔王中。唯有一箇魔王。不順佛敕。待令衆生成佛盡。始當發菩提心。此下疑有關文。第九涅槃經。佛性爲宗者。與華嚴經。有十種別。一種同。其十種別者。一說法處所別。二境界莊嚴化報別。三大會來衆別。四所建法輪別。五所來之衆聞法別。六報土淨穢別。七佛身權實別。八出生滅度軌則別。九示教行相別。十從初爲友軌範別。一同者。如雪山有草。名曰肥膩。牛若食者。純得醍醐。無有青黃赤白黑色。一說法處所別者。涅槃經。在拘尸那國。阿利羅跋提河邊。娑羅雙

樹間說。華嚴經。在摩竭提國。菩提場中。寶菩提樹下說。故言說法處別。二境界莊嚴化報別者。如說此大涅槃經時。娑羅雙樹吉祥福地。縱廣二十二由旬。大眾充滿其間。無空缺處。爾時四方無邊衆菩薩。以其眷屬所坐之處。或如鍼鋒。或如錐頭微塵。十方如微塵等諸佛世界。諸大菩薩悉來集會。又文云。爾時三千大千世界。以佛神力故。地皆柔軟。無有丘墟。沙土礫石。荊棘毒草。衆寶莊嚴。猶如西方無量壽佛極樂世界。是大衆悉見十方如微塵等諸佛世界。如於明鏡。自觀己身。見諸佛土。亦復如是。又下文。娑羅雙樹。忽然變白。廣如經說。如說華嚴經時。有十蓮華藏世界海。又上下二十重。最下重中。略言一佛世界微塵數廣大國周圍。一一國。有十佛刹微塵數諸小國以爲眷屬。以上倍倍增。如是十蓮華藏世界中。金剛爲地。樹臺樓閣。殿堂池海。皆衆寶莊嚴。如經所說。如是我聞。一時佛在摩竭提國。阿蘭若法。菩提場中。始成正覺。其地堅固。金剛所成。上妙寶輪。及衆寶華。清淨摩尼。以爲嚴飾。諸色相海。無邊顯現。如是已下。直至一切佛土不思議劫所有莊嚴。悉皆含容顯現。中間兩紙已來經。是歎佛境界所有莊嚴。又下文華藏世界品廣說。如此莊嚴。即是如來自身實報之所莊嚴。非

如此涅槃經中。以佛神力。爲衆生故。暫化令淨。所以然者。爲此涅槃經來衆。三乘根衆雜故。若不以佛神力持。無由自見。如華嚴中。一乘根純。無有雜衆。如聲聞爲根別故。在其會內元來不見。經中雖然還有以佛神力。下文還有法如是力。所言神者。應眞曰神。非同實是凡夫。加令暫見。名之曰神。當知華藏莊嚴。本明實報。涅槃神力。暫爾權施。又涅槃經。推佛淨土在於西方。過三十二恆河沙佛土之外。不在此處故。即明知是化。非爲實故。三大會來衆別者。說此大涅槃經。所有來衆。總是人天種性。三乘之衆同來。除諸大菩薩衆。餘者皆是憶念如來。涕淚盈目。荷奉香薪。嗟苦悲哀。戀承佛日。皆是如是等衆。即是宜堪聞佛滅度之衆。除諸一乘菩薩入佛智等衆。餘皆例然。華嚴經所來之衆。皆性智海中。佛果位內。諸菩薩衆。純是一乘。更無別種。人天神衆。皆悉同根。入佛智流。具佛知見。初會之中。十佛世界微塵等諸菩薩衆。皆從如來善根海生。善根海者。即是如來法身智海大智所生。一切諸佛。以法身根本智。以爲根本所生。若不如是。所有行門。總屬有爲。如此之衆。從初發心。入佛智海。寄治十信。十住。十行。十迴向。十地。等覺。六位。淺深行相。差別不同。涅槃三乘同攝。

人天善種同來至會。華嚴經三乘之衆。不露其會。設在會內。如聾不聞。當知涅槃會三乘菩薩聲聞人天等衆。不同華嚴。此是一乘位中菩薩衆也。初發心位。階同佛位。入佛智流。同佛知見。爲眞佛子也。四所建法輪主伴別者。涅槃經勸請之首。即是迦葉菩薩。文殊師利菩薩。師子吼菩薩。舍利弗等。爲法軌度勸請之首。魔王波旬。勸請如來入般涅槃。如華嚴經建法之首。即是普賢。文殊。覺首。法慧。功德林。金剛幢。金剛藏等。如是十首。十慧。十林。十幢。十藏。佛果位內大菩薩等。建立五位佛果之行相法門故。以諸位即佛。佛即諸位。明位位中有佛果故。如華嚴經。所有建立法度問答諸菩薩。皆是十方此土諸菩薩衆。盡是神洞眞源。智齊法界。十方應現。不來而到。不去而至。稱法性之施設。非往來之所致。纖塵之內。乃有無盡身雲。微毫之中。顯現難思相海。十方法界。一切皆然。一切處。忽然而有。無所從來。忽爾而無。無所從去。於一切處。一切時。於有情身相境界。山河大海。十方虛空。示現色像。有無自在。無盡重重。如是皆是大菩薩衆。是故不同涅槃經中。迦葉菩薩。聲聞舍利弗。生在人家。示同凡位。引彼三乘之種。見佛涅槃。而生悲感。涕流盈目。而來集會。五所來之衆聞

法別者。此涅槃經。爲諸聲聞三乘。權教菩薩。行諸觀行。未離執障。樂著諸行。執持行相。於此行相。迷無作法身。無證無修。本來自體也。以行修生修顯。建立菩提涅槃。能所等證。如來爲此根故。於此涅槃經。說諸行無常。是生滅法。生滅滅已。寂滅爲樂。所行善行。及能證菩提。是生法故。所證涅槃。是滅法故。既心存能所。生滅不休。以生滅不休。便滯真理。今此涅槃經中。故說諸行。及能證菩提。所證涅槃。二俱滅故。方應真理。故說諸行無常。是生滅法。生滅滅已。寂滅爲樂。是故如來隱身不現。及諸能所心盡。名大涅槃。二乘涅槃。可有能所。有修有證。是故名爲有爲無漏。是故如來涅槃無有能所。是故涅槃經中。純陀向文殊師利菩薩言。莫謂如來。同於諸行。復次文殊師利。爲知而說。不知而說。而言如來同於諸行。若言如來同於諸行。則不得言於三界中。爲人天中自在法王。是故大般涅槃。令彼三乘。令知諸行菩提。能證所證涅槃。悉是無常。生者本無。不證諸滅。無行無修。名大涅槃。是名圓寂。是故涅槃經。令諸三乘樂著行者。離行離修。有所證者。令行無證無修。如華嚴經。所有他方來衆。此土人天。霑其會位。從始發心。即達理事自在。理行無礙。文殊理。普賢行。一

時頓印。如印印泥。一時頓印。無有先後中間等。皆依本法。法爾如然。若存始終因果先後。皆是凡情。皆是生滅。有成有壞。皆是隨根破繫。不關成佛正宗。諸教引生之門。皆入華嚴理智果海。方爲契當。教門明著。龜鏡宛然。宜可徧攬經文。觀智隨照。豁然開悟。智日雲披。頓陟妙峰。俄登智海。凡聖二見。因定水而滌除。悲智二門。以法身而方現。此華嚴經。直爲最上大心者說。如將寶位。直授凡庸。如夜夢千秋。覺已隨滅。如涅槃經所說。雪山有草。名曰肥膩。牛若食者。純得醍醐。無有青黃赤白黑色。最上大心衆生。亦復如是。頓見佛性。便成正覺。不從小位。漸漸而來。是故今言來衆聞法別。以涅槃經。攝末從體。未論智慈眞俗。並用無礙。六報土淨穢所居別者。涅槃經。佛報土。指在西方。過三十二恆河沙佛土。有釋迦報土。爲三乘權學。垢淨未亡。見此娑婆。穢惡不淨。如來於是權指報土在於西方。華嚴實教法門。即此娑婆世界清淨無垢。十方世界清淨無瑕。爲實教菩薩。垢淨盡故。境界純淨。權教菩薩。無垢淨處。自見穢故。故指報土在於西方。七佛身權實別者。如涅槃經中。三十二相如來是權。涅槃圓寂眞理是實。爲一切報相無量莊嚴。皆依眞而有故。如華嚴經。毘盧遮那佛。三

十二相入涅槃佛。俱實。理事無二。不壞法身而隨相海。無量無盡。即相即性。即報即理。如光如影。自在無礙。且略明權實。廣待下文。八出生滅度現相別者。此涅槃經。爲諸人天聲聞緣覺二乘之人。施設從兜率天降神受生。及入涅槃。八相成道。亦爲諸大乘菩薩。說不從兜率天降神母胎。說常樂我淨。無始無終。不生不滅。然且隱身不現。仍推報土在於西方。去此三十二恆沙佛土之外。有釋迦報土。以此娑婆。即爲化土穢境。有此事別。引彼權根。華嚴經即不然。直示本身本法。出超情見。無始無終。三世相絕。一圓真報。不生不滅。不常不斷。性相無礙。自在果海法門。直受上上根人。教門行相。勢分如是。不同權學。依次第漸漸而成。只如登峰九仞。不可以絕其蹤。履十層之級者。不可以亡其跡。常見官階一品。但以爲臣。聞古士夫。忽有身登九五。明珠頓照。普見無方。澤霖大海。滴滴皆滿。一塵空性。法界無差。品類有情。強生留繫。根器不等。權實不同。以此教門。千差萬別。須知權實。識假修真。不可久滯權宗。迷其實教者也。九示教行相別者。如涅槃經。十住菩薩。於如來性品中說。菩薩位階十地。尚不了了知見佛性。即從凡夫十信心後。十住之位。少分而見如來之性。安立十

住。十行。十迴向。十地階降。漸漸而修。等覺位中。方明果行。圓滿妙覺之位。方是如來。亦說雪山有草。名曰肥膩。牛若食者。純得醍醐。無有青黃赤白黑色。亦復說此頓成之教。當知此經。還有五乘六乘。七八九十乘等。法門種性。又此經中。除聲聞乘。緣覺乘外。有三種菩薩乘。通彼二乘。爲五乘也。并取人天五戒十善。即爲六乘七乘故。又三乘之人同聞。各得自法。互參有九乘。其三種乘。行相云何。一修無我法門乘。二從十住至十地。漸見佛性乘。三如雪山肥膩草。牛若食者。純得醍醐乘。不從乳酪生熟酥等。漸漸方成。如如來性品中說。菩薩摩訶薩既見性已。咸作是言。甚奇世尊。我等流轉無量生死。常爲無我之所惑亂。即是法華華嚴經中說。有諸菩薩經無量劫。修六波羅蜜。得六神通。讀誦通利八萬四千法藏。猶故不信此深經典。是其例也。所得神通。不依性起。爲修衆善。及無我等觀。報勝諸天。又如北鬱單越人。先世亦修無我所觀。報生彼國。壽千年。衣食自然。粳米七寸。火珠熟之。香所及處。皆來共食。無有佛法。不得解脫。皆是過去行解訛謬。故致斯咎。令其所得。永不得亡。如此涅槃經。都會人天外道三乘差別。畢竟皆歸佛性。涅槃圓寂。無性眞理。未示報相。無有自他圓

該。理事智用。無礙重重。仍立自他淨穢等別。故說釋迦報土。過西方三十二恆河沙之刹。由根未全堪。教從根設。引彼三乘。有繫真障。佛性圓寂。眞如理門。未得示相重重。礙諸有見。便生惑著。便障法身。如是涅槃經中。十地後佛果法門。乃是華嚴經中。十住初心之所見處。即雪山之草。名爲肥膩。牛若食者。純得醍醐。無有青黃赤白黑色。如華嚴經中。十住菩薩。初心見道。頓見自他無始無終。無古無今。本來是佛。身心性相。本是佛故。以此佛門以爲解脫。乘如來乘。直至道場。龍女。善財。一萬諸龍。八千之衆。總是。六千比丘。五百優婆塞。五百優婆夷。五百童子。五百童女。都爲八千。頓彰五位。總齊佛果理智之門。初住即十地。初住即佛位。若初住不即佛位者。如世卿臣。從初九品。至階一品。但得爲臣。不得名王。若不名王者。當知權教。安立五位諸地次第。一一而登。至三祇之滿劫。但爲菩薩。不名佛乘。不名爲乘如來乘。直至道場。但爲修無我觀。悲勝二乘。不見佛性。名爲菩薩。若少見性者。亦得佛乘。如大海中。一毫之滴。乃至多滴。一一滴中。皆得大海。如是菩薩五位之中。十住十地一一位內。皆有佛果。如彼海水一毫之滴。不離佛性行諸行故。以彼佛性而有進修。

如華嚴經。直以佛全果不動智等十智如來。示凡信修。如有凡夫頓昇寶位。身持王位。徧知臣正。一切群品。無不該含。華嚴經中法門。菩薩行相。亦復如是。從初發心十住之始。頓見如是如來法身佛性無作智果。徧行普賢一切萬行。隨緣不滯。悉皆無作。涅槃經云。佛性非是作法。但爲客塵煩惱所覆故。是故今從十住初位。以無作三昧。自體應真。煩惱客塵。全無體性。唯真體用。無貪嗔癡。任運即佛故。一念相應。一念成佛。一日相應。一日成佛。何須劫數。漸漸而修。多劫積修。三祇至果。心緣劫量。見障何休。諸佛法門。本非時攝。計時立劫。非是佛乘。十從初爲友軌範別者。如涅槃中。說雪山童子。遇羅刹而發心。重半偈而輕命。聞諸行無常。是生滅法。生滅滅已。寂滅爲樂。言佛性涅槃。不可以行修。不可以心證。爲不可以行修。行是有爲。是無常故。不可以心證。有能所故。是故行不可以修其性。心不可以證其理。爲心即性。更無能所故。是故純陀言。莫謂如來同於諸行。如華嚴經。善財童子。所立軌範。從文殊師利發菩提心。至末後普賢菩薩。五十三善知識。一一皆云。我先發阿耨多羅三藐三菩提心。云何教我學菩薩道。行菩薩行。不云諸行無常等事。何以故。爲此華嚴經。明緣起

法界門。理事無二。無緣不寂。無事不真。十方世界。一真性海。大智圓周。爲國土境界。總爲性海。爲一真法界。非有情無情。隨業說故。爲華嚴中。純真境界。總爲智故。十住菩薩。以慧爲國。十行菩薩。以智爲國。十迴向十地。以妙爲國。不說情與無情二見差別。以華嚴經爲彰本法。異三乘權學教故。是無情。是有情。有生有滅故。是故涅槃經中。以雪山童子。說諸行無常者。爲三乘根種性行下劣故。佛令以行調柔。折伏麤惡。方堪入道。便於所說。計行成實。障無作性。廢契真理。以是義故。說諸行無常。能證所證。亦是生滅法。不同善財。一念發心。頓無能所。了三世性。性絕古今。自覺自心。本來是佛。不成正覺。不證菩提。身心性相。無證修者。不成不壞。本來如是。隨緣動寂。不壞有無。所行諸行。皆唯智起。是故不說諸行無常。一同者。如涅槃經中。雪山有肥膩草喻。又如光明徧照高貴德王菩薩品說。一切衆生。皆有佛性。佛法衆僧。無有差別。三寶性相。常樂我淨。一切諸佛。無有畢竟入於涅槃。華嚴經云。如來不出世。亦無有涅槃。如涅槃中訶二乘曲見。佛從兜率天宮降神處胎。如是八相成道。皆爲曲見。即如華嚴經。智入三世而無來往。十方諸佛。以無古今性。成大菩提。

一念見道。古今見盡。新故總無。還同已前億千劫佛。不可說劫佛。一時成佛。亦與未來不可說劫佛。一時成佛。以自證見三世無時故。以無時即無去來。設使衆生。不自見知自己身心。本來正覺。自己身心。正覺全德。本無有滅。設有衆生。若自見知自己身心。本來正覺。於自正覺。本來無生。本如是故。本無能覺所覺者故。若有覺者。還如是覺。本無能覺及以所覺者故。如是本覺佛之境界。無凡無聖。無定無亂。不修不證。不智不愚。不生不滅。三乘權教。爲下劣者說。上根引來。至此華嚴實教。頓授佛門。涅槃經。雖說佛性法身理。與華嚴共同。所說報土。佛身及相。智用全別。如前十門准知。只如法華涅槃兩部之教。雖化佛所爲。皆欲令彼二乘。及人天種類。成就一乘之法。是故法華經中。破三乘遠繫故。令龍女以其本法。剎那之際便得菩提。涅槃經。破闍提之人無佛性故。令屠兒廣額。賢劫之中而成正覺。又雪山肥膩草。牛若食者。純得醍醐。不作乳酥。方成妙藥。一下直頓。體不變移。如彼龍女所得之果。此法華涅槃二部之教。勢分大意。皆令三乘捨權入實。成就法界一實真門。自餘諸教。並皆方便設有。但論理事。少分而談。於中事宜。不能全具。唯是華嚴法界。毘盧遮那根本佛門。

理事性相。輪圓具足。諸餘漸學。究竟總歸。時諸學者。隨路流滯。隨於權教中。繫著。多劫方迴。種性下愚。自生艱難。非是聖旨。故致如斯。問曰。如涅槃經中。屠兒廣額。賢劫之中而成正覺者。如佛所說賢劫之中。千佛出世。於中定數。教有明文。更著廣額一人。千數有剩。云何數內重成佛耶。答曰。三乘權學。繫未亡者。重成不得。至其體達。三世盡劫佛。皆總一時同成正覺。本無先後。無妨無礙。爲法本體。性無時故。凡情橫繫。妄作時生妄見網中。見佛出世。而實諸佛。應真會本。無出無沒。是故華嚴經云。諸佛不出世。亦無有涅槃。諸佛但自體合應真。任性圓寂。稱性緣起。對現色身。無來無去。無造作故。

第十大方廣佛華嚴經者。即以此經。名根本佛乘爲宗。又以因圓果滿。法界理事。自在緣起無礙爲宗。爲此經名大方廣佛華嚴經。還以佛乘爲宗。此經說毘盧遮那自體智悲果德。普示衆生。還令大心衆生。信佛果德。用成因位。既生信已。還修理智萬行大悲果德。用成初證。初發心時。便成正覺。理行雙修。使體用自在。不一理。不孤行。除其偏見。此經有十種甚深廣大無比法。與諸經別。一。是一切諸佛自體根本理智大悲法界圓滿無限之乘。非是三乘權施設故。甚深

廣大無比。二。佛身即是法報本身。無量相海之所莊嚴。一一毛孔。含容法界。一切境界。重重無盡。甚深廣大無比。三。此經說一切諸佛本報國土。十蓮華藏世界海。一一蓮華藏。最下世界。皆有十佛世界微塵數廣大刹。清淨莊嚴。一一廣大刹。復有十佛世界微塵數諸小刹。眷屬圍遶。已上倍倍增廣。一一華藏世界。皆滿虛空。互相徹入。重重無盡。甚深廣大無比。四。此經說有菩提樹。金剛爲身。琉璃爲幹。枝條雜寶所成。寶華雜色。摩尼爲果。與華間列。高逾十萬。金剛藏菩薩身中所現菩提樹。其莖周圍。如十萬三千大千世界。高百萬三千大千世界。枝條廣狹。與樹相稱。廣大無比。五。此經說普光明殿。包含法界。衆妙寶飾。光影重重。衆寶樓閣臺榭階砌莊嚴。皆光映徹。徧周法界。廣大無比。六。此經有一切處文殊師利。一切處普賢菩薩。體用相徹。充滿法界。理事無礙。纖塵之內。行海無盡。甚深廣大無比。七。此經有如來於剎那際。從兜率天。降神母胎。成佛說法。化終涅槃。然不廢報身常居。菩薩衆海。充徧十方。無盡身雲。皆眞金色。目髮紺青。身色光明。互相照徹。如是衆海。皆齊法界。十方無間。無有纖塵空缺之處。體相徹入。色像重重。無妨無礙。隨所宜堪。對現色身。令

諸衆生發菩提心。而無失時。如是衆海。廣大無比。八。此經若有大心衆生。於此法門。深生信心。不讀餘經。深明體用。以少方便。疾得菩提。初發心時。十住之首。位齊佛果。如來出現品中所說云。設有菩薩。於無量百千那由他劫。行六波羅蜜。修習種種菩提分法。若未聞此如來不思議大威德法門。或時聞已。不信不解。不順不入。名爲假名菩薩。以不能生如來家故。若得聞此如來無量不可思議無障無礙智慧法門。聞已信解。隨順悟入。當知此人。生如來家。隨順一切如來境界。又下文。佛子。菩薩摩訶薩。成就如是功德。少作功力。得無師智。自然智。又普賢菩薩言。見佛聞法。不生信者。亦成解脫智種。如食少金剛等喻。廣如經說。此經有如是大威德不思議法門。超諸三乘。廣大無比。九。此經有表法之首。善財童子。不離一念。而經一生。不離一處。徧至十方。經歷五十三善知識。得一百一十城之法門。一一菩薩法門。諸藝行相。身色形貌。攝生之軌。皆齊法界。具足無盡廣大行門。不離一生。便成正覺。更無始終前後之際。即廣大如法界。究竟如虛空。如是廣大無比。十。此經有十佛境界。十無盡法門。十智。十地。十身。十眼。十耳。十鼻。十辯。十寶山王。十龍王。十剎塵。十海。

一一各具十不可說境界。譬喻無盡法門。廣大無比。又此經有十種德。一。如大海。衆流所歸。諸流入已。隨即廣大。皆同海德。此經亦爾。若有衆生。能生信入者。即同如來性海智海果德。二。如世間一切井泉。以海爲體。若人飲者。皆得海味。一體無異。但隨業力而得鹹味。此經亦爾。若有大心衆生。聞持信入。便得如來法身佛性大悲智味。闡提之人。無所堪任。然如來智性。尙作生因。三。猶如大海。有四寶珠。一名積集。二名無盡寶藏。三名遠離熾然。四名具足莊嚴。此四寶珠。一切凡夫諸龍神等。所不能見。此經亦爾。一切二乘。及權教菩薩。行六波羅蜜。未迴心者。所不能見。唯除最上佛乘。大心衆生。能見此經。而生信入。自見自心。同佛知見。大智之寶。此如來出現品中說云。此諸衆生。云何具有如來智慧。愚癡迷惑。不知不見。我教以聖道。令其永離妄想執著。於自身中。得見如來廣大智慧。與佛無異。四者。猶如大海。一切諸龍魚等。同在海中。而有出生。此經亦爾。能說一切衆生心海。一念之中。有無量諸佛。於諸衆生心海而興出世。成等正覺。如此經如來出現品云。佛子。菩薩摩訶薩。應知自心。念念常有佛。成等正覺。何以故。諸佛如來。不離此心。成正覺故。如自心然。

一切衆生心。亦復如是。五。猶如大海。能受大雨。無量大雨。一時滯入。若水及海。皆同海味。無有前後。此經亦爾。爲此經說。十住初發心時。便成正覺。同得如來一切智味。經云。以少方便。疾得菩提。如善財龍女等。是其人也。六。猶如大海。大身衆生之所都止。此經亦爾。最上大心衆生之所都止。澤沼之龍。不樂其居。七。此經猶如大海。不宿死屍。此經亦爾。若有見聞信樂而能悟入。永離凡夫權學闡提死屍。直同如來法身智海。八。此經猶如大海。潮無失時。此經亦爾。若有衆生根堪聞者。即得聞之。隨其樂欲。即得聞之。五乘法化。而無失時。如來出現品云。佛子。如來音聲。亦復如是。無生無作。無有分別。非入非出。但從如來功德法力。出於五種廣大音聲。其五者何。一曰。汝等當知。一切衆生諸行。皆悉是苦。地獄苦。畜生苦。餓鬼苦。無福德著我所苦。作諸惡行苦。欲生人天。當修善根。生人天中。離諸難處。衆生聞已。捨離顛倒。修諸善行。離諸難處。生人天中。二曰。汝等當知。一切諸行。衆苦熾然。如熱鐵丸。諸行無常。是磨滅法。涅槃是寂靜無爲安樂。遠離熾然。消諸熱惱。衆生聞已。勤修善法。於聲聞乘。得隨順音聲忍。此是聲聞乘。三曰。汝等當知。聲聞乘者。

隨他語解。智慧狹劣。更有上乘。名獨覺乘。悟不由他。汝等應學。樂勝道者。聞此音已。捨聲聞道。修獨覺乘。四曰。汝等當知。過二乘位。更有勝道。名爲大乘。菩薩所行。順六波羅蜜。不斷菩薩行。不捨菩提心。處無量生死。而不疲厭。過於二乘。名爲大乘。此是菩薩大乘。五曰。第一乘。勝乘。最勝乘。上乘。無上乘。利益一切衆生乘。若有衆生。信解廣大。諸根猛利。宿種善根。爲諸如來神力所加。有勝樂欲希求佛果者。聞此音已。發菩提心。此是佛乘。佛子。如來音聲。不從身出。不從心出。而能利益無量衆生。佛子。是爲如來音聲第一相。當知如來音聲。常隨五乘衆生應所聞故。猶如大海。潮無失時故。九。此經猶如大海。體無作用。以因緣故。而生四大寶珠。於此四寶。能生一切諸珍寶等。若無此四寶。一切諸寶無所生得。四寶名前已說訖。此經亦爾。而悉能演說如來一性清淨海。一切衆生而共有之。而如來隨衆緣。起四大智。四無量心。而能出生一切法門。利安衆生。無所乏求。無量道寶。於此性海。若無四智四無量心。設有聖果。皆隨聲聞緣覺二乘之行。於性海雖能成就四智四無量心。無量法寶。如彼性海。都無作者。以無得無證。法如是故。十。猶如大海。以清淨德。而能影

現七金山。須彌寶山。四天王等。所有莊嚴。莫不於中分明顯現。此經亦爾。具說如來法身性海。具德莊嚴。十佛身。十蓮華藏。五位。十智。十波羅蜜。十定。十通。十忍。因果報得。諸道品法。莫不分明顯現其事。此經大體。以性起大智法界爲體用。於性起大智法界體用門。安立諸地差別化生之法。是故於此法中起信。發大菩提心。十住初首。便即見性起法身佛智慧。便成正覺。然始即從性起智慧之位。行諸行相。教化衆生。即覺行圓滿佛。不同權教。先行菩薩行。學假真如等觀。地前伏忍。十地已來。猶有十真如障故。爲觀當情。真如成障。所行之行。並是有爲。所發菩提心。並未離生滅。所有能斷分別無明。由觀折伏。十地之位。方能見性。經三祇劫。方始成佛。仍須百劫。別修相好。若將此大方廣佛華嚴經。佛所本乘。同彼化身。引彼權學。上中下流。全非信解。去佛懸遠。未解經意。久大曠劫。終無成佛之期。若上上根人。信解此經。明知不謬。即當乘如來乘。直至道場。當所乘時。即是道場。更無可至。如法華經。亦是佛乘。即是化佛。引彼三乘。令知實法。即三界火宅。門前三乘。羊車。鹿車。大牛之車。即是上中下根三乘。爲上根之人。有一分慈悲故。勝餘二乘故。爲觀假故。

未有實見。名爲不眞菩薩。此三種上中下根之人。俱有惡三界苦。中下根人。聲聞緣覺。惡而求出。上根菩薩。厭而不離。爲慈悲勝彼二乘故。有饒益之心。此三種人。俱不知三界體相。一眞佛境。如出現品中廣明。佛對此故。說佛所有功德報相。皆是修生。令諸權學。修治作意。經多祇劫。終無成佛之期。是故門前之駕。是佛權施。露地白牛。方明法界。法界性相。本唯眞智。所有分別。皆是智爲。是故法華經云。種種性相義我及十方佛。乃能知是事。聲聞及緣覺。不退諸菩薩。皆悉不能知。此等即是門前三乘也。爲未明世間相常住。是法住法位。爲三乘同有厭苦集。樂修滅道之心。未明苦集。本唯智起。不了滅道。本自無修。無造無作。化諸群品。如幻住世。性絕無明。即是佛故。一念相應。一念佛。一日相應。一日佛。何須苦死要三僧祇。但自了三界業。能空業處。任連接生。即是佛也。何須變易。方言成佛。龍天變易。豈爲佛耶。三乘之人亦變易。何故待三僧祇。佛方成故。十地之上。方能見性。是故經云。若以色性大神力。而欲望見調御士。彼即瞽目顛倒見。彼爲不識最勝法。佛者覺也。覺業性眞。業無生滅。無得無證。不出不沒。性無變化。本來如是。即是佛故。隨緣六道。行菩薩行。

變化神通。接引迷流。佛非變化。淨名經云。雖成正覺。轉於法輪。不捨菩薩之道。是菩薩行故。以此善財十住初心。於妙峰山上。德雲比丘所。得憶念一切諸佛境界智慧光明普見法門。即便成正覺。然後始詣諸友。求菩薩道。行菩薩行。當知正覺體用之時。即心無作處即是佛故。不須修行。設當行滿。亦不移今故。如化佛示成化相之時。苦行麻麥。剃髮持衣。捨諸飾好。藉草等事。爲化外道樂苦行者。及三乘之根有放逸者。經中佛已和會。非佛自須如是等行。無增上慢者。豈須如是。一念任無作性。佛智慧現前。無得無證。即是佛也。還如善財證覺之後。方求菩薩道。行菩薩行。何以然者。爲覺道之後。方堪入纏。處纏無縛。始能爲衆生說法解縛。若自有縛。能解彼縛。無有是處。說時前後。法是一時。是故當知。若欲行菩薩行。先成正覺。是故善財十住初首。於妙峰山頂。此像須彌山頂上。說十住法門。德雲比丘所。得憶念一切諸佛境界智慧光明普見法門。解云。以處表法者。爲至法之際。無相可得。如上高山。至相盡處故。以無相性。能現色身。無心性中。知見自在。觀機攝益。名之爲妙。善害煩惱。名之曰峰。具足知見。出過情境。智逾高遠。不動爲山。釋法門者。憶念者。常無念也。一

切諸佛境界者。無念。即無內外中間。無內外中間故。即佛憶念境界也。智慧光明者。應物觀根。名之曰智。簡機權實。名之曰慧。應機破惑。名之曰光。心垢解脫。名之曰明。法眼遐明。等衆生界。名之曰普。恆無所得。名之曰見。創證斯理。名之曰法門。此一門之中。悲智齊足。具差別智。入俗接凡。一如善財所行軌範。從初住位。與佛齊光。等覺位中。行唯卑下。始同人庶童女童男。不閑教跡。虛相誹毀。達心明體。龜鏡宛然。問曰。法華經爲佛乘。門前三乘大牛車。與露地白牛之車。一種是牛。有何異也。答曰。門前三乘。對三界苦。且令離火宅所燒。權免火難。非云成佛。爲權教菩薩。樂行悲心。有饒益志。自離火難。不離三界。有一分度衆生心。勝二乘自求解脫故。且得一分運載之心。名爲大牛。望二乘處大故。十地見性。方成佛故。猶經多劫。始能眞故。望彼二乘。但名菩薩大乘。非名佛乘。法華經云。佛乘唯一。無二亦無三。即引彼三乘。總歸一乘。猶說小乘遠成佛記。爲雖有信許成佛。迴習稍難。故標遠劫。龍女剎那之頃。便至佛乘。即明眞證。達苦即眞。無所厭故。是故門前之乘。對三乘設。露地白牛。方明至無依之處。露地者。即佛地也。爲佛智無依止故。故云露地。白牛者。

即法身也。悲智也。以法身無相。名之爲白。智能觀機。悲心濟物。名之爲牛。爲取牛能運載故。爲以無作法身悲智濟物故。喻同牛也。以濟益名之曰牛。門前之牛。何異此牛。爲門前之牛。觀空增勝。破三界苦處。且有一分慈悲。離一分羶三業苦。三祇未滿。未見佛性。不證法身根本智。不言白色。不言露地。爲假眞如。及空觀當情。猶有所依故。不言白色也。有所依故。不言露地也。今諸子馳走。雖至露地。同索三車。羊車鹿車大牛之車者。明三乘人。出三界苦。且免火難。雖復迴心信此一乘。至於佛地猶將未及。爲三乘習氣未亡故。但隨佛語而隨信之。猶心未成堅信故。還索三乘。未敢欣大故。佛便誘引。令成信力。等與大車。故言非己所望。今皆與之。此明即三乘迴心。如門前牛車。不云白色。不云裝飾。爲有漏故。且得一分勝人天樂。未得無作智身。功德勝妙樂故。不同露地白牛之乘。具言裝飾高廣等事。此乃門前。與露地之乘。全別不同。諸有餘意。下文更明。是故法華經。是會權入實。此華嚴經。即諸佛根本所乘。又彼經龍女所表。此經善財所彰。和會善財龍女行相。下文廣明。佛之意者。化彼三權。咸歸此實。故此經名爲一切智根本佛乘。

大方廣佛新華嚴經合論卷第二終

大方廣佛新華嚴經合論卷第三

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

第二明依宗教別

夫大覺出興。稱眞智而自在。法身無際。等群品以同軀。任器現形。應根施設。如空谷響。應擊成音。谷響無心。亦無處所。但以隨緣。而能普應。如來設教。亦復如是。稱自根緣。得自心之法。隨根增廣而成熟之。示無常宗。而成立教。對病施藥。病痊藥除。一念之間。雨無量法。稱周法界。對現色身。法既無窮。宗教無盡。無前後際。普備諸根。但爲衆生。自分前後。且如毘盧遮那之教。無始無終。稱性無方。無斷無絕。隨其根類。自見入胎。出家說法。始終教行。入寂涅槃。其實如來本不如是。即法華經亦說。吾從成佛已來。經無量阿僧祇劫。以性海圓智。一念即無量劫也。如是圓智。何有前後者焉。此經云。入剎那際三

昧。示現初生涅槃。又如此經中。兜率天子。三生十地。第二生上。猶從惡道中來。蒙光照身。生於兜率天上。得離垢三昧。便見如來。住金剛寶地。化大菩薩。在閻浮提。始入母胎。又法華經云。衆生見劫盡。大火所燒時。我此土安穩。有向前後教之差別也。但隨一期同而且異。約立先德十家之教行也。約爲軌範。餘可准知。第一後魏菩提留支。立一音教。第二陳朝真諦三藏。立二教同時。第三後魏光統律師。立三種教。第四齊朝大衍法師。立四種教。第五護身法師。立五種教。第六陳朝南嶽思禪師。智者等。立四教同時。第七唐朝海東新羅國元曉法師。造此經疏。亦立四教。第八唐朝吉藏法師。立三種教。第九梁朝光宅寺雲法師。立四教。第十唐朝江南印法師。立二教。

第一後魏菩提留支。立一音教者。謂一切聖教。唯是如來一圓音教。但隨根異故。種種差殊。如經。一雨所潤等。經云。佛以一音演說法。衆生隨類各得解。第二陳朝真諦三藏。立二教者。謂一漸。二頓。約漸悟菩薩。大由小起。所設具有三乘之教。名爲漸。即涅槃等經。若約直往頓機。大不由小起。所設教唯菩薩乘。是故名爲頓。即華嚴經是。大遠法師。亦同此說。

第三後魏光統律師。承習佛陀三藏。立三教者。一漸。二頓。三圓。光師釋意。一爲根熟之輩。於一法中。具足演說一切法。謂常與無常。空不空等教。一切具說。更無漸次。故名爲頓。二爲上達之人。分契佛境者。說於如來解脫無礙。究竟果德圓極祕密自在法門。故名圓教。於二教之上。分爲三教。

第四齊朝大衍法師。立四教者。一因緣教。謂小乘薩婆多等部。二假名教。謂成實論。及經部等。三不實教。謂般若說即空理。明一切不實等。四眞宗教。謂華嚴涅槃。法界眞理性等。

第五護身法師。立五教者。謂於前等四教內。眞如佛性。以爲眞教。即涅槃經是。第五法界教。即華嚴明法界自在無礙門是。

第六陳朝南嶽思禪師。智者禪師等。立四教。一三藏教。亦名小乘教。如法華經云。不得親近小乘三藏學者。智論中。小乘爲三藏。大乘爲摩訶衍藏。二名通教。亦名漸教。謂大乘經中。通說二乘。通備三根。又如大品經中。乾慧地等。通三乘者是。三名別教。亦名頓教。謂頓說大乘。經中所說法門道理。不通小乘者是也。四謂圓教。亦名祕密教。說法界自在具足圓滿。一即一切。一切即一。

無礙法門。華嚴法華經等是也。

第七唐朝海東新羅國元曉法師。造此經疏。亦立四教。一二三乘別教。謂如四諦教。緣起經等。一二三乘通教。謂如般若教。深密經等。三三乘分教。如瓔珞經。及梵網等經。四一乘滿教。謂如華嚴經。普賢教。釋四別如彼疏中。

第八唐朝吉藏法師。立三種教。謂三輪。一根本法輪。即華嚴經。最初說。二支末法輪。即三乘等。於後所說。三攝末歸本法輪。法華經。四十年後說。迴三入一之教。

第九梁朝光宅寺雲法師。立四教者。謂如法華經中。臨門三車。即爲三乘。四衢道中所授大白牛車。爲第四乘。以臨門牛車。亦同羊鹿。俱不得故。若不爾。長者宅內引諸子時。云此三車指在門外。諸子出宅。即合得車。如何出已。索本所指之車而不得故。後更索耶。故知是權。同於羊鹿也。以是大乘權教。方便說故。具釋如彼法華疏中。

第十唐朝江南印法師。立二教。一釋迦經。名屈曲教。以遂機性。隨計說故。二華嚴經。盧舍那十身等教。彼法師立二教。略有四別。一主別。謂彼釋迦化身

所說。此是舍那十身所說。二處別。謂彼說娑婆世界。木樹草座上所說。此經於蓮華藏世界。寶樹金座上所說。三衆別。謂彼與聲聞及菩薩說。此唯菩薩極位同說。四說別。謂彼但是當方所說。此要論十方同說。一如華嚴經中說。

已上十家所釋。並依今唐朝吉藏法師所集。同異各是一家。並是當世英才。智超群品。皆爲統賢靈之法將。開佛日之明燈。不可是非加其名也。但知仰敬其高旨。只如思智二德。位已昇堂。雲公演法。雨華庭下。悟靈山於即夕。法眼逾明。登果位於今辰。道齊遐古。只如佛說內外中間之言。遂即入定。後有五百阿羅漢。各解此言。佛出定後。同問世尊。誰當佛意。佛言。並非我意。諸人問佛。既不當佛意。將無得罪。佛言。雖非我意。各順正理。堪爲聖教。有福無罪。況此諸德所說。各有典據。然今唐朝藏法師。承習儼法師爲門人。立教深有道理。亦可敘其指趣。一小乘教。二大乘始教。三終教。四頓教。五圓教。初小乘可知。二始教者。深密經中。立第三時教。同許定性二乘。俱不成佛故。今會總爲一教。此說未盡大乘法理。是故立爲大乘始教。三終教者。定性二乘無佛性者。及闡提。悉當成佛。猶未盡大乘至極之說。立爲終教。然上始終二教。並依地位漸次修成。

俱爲漸教。四頓教者。但一念不生。即名爲佛。不從地位漸次而說。故立爲頓教。如思益經。得諸法正性者。不從一地至一地。楞伽經云。初地即八地。乃至無所有。有何等次。又下十地品中。十地猶如空中鳥跡。豈有差別可得。具如諸法無行經等說。五圓教者。一位即一切位。一切位即一位。故十信滿心。即攝六位。成正覺等。依普賢法界。帝網重重。主伴具足。故名圓教。如此經等說。藏法師作如是和會。又西域戒賢法師。遠承彌勒無著。近踵護法難陀。依深密經。瑜伽等論。立三種教。謂佛初鹿園。說小乘法。雖說生空。猶未說法空真理。以非了義。即四阿含等經是。第二時中。雖依偏計所執自性。說諸法空。然猶未說依他圓成。唯識道理。故亦非了義。即諸部般若等教是。第三時中。方就大乘正理。具說三性。三無性等。唯識二諦。方爲了義。即解深密經等。又此三位。各三義釋。一機。二說教。三顯理。且初。唯攝聲聞。唯說小乘。唯顯生空。二。唯攝菩薩。唯說大乘。唯顯二空。三。普攝諸機。通說諸乘。具顯空有。是故前二攝機。理各有闕。故非了義。後一教無不攝故。教無不具。理無不圓。故爲了義。又智光論師。遠承文殊龍樹。近稟提婆清辯。依般若等經。中觀等論。亦立三教。

謂佛初鹿園。爲諸小根。說小乘法。明心境俱有。第二時中。爲彼中根。說法相大乘。明境空心有。唯識道理。以根猶劣故。未能全入平等真空。故作是說。第三時中。爲上根。說無相大乘。辯心境俱空。平等一味。爲眞了義。又此三位。亦三義釋。先攝初機者。初時唯攝二乘人機。二通攝大小三機。以此宗許一分二乘不向佛果。三唯攝菩薩。通於漸頓。以諸二乘。悉向佛果。更無餘路故。二約教者。初說小乘。二說通。三後唯一乘。三約顯理者。初破外道自性故。說緣生法定是實有。二漸次破二乘故。緣生實有執。說此緣生以爲假有。以彼怖畏此真空故。猶存假有而接引之。方於後時。就究竟大乘。說此緣生即是性空。平等一味。不礙二諦。是故法相大乘。有所得等。屬第二教。非眞了義。此三教次第。如智光論師說。此乃西國法將。立教各有一途。皆詮聖教。在彼一方軌式。仰惟高旨。未可僉量。但通玄自參聖教。隨已管窺。以述意懷。用呈後哲。准其教旨。略立十種教。總該佛日出興。始終教意。何者爲十。第一時說小乘純有教。第二時說般若破有明空教。第三時說解深密經。和會空有。明不空不有教。第四時說楞伽經。明契假即眞教。第五時說維摩經。明即俗恆眞教。第六時說法華經。明

引權歸實教。第七時說涅槃經。令諸三乘捨權向實教。第八時說華嚴經。於剎那之際。通攝十世。圓融無始終。前後通該教。第九共不共教。第十不共共教。

第一時說小乘純有教者。爲諸凡夫。繫著世法。以爲實有。隨於色塵。作諸不善。以不善故。墮於苦趣。還將有法。轡勒彼心。以戒防護。制諸不善。故名純有教。於小乘中。還說無表性戒等。通其大體。但隨根性用事不同。如菩薩戒亦爾。經云。若人受佛戒。即入諸佛位。亦以性戒論之。又云。如是千百億。各接微塵衆。俱來至我所者。所謂初以化身化報引接。後以令歸法身實報。若上根者。法身事理一時。爲依本故。

第二時說般若破有明空教者。既說小乘實有。令成軌範。制其身語意。得住善法。即說生空等觀。方說法空教。破彼繫著。漸向法身。

第三時說解深密經。爲和會空有教者。爲於前空有二教和會。令邊見者。不滯空有二門。爲不空不有教。爲二乘人。滅識證寂。住寂無知。爲迴彼故。寄說第九阿陀那識。爲純淨識。五六七八等識。常依彼九識以爲依止。凡愚不了。妄執爲我。如水瀑流。不離水體。諸波浪等。以水爲依。五六七八識。常以淨識爲

依故。漸迴二乘之心。達識成智。何故安立九識爲淨識者。爲二乘人。久於生死業種六七八識。有怖畏故。恐彼難信。方便於生死種外。別立淨識。漸漸引之。意欲使令留惑不滅。使令悲智漸漸得生。深密經云。如是菩薩。雖由法住。以智爲依止。漸令空見。達識成智。

第四時說楞伽經。云說假即真教者。如楞伽經。直爲大乘根堪之者。頓說第八業種之識。名爲如來藏識。又云。得相者曰識。不得相者曰智。又經云。藏識海常住。境界風所動。此經直於無明業種。以明智門。明與無明。其性不二。起信論亦同此說。此教雖說無明業種成智。猶希出俗。未現同纏也。

第五說維摩經時。明即俗恆真教者。爲維摩經中。不以聲聞二乘。及三乘菩薩。爲知法者故。是以十大弟子。杜口於毘耶。彌勒光嚴。息芳言於法席。此經破前四種教中。菩薩聲聞。染淨未融。常忻出俗。即以淨名身居俗土。明即俗常真。壞彼淨相。常懷染淨。故說有身爲如來種。無明有愛爲種等。使令二乘之衆。淨相心亡。出俗入纏。平等無礙。方明實德也。爲有實宗。還現實報淨土。如佛以足指按地。所現之土是也。爲三乘根劣。籍佛神通。信劣土亡。非自證故。自

餘之意。前判教分宗門中已說。是故此維摩經。明即俗恆眞教。故以文殊爲法身。即以維摩詰。明入纏之行。即以法身爲體。以行爲用。此經乃令體用自相問答。爲三乘樂學如如空理。厭假修真。積行多生方成佛者。令歸法界性相理事因果同時。此經同別。前已判教分宗門中已說訖。

第六時說法華經。引權歸實教者。爲羅漢隨空會寂。緣覺會十二緣生法。皆無體性。以明六根識及名色心境三事自性無生。如是二人。皆心識滅。三界業滅。智慈不生。又爲析法明空。以空破惑。樂生淨土。及留惑潤生菩薩。並不了一切衆生無明諸惑。皆從一切如來根本性清淨普光明無中邊智之所生。皆有淨土穢土。自佛他佛。忻厭等諸邪見。不稱眞理。引此三根令歸本智。故即以妙法蓮華。令知無明生死性。本唯智體。性自無染。但迷悟不同。無有二性。以蓮華像之。引彼三根令歸本故。是故法華經云。明世間相常住。一如判教分宗中已說。

第七說涅槃經時。令諸三乘捨權向實教者。爲餘三乘教中。爲責慢故。爲不信故。說有無性有情。畢竟不得成佛。令起信進修行。於此經中。明一切有情。皆有佛性。如佛無異。但爲無明覆故不見。前爲三權。末後是實。是三乘中修假

眞如。及空教三祇之滿極。是見性之初門。於中佛與迦葉菩薩問答。亦和會初成正覺時。爲大菩薩說法界法門時道理故。更有餘同別意。前已判教分宗門中已說。涅槃經。是三乘中。捨權就實。相盡見性之門。法華即是捨權就實智。法界緣起理事性相之門。二部之經。俱是三乘中第六時教。但爲化相門中。說時前後。故分涅槃經。爲第七時教。然其智境。無有次第古今時也。

第八說華嚴經時。於剎那際。通攝三世及十世圓融教者。如經說云。入剎那際三昧。降神受生。八相成道。入涅槃。總不移時。爲依本性理智。本無時故。非權依本也。故名爲入。非是本法性中。而有出入三昧。以化儀軌則。施方便言。不可無言。滯其化跡。令諸群品。都無所歸。是故諸明人。莫隨其言。言佛世尊一人。入剎那際三昧。諸佛世尊。常於法身智海。與衆生數等諸三昧門。應衆生見。本無出入。應如是知如來三昧出入之相。此經教門。無始無終。是佛實報果德。性相圓周。若求其頭尾長短。始終路絕。該括諸教諸行。世間境界。一切行解。依本總作一時一際法門。本如是故。該彼三世諸時。爲一際一剎那時教。猶如衆流。皆歸海故。出此法外。別生情量。總是權門。非究竟說。如此法門。佛

不出世。亦無涅槃。爲依本法。非情教故。依本法者。即無出入。依權學者。即說出世入般涅槃。從初發心十住之首。以三昧力。頓印三界。三世一際。諸法一味。解脫涅槃。常寂滅味。更無始終。因果一際。諸性一性。諸智一智。諸相一相。諸行一行。三世一念。一念三世。乃至十世。如是等法。自在無礙。此經法門。無始無終。名爲常轉法輪。是故此經教門。依本安立。以備大根。依本一際。不立始終。爲非虛妄見故。入一總得餘。爲法界一際故。不同權學見未盡故。入餘總得一。爲法界體無礙故。如圓珠無方。如明鏡頓照。如虛空無隔。如響無依。如影不礙。如化人所生。此法門者。是該括始終一際。圓滿無礙。無成無壞。無出無沒。常轉法輪。若人了得此法門者。佛智。自然智。無師智。之所現前。爲此法無出沒故。還以自然無出沒智。而自能得之。非情計思量之所能得也。一切權教法門。總在其中。一時而說。爲諸權教。不出法界。無三世故。各依自見無量差殊。此一乘教。是始成正覺時說。若依情。是最初成佛時說。若依智。無始終說。

第九共不共教者。爲說諸大乘經。人天三乘同聞。得益各別。又華嚴經。於

一毛量處。及以一塵中。諸佛轉法輪。衆生解差別。又經云。菩薩在一小衆生身中。成等正覺。轉法輪。度無量衆生。其此小衆生。不知不覺。此乃常與衆生共。及以大小乘。共在佛海中。身之與心。本無差別。然見佛不見佛。聞法不聞法。解脫知見。大小及苦樂。各各不同。是故名爲共不共教。又經云。入剎那際三昧。示現從兜率天。降神母胎。出現。轉法輪。入涅槃。此乃於無時之中。諸衆生等。自得時分。見初中後。於一音法內。自得天人小乘大乘佛乘。自得道果。各各不同。見佛住劫。壽命長短。各自差別。而實如來。性無造作。無生無滅。然以無作法性。無垢白淨之智。自體清淨。與一切衆生。本來體同。故稱衆生應見應聞。不違彼念。爲法性智本無造作者。以法性智自在故。能稱彼念。令無失時。如是與佛。共法。共智。共時。共身。共心。共乘。以知見解脫。各各不共。故言共不共教。亦如五百聲聞。共在華嚴會。而如聾如盲。是其事也。

第十不共共教者。如華嚴經中。十方雲集諸來菩薩。及佛國土所從來方。不同各別。所共同聲說法總同。聞法獲益。能同能別。又於會中天龍八部人非人等。各各差殊。同得聞毘盧遮那果德法門。具同具別自在。諸餘三乘。亦有如是不共

共教。准例可知。如是十教。總是如來於本法界。一剎那際。一時一聲。頓印如響。隨諸衆生自分根力。漸頓不同。是故於今以圓數故。略分十種教門。用彰進修解行差別。如上十時教門。總是如來無三世智海。一時說故。由根聞故。大小及時分差別。自根而生。

第三明教義差別。

夫三界大雄。應真寂寞。身心性相。都無所爲。然以性起大悲。稱法同體。從無作智。隨緣教生。一雨普滋。任生各異。或名同而義別。即漸教十地圓教十地等。或言別而義同。十方世界法門。皆是四諦法門。或理事兩乖。或體用相徹。或初或漸。或頓或圓。法不自施。依根教立。根羸則法劣。器廣則道圓。稱物所宜。大小隨見。或同言而解別。或異語而齊知。當類所堪。應時施設。或樂門前之駕。廢遊露地之乘。且約最上之徒。及以漸漸之衆。麤陳十法。義理差殊。使得始學之流。不以滯權而妨實者也。其十門者。一佛日出興教主別。二光明表法現相別。三問答所詮主伴別。四所示因圓果滿別。五地位所行行相別。六重令善財證法別。七明六位菩薩來衆別。八明所施法門理事別。九與諸三乘得果別。十

所付法藏流通別。

第一佛日出興教主別者。此教即以毘盧遮那爲教主也。梵云毘者種種。盧遮那云光明徧照。又毘之云徧。以大智種種光明。照諸衆生根機。此即以法身悲智爲名。不同權教以姓爲號。牟尼者。此云寂默。但且讚法體無說。不言智慧。但有三十二相。八十種好。不具無邊相海故。又是剃除鬚髮。非是頂著華冠佛故。是同三乘出俗者故。不同此教即俗即真無出入故。如毘盧遮那如來。大約且以九十七種大人之相。頂上華冠。具足嚴好。三十二種寶王。化無量種種莊嚴。手著鐶釧。頸串瓔珞。廣如經說。一一相中。及以隨好。皆無盡相。

第二光明表法現相別者。除如來十身相海品中。九十七種相中所放光明。亦除夜摩天等所放光明。但且直論表法光明。始終有十。一一皆表因果次第。十信十住十行十迴向十地等位。其中行相。無有雜亂。不同餘教。化佛放光。或放多光。或放一光。而無十。或全身悉放。而無次。或放果光。而無因。或放因光。而無果。如法華經。直放眉間毫相果光。而無足輪下信位因光。如大品經中。佛放足輪下光。及全身一時盡放光明。一時普攝三乘因果。直從下向上以放光明。

以成漸次。從凡向聖。多劫積修。行滿之後。方成果德。不同此經放光。從果成因。以因成果。因果一體。不壞進修。第一先放齒間十種光明。莊嚴法界一切道場。爲初登正覺。十方告衆。使令咸集。如經廣明。此爲莊嚴告衆雲集光故。第二放眉間果光。入足輪中。以果成因。起信之首。第三然後還從足輪下。放出所入果光。用照金色世界。不動智佛。還是果佛。亦是根本金剛智體。文殊師利。即是初心。及究竟成果已來。所覺根本法身。成智之母。以彼眉間果光入足輪中。即是以果成因。還以足輪下所入之果光。復出照金色世界不動智佛。即是用因成果。用果成因。因果頓示。用成初信之門。即以智首等十首菩薩。用成信位。其位行相。後當廣明。第四又說十住品時。昇須彌頂上。如來於足指端放光。以明發足之始。見道之初。以三昧力。住法之頂。從前信位。入真實證。須彌山者。明因止而慧明。以入十住聖位之中要定。方能真證慧明也。故十住位菩薩。下名共同。皆名爲慧。第五如來昇夜摩天上。放足踏上光。以明用成行位。此天離地際。故說十行位也。表依空起行用也。表法以明先證法身根本智慧。始行萬行。第六昇兜率天宮品中。如來膝上放光。說十迴向。表此天處欲界之中。理事無礙。

故名迴向。初發心住時。理事無礙。非獨此處。方有迴向。但以次第名言。法須安立。然實體中。一一位中皆具足也。膝者。明屈伸迴旋自在故。說迴向義也。表真俗自在故。生死涅槃自在。成智悲故也。第七他化自在天中。放眉間毫相果德光明。說十地位也。爲十地菩薩。因果位終故。還像此天。依他起化。無自心化故。表十地菩薩。但爲衆生所須教化。自無業化。又於欲界之際。即無欲故。還同四禪。及出三界之法門故。異彼小乘。修生涅槃。出三界惑故。又異權教菩薩。於第四禪中。成十地故。又從兜率天。超過化樂天。至他化自在天者。表十地位法。徧法界故。不須次第。上界四禪。亦在其會。不來而到。不往而至。不動而見故。上下諸天。皆處其中。十方世界。悉在毛孔。但以表法階降如是。實無上下彼此往來。十一地普賢佛華三昧會。在第三禪天說。來文未足。第八如來普光明殿。說如來出現品。放眉間毫光。灌文殊頂。明前他化天上。十地果終。第三禪中。等覺位畢。設法已成。陳施本教行相規模。規模既終。因果圓備。設教既畢。後方出現。未說法門。何名出現。又世主妙嚴品中。始成正覺出現。起自信心。修行五位。五位既成。佛果自現。後出現品中。即明自己證修果終。自

已稱法所見出現。又明從初始終。於佛法界體上。安諸地位次第之門。於始於終。長明出現。本來一際。無前無後。放光灌文殊之頂。以果光灌果法。以文殊是佛法身根本智。欲令文殊普賢菩薩。共相問答。結會五位。始終因果。體用徹故。文殊菩薩。知而故問。經云。誰爲佛長子。我今當問誰。於是如來放口中光。灌普賢口。第九如來口中放光。灌普賢口。口中光者。是佛教光。欲令普賢。以差別智。說佛出現果德法門。文殊因佛放光。始知問法之處。夫聖智本自相知。今以佛法印成。用成後則。此乃九度放光。以成一部經之始終法則。結會已前五位因果體用之門。此之三人。始終不相離故。以明如來是文殊普賢二人之果。第十復更於給園之內。更放眉間毫相果光。明以上五位因果已成。還將果法用利衆生。故入法界品中。令人天凡夫。六千比丘。五百優婆塞。五百優婆夷。五百童男女等。皆令於此門得道成佛。更餘廣意。後當更明。從此已上。十度放光。於中表意。各有分劑。此經放光具足。表德圓滿故。具足其十。皆周法界。不同化佛所放光明。說一部經時。或一度放光。或即全身。未曾有如此經中。圓周始終。一成一備德。具其十也。但言說十。備德無盡。十爲圓數故也。

大方廣佛新華嚴經合論卷第三終

大方廣佛新華嚴經合論卷第四

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

第三問答所詮主伴別者。說此一部經之問答體用。所乘宗之大意總相。具德有三。一佛。二文殊。三普賢。佛表果德無言。當不可說。不可修。不可得。不可證。但因成。果自得。文殊因位可說。以此說法身果德勸修。普賢自行可行。行其行海。充滿法界故。用此三德。將爲利樂衆生。文殊成讚法身本智。普賢成其差別智之行德。一切諸佛。皆依此二尊者以爲師範。而能成就大菩提之極果。或說普賢爲長子。爲建行成滿衆生故。或說文殊爲小男。爲創始發心。證法身本智佛性之首。爲最初證法身本智佛性。爲初生諸佛聖性智慧家故。爲啓蒙發明之首。故爲小男。主東北方。爲艮卦。艮爲小男。又爲山。爲石。在丑寅兩間。表平旦創明。暗相已無。日光未著。像啓蒙之首。十住初心創見道也。故指文殊師

利在東北方清涼山也。且取此閻浮之洲境位也。託法在於世間。使令易解。又經云。一切處文殊師利。即明法身徧也。又過東方十佛刹微塵世界。有金色世界。有文殊師利。又十方文殊師利。所從來國。金色世界。金爲白色。其相黃。體白而黃相者。即明法身佛性智也。體白淨清潔。非屬色形。身心無染。非如世間色白之白也。法身佛性。無心無身。任性無作。緣緣自淨。物物無心。唯無依智。名爲白淨。若諸菩薩。證如是性。如是智。身皆黃色。爲黃爲福慶之色。無貪嗔恚。即有和氣智慧益物之德也。經云。應眞菩薩。皆眞金色也。故言文殊師利從金色世界來者。明一切處。法皆眞也。表一眞法界也。普賢長子者。位在東方卯位。爲震卦。震爲長男。爲頭。爲首。爲青龍。爲吉慶。爲春生。爲建法則之初也。世間佛法。皆取東方爲初首。表像日出。咸照萬物。悉皆明了。堪施作務。隨緣運用故。普賢爲行首。故爲長男也。觀音爲悲首。位在西方。住金剛山之西阿。說慈悲經。西爲西位。酉爲兌卦。兌爲金。爲白虎。爲凶危。爲秋煞。故以慈悲觀音主之。於不善處行慈。是觀音也。文殊。普賢。觀音。三法。是十方諸佛共行。爲善財童子十迴向中。第七慈悲位中善知識。餘廣義。後當更明。佛法

無言。以用世間法。託事表之。有言說者。皆是世間法也。若也無言。啓蒙何達。以此義故。用佛。文殊。普賢。觀音。三德。互爲主伴。以成法則。化利衆生之首。佛收一切果。文殊收一切所行因果法身本智。普賢收一切因果行身差別智。以此義故。或說文殊普賢。爲一切諸佛之師。或說文殊普賢。爲小男長子。三人互體。成一法界之體用也。即文殊爲始見道初法身本智之門。普賢即爲始見道之後行行之門。佛即二事之中無作體也。故以文殊法身該此一部之教所說法身本智。備一切衆生初見道門。普賢該此一部之教所說行門差別智。備一切衆生行行之門。法行具足。名之爲佛。化佛教中。無此所表。涅槃經中。佛隱身不現。昔雪山童子。所得了諸行無常。是生滅法。獨表法身涅槃無有行故。小品經中。薩陀波倫菩薩。求般若波羅蜜門。具六波羅蜜。未有方便波羅蜜。願力智等十波羅蜜。但爲引聲聞人天小器。未堪聞方便願力智等波羅蜜也。六波羅蜜中。無方便波羅蜜者。爲方便波羅蜜。行於非道。彼小器不堪聞也。何以然者。有畏愛故。及於彼經中。多有聲聞人共佛爲問答。非大菩薩故。設有菩薩。非文殊普賢故。設有文殊無普賢者。表未具行故。設有普賢無文殊者。明不見法身本智慧故。設

有文殊普賢不自相問答。明理事未徹故。又不言一切處文殊。一切處及微塵中普賢行衆行故。又化佛自爲問答主。但有因果行。待三僧祇劫之後。爲引小器之徒。未說即因即果。理事圓融。十住初心。即是佛故。無前後際故。頓全法界故。眞俗俱眞。以此不同。用例化佛所說之教。無如此經也。一切諸教。皆權施設。引彼諸根。咸來至此華嚴大海。入毘盧遮那一眞境界。以三乘空觀。折伏現行無明不生。不滅根本智。未具差別智故。忻生他土。厭此娑婆。設有住者。猶言留惑也。又此經中。善財童子依十住中。徧行五位法門行相。徧行滿故。以此十住位內。具有十地行門。以表此法。德用滿故。不同餘教行也。如雪山童子。見一善知識。得一法門。薩陀波倫亦然。法華經中。略示龍女成佛。猶指南方。非爲法界自他圓滿故。分示少多。仍問答主別。教主即是化佛。穢國設化令淨。非實淨土。仍移人天置於他土。仍彼此未終也。若說此經與餘經別者。事廣而難終。略而言之。且復如是。

第四所示因圓果滿別者。顯佛果有二種不同。一亡言絕行。獨明法身無作果。二從行積修。行滿功成。多劫始成果。三創發心時。十住初位。體用隨緣所成果。

初亡言絕行。所明法身無作果者。即涅槃無行等經是。隱身不現。萬事休息。又云。羅刹爲雪山童子。說諸行無常。是生滅法。生滅滅已。寂滅爲樂。是無作果。不具行故。二從行積修。行滿多劫方明果者。即權教之中。說從行修成。三僧祇劫。行滿所成佛果是也。此以不了無明十二有支。本是法身智慧。厭而以空觀折伏現行煩惱。忻別淨門。三從凡十住初心創證。隨緣運用所成果者。即華嚴經是也。十信終心。即以方便三昧。達無明十二有支。成理智大悲。即具文殊普賢體用法界法門。又如化佛所施因果教行。定經三僧祇中。所有佛功德。總是修生。百劫修相好業。然燈得光明。不殺得長壽。布施得資財。忍辱得端正。一一因果屬對。相似具足。仍對治種種法門。始得見性成佛。如華嚴經即不然。一念頓證法界法門。身心性相。本唯法體。施爲運用動寂。任無作智。即是佛也。爲一切佛。法應如是。無長無短。始終畢竟。法皆如是。於一眞法界。任法施爲。悉皆具足恆沙德用。即因即果。以此普門法界理智。諸障自無。無別對治。別修別斷。不見變化。變與不變。無異性相故。普觀一切。無非法門。無非解脫。但爲自心。強生繫著。爲多事故。沈潛苦流。故勞聖說。種種差別。於所說處。復生繫著。

以此義故。聖說不同。或漸或圓。應諸根器。如此經教。頓示圓乘。上上乘人。所應堪受。設不堪受者。當須樂修。究竟歸流。畢居此海。是故餘教。先因後果。不同此教。因果同時。爲法性智海中。因果不可得故。爲不可得中。因果同時。無有障礙也。可得因果。即有前後。有所得者。皆是無常。非究竟說也。若先因後果者。因亦不成故。果亦壞也。緣生之法。不相續故。即斷滅故。自他不成故。如數一錢。不數後錢。無後二者。一亦不成。爲剎那不相續。剎那不成果亦壞。多劫不相續。多劫因果壞。要待數後錢時。前一始成。因果亦爾。要待一時中間者。因果始成。若爾者。如數兩錢同數。無前無後。誰爲一二。如豎二指。誰爲因果。如二指等。隨心數處爲因。後數爲果。若如有前有後。即有中間者。還有剎那間斷。有間斷者。不成因果。若同時者。如豎二指。無前無後。誰爲因果。亦皆不成。如此華嚴經因果同時者。俱無如是前後因果。及同時情量繫著妄想。有無俱不俱。常無常等。繫著因果。但了法體。非所施設。非因果繫。名爲因果。非情所立同時前後之妄想也。如是者何異楞伽漸教之說。此則不然。前說教主別。問答主別等。即明文殊普賢佛等三德體用主伴無礙故。楞伽經中。化佛

及大慧菩薩問答破相。但教顯理無繫著故。不論緣起。如緣起法界者。法界不成不破。但知了法如是故。是故楞伽經云。先示相似物。後當與真實。又云。得相者是識。不得相者是智。即是明成壞也。如此經中意者。即真無有假法。諸法總真。純真更無假。無相似存真存假。經云。衆生界即佛界也。如此經中。文殊以理會行。普賢以行會理。二人體用相徹。以成一眞法界。前後相收。四十品經。互相該括。前後相徹。文義相收。一法門中。具多法也。是故經云。於多法中爲一法。於一法中爲多法。於漸教中。設有少分義同。多分不相似故。如覺首等十首菩薩。各說一法以成十信。於十信中。共成一信。爲十箇信位。互體相成。不獨施設。以十信成一信。以一信成十信。有解者不可偏取一門。十慧菩薩。十林菩薩。十幢菩薩。十藏菩薩。又說十定十通十忍。如是一二位次法門。皆悉如是。互相成就。如帝釋網。互相徹入。一中無量。無量中一。諸佛菩薩。體用相成。因果相入。同時無二。如經中說。法慧菩薩入定。即十方世界。同名法慧佛來。功德林菩薩入定。十方世界。同名功德林佛來。金剛幢菩薩入定。即十方世界。同名金剛幢佛來。金剛藏菩薩入定。即十方世界。同名金剛藏佛來摩頂。如是位

位之內。地地之中。佛與菩薩。因果相成。體用相徹。所來諸佛。即明是果。入定菩薩。即明是因。明因果無二故。於佛法身智體上。安立十住。十行。十迴向。十地。十一地等。行相。引凡接俗化生之門。諸位即佛。佛即諸位。若上上根人。於此教中起信行者。還依此法。創首十住初心。正證如來佛果智法。方行一切菩薩萬行。爲初證之首。爲知法體智性故。設同凡事。經過多劫行。而於自見。本不移時。於初發心時。與二世佛同成正覺。無前無後際故。法如是故。應如是知。不同權教。經三僧祇。方成佛果。是故今言與諸三乘得果別故。又於此經。乘如來一切智乘。得佛果故。無二乘人。得四沙門果。亦無權教菩薩。諸地行相。因前果後也。第五明地位所行行相別者。凡發大乘心者。依其根品。有六種所乘。三種五位十地。差別行相不同。其名數如何。一念佛願生淨土門。二作淨土觀行所生淨土門。三修空無我所乘門。四和會有無觀智門。五漸見佛性進修門。六頓證佛性圓融門。修大乘者。不離此六種所乘行相。何者三種五位十地。一修假詮假智假真如等。安立五位十地。二修分真分證一分真如。安立五位十地。三頓修頓證頓真頓說佛境界圓滿真如。安立十地五位行相。此佛乘中無假法言說名相總

眞。如是三種十地五位行相。向善提者。行菩薩行者。滿佛果者。莫不總在其中。今以總舉。各以已所乘宗。辯其權實。使令離障。進修有功。不相誹毀。顯了差別。令無疑悔。令進修者。分明了知權實故。令成佛者。不迂滯其功故。一念佛力修戒發願力生於淨土。是化佛淨土。非眞淨土。爲非見性。及不了無明是一切如來根本智故。是有爲故。如阿彌陀經是也。二作淨土觀行所生淨土。是化淨土。從心想生故。是有爲故。不見佛性本智慧故。即無量壽觀經是也。三修空無我觀所乘門者。爲初說般若。破凡夫實有。二乘生空我執故。多修空法。空有俱空。爲空增勝故。雖行六波羅蜜。修種種菩提分法。得六神通。行菩薩行。福勝人天。不生佛家。不見佛性。爲析法明空。不了無明是如來智慧故。華嚴經亦同此訶責。如前已述。如法華經云。假使有人。讀誦八萬四千法藏。爲人解說。行六波羅蜜。得六神通。亦未爲難。暫讀此經。是則爲難。法華經成就佛乘故。非菩薩乘故。是故如來於涅槃經中。說一切衆生。皆有佛性。常樂我淨。有諸菩薩自悔過言。我於無量劫流轉生死。只爲無我之所惑亂。有如此過故。迴心方可得見性達我是智。諸般若中。有文殊師利菩薩爲問答者。皆論一分法身佛性道理。如文殊般若

是也。若與聲聞爲問答者。多爲破二乘生空我執。說法空故。與普賢問答者。多約行門。凡說法依根。但見問答主伴。可知表裏。准之可見。四和會有無觀智門者。即解深密經。第三時教。說九識爲淨識。與業種爲依。并說三性三無性。所謂偏計所執性。依他起性。圓成實性。互相成壞。離諸執障。不成不壞。性自涅槃。如深密經頌曰。一切諸法皆無性。無生無滅本來寂。諸法自性恆涅槃。誰有智者無密意。此經爲破般若修空增勝者。壞緣生法故。空見現前。違道理故。但於此經。成就緣生諸法。自體涅槃。不須誹撥。言空言有。互相破斥。不令計有。不令計無。又此經雖安立十地。名同華嚴。於中義意軌則各別。又無地前三賢十信等位。但立十地斷惑行相。及說佛地爲十一地。於其十地位之內。復說有十一種羸重。二十二種愚癡。所以此經不安立地前三賢十信具足行門。爲此經地前非見道故。又爲第三時教。中間但和會有無。未是文殊普賢理事相攝行滿故。是故華嚴經中。說十信十住十行十迴向十地法門時。十方諸佛同來印可故。一切諸佛國土。總說此門故。十三種相加。表真實故。三乘經中。但說十地。攝諸衆生不盡故。此即是三種十地中。假詮假智假真如十地行故。何以然者。爲此十一地是

佛位。佛位之內猶有障故。明十一地已前。未有真理本智故。若全真理智。云何十一地。有十一麤重。既有麤重。即非地地中有佛智爲因果故。此經且漸和會有無。令無滯住。未似普賢文殊理事智盡大用而說故。如仁王經。說五位十地行門。安立從凡漸習。積行多生。修假真如。又有教。說地前伏惑。地上見道。或說留惑不斷。要經三僧祇劫。方可成佛。如是等教。並對權根。假施設有。未爲實說。但化佛所說。皆是引中下根人。未盡實說。餘准可知。又二乘人。迴心向權教中。所忻佛果。及權教菩薩。所忻佛果。僧祇滿後。但只樂求三千大千世界佛之報果。不忻十佛境界毘盧遮那無盡十方境界之報果也。不如華嚴經中。十信菩薩。所忻佛果。勝解心上。具足凡夫。即樂忻修十身毘盧遮那之境界。深心廣大。盡無極重玄之妙境界也。不同權教佛之境界。皆立分劑限量。此乃爲根狹未廣故。且權安立。如解深密經中。十地斷惑分劑。第一初地中。對治惡趣煩惱業生雜染障。第二地中。對治微細誤犯現行障。第三地中。對治欲貪障。第四地中。對治定愛及法愛障。第五地中。對治生死涅槃一向背趣障。第六地中。對治麤相現行障。第七地中。對治細相現行障。第八地中。對治於無相無作用及於有相不得自在

障。第九地中。對治於一切種善巧言辭不得自在障。第十地中。對治不得圓滿法身證得障。善男子。此奢摩他毘鉢舍那。於如來地。對治極微細最極微細。煩惱障。及所知障。如華嚴經。但於地前三賢初發心住中。即能頓證佛果法門。普印諸位。十住十行十迴向十地等覺諸位。如印印時。文相具足。無前後際。即以初發心時。頓印三界無明。便爲佛智之海。以如來法身智身大悲之印。一下頓印世間。以爲法界大用。無前後故。法如是故。不同權教法外施設。且引三根來歸一實故。五漸見佛性進修門者。如涅槃經云。十住菩薩。少分見性。乃至十地。未能了了。起信論云。十住菩薩。少分得見法身。化八相成道故。如彼論釋。言是願力所爲。既是願力。非爲實報。總爲漸見佛性。皆是權教分分中漸引之宗。非爲圓故。如是之類。從初發心住已後。所證佛果。不定僧祇。何以故。如涅槃經云。記屠兒廣額。於賢劫中成佛。闍提創發心。尙有越劫之功。何況具足信根。復能少分見性者。何有僧祇之隔哉。世有諸德。解屠兒廣額是化作爾者。此乃曲逐人情。未詳佛意者也。漸漸引權向實。豈令見劫存情。令違本耶。漸漸引至龍女善財。一念之中得成佛者。始成實說。三乘小見。但念長時。時體本無。空嗟

忻仰。無繩自縛。何有休期。前略說三種十地。又以經義校量。有六種十地者。如三乘權教中。有三種十地。實教中。有三種十地。如仁王經。解深密。大品經。此三部經中。所說十地。多立假真如門。以成十地行相。如此是權教中三種十地。第四如涅槃經中。十住菩薩。少分見性。十地菩薩。見性未了了。即明以佛性爲所乘門。分修分證十地。第五又涅槃經。如牛食雪山肥膩草。純得醍醐等。即明證佛位故。即爲五種十地。此教通華嚴經。初發心上。同佛正覺故。第六一乘十地。如華嚴經所說法界門。重玄無盡法。以成十地。是爲六種十地。涅槃法華。龍女剎那成佛。皆是引權向實教故。且三乘十地菩薩。所忻佛果境界。但忻三千大千世界。爲報佛之果故。此即實教中。第三化身。非爲實報身故。三種化身者。一者佛化身作種種衆生身。二化身者。化作一四天下。及二十八天所化之佛。三化身者。化作三千大千世界佛也。實報身者。十身毘盧遮那。互體相徹。重玄境界。量齊法界。及徹纖塵。塵塵之內。皆齊法界。具如華嚴經說。三乘之教既權。所說法門。及佛報境界。總未實說。是故大品經中。名共教。三乘共行十地。第二解深密經。所說十地。直爲解深密廣意菩薩。廣慧菩薩。清淨慧菩薩等。共爲

問答主件。說十地門。不共聲聞爲問答主件。爲深密經。迴彼般若樂空增勝者故。此大品深密等經。但說十地之名。無地前十信三賢四資糧位。第三如仁王經中。具足五位行相法門。如是權教中所說三賢十聖。多分總是說假真如。次第漸細。方明佛性。方可說乘如來乘。直至道場。將知權教非真。所說地位次第未實。第四如來乘中。如涅槃經中。說十住少分見性。十地菩薩未全了了者。如起信論中。十住菩薩少分見性。以誓願力能八相成佛者。是其流也。雖未圓滿。爲見少分性力故。勢力如是。猶如儲君。爲有因緣。父王令其統紹君政。爲是王眞子故。力堪如是故。爲少見性故。爲如來眞子生佛家故。不同餘教。假眞如假智等。待於初地。方云生佛家故。明見性力眞。勝餘宗故。少分如是。何況全得。第五明圓教十地者。一念體道。智全佛故。以會無明體全智故。經云。一成一切成。一壞一切壞。後當廣明。是名五種十地。此四種十地位次第行相。以化下中根。接生門中。大同小異。至於本法教門。而權教之中。三種假立眞如爲觀智。與從法身佛性體上。安立漸頓二門全別。如權教中。雖復還從初地之中。對治惡趣煩惱業生雜染障。乃至第七地中。對治細相現行猶成障。障無相智。未全自在。至於八

地無相無作功用。及於有相功用。亦未自在。如是地地中不自在。皆有障故。如前依解深密經中。地位斷惑次第法門說。如三乘中十地。畢定如是。階降斷惑。經三僧祇。百劫修相好業。如涅槃經等。佛性門中。安立諸地次第。如前已明。如本業瓔珞經云。十住菩薩。銅寶瓔珞。銅輪王。百福子爲眷屬。生一佛土。受佛學行。教二天下。十行菩薩。銀寶瓔珞。銀輪王。五百福子爲眷屬。生三佛國中。受教行。化三天下。十迴向菩薩。金剛寶瓔珞。金輪王。千福子爲眷屬。入十方佛國中。化一切衆生。處四天下。初地已上。百寶瓔珞。二地千寶。三地萬寶。四地菩薩。不可稱數寶爲瓔珞。乃至十地。寶瓔珞漸漸增廣。及十地。十一地。通佛法王。及三賢菩薩。總有十五種輪王位。廣如瓔珞經說。又言三賢菩薩。伏三界煩惱麤業道。麤相續果。亦不起麤見道。喜忍。伏三業道。離忍。伏地獄餓鬼畜生人中業道。明忍。伏六天業道。炎忍。伏諸見業道。勝忍。伏疑見業道。現忍。伏因業道。無生忍。伏果業道。不動忍。伏色因業道。光忍。伏心因業道。寂滅忍。伏心色二習業道。無垢忍。伏習果業道。習前已除。而果不敗亡。是故佛子。三賢名爲伏斷。喜忍已上。亦伏亦斷一切煩惱。覺忍現時。法界中一切無

明。頓斷無餘。如是已上說十一種忍。三堅菩薩。用除三界麤煩惱故。亦伏斷故。解云。三堅者。即三賢菩薩也。十住。十行。十迴向。地前三位也。又瓔珞經云。佛子。初地一念無相法身智。成就百萬阿僧祇功德。雙照二諦。心心寂滅。法流水中。不可以凡夫心識。量二種法身。解云。二身者。一法性身。二報化身。法流水者。言初地菩薩。即法性智流中。任運至佛位故。無所修造。何況二地三地故。又經云。地前三賢菩薩。入聖人位。但法性流中。心心寂滅。自然流入妙覺大海。佛子。乃至三賢十地之名。亦無名無相。但以應化故。古佛道法。有十地之名。此經即是說華嚴經已後。教化三乘人。於別時中。重於初始成佛菩提樹下。重略敘華嚴法門。此瓔珞經中。皆言我曾於普光堂。說淨土法門。及至初利天。說十住。今更略說。廣如彼經說。准此經次第。說十地已後。於第三禪中。說十一地法門。經在西方不來。經云。佛子。吾先於第三禪中。集八禪衆。說一生補處菩薩入佛華三昧。說百萬億偈。今已略說一偈之義。開衆生心。汝等受持。又依瓔珞經。安十地斷惑法相門。經云。佛子。前三賢伏三界無明。而用除麤業。何以故。當受生時。善爲緣子。解云。三賢菩薩。初受法性智慧。生佛家時。悲

心增勝。爲觀一切三界衆生。總爲子故。誓願無捨。爲慈悲故。潤生三界業故。三界受生。又經云。爲潤業故。受未來果。故名息用。解云。於三界無造新業。故爲息用。又經云。而不斷愛用。解云。然三界業亡。慈業受生不亡。經云。有十一人。亦伏法界中三界業果故。解云。十一人者。十地并等覺位。爲十一人。又經云。初地乃至七地。三界業果。俱伏盡無餘。八地乃盡故。解云。七地已前伏盡。八地稱法盡故。從此已上。示現作佛。王宮受生。出家得道。轉法輪。滅度。示現一切化佛界故。無子愛三界之報。唯有無明習在。解云。此八地現前。住無功用智。雖度衆生。無衆生想。七地已前悲勝。八地已後。無相智現前智勝。雖無受生。任運度人。非無愛法習故。佛地始盡。以本願力故變化生。是以我昔天中說生不生義業生變生。佛子。聖位中二種業。一慧業。無相無生智。心心緣法性。而生無照。是名慧業。二功德業。實智出有諦中。有爲無漏。集百萬阿僧祇功德故。名爲功德業。從初聖已上。而現受生。以變易故不造新。以願力故。住壽百劫千劫變化生。以上並依本業瓔珞經說。此即是圓教中。亦頓亦漸二門。亦頓者。此經云。三賢菩薩。即入聖人位。入法性流中。任運至佛海。更無造作。

漸者。斷惑階降。一一進修。此瓔珞經。三賢十住。即入法性之流。不同權教。初地見道。道前伏惑。若望華嚴經。十地品初地。令凡夫修行。不云要聖人方學。彼經自有明文。又明進退者。如瓔珞經云。佛子。若退若進者。十住已前。一切凡夫法中發菩提心。有恆河沙衆生。學行佛法。信相心中行者。是退分善根。諸善男子。一劫二劫。乃至修行十信入十住。是人爾時。從初至第六住中。若修第六般若波羅蜜。正觀現前。復值諸佛菩薩善知識所護念故。出到第七住。常住不退自在。七住已前。名爲退分。佛子。若不退者。入第六般若。修行於空。無我無人無主者。畢竟不生。畢竟入定佛位。佛子。若不值善知識者。若一劫。若二劫。乃至十劫。退菩提心。如我初會衆中。有八萬人退。如淨目天子。法才王子。舍利弗等。欲入第七住。其中值惡因緣故。退入凡夫不善惡中。不名習種性人。退入外道。若一劫。若十劫。乃至千劫。作大邪見。及五逆。無惡不造也。問。如涅槃經。聞常住二字。尚七劫不墮地獄。如華嚴經云。設聞如來名。及所說法。不生信解。亦能成種。必得解脫。至成佛故。何故今言第六住心。及從凡夫信位。猶言有退。此意若爲和會。解云。十信之中。勝解未成。未得謂得。便生憍慢。

不近善友。不敬賢良。爲慢怠故。久處人天。惡業便起。能成就大地獄業。若一信不慢。常求勝友。即無此失。若權教中。第六住心。可有退位。實教中。爲稽滯者。責令進修。如舍利弗。是示現聲聞。非實聲聞。所作方便。皆度衆生。使令進策。如權教中。第六住心。可說實退。何以故。爲權教中。地前三賢。總未見道。所修作業。皆是有爲。所有無明。皆是折伏。功不強者。便生退還。若折伏有力。亦不退失。如蛇有毒。爲咒力故。毒不能起。但於佛法中。種於信心。謙下無慢。敬順賢良。於諸惡人。心常慈忍。於諸勝已者。諮受未聞。所聞勝法。奉行無忘。所有虛妄。依教蠲除。於三菩提道。常勤不息。夫爲人生之法。法合如然。但不長惡而生。何須慮退。已上五種十地。權教中三種十地。如大品般若。但有十地名。第八名大人地。第九名乾慧地。地名少殊。解深密經中十地名。雖與華嚴經中十地名雖同。從初地至十一地。有十一種麤重。二十二種愚癡。此二部經中。但有十地。總無地前四種資糧。仁王經中。雖說地前。十信。十住。十行。十迴向。四資糧。十信即說爲外凡。十住爲內凡。即不同實教中。十住初心。便登聖性。體齊諸佛。十信之中。若不信自身與佛身因果無二者。不成信解。是

故如來出現品云。菩薩摩訶薩。應知自心之內。一念念中。有十方諸佛成正覺。轉正法輪。何以故。佛心與自心無二故。如是信心。方名信故。何況十住之位。不證此心。若不證此心。云何爲住。以是義故。住於佛住。名之爲住。是故初發心住。便成正覺。又權教中。說十地時。並無他方佛與說法者同名故。又無同名佛來證成。表同因果故。以是義故。地及教門。並是接小根衆生。權施設故。諸有智者。勿滯其中。應忻昇進。是故說華嚴經中五位十地法門時。十住中。法慧菩薩入定。欲說十住法門時。過十方千佛世界外。有千佛世界微塵數同名法慧佛來。手摩法慧菩薩頂。及語業讚歎。及與法慧智力。十三種加持。說十行位時。功德林菩薩入定。十方過萬佛世界外。有萬佛世界微塵數佛來。俱名功德林。及十三種加功德林菩薩等。說十迴向時。十方過百萬佛世界外。有百萬佛世界微塵數佛來。同名金剛幢。亦十三種加金剛幢菩薩。十地亦然。佛與菩薩名同者。明因果同故。後當廣明。如十地論。是天親菩薩造。解十地經。是華嚴經中十地品也。於解義處。文義通三乘。及一乘義解。於中解者。多解三乘義。於一乘義。人多不解。爲一乘道理。情解不及。設有以情解者。疑網不除。且信佛語故。自

疑不斷。會久在無思。不厭苦者。不滯寂者。悟常樂我淨者。之所能知故。是故五種十地。三種是權。餘二種十地。是實教故。是故瓔珞經云。古佛道法。爲化衆生。有此十地。當知三乘權教十地名雖同。所設方便引衆生行解全別。以此當處具說。未有同名佛。共成印信因果契證故。

大方廣佛新華嚴經合論卷第四終

大方廣佛新華嚴經合論卷第五

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

六明頓證佛性理智萬行圓融門者。如華嚴經第一會。如來現相品中。如來齒間放光。又放眉間中道果德光明。又令普賢菩薩入三昧。說世界成就品。華藏世界品。毘盧遮那品。說諸佛果法。令生愛樂。既生愛樂已。於第二會中。令文殊師利。說如來名號品。四聖諦品。又於兩足輪下放光明。其光明過十方十佛刹微塵數世界外。各有十佛刹微塵數菩薩。皆來集會。又說菩薩問明品。淨行品。賢首品。成就十信之門。兩足輪下光者。爲其最下。明入信之首。以信爲因。信爲最下故。此是如來眉間果光放入故。前如來現相品中。如來眉間放光已。入兩足輪中。爲欲明舉佛果德。用成信位。諸有學者。還信果法。用成初證。入於十住之門故。以是義故。十方各有十佛刹微塵數十首菩薩。皆從十色世界。十智如來

所來。以十信爲入道之初故。是故所來菩薩。皆名爲首。十色世界者。爲十信菩薩。未成實證。明是凡夫。雖信果德佛境。未離色塵。以色爲國。十住菩薩。理事圓明。以華爲國。爲創從凡位。理事開敷故。十行菩薩。善達簡擇。覺慧圓明。以慧爲國。十迴向十地。以妙用自在。以妙爲國。從當位法門所來。以法爲國。非爲四大地水火風故。入聖智者。已離此障。十信位中菩薩。皆從十智佛所來者。所謂不動智佛。無礙智佛。解脫智佛。如是十智佛者。智爲果德。爲十信位中。以果成信故。爲明信從果來。以果爲因故。若不以果爲信。即無所信故。信無所依。何故文殊師利爲上首者。爲文殊師利。皆啓蒙之主故。十方諸佛。皆以文殊師利妙德。爲發信心之首故。以彰顯法身根本智故。常以文殊爲果前之信。普賢明是差別智。爲果後之行故。是故善財童子。初見文殊爲信門。後見慈氏爲佛位。又自見其身入普賢身。是佛果後行。文殊爲小男。普賢爲長子。二聖合體。名之爲佛。文殊爲法身妙慧。普賢爲萬行成德故。體用自在。名之爲佛。文殊小男者。爲信證法身根本智慧。爲初生故。因初證本智法身。能生佛家故。普賢爲長子者。爲依根本智起行行差別智。治佛家法諸波羅蜜事自在故。常以行門。建佛家法。

治佛家事。但諸經之內。以文殊爲問答主者。多明法身佛性之門。普賢爲問答主者。多論其行。以此表之。又文殊乘師子者。爲明創證法身佛性根本智斷惑之驗故。普賢乘香象王者。表行庠序爲威德故。又文殊常居東方金色世界不動智佛所者。爲明金爲白色。能離垢故。金色者。表法身也。不動智者。依法性身根本智起智用。即無動故。普賢菩薩常居東方寶威德上王佛所者。明萬行爲寶。以此行故。成其威德。若具行者。以法寶身自在也。威德無畏。自在爲王。若不具行者。皆有所畏。設居高位。不得爲王。爲有所畏故。與文殊師利同在東方者。爲法身智身。理事體用。本自一故。本無二故。又文殊居東北方清涼山者。像艮卦。艮爲小男。主東北方故。艮爲小男。爲童蒙。爲文殊常化凡夫。啓蒙見性。及本智之初首故。又與普賢俱在東方卯位。卯爲震卦。震爲長男。又像日出東方。春陽發萌。無物不生。無物不照。表理智雙徹。體一無二。如日出東方。無物不照。春陽發萌。無物不生。以根本智差別智。無別體用。生萬行故。是故子爲佛位。丑爲信位。寅爲十住。卯爲十行。辰爲十迴向。巳爲十地。午爲等覺。未爲晦明入俗。同俗化迷。申酉戌亥。爲所化故。如是安立法則。法合如是故。易卦。坎

爲君。離爲臣。震爲上相。西爲上將。東爲青龍。西爲白虎。前爲朱雀。後爲玄武。青龍爲吉慶。白虎爲凶害。朱雀爲其明。玄武爲其黑。是故如來治坎而發明。普賢爲智相。主萬行。觀音爲大悲之首。治凶危。爲上將。文殊爲覺蒙之首。常爲接信之師。互體交參。以持佛家之法。皆令衆生住於中道。處恬和之性。智慧益物。以是身皆金色。目髮紺青。體白而相黃。爲應真和氣也。皆爲無形之形。無色之色也。若以其體用也。一一菩薩。總具智德無邊。次其法則。常以文殊爲創信之首。今以南北。且立東西之一門。若論互體重玄。一方總俱有十。經云。一切處普賢菩薩。一切處金色世界。一切處文殊師利。一切處不動智佛。經云。佛身充滿於法界。普現一切衆生前。應受化器悉充滿。佛故處此菩提樹。一切佛刹微塵等。爾所佛坐一毛孔。皆有無量菩薩衆。各爲具說普賢行。如是一方。即十方無盡。一塵。即刹海無窮。今爲化儀。各示方分總別。今言十信者。信何等位。決定成於十信之門。如經十信中。光明覺品云。十方一切處文殊師利。於十方一切處。說十方一切處法門。歎佛十種果德。以成信位。如光明覺品說。又令起信根者。轉更明淨。文殊師利又問十首菩薩等。業不知心。心不知業等。十問。

令起信者。自身觀照。轉令深固。經云。諸法無作用。亦無有體性。是故彼一切。各各不相知。又作水流。火焰。風起。大地所生。不相知喻。又下頌云。分別觀內身。此中誰是我。若能如是解。彼達我有無。如是文殊師利。問十首菩薩。所成十信觀行之門。具如問明品說。又賢首品中。從凡夫位。以信爲首。決定取佛大菩提果故。從凡夫地。信十方諸佛心不動智。與自心無異故。只爲無明所迷故。無明與十方諸佛心。本來無二故。從凡夫地。信十方諸佛身根本智。與自身無異故。何以故。皆是一法性身。一根本智。猶如樹枝。一根生多枝葉等。以因緣故。一樹枝上成壞不同故。從凡夫地。信如來十住十行十迴向十地。我悉盡能行之。何以故。自憶無始時來。波流苦海。無益之事。尚以行之。何況如今有益之事。菩薩萬行。濟衆生事。豈不能爲。從凡夫地。信十方諸佛皆從三昧生。我亦當得。何以故。諸佛三昧。皆從如來自性方便生。我亦具有如來自體清淨之性。與佛平等。從凡夫地。信十方佛一切神通。我亦當得。何以故。諸佛神通。依眞智而得。我但依眞性智中。無有煩惱。無明成智。一切業亡。唯有智慧。通化自在。從凡夫地。信佛智慧。我亦當得。何以故。一切諸佛。悉從凡夫來故。從凡夫地。信

佛大悲普覆一切。我亦當得。何以故。諸佛大悲。從大願起。我亦如諸佛發大願故。從凡夫地。信佛自在。我亦當得。何以故。諸佛自在。於性起法門。智身法身。入衆生界。不染色塵。諸根自在。我亦不離性起如來智故。從凡夫地。信自發心。經無盡劫。修功德行滿。位齊諸佛。不移一念。何以故。爲三世無時故。如是從凡夫信解。始終徹佛果位。如上所發十種信者。必能決定成就十信之門。住於堅固之種。永不退轉。又十信中。文殊師利及覺首等十首菩薩。皆從十色世界來。所謂金色世界者。表本白淨法中來故。爲明信心依本信故。妙色世界者。爲依理事自在妙用而生信故。蓮華色世界者。依行能信故。爲蓮華表萬行故。蒼蘊華色世界者。表從福慶之色。以理智大慈中和性而生信心故。五色之中。黃色爲最。此爲應眞色。亦中宮色也。表中道色故。爲此華爲黃色華故。此信心菩薩。爲智慈中和之色。應眞世界來故。優鉢羅華色世界者。其華赤黃色。兼有紫焰氣。表一行行一切行。能純能雜而生信故。寶色世界。表智慈法行成信而可貴故。金剛色世界。表以佛果德而生信心故。必能決斷諸煩惱故。玻黎色世界。似水精。表信心本清淨故。平等色世界。表信法界平等無二故。如是十色世界。皆是十信。

菩薩所信之法門。皆從自信法門中來故。名曰從如是世界中來。已下本所事佛。所謂不動智佛。無礙智佛。解脫智佛。如是十箇智佛。即是佛果中佛。明信自智從佛智果爲因故來。表不因佛果。不成信故。其十住位中。昇須彌山頂。於兩足指端。放百千妙色光明。明前十信位。於普光明殿。兩足下千輻輪中放光。表信位在凡。未離凡地。光出足下。爲表以信爲初因。其位最下。今說十住。上昇須彌之頂者。明十住初心。證法頂故。從地昇上。至相盡處故。陟山王頂。至法王位處故。明其止爲山也。以入真實證。非止不會。於兩足指端。放百千妙色光者。爲明足指。以良爲手足之指。初取聖道。非止不明。履踐之始。表創從十信凡夫之位。極始在十住初首。履踐如來法王聖蹤。以其定門。普觀凡聖一切境界。性相無礙。色無不妙。故稱爲光。如本業瓔珞經云。修三賢法。入聖位。法流水中。心心寂滅。自然流入妙覺之位。然此華嚴經意即不然。識滅時亡。情塵頓絕。唯眞智境。一念則五位齊明。爲全將佛果以爲因故。設凡夫住世百年。及以多劫。而於自見。不見須臾可遷。不見當成佛。不見已成佛。不見現成佛。十住之位。法既如是。更有何生不成佛耶。更有何生而成正覺。此華嚴經。是本法界門。一

切諸佛。本住大宅。一切佛子。究竟所歸。化身權乘。總居其外。若有入者。一入全真。此位中初發心住菩薩見道。住佛知見。入佛知見。直與如來同身心性智相故。頓印五位行相。總在其中。如持明鏡。普臨衆色。此經法門。法合如是。所有歎說。應如是知。應如是信解。爲法界法門。圓無始終。於一念中。歲月晦明。重重無盡。一毫之內。佛境衆生境。色相無邊。一成一切成。一壞一切壞。此十住位中。有十箇菩薩。下名悉同。名之爲慧。本從來土。皆號爲華。從十箇華國土來。本所事佛。下名悉同。名之爲月。釋云。此位自己證真。善簡邪正。名之爲慧。理事齊發。開敷若華。以開敷法門爲國所居。得法惱除。清涼如月。名爲本所事佛。此之名目。總是十住位中。所證法門。非虛名也。經云。爾時法慧菩薩。以佛神力。入菩薩無量方便三昧。以三昧力故。十方各千佛剎微塵數世界之外。有千佛剎微塵數諸佛。皆同一號。名曰法慧。普現其前。以十三種加法慧菩薩。十三加者。語業加。以言稱歎善哉善哉。身業加者。以手摩法慧菩薩頂。智業加者。經云。即與法慧菩薩十種無礙智。及此土如來光照其身。是爲十三。十方佛所以同名爲慧。此十住法。證聖位法流。已入法界大海。同佛入聖位智慧。

故。是以佛與法慧菩薩名同。爲表法同故。又明十住法門因果齊故。佛位果德。菩薩爲因。因與果體不異。是故同名。說此十住法時。昇須彌山頂上。有六品經。共成十住法門之行相。一昇須彌山品。二偈讚品。三十住品。四梵行品。五初發心功德品。六明法品。但依此六品經中。解行法門。修學悟入。必能成就十住法門。住佛種性。生如來家。爲佛眞子。不同權教。初地菩薩。始生佛家。或說三賢菩薩。以誓願成佛。此華嚴經。直論實證位。不論誓願。爲此教門。總一時一際一法界。無異念。前後情絕。凡聖一性。不論情計。應以無念無作法界門照之可見。若立情見。不可信也。設生信者。懸信佛語故。非是自見。若自見者。非情絕想亡。心與理合。智與境冥。方知萬境性相通收。若不如斯。心常彼此。是非競作。垢淨何休。若也稱性情亡。法界重玄之門自達。一多純雜。自在含容。總別之門。圓融自在。於利生之法。善達諸根。隨所堪能。悉皆成益。敬承親近者。皆能友之。如昇夜摩天宮。說十行品。及如來於兩足踏上。放百千妙色光明。爲表依空建行。始可理事自在。明十住之位。證法身本智。十行之位。以法身根本智無礙。方行萬行。行亦無礙。若不見法身本智。所行萬行。皆屬人天因果。

皆爲有漏生滅之福。以法身自智慧。用治諸惑。以萬行悲濟衆生。法身智身。任無作大悲。一時頓用。雖寄七地悲增。八地智增之行相。此華嚴法界門。十住初位。總該諸位。在十住初門。位同佛果。爲一法界體用故。以一位中。具十波羅蜜諸十法故。以諸法重玄門照之可見。此乃總是如來藏身普賢菩薩世界海漩法門。此乃如日月照臨。盲者不見。非日月咎。應自責躬循德。可以頂敬。以定慧觀之。如來藏身者。即法身也。諸福智海。莫不居中。故稱爲藏。若不見法身。一切福智大慈大悲。悉皆不辦。總屬生滅。世界海漩者。悲智觀根。屈曲徹俗。身土及業重重。衆生重重。諸業各別。大悲普救。根無不盡。故名之曰海漩。漩者。甚深漩復義也。像此佛果位中菩薩。一入法界之門。攝重重衆生根業盡故。無出世心。永沒生死大海漩流。無出沒故。此十行門。同普賢行。前十住門。同文殊師利法身根本無相智慧。二人齊體。互爲主伴。中間無作智。即爲佛果。三人體一。寄安五位。用接凡迷。若有凡夫。信滿發心。十住之初。三身同得。文殊是佛法身。普賢是佛行身。無作之智果。是佛報身。常以文殊法身。無相妙慧。以爲先導。說時先後。證即三身一時。法合如是。廢一不可。若廢文殊。存普賢。

所有行門屬有漏。若廢普賢。存文殊。所證寂定是二乘。若廢佛。存普賢文殊。佛是覺義。無覺者故。以是義故。三人不可廢一。若廢一。三不成故。是故三乘權教中。無此三人始終不相去離。以教門未實。總皆化身。權逐小根。且略權施。待其熟故。方遷就實。如法華涅槃。總是漸漸遷向實教。如此經中。十住初位。即是十行十迴向十地等覺位。總得其初。及得其終。互相貫通。一位中得五十法門。以互相徹故。一一位中。二千五百總別之義齊現。乃至無盡諸位等。進修行相層級。不廢漸漸而是一時。不廢一時中漸漸。此十行位中。隨其十方。各有一大菩薩。來至佛所。各將十佛刹微塵數菩薩而來集會。十箇上首菩薩。下名悉同名之爲林。本從來國。下名悉同。名之爲慧。本所事佛。下名悉同。名之爲眼。十箇上首菩薩。下名悉同。名之曰林。林有五德。一建立德。二身根幹枝條。緣互相生無生德。三華葉果實成益德。四能障炎暑清涼德。五人龍鳥獸鬼神所歸德。一。何謂林爲建立德。謂如大林。內有龍神所居。外無大風所折。若不如是。不得建立高顯成林。明此位菩薩。內有大智之龍。常以大慈悲神而自守護。了境自寂。外無色塵境風所折。異道邪論。以智摧之。無能所伐。而建萬行。與一切衆

生皆共同之。常爲利益故。爲建立德。二。何謂身根幹枝條。緣互相生無生德。爲明樹身根幹枝條上。各各求能生所生性。了不可得。但爲緣生之法。緣緣無所生。本來不生生。本來生不生。爲明此位菩薩所行行無盡門故。爲以法身本智爲先導故。常行萬行。於身於境。求能行所行。了不可得。但以法如是行故。三。何謂華葉果實成益德。如樹林華敷可觀。令人愛樂。葉能映障炎熱。令得清涼。果實資養衆生。飢渴者皆令充足。明此位菩薩常行萬行。令人天樂見。廣布大慈悲之葉。令人親而不捨。施大智之果。充足法界衆生。皆令滿足。本願方終。四。云何障炎暑清涼德。謂如林。隨所歸者。皆得離暑。獲清涼樂。如林。爲明此性都無有心。此位菩薩。所歸依者。隨其根性。皆得清涼。本性無心利與不利。五。云何鬼神所歸德。謂好茂林。人多所採。龍多所居。衆鳥所都。明此位菩薩。亦復如是。以建萬行之林。衆人所歸。採其衆德。龍鬼所居常恭敬。鳥獸所歸離恐怖。又林爲多義。以此位菩薩。建行衆多故。又以行多故。功德亦多。言以法身悲智行諸行。功德如林故。是故菩薩。下名悉同。名之曰林。何故本從來國。下名悉同。名之曰慧。凡夫人以土地所居。名之爲國。此位菩薩。以定慧解脫安養。

自他平等。名之爲國。皆令離苦。名之爲國。地水火風所居之國。是衆生業之影像。非是實故。法身智慧解脫。是諸菩薩常住本體之國。非業幻生之國。是故菩薩以慧爲國。又此位菩薩。以建萬行行解利生。行能同事。慧能設教。利樂人天。名所居之國。何故本所事佛。下名悉同。名之爲眼。此華嚴經。以事表法。以其佛名。同已所證。所證法處。名之爲佛。爲此位菩薩。以行益衆生。善能觀根。稱根中法。不失時度。名之爲眼。經云。爾時功德林菩薩。承佛神力。入菩薩善思惟三昧。入是三昧已。十方各過萬佛刹微塵數世界外。有萬佛刹微塵數諸佛。皆號功德林。而現其前。還如前十三種加功德林菩薩。只如佛果位內菩薩。法身悲智。常現在前。定慧法門。常當具足。何須入定。諸佛來加。爲諸菩薩。設教度生。要成軌則。言佛神力。推德於尊。雖法界體齊平等。爲化儀故。須存師弟。爲化儀故。入定觀法。出定方說。三昧者。名爲等引。引生正解。名善思惟。十住之內。過千佛世界。十行之內。過萬佛世界者。表位增廣。化儀軌則。行相眉目。法合如是。然其眞性。皆滿十方。他方所來諸佛。與入定菩薩同名功德林者。明因果俱齊。法智一種。以此所來諸佛。與入定菩薩同名。十三種加者。一語加。

二手加摩頂。三與十種智。及此土如來光照其身。以語加者。表法不謬。以手摩頂者。法身智悲知見解脫相及故。又摩頂者。安慰之相。與十智者。明菩薩智與佛果齊故。名之爲與。又推德於尊。謙和離慢故。名之佛與。於經中皆云。法如是故。自善根故。皆是化儀軌則。故有此言。此十行位。總有四品經。共成此位法則之門。一昇夜摩天宮品。二夜摩天宮偈讚品。三十行品。四十無盡藏品。十行門中所有法門。當依此四品經修行。理事悉皆具足。如說十迴向品時。何故昇兜率天。因何如來兩膝之上而放光明。何故上首菩薩。下名悉同。名之爲幢。所從來國。下名悉同。名之爲妙。本所事佛。下名悉同。名之爲幢。爲兜率天。於欲界中。上下處中故。如四天王天。總是帝釋所攝。連妙高頂。總是一天之界所收。夜摩天名第二天。四天王天。帝釋妙高。俱連地界。夜摩天已上。方是空居。以次兜率天。上下居中。向上即化樂他化二天。以此天於欲界處中故。故於此天和會理事。會於中道。迴理向事。迴事向理。理事無礙。成智慈妙用之門。故名迴向。夫十住初心。理事元來自會。非在後位。始有迴向。爲化衆生故。名目法則須存。從初發心住已後。五位之內。理事本自迴向。今此第三位中。迴向前十

住十行。一一法位無礙。說名迴向之位。不在第三普和諸位。名爲迴向。託事表法。故於此天說十迴向。如來膝上放光者。爲膝迴旋屈伸之所自在。莫過於膝。故於膝上。放百千億那由他光明。用表理事涅槃生死無礙。卷舒自在。亦是以事表法。此之一部之典。名言。境界。處所。身相。名目。及放光明。總其所表自證法門。此位中上首菩薩。名之爲幢。爲明十迴向菩薩。智悲自在。能壞自他惑業。於生死中。能建衆德。名之爲幢。幢者。建德不傾動義。降怨義。摧壞義。堅固義。勝智立。法幢豎。建大慈。心堅固。摧慢山。遊寶路。藉蓮臺。成妙悟。是故此位菩薩。名之爲幢。爲以不動無作智悲。能破自他生死故。此華嚴經教。十住十行十迴向十地。位位有佛果故。又此位菩薩。能建勝德。常處生死。誓度一切無盡衆生。而智無怯懼。名之曰幢。以了無明爲智故。有忻厭者不可爲。又行施波羅蜜時。若有乞者。乞諸財寶盡世所有。及身若命盡世所有。皆悉歡喜。心不傾動。名之曰幢。幢者。不傾動義。施有二種。一者以法施。二者事施。以法施者。以法施人。無我所故。一切無念。名爲法施。事施者。以物與衆生。於身命財。所求無悋。此位菩薩。行二種施。尋常無懈。廣如此十迴向位中說。何

爲所從來國。名之爲妙。明此位菩薩。智慧妙用。以妙用自在。不滯有無及諸見量障礙等過。名之爲國。何爲本所事佛。同名爲幢。與己同號。明此位菩薩。既成妙用。與佛妙用。理事因果。當位體齊。還同前十住十行當位。與所事佛因果體齊。位位如是。爾時金剛幢菩薩。承佛神力。入菩薩智光三昧。入是三昧已。十方各過十萬佛剎微塵數世界外。有十萬佛剎微塵數諸佛。皆同一號。號金剛幢。而現其前。還如前十三種加金剛幢菩薩。言承佛神力者。推德於尊。師弟之敬。入智光三昧者。名之等引。入是三昧。引生無量教光。以根本智爲光體。差別智爲教光。隨根與益。智能破闇。光者是教。爲教能破迷惑故。發生明解。開一切衆生智日故。令其衆生密雲昏夜不迷亂故。能決盲聾。開耳目故。能令邪慢之山悉傾倒故。教光如是不可思議。前十行位。功德林菩薩入善思惟三昧。此十迴向位。金剛幢菩薩入智光三昧。以明五位層級。次第增廣。眉目行相。前位明始善思惟。此位明妙用自在。教光遐照。前位過萬佛剎塵。此位過十萬佛剎微塵世界外。有十萬佛剎塵佛來。亦明五位次第增廣進修之門。皆亡情以定慧門入重玄理事照之。方可迷解。不可懸頭斟酌。生增上慢。十三加者。以言善讚。以手摩頂。

十方諸佛。與金剛幢菩薩十種智。此土如來光照其身。十三加者。以言讚歎。爲明所說法者及法不謬故。手摩其頂者。表說法者與佛智相及故。與智慧者。明說法者與佛智同故。此土如來光照其身者。明與佛教光合故。又以光覺觸。許令說法故。十三加意者。欲令後世斷疑成法。令生信故。論其實體。總是諸佛隨諸五位行門。依本位法而立其名。而現其身。與衆生作法軌則。令其做學。使令悟入。佛既立教。學者必得不虛。所以同名者也。十住十行中已釋訖。此位之內。有昇兜率天宮品。兜率天宮中偈讚品。十迴向品。此三品經。成斯一位十迴向法門法用軌則。學之者依之成則。如說十地品時。何故不從兜率天次第而昇化樂。何故越化樂天而昇他化自在天。爲明十地菩薩法門。功德廣博。攝境超前。不依次第。又明十地妙用無方。蘊功自在。說處亦須自在。同彼天稱名爲自在。又明十地菩薩。以稱理體性。自體無心。無自心化。皆因衆生。起大悲智。因他起化。德似彼天。以處表德故。是故於他化自在天而說十地。一明功高勝前故。須超次第。二表自在而化衆生故。於此天處而說十地。如普賢等覺位。在第三禪。集八禪天衆。入佛華三昧。說百萬億偈。此之一會文廣。不可於世傳持。如是超間位。倍

倍於前。佛華者。佛行也。入佛行三昧者。是普賢法界行也。何故十信十住十行十迴向四位之中菩薩。但舉十箇上首菩薩同名。此十地位中。何故舉三十七箇菩薩同名爲藏。解脫月菩薩。何故獨名爲月。此一部之教。各各菩薩。與佛果功齊。皆十方來佛。與入定菩薩同名者。爲表當位之內。菩薩證入。與佛齊。因果相似。以成龜鏡。然六位五位中層級。非無次第。同別之義。影互參差。能純能雜。能同能別。能成能壞。以六相總別同異成壞門准之可見。六相者。一總門。二別門。三同門。四異門。五成門。六壞門。此六門義。一門中具六。互爲純雜。不可廢一也。十重玄義亦然。此之文繁。出於別本。但且影響參之。然十地法。且於別門中。立層級處。說其行相。此十地位。爲中道果終之教。是故前位膝上放光。此位如來眉間出清淨光明。名菩薩力焰明。以百千阿僧祇光明以爲眷屬。眉間光者。表中道果終之義。此眉間光。從初會中。如來現相品中。如來於眉間放果德光明。入足下輪中。明以果成因。便令普賢菩薩。示佛果德。令其信樂。既生樂已。便說信門。即於光明覺品中。還從兩足下輪中。放出初眉間放入果德光明。用照金色世界不動智佛。以成信位。以次欲說十住品時。昇須彌山頂。於偈讚品

中。於如來兩足指端放光明。以次欲說十行品時。於偈讚品中。於如來兩足踏上放光。以次欲說十迴向品時。於如來膝上放光。如今說十地法門。還於初會之中眉間放中道佛果光。終而復始。至果極際。三乘中十地。不同於此。行相全別。十地菩薩。見道未能明了。初會中。如來眉間放佛果光明。名一切菩薩智光明普照耀十方藏。此光使令菩薩入佛果德門故。還放果光。使令入果。以因果忻修相似故。經云。爾時世尊。欲令一切菩薩大衆。得於如來無邊境界神通力故。放眉間光。名一切菩薩智光明普照耀十方藏。其狀猶如寶色燈雲。其光名爲普照耀十方藏者。即照此十地之藏。一一地內。皆徧法界虛空界福智大悲之藏。今此十地。即是初會之內。如來使令菩薩所成之門。終而復始。以放眉間光明相似故。放光處相似故。前初會放光。其狀猶如寶色燈雲。此十地放光。名菩薩力焰明。此前後光明。因果相似故。燈之與焰相似故。前之放光。名菩薩智光明普照耀十方藏者。即明如來開悟菩薩智。令諸菩薩至此十地故。此十地品中。如來所放光明。名菩薩力焰明者。即明菩薩自力功極。而登十地。前光開發。後明自力。以自力故。至於如來初開發處。稱佛本心。始終相似。是故明此十地中道果終之門。後

徹初故。前光舉果勸修。後十地放光。明自修至果。是故光明名菩薩力。以菩薩修自精勤力。無退轉力。不懈怠力。而能修習至此十地如來法界藏故。是故菩薩。悉名爲藏。藏者。含藏蘊德。不遺失義。此法界自體清淨無漏法門。體該法界。含藏一切大智大慈諸功德故。興萬行雲。普雨法雨。潤衆生故。此位菩薩。稱如斯法。名之爲藏。此位中有三十七箇菩薩。同名爲藏者。爲明此十地法門果終。意欲辯知正道助道故。故立三十七菩薩。成三十七助道法門。非正果故。十住已來。菩薩所行。皆是助道。非是正位故。意欲明行所行者。是爲助道。無住無行。任眞自體。名之爲正果故。若以初發心住。以法性無相根本智。不離無作用之體。行諸萬行。菩薩與佛。因果本來體齊。若簡佛果無作無修。菩薩正加行已來。總名助道。以動寂無礙。正助元來不異一法門也。眉目不可不簡。體用圓寂。正助全同。此即全別全同門。還以重玄門思之可解。聞所未聞之法。聞之不疑。全別全同。境界難解。佛及凡夫。各自別有。是全別義故。二見恆存。若全同故。便成滯寂。圓融道理。事理不礙。若也法門。全分兩向。是凡夫法。全合一體。是二乘法。但以理事自在。其道在中。留心滅之。此亦不可。以心存之。此亦不可。

此助道行門。與正智果德無作之門。體合無二。事中軌則。不可不分。以其體用。不可一向全別。以全同作全別。以全別作全同。不可全別無全同。不可全同無全別。如迷此同別二門。即智不自在。如解脫月菩薩。三十七箇同名爲藏。三十七菩薩外。獨自一箇名解脫月。何以故。同名爲藏者。總明十地法中。正助之內。爲同法衆。三十七即爲其主。唯解脫月一箇菩薩獨是伴。明非同法衆。故立別名。以爲賓主。須有啓請擊難十地之法。令現在及後世。得聞正法無疑經意如是。應如是知。是故此十地法門。即是解脫月。爲衆請法首。金剛藏菩薩。爲衆說法首。已上可知。爾時金剛藏菩薩。承佛神力。入菩薩智慧光明三昧者。十迴向位中。金剛幢菩薩。入菩薩大智光明三昧。今此十地。金剛藏菩薩。入菩薩大智慧光明三昧。此位菩薩智增明故。妙用決擇增明。更加其慧。此乃明位位層級法門。漸增勝故。然諸餘位。非無慧用。入是三昧已。即時十方各過十億佛刹微塵數世界外。各有十億佛刹微塵數諸佛。同名金剛藏。而現其前。則以十三種法。加金剛藏菩薩。一以言讚論。二十方諸佛與無能映奪身。三與無礙樂說辯。四與善分別清淨智。五與善憶念不忘力。六與善決定明了慧。七與至一切處開悟衆生智。八

與成道自在力。九與如來無所畏。十與一切智人觀察分別諸法門辯才智。十一與一切如來上妙身語意具足莊嚴。二十十方諸佛手摩其頂。十二此土如來光照其身。與意加者。欲令後世斷疑成法。令生信故。一如經說。以言讚論。許說無疑。以手摩其頂。安慰許智相及。何以同名者。明金剛藏菩薩。證法因果。與佛所證相似。如五位菩薩。與佛因果俱齊。皆以同名佛印之成法。令現在衆及後世無疑。并此土如來光照其身。爲十三種加。如等覺位中。普賢境界。准菩薩本業瓔珞經。在第三禪說。來文不備。不可和會。本業經。是說華嚴經竟。化三乘衆。於後重於菩提場中更略說。彼經自有明文。此五位教門。依品次第。今且略說。後法界品內。善財童子。求五位菩薩善知識。一一行之。師弟軌則行相。利益衆生。後當更明。地地法門。一一別相。隨文釋義方解。略會三乘十地門差別。三乘十地。教行印信全別。上下披讀。思之可見。三乘十地。無似此華嚴法界佛所乘門法門次第。經中五位六位行門。皆以菩薩自證果德。爲己躬之號。即如十信位中。與覺首等十首菩薩。十住位中。法慧等十慧菩薩。十行位中。功德林等十林菩薩是也。如前所述。皆以當位之內。自證本法。名之所從來國。皆以根本智導利衆生。

觀根滅惑之智。號之爲本所事佛。當位之內。有十方同名諸佛。來現其前。十三種加成信。表因果體齊。以現同名。總別通徹。時劫互融。無盡重玄。一多相徹。一切諸法。皆如帝網。同別重重無障礙。三乘之中。三賢十地。無此印信。行相全別。有修真者。須知權實。勿滯其功。滯權迷實。虛煩多劫也。

大方廣佛新華嚴經合論卷第五終

大方廣佛新華嚴經合論卷第六

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

第六重令善財證法別者。如經中從第二會光明覺品。於如來兩足輪下放光明。徧照百千那由他三千大千世界。乃至如是無量無數無邊無等。不可稱不可量不可說。盡虛空徧法界。所有世界。四維上下。亦復如是。蒙光照及。一切處金色世界。一切處文殊師利。乃至十色世界中。覺首目首等十首菩薩。各與佛刹微塵數菩薩同時發來。各說一法。如是十法。共成信位法門。如善財童子。於覺城東。見文殊師利。說種種法。而生信心。還做前信位之中。文殊覺首等十首菩薩所成信位。第三會昇須彌山頂。法慧等十慧菩薩。各說一法門。共成十住。如善財童子。南行至妙峰山頂。見德雲比丘。及已下十善知識。還如前經中。昇須彌頂。法慧等十慧菩薩。說十住法門。第四會昇夜摩天宮中。功德林等十林菩薩。

各說一法。共成十行法門。如善財童子。南行至三眼國。見善見比丘。及已下十善知識。還如前經中。功德林等。說十行法門。一一以行行之。第五會昇兜率天宮中。金剛幢菩薩等十幢菩薩。各說一法。共成十迴向法門。如善財童子。南行至廣大國。青蓮華長者。及已下十善知識。還如前經中。金剛幢等十幢菩薩。所說十迴向法門。善財一一詢友。以行行之。第六會昇他化自在天宮。金剛藏等菩薩。說十地法門。如善財童子。至此閻浮提迦毘羅城。婆珊婆演底夜天。及已下十善知識。還如前經中。他化自在天上。金剛藏菩薩。說十地法門。善財詢友。一一以行行之。第七會昇第三禪。爲八禪衆。說一生補處菩薩。入佛華三昧所有法門。十一地等覺位中普賢境界。如善財童子。至摩耶夫人。及已下十善知識。還如前瓔珞經中。重說華嚴次第。十一地法門普賢境界。善財詢友。一一以行做而行之。令成後則。第八會佛地法門。於菩提場中始成正覺時說。如善財童子。至海岸國。大莊嚴園林。廣大樓閣。名毘盧遮那莊嚴藏。彌勒菩薩所。此爲善財佛果圓滿善知識也。還如前經中。如來於菩提場中始成正覺。及三十七如來出現品。如經中。如來出現品前。即是普賢行品。出現品後。即是離世間品。還是普

賢菩薩說。善財童子一一倣之。還從前五位。摩耶夫人十一地等覺位中。乘普賢行。而自成正覺。出現世間。還以普賢行。導引衆生。令離世間。善財童子還以倣之。從彌勒菩薩後。自見其身入普賢身中。即明自乘普賢行。自成正覺。出現於世。常以普賢行。導引衆生。令離世間。自見其身入普賢身者。明行滿同普賢故。法相似同一體故。如出現品。即是經中如來自放眉間光。灌文殊頂。口中光。灌普賢口。令此二人。共相問答。明因果理事交徹相入故。以此二人理事體用二門。成佛果故。出現世間。如善財童子至於彌勒所。彌勒菩薩。還令善財。還見初善知識文殊師利。善財聞已。憶念之間。便聞普賢菩薩名。乃入無量三昧門。便見其身入普賢身。及於彌勒樓閣中。會三世事。在於今時。即是善財童子功窮果極。彌勒菩薩而與會之。令成法則。令使後學信解證入無疑。經中但有法門。未有人求學者。故令善財詢友。一一以行行之。一如前經之法則。若也空施法則。還恐在行猶迷。故令善財以行行之。令使後學無滯。彌勒令善財卻見文殊。明從法身理體根本智爲因。見彌勒菩薩。是善財乘法身本智爲果。及諸善知識所。行普賢行。以成自己佛果。見彌勒之後。入普門法界。自見其身入普賢身者。雖成

正覺。常以普賢行利益衆生。即明文殊普賢彌勒佛果。三人始終一處。表通因徹果。此三人之道。是古佛之大都。是源始之法際。若迷解者。即本來全得。處迷者。自沒輪迴。爲古佛道法。本來常如是故。非生滅法。無作無爲也。修之者。及以放逸者。皆有作者故。忻寂不當。放逸還非。以自情纏。乖其聖性。是故修道者。以定慧力。善自觀之。勿滯其事。

第七明六位菩薩來衆別者。且如權教之內。所說菩薩諸地位次。但說假眞如爲因果。仍地前三賢。未能正證。初地之中。一地證一眞如。十地證十眞如。證十眞如之後。方能始見佛性。前證眞如。復言有十眞如障。眞如既能成障。明知權教之中。即施設假眞如。非本眞也。所說地位。三乘同聞。聲聞人天共會。此經不爾。總是果位菩薩。六位之中。一位具十。又當位之內。十箇菩薩。下名悉同。各從十方。與十佛刹微塵數菩薩來至佛所。信位之內。俱名爲首。初名覺首。次名目首。有十首菩薩也。創初起信。即有一切處文殊師利。所從來國。金色世界。本所事佛。皆號不動智。華嚴經即事表法。無一事不表法門。金色世界者。白法也。金爲白色。明法身本體也。不動智佛。明法身之內。無作性智。是根本

智也。文殊師利。即是能證之因。不動智佛。即是所證之果。今舉此因果同體無二。用成十信之初門。還令諸信者。信果成因。還修果法。以成因位。十住初心之上。便成正覺。爲從證果本智爲因也。是故此經下云。以少方便。疾得菩提。不同權教菩提。同有爲故。立能證所證也。一念之間。無有能所。能所盡處。名爲正覺。亦不同小乘滅能所也。了能所本無動故。此乃住法性故。動寂皆平。爲本智非動寂故。妄謂爲動。愚夫不了。棄動而求寂。爲大苦也。故維摩經云。五受陰洞達空爲苦義。爲小乘有忻厭故。即苦生也。以此文殊等十首菩薩。還興果德。示悟衆生。法華經云。以佛智慧。示悟衆生。使得清淨故。以此義故。覺首等十首菩薩。皆從本所事佛。下名皆同。名之爲智。所謂不動智佛。無礙智佛。解脫智佛。如是十智如來所來。皆表所從本智所來。來處是己身之智。所來者是因也。即明因從本智果來。猶如全將金體以成環釧。全將佛體以成菩薩。全將佛果以作自身。今還以自佛本智成初證也。一切衆生。總皆如是。今從佛所來者。即表初發心時。頓證本智。如佛體用。以成初覺。以此正覺。爲初證之因。是故彼十首菩薩。以表因從果來。次十住位中。十慧菩薩。所謂法慧菩薩。一切慧菩

薩。勝慧菩薩。如是等十慧菩薩。各各與佛刹微塵數菩薩來至佛所。所從來國。本所事佛。所謂殊特月佛。無盡月佛。不動月佛。如是等十箇月佛。所表是果。法慧等十慧菩薩。所表是因。還表因從果來。佛皆爲月者。表此十住之內。創證果德。無明熱除。性清涼故。以此義故。表果德清涼故。佛名爲月。像此位初證者故。還同體清涼也。經云。法慧菩薩。入菩薩無量方便三昧。以三昧方故。十方各千佛刹微塵數世界外。有千佛刹微塵數諸佛。皆同一號。名曰法慧。普現法慧菩薩前。慰歎善哉。如此言千者。爲一一佛。皆滿十方故。不同權教。有數量彼此國土也。此則明此位之中。創發心時。因果相成。無差別體故。是故菩薩與佛號名同。但法慧菩薩。爲印因果爲一體故。佛名與己同名。表一切證道者皆然。前十信中。不動智佛。是根本智。此十住中。佛果名號月者。是隨位進修獲益之果。因果者。即是非因果之因果。但以無依止處。名之因果。亦不同外道。以情撥無因果。不同人天凡夫。繫成因果。不同此二。名爲佛因果也。如此位中。十住初首。證此非因果之因果也。是故初發心時。即是佛故。如此位之中。無上慧菩薩頌曰。凡夫無覺解。佛令住正法。諸法無所住。悟此見自身。非身而說身。

非起而現起。無身亦無見。是佛無上身。問曰。何故前信位之中。十首菩薩。不入三昧。即便說法。又無同名覺首佛而稱歎。何故此十住位中。法慧菩薩。入三昧。始說法。又千佛世界微塵數佛。與法慧同名。皆號之爲法慧。來慰歎。何故前十信無此等相者。何爲也。答曰。爲信位。但示果法。因果同舉。但令生信。未有實證。故不入三昧。以十住之位。入真實證故。以此義故。須入三昧。方能眞證。爲與衆生成證法則故。爲正證果德。同號佛來。印成因果一味故。前信位中。但且成信。未正證故。以此不入三昧。亦無同號佛來。印成因果。當如是知。如是信解。如是千佛。已次萬佛者。明進修行相故。如十行品中。功德林菩薩。入菩薩善思惟三昧。入是三昧已。十方各過萬佛刹微塵數世界外。有萬佛刹微塵數佛。皆同一號。號曰功德林。而現其前。歎慰功德林。還如前位。因果同故。其佛名號。與菩薩名同。還以菩薩爲因。佛爲果德。二體同故。是故名同。十林菩薩。本所來國。皆名爲慧。功德林等十林菩薩。各各與佛刹微塵數菩薩俱。從十方萬佛刹微塵數國土外。諸世界中來。其國名親慧世界。幢慧世界。寶慧世界。如是十慧世界。本所事佛。所謂常住眼佛。無勝眼佛。無住眼佛。如是等十眼佛。

問。何故前十住位中。同名法慧佛。只舉千佛刹微塵爲數。所有菩薩來。亦過千世界外來。所來世界名同爲華。本所事佛。名同爲月。何故此十行位中。本從來國。皆同名爲慧。本所事佛。同名爲眼。何意如是。答曰。爲十住位中。從凡創證果德。始從凡夫來故。國土名同。皆名爲華。爲創住佛所住。自佛智慧開敷故。證佛慧。初生諸佛家故。佛號皆同爲月。以表得法。清涼如月。此十行位之中。始終總佛。內外俱真。國亦以法爲名。佛亦以法爲號。前位始證。以表如月清涼。此位已眞純。名之爲眼。眼者法眼也。爲此行中。明法眼圓明。應機照俗。以成德故。以次千及萬數漸漸增廣者。明法界圓明。不增不減。但以佛果位菩薩。引生方便。引接凡庸。令增勝故。皆爲如來密意方便故。如佛名經。無量聲如來。日月光明世尊。偏增致敬。重加三禮。云滅罪名者。如來方便。引凡心生。令策志故。豈謂諸佛體同一味。功德有差別邪。今時佛果中諸菩薩。安立地位。境界增廣。如是漸次。言千佛世界。萬佛世界。乃至數終。一一數體。緣起相徹。一一數中。始終相入。無前後際。是諸佛密意方便故。猶如十錢。去一錢。十總無著。一錢十全。成爲諸數。如響應聲。同時緣起故。得初即得終。還以性齊時齊。

緣起同時故。今此中安立境界。法門如此。此下似闕十迴向文

初地菩薩多百法明門。王化多百佛世界。二地菩薩多千法明門。王化多千佛世界者。不同權教。實有分限。如前數法。互相徹入。又如人以指畫空。作百千微塵數分。復以手除之令盡。然彼空中無有增減。以情量故。見彼虛空數有增減。此亦爾，所有菩薩安立諸地法門增減。亦復如是。爲成諸有情故。使令進修。若也一概皆平。無心進也。凡夫無有策修之心。發心修至不修。方知萬法無修也。而實教菩薩。一得一切得。爲稱法體中無前後故。猶如帝網。光影互相參徹相入。無前後際也。亦如百千寶鏡。同臨妙像。一一鏡中。影像相入。色像齊平。如佛果位中諸菩薩。爲從性起法身根本智。爲十住之中創證心故。所有法門境界。皆悉依本。以體用通收。皆悉徹故。還以性齊。即時齊故。更有餘不齊之法。爲不可也。不同權學情障未亡。九地已來。未見佛性。所立地位。皆有分劑。而實可得。爲未見佛性。有假眞如障故。是故經云。十地差別。如空中鳥跡。如是地位法門。權施增減。爲逐衆生情故。體道者眞俗便爲一眞也。一切眞故。都無假法。不可於此圓教。作增減見。同其漸也。此經所有一切衆海。菩薩天龍諸神等衆。

皆佛果位海諸菩薩衆。非是凡夫。欲令人者即同聖故。明毘盧遮那攝化境界。等衆生遍故。皆是佛果位衆。以化儀主伴故。如是果德位衆。共會成法。示悟衆生。成法之後。入法界品中。文殊師利。以此果德法門。出祇園會外。南行欲往覺城中。利樂於人。舍利弗六千比丘。路上發心。得十耳十眼。覺城東會。善財徧求諸友。一生佛果圓明。五百優婆塞。五百優婆夷。五百童子。五百童女。皆如善財。經文不可一一具陳。同會總皆如是。若也無緣。總亦不聞。如祇園羅漢比丘等。同會不聞不見如來說此華嚴經典。是五衆同會。於文殊所。同聞此法。悉皆同證之流。是故經云。此經不入凡夫手。能深信者。情過三乘權學之流。何況能證者。故此經賢首品中云。一切世間群生類。鮮有欲求聲聞乘。求緣覺乘轉復少。求大乘者甚希有。求大乘者猶爲易。能信此法爲甚難。是故當知。正集海會。未有人中凡夫。純是諸天果位菩薩集會。成其教法。文殊覺城所化。始明以此教法。將用利樂閻浮提衆生。善財等五衆。總表實得此法者。餘義如前所明。如是來衆。純是果位菩薩。來明果德。用備上機。都無權教菩薩。小乘。人天凡夫。因果等衆。來集此會。權教菩薩。至於九地已來。不預此衆。何況凡夫。何以故。爲行

六波羅蜜故。有雖行十波羅蜜者。由三僧祇劫成道果德故。不同此教。一時即一切時。非情所收故。出祇園會。文殊南行。六千比丘路上發心者。此明許聲聞。亦有最上之器。堪能入此最上乘中。又彼六千比丘。於舍利弗所。皆新出家。未忻小果。以器利故。方能發心。至此位流。若登小果。卒迴難得。如舍利弗。即是影響聲聞。非實聲聞也。即是已登佛位。入流接凡。以此義故。此經來衆。與權教不同。化佛設有處純會菩薩。無小乘者。亦不同此教。何以故。或有教說即因成佛者。即不行五位。或五位行相體用不同。如前已述故。如是准例。無有同者。法既不同。衆亦全別。又於此經中。所有來衆。有十種同法。與諸經來衆不同。一色身同。二法身根本智同。三慈悲智位次同。四言說法輪同。五來處同。六所成法則同。七與佛因果同。八事佛師弟同。九報身國土圓滿同。十懷疑獲益同。一色身同者。如五位中諸菩薩。各從十方來。一一方來衆。皆有十佛刹微塵數衆菩薩來。皆金色身。目髮紺青。與當位菩薩色身相似。諸天八部之衆。當類相似。明得法同。故報亦同。如初會中。有五十五種部類。雖別明行門。攝化異故。然其行相身色法門。五十五部。互相參徹。一行作多行。多行作一行。一身

作多身。多身作一身。相似故。前後十處十會例然。二法身本智同者。如十處十會中所有衆海。皆同如來法性身本智慧故。設有新學凡夫入會之者。見聞佛法。剎那證入。皆齊如來法性身根本智故。無有入會見聞法者。不同佛身智慧者。五百羅漢身在會內。不見不聞不知不覺此之大會。及所說法門。不同權教。菩薩二乘人天八部同會。見佛聞法獲益全殊。三慈悲智同者。法身本智。及差別智。慈悲體同。解行合故。爲文殊普賢佛果。始終一法故。如華嚴經三寶者。佛爲佛寶。文殊爲法寶。普賢爲僧寶。是古今佛之舊法故。若合即一切皆同。爲本如是故。非造作有。非成壞故。四言說法輪同者。如經中五位菩薩。各十方來。一一方。各有十佛剎微塵數菩薩來至此會。十方世界。皆悉如是。一時雲集。異口同音。十方衆海。一時說偈。皆同文句。名字恰合。一無差別。爲智慧同。法行同。所說法門。十方世界一種皆同。不似餘經之衆。解行差別。有得不得故。五五位菩薩衆來處同者。爲此五位菩薩所來會者。十方一切處皆至。又十方世界及微塵中。一一菩薩皆共住。爲居法界體。自他彼此遠近情盡故。總不出一塵故。亦本來無入故。不似權教。三祇未滿。諸見未亡。來至此已。各還本土。又未論一塵之境。

圓法界故。然通變皆有限故。皆言神通。非本法故。六所成法則同者。十信十住。五位六位。菩薩行門。十方世界同施設故。十方世界古今諸佛同此法故。頓示因果。在剎那中。其法元來無前後故。非同權教。因前果後故。十地位終。方始見性。地前菩薩。是凡夫故。設有地前成佛者。推爲誓願力能。非本法故。或推地上菩薩。引諸凡夫起勝行故。非論本法本來佛故。此華嚴經所施設法則。直論根本智佛自乘門。不論權教開三乘門。設多劫故。直明衆生本來自體無作者故。性本自法界元眞佛智慧故。以爲所乘也。七與佛因果同者。既是文殊法身智身。諸佛果德。普賢行門。本來一法。此諸衆海。皆悉同之。故初發心時。便成正覺。於一剎那際。皆得此之法者。不許於剎那際外有別時得者。即非本法故。若有人於佛法中見佛成道。作劫量延促處所而生見者。信亦未成。未論修道見道。是故修道者。莫作如是順情所迷。妄云修道。輪轉生死。無有休息。此是情量。非是佛法。是故此經來衆。皆與佛果位齊。還成佛果位法。若有見聞悟入。皆同佛果位。爲依本智慧法故。八事佛師弟同者。如因陀羅網。影互相徹。此十會法界海中菩薩。徧法界中一切佛所。皆有其身。奉事諸佛。成師弟之敬門。能同佛果。師弟

之敬不失故。不同權教。有自他佛故。有往彼佛所。來還歸自土故。不同此教。不移本處。不作神通。而依本法恆徧滿故。承事諸佛。能同別故。九報身圓滿國土同者。爲以實法故。而起信修。法既恆徧。身亦徧故。依法智行。身土皆圓。此以一圓即一切滿故。以無作智終大小量故。爲依本法身智身爲依。正報亦等故。十懷疑獲益同者。如初會中。五十五衆。一時同疑。心念同請。如來放光。示現果德。一時同益。諸衆各得一法。一人得諸人之法。已下九會。皆悉如是。如上來衆。十種同法。比於餘教。全無相似。此本智本法。本時本處。古佛本法。六位行門大衆之海。充滿虛空微塵之中。重重如是。一時集會。如此經中大衆之海。從前至後。皆是成就彰表如來所乘五位六位佛因果門。無有一人得三乘果者。皆以此法。十住初心。體用齊佛。依本智法故。不增不減。於法體性。任運利生。十處十會。來衆行相。隨文釋義。方可料簡。

第八明所施法門理事別者。如化佛權教中說。有情有佛性。無情無佛性。一切草木。不能成道轉法輪等。如華嚴經。即是越情實教。即不如彼化佛權宗。約凡化教。如功德林菩薩等十林菩薩。所從來國。國亦名慧。一切境界。總名慧體。

何以然者。無有情。無無情故。所以然者。無二見故。爲一眞智境界。無成佛者。無不成者故。夫有情無情者。此是依業說。夫論成佛者。非屬業故。若非屬業者。即非有情非無情故。何得於出情法上。計言有成佛不成佛耶。彼有情此無情者是業收。非佛解脫故。豈將自己情業之計。作如是卜量。情與非情。成與不成。如經所說。是諸法空相。不生不滅。不垢不淨。世間相常住。諸法住法位。如是之道。爲有情及非情耶。如此華嚴經中大義。本無凡聖情與非情。全眞法體。爲一佛智境界。更無餘事。莫將凡夫情量。妄作斟酌。若存情計者。見有情成佛。見無情不成佛。此爲自身業執。如是解者。終不成佛。夫言理性偏非情者。而不同有情成佛者。此由未見法空。不依實慧。未了得世間諸相本來常住。但見隨情識變生滅之相。而妄斟酌。言非情但有其理偏故。只如成佛。豈可理外別有佛耶。若理即是佛者。於此理中。情與非情。本無異相。豈從妄見立情非情耶。如佛是非情。應不得成佛。若有成大菩提者。不依此二見。是故法華經。會權歸一實。經云。種種性相義。我及十方佛。乃能知是事。聲聞辟支佛。不退諸菩薩。如是等三乘權學。總皆不能了。廣如彼經。如華嚴經中。無有情與非情。俱爲智智境

界。一切山河樹木。皆能現佛菩薩身及說法。與佛體同。能同能別。自在無礙。佛於世界中住持。安立自在莊嚴。境界差殊。莊嚴各異。於其妙剎國土莊嚴。一境中。纖塵之內。佛身出現。剎海重重。佛身無盡。佛身毛孔。亦復如是。境界重重。佛身無盡。互相徹入。能同能別。全同全異。淨穢國土。無障無礙。不論如是情與非情。是故今言所施教門別。又權教之中。諸行爲先。佛果在十地之後。此教之中。佛果根本智爲先證。以差別智而互爲資。因果行相。一時頓徹。無前後際。一成一一切。一壞一切壞。不同餘教一地修一地。以爲性齊時齊行齊智齊故。以修定慧。用智觀之。莫將情解。

第九明與諸三乘得果別者。如經所說。爲聲聞人。說四諦法。生老病死。爲緣覺人。說十二緣行。爲諸菩薩。說應六波羅蜜。今此華嚴經。亦說四諦法。即與聲聞四諦法不同。如四諦品中廣明。皆爲四諦。明苦集本真。元來是根本智。不同三乘有忻厭故。又五地菩薩。作十諦觀。一切十方世界諸佛。皆說四諦法輪。但隨類音不同爾。如世間孔老。一切治衆生法。總是四諦法。但隨器所授。深淺不同。或說十二分教門。或作咒說。皆爲四諦法輪所收。聲聞之人。但隨自根器。

得一分斷苦之教。只如小乘斷苦之法。廣如小乘等部所說。且約四乘總相所趣成。果處論之。聲聞觀苦集二諦。深生厭離。作無常。不淨。白骨。微塵。等觀。知身空寂。隨空寂法。智滅身亡。不生悲智。名之爲滅。以此滅處。名爲涅槃。設當從空起後。亦無世間三毒等過。爲在道前。修諸觀等。以觀折伏。如咒毒蛇。又修生空。知心性滅。本來無我。以此人無我法故。空三毒業。不生悲智。出定入定。無離此修。不離此者。畢竟同空。悲心頓息。名爲滅諦。滅伏諸苦。名爲滅諦。以此滅諦。名爲道諦。如楞伽經說。譬如昏醉人。酒消然後覺。彼覺法亦然。得佛無上身。如是等比。不依佛慧。偏修空定。從此知過。迴心從正。能成佛身。如經所說。有永滅者。爲滯寂故。責令早修。不應永滅也。爲修生涅槃。非永滅故。此乃大乘經中。自有和會。如華嚴經中。都無此文。如緣覺之流。知十二緣生之法。本來無實。自體皆空。知身知心。自皆無主。身心無主。性恆無我。以無我故。無明便滅。無明滅。十二緣滅。逍遙任性。獨覺自居。異聲聞故。不趣於寂。異菩薩故。無有悲智。准不趣寂故。即勝聲聞。唯能持法故。即不如聲聞。以聲聞之人。聞佛所說大乘經典。亦能宣傳。但未親證。如淨名所責。無

以生滅心行。說實相法。權教菩薩。創迴二乘。及小菩薩。未能全具大悲智者。如大品經等是也。但說六波羅蜜。引起小根。令成智慧。以彼偏修定業。滯在無智故。但說六波羅蜜。以根劣故。猶怖生死。未說七八九十波羅蜜等。爲無方便波羅蜜。成其大悲故。處於生死。能運度故。如仁王經中。外凡內凡。修六波羅蜜。作六種人王。忍等已上。四波羅蜜。俱是四種輪王。十地十聖。修十波羅蜜。能成十種天王。又餘經。漸迴彼二乘分學。及頓學等根。成其悲智。雖修十波羅蜜。猶修假真如觀。作諸法從本已來。自體凝然。不遷不變觀。破修空有二執。成不生不滅法門。猶觀當情。九地已來。未明佛性。爲修彼假智。乃成障故。如前已說。如此經。爲上上根人。頓示本智。初心創發。十住位上。即與佛同智慧。如善財妙峰山頂。得憶念一切諸佛智慧光明。是其義也。以依本智法。即無所修故。本無障故。任運悲智。不作而成。隨緣六道。無非法界。了緣生法。自體恆真。更無修作。所有念慮。皆從智生。但知任運。對現色身。說法應機。如響相對。恆處生死流。法身常寂。雖經多劫。體不移時。入死出生。非沒生也。任大悲智法隨緣故。法應如是。性無憂惱。不住證修。法如是故。龍女善財。總明如

是。此法難信。三乘拱手。遙推是化。非是人修。直說僧祇。逐情立劫。焉能信此無時智門。是故經云。能信此法爲甚難者。即其事也。設經多劫。勤苦作修。有得有求。作長作短。作是作非。作成作壞。捨身壞命。豈有成佛之期。何如初心。即須如是入佛智境修學。豈不省力不枉功耶。以此義故。聲聞。緣覺。權教菩薩。不真解四諦十二緣。及真如法身實智境界。皆是毘盧遮那方便引修。向此華嚴真實之海。令歸本法。任智施爲。所修諸地。隨智所作。不起能心。而皆成辦一切種智。不似諸教。地上別作對治。但十信終心。十住初位。即自了知混然法界本智慧境。凡聖不異。脫體全真。不見有情無情。有性無性。如是繫障。任法不生。如經所說。如來成等正覺出興於世。以其自身之智。普見衆生成等正覺。善惡情絕。性相無殊。雖度衆生。而無度者。是則名爲種如來相諸善根故。如是之法。付囑流通。全與三乘淺深懸異。如大乘權學。二乘。及人天。不聞如此華嚴經典。上上根流。唯希佛因果位諸菩薩等。而能聞之。如上四乘之內。具有明證。如所乘既別。見諦全殊。於一名言。淺深全隔。又如華嚴十地品所說。五地菩薩。修十種四諦觀。六地菩薩。修十種十二緣。以此不同三乘四諦十二緣。

第十明所付法藏流通別者。如此如來出現品中說。佛子。此法門。如來不爲餘衆生說。唯爲趣向大乘菩薩者說。唯爲乘不思議乘菩薩者說。此經法門。不入一切餘衆生手。唯除菩薩摩訶薩。佛子。譬如轉輪聖王所有七寶因此寶故。顯示輪王。此寶不入餘衆生手。唯除第一夫人所生太子。具足成就聖王相者。若轉輪王。無此太子具衆德者。王命終後。此諸寶等。於七日中悉皆散滅。佛子。此經珍寶。亦復如是。不入一切餘衆生手。唯除如來法王眞子。生如來家。種如來相諸善根者。佛子。若無此等佛之眞子。如是法門不久散滅。何以故。一切二乘不聞此經。何況受持讀誦書寫。分別解說。唯諸菩薩乃能如是。是故菩薩聞此法門。應大歡喜。以尊重心恭敬頂受。何以故。菩薩摩訶薩信樂此經。疾得阿耨多羅三藐三菩提故。解云。生如來家者。自覺自身法身根本智。與佛眞性。性相平等。同無性味。混然法界。自他情盡。唯佛智慧。明徹十方。無性無依。無生死性。名爲生在佛家。以自體無作平等悲智力故。紹隆正法。統治衆生。隨所應作。以法調伏。令諸衆生。差生死業。所有一切安樂之法。皆悉樂之。是則名爲持佛家法。又云種如來相諸善根者。解云。證佛法身。性同法界。同佛悲智。如是信修。

理事不殊。性相平等。如是學者。種如來相。同佛善根。不同權教。付囑三乘。聲聞菩薩所共流通。又三乘之教。多付囑諸聖。及未生佛家者諸凡夫。此經付囑最上大心凡夫。唯求如來不思議乘。生佛家者。若無大心凡夫。求此法門。生如來家。此經當滅。何以故。爲此經難信。設有聖說。凡夫不信不證。此經當滅。若不如是付囑凡夫。令生佛家。聖位菩薩。有一切佛世界微塵數。如來何處此經散滅。當知如是如來意者。令諸凡夫生而起信修。得生佛家。不念已齊佛位諸菩薩衆。諸有行者。應如是知。何故三乘之教。多付囑諸聖者。令使流通。及付囑未生佛家諸凡夫等。爲三乘之法。未出情塵。明法未真。易信解故。且令凡聖共讚。令教流行。善根不斷。未出情量。不似此十信之終。剎那即佛故。以此義故。三乘之教。且漸引生。未出情塵。三僧祇劫。方得作佛。順情之教。根易信故。凡聖共讚。皆得流通。不同華嚴。十方諸佛根本智法。及差別智大慈大悲法。出情塵教。深難信故。要待入證十住之位。生在佛家。爲佛眞子。方是流通。但有聖說。無人證者。不名流通。但有凡夫說教。無入證者。亦不名流通。爲自法不明。疑情猶在。不破自他暗故。未能決定知佛意故。以此義故。要待入證。同諸

佛智心。方可決知佛教門故。以是義故。付囑大心凡夫入證者故。始名流通。但聞不契。不名流通。

第四明成佛同別。夫智身寥廓。總萬象以成軀。萬象無形。與智身而齊體。違真相隔。得本形同。只爲乖本相殊。致使化儀各別。或見形羸道樹。藉草蓐以微軀。或見色究竟天。處蓮華之妙相。或見寶菩提樹。居淨土以成真。或見遠劫修行。或見剎那當證。或見報身圓滿。相海無邊。或見化體分身。具三十二相。如是殊形異狀。徧含識以情根。萬別千差。言何能悉。且約人天共感四乘權實之流。略作十門成道差別。使得童蒙起信。發解除疑。識本離權。情希勝德。十門者。第一成佛身別。第二成佛時別。第三菩提樹別。第四所坐座別。第五同住衆別。第六所示相別。第七轉法輪別。第八轉法輪處別。第九大會莊嚴別。第十所受法門別。

第一成佛身別者。此毘盧遮那佛身。如經所說。有九十七種相。及無盡相身。非三十二相。八十種好身。

第二成佛時別者。如權教中。佛生之後。即以逾城出家。菩提樹下成等正覺

時。以之爲時。如毘盧遮那佛。即實不如是。如來安立化相。爲度三乘衆生。應見如是出家成佛。如華嚴經中。實法界海。即不如是。如法華經云。吾從成佛已來。經無量阿僧祇劫。此即是迴彼三乘人。就實而論。此毘盧遮那佛。依本法界。成大菩提。還依本法界。無始無終。出不出沒。無成無壞。無有時分。此經云。如來不出世。亦無有涅槃。此爲實說。又頂著華冠。本非出家。都無八相之事。若有人能知如來出不出沒。不成不壞。即知如來常住在世。常轉法輪。即是毘盧遮那出興於世。又從兜率天下。降神入母胎。轉法輪。入涅槃。不出一剎那際。彼天猶未下。母胎猶未出。此已入涅槃。一切法事總畢。

第三菩提樹別者。三乘之中。見佛道樹。是木樹。高下稱人間。如一乘中。如來成道所居之樹。即寶樹。高顯殊特。如金剛藏身中所現之樹。高百三千大千世界。其身周圍廣十三大千世界。大意總一切處徧故。

第四所坐座別者。三乘中。化身成道。棄榮貴。藉草蓐。此一乘中。本身成道。坐寶蓮華師子之座。妙寶嚴飾。具衆莊嚴。

第五大衆別者。爲毘盧遮那佛。所有大衆圍繞。皆是普賢文殊等衆。及有新

發意者。皆是志求佛果法界之衆。非是三乘權學。爲求聲聞緣覺。厭苦菩薩之道。樂生淨土之衆。設有聲聞之衆。若未迴心。如聾不聞。不知不見。說此甚深華嚴經典。亦非因前經三祇劫後得果之衆也。皆智圓多劫一際。無前後時之衆。

第六示相別者。如權教中。即以兜率天受生。降神入胎。八相成道等。一乘教中。即以初發心住。會法身本智。以爲正覺。情絕始終。不見時遷。及以不遷。不乖當念。蘊功即佛。都無時分遷轉之相。應真自性。常轉法輪。不似權教八相等事。或於摩醯首羅天。坐華王之寶座。或以三千大千之國土。以爲報境。如是施設分量限劑者。皆引衆生之化儀。漸令心廣。未爲究竟之實相也。如此華嚴法界之妙門者。約分十佛刹塵蓮華藏刹海。參映重重。爲明無盡佛國。互相徹入。一一佛刹。皆滿十方。十佛刹塵國土。皆無限礙。身土相稱。都無此彼往來之相。不同三乘爲小根故。權安分劑身土之相。如此盧舍那之相海也。纖塵匪隔其十方。毛孔詎虧於刹海。三乘示相者。螢光不可以比日月之照功。琉璃難以類摩尼之淨德。此乃非由佛爾。只爲器劣故然。

第七轉法輪別者。化佛轉三乘法輪。毘盧遮那轉一乘法輪。一乘者。所謂佛

乘。如法華經云。佛乘唯有一。無二亦無三。但以假言說。引導於羣生。乃至乘如來乘。直至道場。爲法華經。會三乘。引令至實。如前依判教分宗門中已說。只爲三乘種性人。還依本種性作三乘教說。說龍女剎那成佛是化。反成謗教。不順佛心。元佛本意者。令龍女剎那成佛。爲本法。法自無時。證盡時處。即爲實法。反云是化。此是苦哉。當復奈何。不期甘露。反成毒藥。翻將寶玉。喚作泥塵。以實爲虛。將虛爲實。請後達士。莫踵前賢。先聖法門。普咸垂訓。隨根權實。事非一途。深可久思具閑佛意。了明權實。順教流通。不滯諸根。權實俱濟。只可引小歸大。衆聖允心。以實成虛。佛不悅可。依宗傳教。福利人天。使得金玉煥然。各不沈沒。是故毘盧遮那佛說佛乘。化佛說三乘。化佛教中。法華涅槃。漸漸引權。令歸實門。即龍女剎那成佛。雪山肥膩草喻。若牛食者純得醍醐等。是也。皆爲分有。未具全示。一一具足因果報相之門。唯此華嚴具足。是故今言轉法輪別。

第八轉法輪處別者。權教中化佛轉法輪。或言鹿園。或言給孤獨園等。皆有處所。上下往來。此經即十處十會。及一切塵中。佛國佛身。重重重重。重重無

盡。無盡無盡。常轉法輪。不去不來。出不沒。十會名處。後當更明。皆云不離菩提場。而昇一切處。經自具言。

第九大會莊嚴別者。說此經時。天上人中。十會十處。一時普集十方聖衆。大心衆生。無有三乘定性。未迴心者。設在其會。不在其流。又十會之衆。各從十方來。隨所來方。皆云有十佛刹微塵數衆而來集會。位位地地。以次十百千增多。爲明無盡。又一一會衆。皆徧法界。重重重重。參光影像。纖塵之內。亦衆會重重。一一塵中衆會。皆與法界虛空等。乃至於一小衆生身內。成等正覺。衆海重重。轉正法輪。其彼衆生。不知不覺。如是衆會。皆爲諸佛菩薩。性徧一切處。身土衆會。皆徧一切處故。不似三乘中。化佛衆會。皆有處所限量。分劑往來。爲衆生根小。非佛故然。

第十所授法門別者。如權教中。或從小乘。漸漸修習無常苦空。厭老病死。修四諦觀。於中苦集二諦。以爲世諦。滅道二諦。以爲真諦。觀彼苦集。真實是苦。深生厭離。趣求寂滅。以無常。不淨。白骨等觀。觀彼微塵。成於空觀。故苦集本無。識滅智亡。以空爲證。且令苦盡。然後方爲說大乘法。令使迴心。修

法空觀。行諸六度。漸起悲智。或有大乘菩薩種性者。觀行對治。似彼小乘。性有慈悲。樂行諸度。不取空證。留惑益生。成法空等觀。或有大乘菩薩種性。一下頓修假真如等觀。以假真如門。加行調伏。經三僧祇劫。十地見性。方始成佛。或有教說。地前三賢菩薩。以觀力故。折伏無明。地上見道。或有教說。三賢菩薩。少分得見法身。如是等說。總是三乘權教所說。如此華嚴經即不爾。直爲上上根人。一下直授法界自體根本法身。古佛智海。迷在無明。頓令以方便三昧而令現之。全將佛果。頓授十住初心。一念一時一際一法界門。頓收文殊普賢萬行理事。更無情量卷舒延縮。不廢隨俗時劫。了然具存。三世日月歲數差別。了然明著。然其歲劫。當自不移。常與無常。不成不壞。法本如是。了知苦諦。本來聖諦。元無諸苦。亦無涅槃。若如是信解。如是證入。經云。以少分方便。疾得菩提。即以智幻門。幻生其身。等衆生界。同衆生事。即以無礙念門。了衆生根。即以師範門。以成軌則。即以衆藝門。訓誨衆生。即以無依道場門。法無所著。即以無念門。念而不著。即以淨智光明門。恆照無礙。安立諸法。度脫衆生。即以無盡相門。不壞色身。即以誠願語門。出言誠諦。即以幻住門。常住世間。成

就衆生。諸根解脫。如是十法。即是善財童子。等覺位內善知識。利安衆生之門。令諸學者頓修悟入。行此十法。利安衆生。善住世間解脫法門。殊非如三乘之衆。厭苦集樂滅道之法也。亦非留惑樂空出纏。別求淨土也。

大方廣佛新華嚴經合論卷第六終

大方廣佛新華嚴經合論卷第七

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

第五明見佛差別。夫佛身性相。一體無差。器有萬端。依根各異。情存想隔。見絕體齊。身立影生。情留佛異。佛由情應。以此乖真。心盡情亡。智身自稱。隨緣無作。動寂俱真。如是相應。名毘盧遮那佛也。毘盧遮那者。名種種光明徧照也。以法身悲智。示相教光。用對諸根。隨情現色。爲情乖相別。見異佛殊。以體用混收。本是毘盧遮那一智身也。只可歸真去假。不可滯假亡真。略立十門見佛差別。使得留心創信者。返末而還源也。一。人中見佛。但有三十二相。二。諸天見佛。但有八十種好。三。諸龍見佛。或同人所見。或見但爲大龍王也。餘畜例然。四。諸仙人見佛。但見仙人。五。諸餘外道。還見佛與己同類。六。八部神等。見佛與己爲王。七。小乘人見佛。爲大聲聞。八。緣覺人見佛。還爲緣

覺。九。權教中菩薩見佛。但爲三千大千世界之主。福智充徧三千大千世界。十。一乘教中菩薩見佛。爲十佛剎塵蓮華藏世界海。爲法界主。具云十佛剎塵蓮華藏世界。爲明無盡。總攝一切剎故。福智充滿一切諸剎。無盡相海重重故。如上十種見佛不同。皆由發心之時。信樂差別。以信樂力故。見佛不同。是故當知發心之者。發廣大心。信廣大教門。發廣大願。行廣大行。入廣大智。利益成就無盡衆生。即得速成菩提行願。福智悉皆圓滿。若不如是。終非畢竟成大菩提。勞而功少。何如直往一切智之本智中也。

第六明說教時分

夫創證覺心。道源虛寂。智圓三世。始終俱盡。會萬象。齊有無。混去來。印古今。豁達唯神。恬怕應真。情亡智立。想絕悲存。圓聲遐布。隨根受益。一雨普滋。百卉齊得。如空谷響。稱擊成音。諸根獲益。任智無心。剎那無際。焉存古今。略依權實。且立十種教起前後時分不同。第一如力士經說。佛初成道。一七日思惟已。即於鹿園說法。第二如大品經說。佛初鹿苑。轉四諦法輪。無量衆生。發聲聞心。乃至獨覺心。大菩提心等。第三如法華經說。三七日詣鹿園說

法。第四如四分律。及薩婆多論。六七日方說法。第五如興起行經。及出曜經。七七日方說法。第六如五分律。八七日方說法。第七如大智論。五七日方說法。第八如十二遊經。一年不說法。第九依今唐朝藏法師。判如來成道。定經二七日後。方說華嚴經。第十通玄今依此華嚴經法界門。總不依如上所說。如此經以法界本智性自體用理事大悲本實爲宗。不依情量時分之說。古今見盡。常轉法輪。無始無終。法本如是。如上所說。總依根自見時分。並非如來有此不同。如來本法智體。並無時分可立。但使令心信解法界無時。即是如來說法時也。情亡心盡。任智利人。即是如來成佛轉法輪時也。若也情存立見。云如來如是時出世。如是時說法者。並不依佛見。總是自情。如此華嚴經教門。即是無始無終爲門。不可逐情強立時分。此經乃是無時之時。一切時說。如法華經云。吾從成佛已來。經無量阿僧祇劫者。量既本無。知欲將何爲說法時也。皆是如來一智用。一圓音。一剎那時。以無時之時。爲說法時也。

第七明淨土權實

夫以滔滔智海。茫茫莫究其涯。淼淼眞源。蕩蕩罕尋其際。遮那法界。體相

括於塵沙。方廣靈門。淨穢互參於無極。但隨自修業用。見境不同。致使聖說乖違。依根不定。或權分淨土於他國。指穢境於娑婆。或此處爲化儀。示上方爲實報。文殊住居東國。金色世界而來。觀音身處西方。安樂妙土而至。如是權儀各別。啓蒙的信無依。今以略會諸門。令使創修有託。約申十種。以定指南。第一阿彌陀淨土。第二無量壽觀經淨土。第三維摩經淨土。第四梵網經淨土。第五摩訶首羅天淨土。第六涅槃經中所指淨土。第七法華經三變淨土。第八靈山會所指淨土。第九唯心淨土。第十毘盧遮那所居淨土。第一阿彌陀淨土者。此爲一分取相凡夫。未信法空實理。以專憶念。念想不移。以專誠故。其心分淨。得生淨土。是權未實。第二無量壽觀經淨土者。爲一分未信法空實理衆生。樂妙色相者。令使以其心想。想彼色像。想成就故。而生佛國。此權非實。第三維摩經淨土者。佛以足指按地。加其神力。暫現還無。是實報土。未具陳廣狹。是實未廣。第四梵網經淨土者。雖說一大華王。而有千華。一一華上。有百億化佛。教化百億四天下衆生。然彼千華。及彼華王。爲三乘菩薩見未廣故。分示報境。未成圓滿。是權未實。第五摩訶首羅天淨土者。如來於彼坐寶蓮華座。成等正覺。以爲實報。

此閻浮提。摩竭提國。菩提場中。成正覺者。是化。此爲三乘中權教菩薩。染淨未亡者說。言此閻浮提及六天等。是欲界有漏。彼上界摩醯首羅天。是無漏故。心存染淨。彼此未亡。此爲權教。未爲實說。第六涅槃經所指淨土者。云如來有實報淨土在西方。過三十二恆河沙佛土外者。爲三乘權教。一分染淨未亡者言。此三千大千世界總是穢土。權推如來報境淨土在西方。此權非實。第七法華經三變淨土者。此爲三乘權教菩薩。染淨未亡者言。移諸人天置於他土。是權非實。第八靈山會所指淨土者。此引三乘中權教菩薩染淨未亡者。令知此土即穢恆淨。諸衆信可。未能自見。是實非權。信而未見。第九唯心淨土者。自證自心。當體無心。性唯眞智。不念淨穢。稱眞任性。心無罣礙。無貪瞋癡。任大悲智。安樂衆生。是實淨土。以自淨故。教化衆生。令他亦淨故。是故維摩經云。隨其心淨。即佛土淨。欲得淨土。當淨其心。第十毘盧遮那所居淨土者。即居十佛剎塵蓮華佛國土。淨穢總含。無穢無淨。無有上下彼此自他之相。一一佛土。皆充法界。無相障隔。略言十佛剎塵國土。爲知無盡佛國。不出一塵。爲無大小故。不立限量故。以法爲界。不限邊際。相海純雜。色像重重。此爲實報。非是權收。

第八明攝化境界

夫佛境無邊。順機各異。隨情廣狹。見有差殊。非是如來分其量數。情微即境狹。量廣即境寬。若也智契真源。佛境彌綸法界。或見閻浮爲化境。或見四洲以濟生。或見形滿大千。或見報身十海。如是種種。器有萬端。設教不同。千差萬別。發蒙始學。憑准何依。略示五門。識其權實。使得捨諸條而從本。返末而還源。速證菩提。無令稽障。一人中見佛境界。二諸天見佛境界。三二乘見佛境界。四權教菩薩見佛境界。五實教菩薩見佛境界。第一人中見佛。但見化一閻浮提衆生。第二諸天見佛者。但應自見境。見佛亦然。隨自見廣狹故。如帝釋梵王。及諸天王。即是菩薩位。即依菩薩位。配所見佛攝化境界廣狹。不可依諸凡見天人之類。如帝釋。即是二地菩薩位。乃至漸昇至梵天王。是十地菩薩位也。或時以佛暫時佛神通力。成就衆生。亦令人天中。凡夫及二乘。并小菩薩。總得見佛報土境界故。即如維摩經。佛以足指按地。所現淨土是也。或時以佛神力。亦令人天總得相見故。即如大集經中。所說寶坊之上。處欲界上色界下。大集人天之衆。總在其中。如彼經說。第三二乘中羅漢。見佛攝化境界者。如大羅漢以天眼

力。得見佛攝化三千大千之境界也。即如阿那律云。我以天眼。見釋迦牟尼佛土。三千大千世界。如觀掌中菴摩勒果。如小羅漢即不定。或見佛攝化一閻浮提。此即以久伏忍力。能斷結使。未有定力。亦名斷結。未有神力通變等事。如以次羅漢。或見佛攝化四洲。及上三界境界也。此廣說在小乘諸部中。第四權教菩薩見佛攝化境界者。初地百佛。二地千佛。三地萬佛。境界以此漸增。如三乘大乘教說。第五實教菩薩見佛攝化境界者。初地菩薩。即見多百佛。多千佛。即是無盡之百。不是一百之百。二地菩薩。即見多千佛等。即是無盡之千故。三地菩薩。即云多千萬等。以實之說。諸地菩薩。皆悉齊見。如帝網等。三賢菩薩亦然。非但十佛剎塵蓮華藏爲其報境。法界虛空。總皆平等。爲十住初心。初見道時。即已無大小見故。即總見佛化境。皆如法界。不分大小。行布之中。寄位階降。如此經。初地見多百佛境界者。即圓滿義故。非如三乘單百之百。此多百者。即齊無盡之數故。如三乘教。化佛即攝一四天下。報佛即云攝化千百億四天下。爲一釋迦報境。如梵網經所說。如華嚴經所說毘盧遮那攝化境界。且約立一大蓮華藏世界海。廣大無際。與法界虛空等。但爲化衆生故。約陳形狀。令衆生心廣大發

開狹劣心故。於此大蓮華中。總言有十不可說佛刹微塵數世界種。爲教文有限。且立其一百一十一箇世界種。中心有十一箇世界種。上下各具二十重蓮華藏世界。最下重中。有一佛世界微塵數廣大世界圍繞。次上第二重。二佛世界微塵數。次上第三重。三佛世界微塵數。此十一箇世界種。皆悉如是。從下向上。轉轉倍增。最上重中。具足二十佛世界微塵數廣大刹。一一刹。各有十佛刹微塵數諸小刹圍繞。其十一箇二十重世界外。有一百箇一重世界種。圍繞十一箇二十重世界。此一百箇世界種外。近金剛山。復有十箇四重世界種。其中國刹。重重之內。如上所說。於金剛山內。圍繞如上諸世界種等。如天帝網。分布而住。如來所化。周徧其間淨穢純雜諸世界海等。如三乘中所說世界種者。數三千大千之刹至一恆河沙。爲一世界性。數性世界至恆河沙。爲一世界海。數海世界至恆河沙。爲一世界種。如此經世界。並數一佛刹微塵。二佛刹微塵。三佛刹微塵。如是倍增。至最上重中。二十佛刹微塵數世界。如是上下通數。總二百一十佛刹微塵數廣大刹。始成一世界種。非爲恆沙以限其數。三乘之中。多取恆河沙數爲量。如此經中。常取一佛刹塵。十佛刹塵。爲表無盡爲其數。如是增廣。令小狹劣衆生。知

佛攝化境界。發菩提心。其佛攝化境界。一一塵中境界。與法界虛空界等。不言獨化三千大千世界。於中表法。至後釋華藏世界品廣明。

第九明因果延促

夫法界圓寂。無始無終。理智虛空。非因非果。但爲有情存量。假寄其名。情亡量絕。何名能立。名不自施。本由量起。量亡情盡。名亦自真。今以無名之真名。談無果之真果。以無說之真說。談無因之真因。啓蒙之士。不可以滯其名。始學之流。不可以廢其說。滯名則名立。廢說則言亡。當可任性隨緣。起爲法起。若無緣者。滅唯法滅。有此法者。性不相知。今談因果延促。如空中鳥跡。如石女之子。但爲衆生。情有愚智。隨心照惑。遲速不同。劈竹登梯。稱機各別。因茲之類。延促不同。非謂日月。與作時分。教不自施。因機故起。教隨根應。有根教生。今以依根。約立十門因果延促。使得啓蒙之士。後學無疑也。第一小乘善來得阿羅漢果。第二小乘一生得阿羅漢果。第三小乘三生得阿羅漢果。第四小乘六十劫得阿羅漢果。第五緣覺四生得緣覺果。第六緣覺遲經百劫得緣覺果。第七依權教菩薩成佛。定經三僧祇劫。得成佛果。第八依法華經實教。會三歸一。

令龍女一刹那成佛。破彼三乘經於多劫方始成佛。第九華嚴經說。兜率天子三生得十地果。第十善財童子一生成佛。如上所說。皆是三乘及一乘聖教。依根約器所說。各各依其部教。自有和會。今欲廣引諸義。文句繁多。根有萬端。依根教別。今以略分十種大意。得果延促不同。意令知權向實。不滯虛乘。入真實門。速成佛道。如龍女。破三乘之定劫。成剎那之實門。涅槃經。屠兒廣額授賢劫中成佛之記者。破闡提之無性說。越三僧祇之功。兜率天子。明一乘之教殊勝之力。聞之生信。爲不修故。設入地獄中。亦能成種。蒙光觸身。來生兜率天上。登十地位。一如隨好光明功德品說。舉此一事。意令信此諸佛所乘。以難信故。信即必定成種。爲信解內熏。必至成佛。設暫著樂。遇苦便修。若至十住初心。位齊十地。更無退轉。如善財童子。一生成佛者。明於十住初心。一剎那際。情亡想盡。三世一念。更無所生。名爲一生。不取存情立劫時分之生。如是無生。便成佛果。如本生故。名爲一生。還同龍女。一剎那際。情盡時亡。名之爲佛。

第十明會教始終

夫慧日世尊。稱法界而徧照。智周萬有。與凡聖而同真。理事互融。體用相

入。即四十品之勝典。終始交羅。百萬頌之妙言。前後參映。十處十會。如帝網之重重。十刹十身。若鏡像之相入。舉一門。衆門俱發。談一品。諸品齊應。道樹始成。九天同屆。普光一集。十處咸登。今古無差。舊新一念。不離一位。便分五位之門。一行之中。乃建塵沙行海。法界體上。安立訓俗之詮。果德性齊。施設引生之教。文殊以贊明法體。普賢爲成備修行。二人悲智參光。使得雲滋寶澤。法界品內。復令善財重修。倣此一部之經。一一行其行相。菩薩接生之軌。各各次第分明。發心求進。師資差別。具陳法則。令使童蒙易解。學者不枉功程。一念與道相應。便得超過永劫。今分十法。以約紀綱。教體參差。略知分劑。第一明毘盧遮那始成正覺。第二明示果勸修。第三明信心成備。第四明入眞實證。第五明發行修行。第六明理事相入。第七明蘊修成德。第八明隨緣無礙。第九明因果位終。第十明令凡實證。

第一明毘盧遮那始成正覺者。即世主妙嚴一品經是。言始成正覺者。以自身心。證盡三世古今等法。在一念中。無久近相。於一念中。而亦不壞衆生三世久近劫智。及種種衆生差別知見智。如經智入三世而無來往。如有十種智。具在

經說。如是上下前後四十品經。總於始成正覺時。於一剎那際。以法界海智印三昧門。一時頓印身色言音說諸佛法。及一切塵中。諸國刹海。普宣流布。及入涅槃。不移一時一際一性。皆是法如是故。前佛後佛。古今如是。總在一時。隨諸衆生。現差別法。古今相徹。名之爲始。契法如是。名之爲成。依法如是。非心造作。名之爲正。智達斯理。名之爲覺。此經在晉朝初譯。有三十四品。今於唐朝再譯。爲三十九品。又檢菩薩瓔珞本業經云。佛子。吾先於第六天。說十地道。化天人。今故略開衆生心。汝等受行。又下文佛子。第四十一地心者。名入法界心。又此文佛子。吾先於第三禪中。集八禪衆。說一生補處菩薩。入佛華三昧定。說百萬億偈。今以略說一偈之義。開衆生心。汝等受持。此品即在十地品後。是十一地等覺位。計此品名。還名佛華品。爲依法爲名故。又下文佛子。吾先在此樹下。說法界海時。有八萬無垢菩薩。現身得佛。故今爲此大衆。略開佛果行處。汝應頂受。如瓔珞本業經。即是說華嚴經竟。化諸三乘衆。來詣菩提樹下。一一重敘初成正覺時。所說華嚴五位法門。具如彼經說。爲華嚴經。少十一地一品經。今將彼對勘。方知次第。後有聞者。不須生疑。但取彼經勘驗。可知皁白。

今以第三禪中。說十一地佛華品。即總有十處十會四十品。並在初成正覺時。以一剎那際海印法門。一時頓說。以依本法。無前後故。爲法本如是故。以本身。以本智。示本法故。無重會普光明殿。及三會等事故。若重重重重無盡之重。不論三會。以其法界海門。總收三世一念。前後並是一時。亦無往彼重來入此。如來但以本智對現色身海印門故。一時普示。今言於普光明殿重重三會者。此非如是。總是一時頓印之法。如經云。如來於一言說中。演說無邊契經海。但從法門品類。爲表法故。菩薩名殊。非是先來後來之衆。於法界海內。不可以情作前後之想。違本法故。於一念之內。現三世事者。爲衆生故。非於本法而有三世。此爲明本法。不可從末。前已覆車。後須改轍。不可直推先德。以爲龜鏡。檢參經意。都無重會之名。以文字敘致。法門似有重意。不觀品中經意。總是敘其前後通括一時一際一法界之智用法門。如十定品。離世間品。皆云。如是我聞。一時佛在摩竭提國。菩提場中。始成正覺。普光明殿。入剎那際三昧者。但隨法位菩薩名別。非是如來去已重來。以普光明殿。爲法界果智體故。於一時之際。會其理事。不離無作定門。以十定門。是法界體故。以普賢行。是法界用。即離世間

品是也。會此二品。不離普光明殿果德大宅智之本都。如此三度之說。總是一處一時一法界一會之說。非是如情所見前後往來。通餘九會。總在一會一時一法界一智海。法門重重。一時隱現。無障無礙。今於一法界內。隨其進修方便行相門中。寄處表法。以分其十處十會者。一菩提場第一會。二普光明殿第二會。三昇須彌山頂第三會。四昇夜摩天第四會。五昇兜率天第五會。六昇他化自在天第六會。七昇三禪天第七會。八給孤獨園第八會。九覺城東大塔廟處第九會。十於一切國刹及塵中一切虛空法界會。名爲十處十會。普光明殿中會。此經中五位六位法門。十定妙理。普賢萬行。始終體用。十處十會。總在普光明殿一眞法界。因圓果滿報居之宅。之所含容。十方世界。都爲一法一處一時一體用際。攝未歸本。不可別分。作前後往來三會之說。不可以己情塵。翳障眞教。又此經中諸法。皆以十爲圓數。不可但言七處九會之說。又問。何故至第七會。但至三禪。集八天衆。說十一地法門。何故不至第四禪天者。答曰。爲四禪天。依其次第。是佛果處故。佛正於菩提場中。正證佛果。通收四禪。及十方世界。總爲一普光明殿法界之宅報居之都。更無上下往來進修所在可得之相。明佛四禪心相。無依無進修

處。故無往來也。情絕應真。同法界故。是佛第四禪。以菩提樹下。寄同阿蘭若處。普光明殿。即是本居之報宅。以此三說始終因果。重敘前初成佛之時。以明前後不離菩提體本智海故。如此圓融始終因果。成一際門。於此經中。前後有六處和會也。示果勸修門中有二處。已信修行門中有四處。一。如初會中。普賢菩薩。入如來藏身三昧。以世界海漩法門。示佛本源法界。十蓮華藏世界海。因果始終報得之門。即普賢菩薩是其行。如來藏身是其體。即明以用入體。理事徹故。二。毘盧遮那所坐之座。諸有莊嚴。亦明因果始終。體用相徹故。即以遮那佛以爲報果。以一切法空本智爲座體。以普賢萬行爲用莊嚴。以此一切莊嚴具。即還以輪臺戶牖。諸莊嚴具中。出衆菩薩。有十佛世界微塵數。雨寶供佛。即明如來果德。常居一切法空之座。普賢衆行妙用。常感依報之所莊嚴。理事因果體用。常相益故。又以信修行門中。有四度和會因果無二門者。即普光明殿。三說始成正覺。攝末歸本一際法界。是一度和會。二。三十七品名如來出現品。如來放眉間光。灌文殊頂。放口中光。灌普賢口。令此二人共相問答。說佛出現果德之門。即文殊爲本智法體。普賢爲行。爲明和會體用徹故。以此徹處。即名爲佛。初會

中佛。即明佛所自成佛也。三十七品中佛。即明菩薩自力所及也。因初佛故。而起信進所修。以信進修行故。自力所及自佛果故。以自佛果。與前所信無異故。三。祇園之中。如來以師子頻伸三昧門。舉五位因果導利人天。四。善財童子。彌勒樓閣中。和會文殊普賢始終因果。及彌勒菩薩始終因果。都爲一際。體用徹故。通前示果勸修門中。普賢菩薩。毘盧遮那。二處和會。及後普光明殿。如來出現品。給孤獨園。及彌勒樓閣。四處。通爲六處。和會體用因果無二。一際法門。是故彌勒樓閣。名毘盧遮那莊嚴藏。與初會中。普賢菩薩所入三昧。名如來藏身。前後名字一相似故。但取經文品類意況尋之。參驗可見。如來會通。總爲一時一際。以剎那際根本智宅門。出生滅度。及常住在世。轉正法輪。總無虧一念成正覺時。是故經言智入三世而無來往。此經總有十處十會四十品經。於九會中。雲集都衆。總有三百四十二種衆。并第三禪中一會。九種衆。亦在其數。如是之衆。各各云有佛世界微塵數。或云十佛世界微塵數。如是衆會。一時俱會。在始成正覺一剎那際。猶如大海。周徧十方。互相參映。無障無礙。若以第十會。一切國刹及塵中虛空法界一切會中者。即十方世界虛空法界。及纖塵之內。及一

切衆生身塵毛孔。海會如海。十方無間。重重重重。無盡無盡。諸佛菩薩衆海常然。三世一念。古今咸即今時之際。過去未來無盡之劫同時。無虧一念成正覺時也。如是時體。成佛不成佛。覺與不覺時。法如是故。

第二明示果勸修者。即如來現相品。普賢三昧品。世界成就品。華藏世界品。毘盧遮那品。如是五品經是也。於現相品。如來口中衆齒之間放光。以光中音聲。十方告衆。使令咸集。普賢菩薩。爲佛長子。治佛家法。入佛三昧。舉佛果德。令衆敬愛。起信樂修。如來於自身及座。舉體用因果門。令衆咸知。以佛自身。爲法界大智身。以諸莊嚴具。爲普賢行用報果。以一切法空。爲座身。以此三法齊平。興悲智門。無始無終。示悟衆生。名之爲佛。如來又於眉間毫相中放光明。名一切菩薩智光明普照耀十方世界藏。其狀猶如寶色燈雲。普照十方世界已。右遶於佛。從足下入。及於眉間毫相之內。出十佛世界微塵數菩薩衆。於其佛前。共坐一蓮華之座。復讚歎佛境界甚深。此明因果無二。光入足下。明以果成因。眉間光者。十地智果之光。今入佛足下。以果成因。十信之位。還從足下輪中出此光也。至十住位內。次至足指端出。十行之內。從足趺上出。十迴向之內。膝

上出。十地之內。還至眉間出。終而復始。毫相光明。是十地之果光。其中出菩薩。是其因行。明因從果出。明此已上五品經。是示佛果德。令衆信樂故。

第三明信心成備者。即第二會中。如來名號品。四聖諦品。光明覺品。菩薩問明品。淨行品。賢首品。已上六品經是也。此六品經。共成十信之一位。一如來名號品。信佛名號。十方世界。隨生不同。二四聖諦品。信知十方世界法門名字差殊。皆以四聖諦爲本。三光明覺品。知光明本從果而來入佛足下。今還從足下放彼果光。用成信位。四菩薩問明品。信菩薩所問之法門。五淨行品。明信菩薩淨行。從大願力生。六賢首品。信知成佛以信爲首。信此六品法門。共成信位。此六品經。於普光明殿中說。以普光明殿。是佛智用果滿報居之本宅。還從中說信位法門。爲明說果成信。既信果德。從茲已後。至十地十一地佛華品已來。方明入道進修。五位成滿。階降同別。一通一切通。爲從因至果不隔時故。皆以根本不動智等十箇佛。以爲所信之門。還以自心根本不動智佛。以爲會體用故。

第四明入真實證者。從第三會昇須彌山頂上。於如來兩足指端放光明。於中說六品經是。一昇須彌山頂品。二須彌頂上偈讚品。三十住品。四梵行品。五初

發心功德品。六明法品。此六品經中。如須彌山頂品。及偈讚品。兩品經。是帝釋諸天。迎讚如來。歎佛功德及處之勝。十住品。梵行品。初發心功德品。明法品。四品經。明創證法門。住佛所住。生在佛家。同佛智性。功德解行。理智如佛。初發心時。便成正覺。此會兩足指端放光者。明初證法門發足之始。昇須彌山頂者。明從前信心。今昇十住法王山頂。至法之際。智照無礙。如上高山。至相盡處故。又山者表定能發慧故。從茲已去。任法無功。始終俱佛。不從八地方具無功。瓔珞經云。三賢菩薩。法流水中。任運至佛。初水後水。一性水者。因果佛。一性佛故。於其中間。無初中後。不隔念故。依本法故。無念可隔。因果便終。一念相應。一念佛故。不論相好及與神通。相好神通。從此正覺中得。若證正覺。即不著諸相。但以覺道恆相應故。通變相好。不求自至。設至於後。福智終時。三世一時。不隔念故。

第五發行修行者。從第四會昇夜摩天上。於如來兩足趺上放光。說四品經。一昇夜摩天宮品。二夜摩天宮偈讚品。三十行品。四十無盡藏品。如此會中。昇夜摩天宮品。夜摩天宮偈讚品。兩品。是諸天迎佛。讚歎佛功德。及歎處之勝。

十行品。十無盡藏品。兩品經。明從智身。具普賢行。悲智具足。理智行門。所成依正二報。福智無盡。此位從如來兩足上放光。及昇夜摩天上說者。爲明從須彌山頂。至相盡際。證佛智身。至夜摩天下。依法空本智。起普賢萬行門故。以處表法。令易解故。如彼諸天離地際故。此天依空而住。爲明十行。依本智法空而行故。

第六明理事相入者。從第五會昇兜率天宮。於如來膝上放光。說十迴向。有三品經。一昇兜率天宮品。二兜率天宮偈讚品。三十迴向品。前之二品經。是諸天迎讚如來。敬歎佛德。及歎處之勝。後之一品。是正說十迴向之法門。迴向者。令諸事法皆入理故。以十行事法。入前十住中。理事無礙。故名迴向。前十住。即是文殊法身本智。後十行。即是普賢之萬行。明二人體用相徹。名爲迴向。膝上放光者。明理事卷舒自在故。猶如人膝。屈伸迴旋。皆由於膝。何故兜率天說此位者。爲明此天。於欲界之中處中故。又於天上五位五處五會之中故。向下有帝釋宮夜摩之兩會。向上即有他化三禪之兩會。處五會中故。於欲界中。此天處中故。故說十迴向。令會理事無礙。根本智。差別智。智悲均融。處於中道。以

處表法。故須此處說十迴向之門故。

第七明蘊修成德者。從第六會。昇他化自在天宮中。如來眉間放光明。名菩薩力焰明。此光與初會中。如來眉間所放光明。終而復始。至本處故。說十地一品經是也。何故無昇他化天宮品。無偈讚品者。爲明十地果終。住法本宮。恆徧一切。功終行極。更無昇進。乃至三禪。十方世界。亦同此也。爲表果終。十地智滿。無進修故。常對諸佛。現在前故。爲非新來。無稱歎故。此十地門。但於十住十行十迴向中。蘊積功成。使令淳熟。更無所住。任運而成。自令具足一切諸法。何故於此天處。而說十地法門。爲此天依他起化。以成自樂。名之他化自在天。此位菩薩。依衆生故。而行悲智。興諸行雲。雨諸法雨。以此爲樂。無自心想。作諸行相。以處表法。故須此處而說十地法門。依藏法師。說此品時。有三加五請者。檢尋經意。佛有十三種加金剛藏菩薩。解脫月及諸菩薩有四重請。十三種加者。一。十方同號佛現身。以言讚慰。使令說法。又十方佛與十種智。及自善根力。勝智力。法如是力。十二。十方佛手摩金剛藏菩薩頂。許令說法。十三。毗盧遮那如來。放眉間光。照金剛藏身。光中說偈。勸令說法。是名十三。

明以言讚慰。是語業加。與十種智。是智業加。手摩頂。是身業加。眉間光照。光中說法。是法力加。總通言讚。與十智。手摩頂。及光照身。都爲有十三種加。四種請者。一解脫月菩薩舉大眾疑請。金剛藏菩薩止而不說。二解脫月重請。金剛藏重止。三解脫月三請。四諸大菩薩一時同請。都爲四請。未知三加五請。從何而來。若但取身語意業。爲三加者。即與十智。眉間光照金剛藏身。及光說法。其加即有餘。若但取十方諸佛言讚使說。爲五請者。佛位居尊。軌則之中。不合爲請。以此之義。總有十三種加。四種請。與十種智業。雖是智體不殊。爲不迷法相。成差別智故。用時各別。不可直取同門。以一同中。有十三種所加各別。四度重請皆殊。超昇之義。前已說訖。

第八隨緣無礙者。於第七會。第三禪天。集八禪衆。說一生補處菩薩入佛華三昧定。說十一地等覺位中普賢法門。十地已終。明自分道終。等覺位中行普賢行。徧明入俗。徧周法界。行門重疊。廣及虛空。及微塵中。諸國刹海。重重無礙。究竟如法界。廣大如虛空。名爲等覺位中普賢行也。言佛華三昧者。華之言行。能堪可觀。開敷感果義也。此爲佛行法門。佛者覺也。明十一地等覺行用。

明十地成佛已終。次十一地覺行滿也。故名佛華法門。三昧者。法界本體大寂法門。定亂情盡。名爲本寂。以此定故。行普賢行門。一切三昧。此乃爲本體故。於彼天處。爲於色界無色界八禪之衆。說一生補處菩薩入佛華三昧定門。有百萬億偈。以此位菩薩。入佛華法門。善明入俗廣利含生自在故。名隨緣無礙。此位明法界行周。何故在彼天處。說十一地法門。爲彼天處。憂苦情亡。唯三昧樂。爲明此位菩薩。定亂情亡。唯智慧利衆生樂故。以處表法。故於此處說十一地法門。地位行門。廣如瓔珞經說。此以當華嚴經來文未足。

第九明因果位終者。從十定品。十通品。十忍品。阿僧祇品。壽量品。諸菩薩住處品。不思議法品。如來十身相海品。如來隨好光明功德品。普賢行品。如來出現品。離世間品。已上十二品經是也。何以然者。爲十定品至離世間品。總該五位十地佛位。及普賢萬行。始終因果門。前後徹故。是以十定品離世間品二品經初。皆卻敘初會及第二會云。如是我聞。一時佛在摩竭提國。阿蘭若法。菩提場中。始成正覺。於普光明殿。入剎那際諸佛三昧者。非是重來集會。但爲十定及離世間二品。是體用門。通始終故。於普光明殿如是重敘。依其法門。菩薩

衆名號差別。非是去已。還復重來。於十住十行十迴向十地十一地法。徧諸天處。一時頓說諸位。此之二品意。明體用徹於始終。佛因果門故。十定體是文殊。離世間法是普賢。是故如來出現品中。放光和會二人因果相徹門故。放眉間光。入文殊頂。放口中光。入普賢口。令其理事自相問答。說佛果門。佛果之門。總在二人根本智差別智之際。以定慧力照之可見。此之十二品經。一時都會諸會六位十一地。總入普光本智法堂。果德大宅法界之門故。是故十定品及離世間品。皆敘前之初一二之會。說此經時。譬如空中置百千寶鏡。置一佛像在於地上。以衆菩薩圍繞莊嚴。於彼百千寶鏡之中。一時頓現。一一鏡中。影像互相參入。都無來往。如來亦爾。於始成正覺之時。天上人間。十方國土。一時頓現。互相參徹。都無來去故。彼此言音句義。悉皆參入。都無來去。不論重會。不得作世間情解。作往來重會之心。如前已述。事須計會。至而復說。此之經末。須知和會始終。如來出現品。明五位十一地果終之門。一部之經始終之際。以是義故。流通付囑。總在其中。出現品前。普賢行品。即明自己佛果修行之行。出現品後。離世間品。即明自己佛果之後利生之行。明佛果之後。所行大悲智行。諸習總盡。雖行普賢

萬行。不染世間。名離世間品。自修佛果前普賢行。明是自所乘。并勸他學佛果也。後普賢行。自己佛果已終。果後純是利他。以此能令三寶不斷。十通十忍。亦是十定。徧通五位。體徹始終也。通者。總通明義也。忍者。法忍之門。阿僧祇。乃明數量之門。壽量者。乃明佛壽量隨人。菩薩住處者。明菩薩所爲人攝化住持境界。常在不滅。不思議法者。爲明如來化儀法則自在。非諸二乘及三乘權學所知。如來十身相海品者。明十世界海十毘盧遮那。皆有九十七種相。及十華藏世界微塵數相。如來隨好光明功德品。爲明如來隨好光明照燭功德。蒙光獲益。普賢行品。爲明果前進修之行。如來出現品。爲明五位菩薩自力果終出現。因果位極。離世間品。爲明佛果之後。純是利他。此已上三十九品經。六位五位因果位終。利及諸天諸神王衆。入法界一品經。如來入師子頻伸三昧。還舉佛果五位。利及人間。已前總結初會二會。乃至十一地。七會之中。佛位因果法門竟。八會在祇園之中。後當更敘。

第十明令凡實證者。從第八會。在祇園之中。如來入師子頻伸三昧門。還舉法界果德。現諸世間令生信樂。達佛實相。五百聲聞。目連鶩子。示同不聞。寄

同二乘。有信不信。如初會中五十五衆。及覺首等十首菩薩。功德林等十林菩薩。金剛幢等十幢菩薩。金剛藏等三十七箇藏菩薩。如是各各有十佛刹微塵數菩薩共集。隨位倍增。寄成諸位。令諸人天凡夫。得此法門。如此會中六千比丘。明是凡夫。於文殊師利所。頓明十耳十眼。此衆雖居在路發心。境界不離佛會。路上發心。爲表進修。非是即離其佛會。乃至第九會。覺城東會。一萬龍衆。五百優婆塞。五百優婆夷。五百童子。五百童女。並明是凡夫同證佛位。是故今言令凡實證。第九會覺城東過去佛大塔廟處。文殊師利。說普照法界修多羅門。無量諸龍。得生人趣。一萬諸龍。發菩提心。覺城五衆。俱登佛果。但舉善財一人爲首。俱及其五百之數。法皆同然。五百者。表五位。六千者。表六位。信亦在中。一萬龍者。表其萬行之門故。無有一事浪施設故。皆表法門。過去諸佛大塔廟處爲其會者。明古佛今佛道跡不殊。還同如來會內一種。善財南詢諸友。還明進修。又明菩薩攝化衆生之行相。第十會者。一切國刹及塵中虛空法界一切會。此十會徧一切刹塵中虛空法界有情身塵毛孔之內。如來重重重重海會無盡故。如是法界佛果法門。諸有信解。及初發心證入之者。猶如師子王之子。初生之時。雖則未

能如其師子王。力勢自在。然則師子相。全體無異。一切諸獸。皆當畏之。如於此華嚴經佛果法門。修信解及初證入者。亦復如是。能信自己身心性相。全體同諸佛果。自體恆真本大智故。及證入者。同諸如來佛果之門。本無修造。自體全佛。以此真門。成備進修差別萬行。恆無始終。一真果德。雖未能堪力用如佛。是則名爲種佛種子在於身田。以信爲始。以定慧力證入之者。初發心時。十住之首。已入佛智慧。是則名爲生在佛家。爲佛真子。已與佛智同故。具足如來諸善根故。便即超彼三乘得神通菩薩九地等見。一切三乘人天外道。智所不及。是故應當根堪之士。一心奉行。

大方廣佛新華嚴經合論卷第七終

大方廣佛新華嚴經合論卷第八

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

世主妙嚴品第一之一

稽首十方清淨海。法界真報盧遮那。六位因果諸菩薩。文殊普賢大海衆。所說法門清淨輪。果德圓滿金剛句。我今釋此微妙典。將欲廣利諸衆生。唯願衆聖垂加護。令於法門無罣礙。諸有見聞獲大利。皆同遮那清淨海。

夫闡教弘經。須分四義。一長科經意。二明經宗趣。三明其教體。四總陳會數。

一長科經意者。略作十段長科。一明如來始成正覺。二明舉果勸修。三明以果成信。四明入真實證。五明發行修行。六明智悲相入。七明蘊修成德。八明利生自在。九明諸賢寄位。十明令凡實證。一明始成正覺者。即世主妙嚴品是。二

舉果勸修者。即現相品已下。至毘盧遮那品。總五品經是。及世主妙嚴品。舉佛所成之果。令使人修。三明以果成信者。即從佛名號品已下。至賢首品。六品經是。亦通取前世主妙嚴品已來總是。便以十箇智佛。以爲自心之果。以不動智佛爲首。明自心智。隨分別性。無所動故。四入真實證者。從昇須彌山頂品已下六品經是。以十住爲體。住佛智慧家生故。五發行修行者。從夜摩天宮已下四品經是。以十行爲體。行佛行故。六明智悲相入者。從昇兜率天宮品已下三品經是。以十迴向爲體。體圓真俗。成大悲故。七明蘊修成德者。從他化自在天中十地一品是。蘊修前三法。令慣習成就故。八利生自在者。十定品已下。乃至普賢行品等。十二品經總是。以十地中蘊德成功。十一地利生行滿。方名法行圓滿佛。於始於終。無作體性。不移毫念。爲以法界圓明大智之性。爲十住見道之初。無時念故。三世無性故。總一時故。此非情識所知。唯智會故。九諸賢寄位者。即已上六位諸菩薩。并佛出現世間品亦是。皆從性海大智境界中。方便出現其身。寄位成十信十住十行十迴向十地。及等覺位十一地法門。令凡夫信入做學。依跡不迷其事。十明令凡實證者。以法界性中。安立十信等六位。進修方便行。不離體

用。不壞方便。其智彌高。其行彌下。逐根行滿。故名進修。隨力堪能。安立諸位。隨位知行。令不迷因果。使學者善明總別。依位成功。不滯始故。不離初故。即如下文善財等衆。優婆塞。優婆夷。童子。童女。各列有五百。具明十住十行十迴向十地十一地五位。一位有十。通爲五百。如六千比丘。通信亦不退。總云六千。一萬諸龍。以明萬行。如是之衆。並是凡夫。皆信是法界佛果智境門故。而登十住十地。故名令凡實證。已上十段長科經意竟。於中廣意。至文方明。如法界一品。總通前後四十品經。總法界故。明三世法總法界故。以此法界一品。是一切諸佛及以一切衆生之果也。於此一部之經。總有五種因果徧周義。一示成正覺因果徧周。即世主妙嚴品。通下五品經是。二信位及進修因果徧周。從佛名號品已下六品經。通十住十行十迴向十地位中。共二十品經是。三定體徧周。即十定十通十忍等品是。四行海徧周。即普賢行品離世間品是。五法界不思議大圓明智海徧周。即法界品是。有此五徧周義故。以此一部之經。有五品之內。品初皆有爾時世尊在摩竭提國。以爲品首者。明此五法。是一時一法界一剎那際一體用一切諸佛一共同之法。一因果等周圍滿。無前後義。一切諸佛皆如是。如是之

法。不離十定之中。剎那際。降神入胎。示現成佛。入涅槃。不離一剎那際。更無移也。以此一部之典。五度一箇爾時世尊在摩竭提國。唯法界品別。總明此一部之經。大體宗趣。一法界大圓明智。有此五種徧周之因果。從初信心。進修諸行。始終因果。萬行圓滿。畢竟不出十定之體。無時之性。凡聖總齊。本來如是。由情妄計。時量隨生。由妄計故。生老便有。若於根本法界門中。起延促見。皆是自情妄見。非實有故。如是迷無性理。違本無時智境之法門。起逐情隨妄。見時劫延促者。於佛正法之中。不成信種。當知是人。設修行出三界果。未有成佛之種故。即權教六通菩薩。聲聞緣覺是也。如法華經。不退諸菩薩。亦復不能知。此明出生死之不退。未成處生死中不退。又亦但得以空觀折伏現行煩惱。入初地見道位。非是已達根本無明。得根本智見不退。如是三乘見道。總是三種意生身菩薩。皆非是根本法界大圓明智。初發心住中。能十方成佛等不退。三種意生身者。初二三地。名三摩跋提樂意生身。四五六地。名覺法自性意生身。七八九十地。名種類俱生無行作意生身。如是三種意生身菩薩。並是法界大圓明智海大宅門外。草室權施。方便安立。令諸子等。且免火難。如此經下文。聲聞在會。如

聾若盲。六通菩薩。設聞此經。不能生信。如經具明。爲從無始際來隨計。設能於佛法生信。但隨情生信。迷自智境故。無自契實智。起眞信修故。若不迴心。畢竟不成佛故。設復教化衆生。還能成得三乘。及人天之種。但住一方之淨刹。無廣大法界。量等虛空。無邊智之大見。十方塵刹。對現色身。一切衆生。隨根引接。三乘無分。但云見三千大千之境。如此經。有世界海。有世界性。有世界種。皆甚深廣大。與法界虛空等。具如華藏世界品說。如三乘中。設見如來身三十二相。八十種好。設復廣大。云八萬四千。不見如來十佛刹微塵等身相隨好。三乘之種。但見如來化滿三千大千世界等行。不見如來化滿無盡佛刹微塵等行。三乘之種。所作一切。皆有邊量。不見法界。一一塵中。無邊量法。普賢行法。互參不礙也。

二明經宗趣者。其義有六。一明經宗趣。二此經何藏所攝。三分其序分。四定其正宗。五明此經付囑何人。六明此經流通所在。一明經宗趣者。此經名毘盧遮那大智法界。本眞自體。寂用圓滿。果德法報。性相無礙。佛自所乘爲宗。如法華經云。乘此寶乘。直至道場。又此經云。有樂求佛果者。說最勝乘。上乘。

無上乘。不思議乘等是。還令初發心者。爲志樂廣大故。還得如是如來大智之果。與自智合一無二故。此經宗趣。甚深難信。若有信者。勝過承事十佛刹微塵數諸佛。盡經於一劫。所得功德。不如信此經中如來大智境界佛果法界門而自有之。信此福勝於彼。如賢首品下文頌云。有以手擎十佛刹。盡於一劫空中住。彼之所作未爲難。能信此法爲甚難。十刹塵數衆生所。悉施樂具經一劫。彼之福德未爲勝。信此法者爲最勝。十刹塵數如來所。悉皆承事盡一劫。若於此品能誦持。其福最勝過於彼。又前頌云。一切世界諸群生。少有欲求聲聞乘。求獨覺者轉復少。趣大乘者甚希有。趣大乘者猶爲易。能信此法倍甚難。爲明此經宗趣甚深難信。修空觀者。息妄修禪。垢淨情存。聲聞獨覺。六通菩薩。未迴心者。無如是分。如經下文云。設有菩薩。經無量百千那由他劫。行六波羅蜜。得六神通。猶名假名菩薩。不眞菩薩。設聞此經。不信不入。如法華經。亦是爲迴三乘人。令歸一乘故。迴彼門外三車。權引諸子。令歸如來大智法界眞實門故。破彼几案所依法故。令得如來無依住智本自在故。華嚴經。即是始成正覺時。頓爲上根者說。法華經。即是佛出世後。四十年中。爲迴三乘者說。又佛乘三乘。一時總說。但隨

根自應。一音法門各有差別。總別義生。爲真體無時。無可作前後故。如法華經云。十方佛土中。唯有一乘法。無二亦無三。但以假名字。引導於衆生。又云。唯此一事實。餘二即非真。餘二者。但以十方諸佛共所乘門爲實。三乘爲餘二。但權施設未真者。是餘二故。以一實對諸權。皆是餘二。爲法華經。責聲聞緣覺不退菩薩三乘等。皆未能信一乘法故。爲權教菩薩。雖有一分求菩提之心。猶有怖生死故。得離染不退。未得稱真染淨平等不退。如修空觀菩薩。樂空增勝。及假真如觀。一向離纏。皆有忻厭。及樂生淨土等諸菩薩衆。皆能離生死出纏不退。不入法界性海。一真無忻厭門故。望此佛乘。樂生死者。及厭生死者。二俱是退。設觀空增勝。修假真如門。行六波羅蜜。得六神通。是離生死不退。非是生死涅槃一性中不退故。以是義故。華嚴及法華經說。得六神通菩薩。不聞不信此經典故。如法華經云。設有菩薩。讀誦八萬四千法藏。爲人解說。得六神通。亦未爲難。暫讀此經。是則爲難。唯此智境界。違情所解故。甚難信也。三乘信解。順情所忻。何以故。說佛果即在三僧祇之後。說佛淨土在於他方。此娑婆是穢土。修菩提者。厭垢忻真。樂生淨國。設有住世菩薩。所言留惑潤生。爲濟衆生故。

非由法爾根本智自在力。合如斯故。如是菩薩。皆是順情之法。法易信故。非如此經。說入佛果。不逾剎那。但隔迷悟。說無量劫。總不移一時故。說從凡夫地。創見道時。因果一時。無前後際。不見未成佛時。不見成正覺時。不見煩惱斷。不見菩提證。畢竟不移毫念。修習五十位滿。一切種智。悉皆成就。總別同異成壞。一時自在。皆非世情所見故。是故難信也。其所信者。如經下文十信之位。金色世界。不動智佛。上首菩薩。名文殊師利。此云妙德。云金色者。明白淨無垢。即法身之理。不動智佛者。即理中智也。一切凡聖身。等共有之。故云一切處文殊師利。一切處金色世界。一切處不動智佛。今之信者。當信自心。無依住性。妙慧解脫。是自文殊。於心無依住中。無性妙理。有自在分別。無性可動。名不動智佛。理智無二。妙用自在。是故號曰妙德菩薩。是故一切諸佛。從此信生。故號文殊爲十方諸佛之母。亦號文殊爲童子菩薩。爲皆以信爲初生故。信心成就。即以定慧觀智力印之相契。一念相應。名十住初心。便成正覺。取能行行處。號曰普賢。取妙慧無依處。號曰妙德。取善能分別知根之智。號之爲不動智佛。自契相應。名爲正覺。且能信處。號曰信心。自契相應。名爲住心。爲住佛

所住。妙慧解脫。相盡無生法故。若心外有佛。不名信心。名爲邪見人也。一切諸佛。皆同自心。一切衆生。皆同自性。性無依故。體無差別。智慧一性。應如是知。以此同體妙慧。知諸佛心及衆生心。應如是信解。不自欺誑。是故此經宗趣。爲大心衆生。設如斯法。諸佛自所乘門。一乘妙典。法界道理。令大心衆生。入佛根本大智佛果故。一念契眞。理智同現。即便佛故。爲法界道理。見則無初中後故。異彼三乘劣解者。宜聞三無數劫。登佛果故。宜說釋迦淨土在於他方。此娑婆是穢土故。是故法華經內。爲迴三乘劣解者。令龍女非器。剎那成佛。明信心廣大。非權施設。現實教故。所修實教。不迂滯故。言龍女始年八歲。表今生始學。非舊學故。畜生女者。明非過去積修。此明此生所信法門。理直無滯故。法界體性。非三世收。一念應眞。三世情盡。智無出沒。即佛果故。是故經云。爲劣解衆生。興度八相等事。娑婆世界。舉衆遙見龍女。即往南方無垢世界成佛者。解云。南方者。爲明爲正。以主離故。離爲明。爲日。爲虛無。即無垢也。舉衆遙見者。明三乘權學。信而未自證故。故言遙見。夫法界一眞。自他相徹。若當自得。焉得稱遙見。此經即令善財一生得佛。解云。一生者。從凡夫地起信。

之後。十住初心契無生也。即任法界智生。非業生也。至文廣釋。今且略明此經宗之所趣佛果法門竟。博達君子。熟可思焉。二明此經何藏所攝者。此經名毘盧遮那法界藏所攝。以徧照法界海。一切諸法門。盡含藏故。又此經不許三乘化佛權教所收衆生所知解故。化佛教中。菩薩及二乘之衆。不能解了一眞法界報佛法門。唯知三乘自分法故。設是菩薩。但知三千大千世界。爲一報佛境界故。千百亿釋迦。是化身故。不解此一乘實報法界報佛所說法門故。是故此經。還名毘盧遮那法界佛果智海所收。非同三乘菩薩化佛教中權施菩薩藏所攝。是故下文法界品中。慈氏所居樓閣。名毘盧遮那莊嚴藏。善財入已。唯見無量諸佛。法藏行門。報相莊嚴。無盡福相。皆阿僧祇。一一具如經說。此即依毘盧遮那佛所教法法行之因所報得。所居宮殿樓閣。一依法界藏行行所成因果故。乃至諸佛報得莊嚴因果亦如之故。藏者含容義。含容法界一切法門因果法皆無盡故。三乘經。多以恆河沙爲法門數之比量。成廣大義。此一乘經。多以一佛刹塵。及十佛刹塵。乃至無量佛刹微塵。爲法數之比量。又三乘法相。或一。或二三等。七八九十爲數。此經法門。一一具十爲數。以明佛果法門圓滿故。名詮既是廣狹不同。法藏必當

差別。是故此經。是毘盧遮那藏所收。非三乘菩薩藏所攝故。此經常以佛果爲進修道跡。是佛根本大智古跡。修差別智故。若異佛古跡。而有進修。無成佛義。如三乘。且免一分纒生死苦。非是依佛智體古跡。契修佛乘也。是故此經。是毘盧遮那藏所收。非三乘菩薩藏所攝。三明分經序分者。分爲二門。一都該一部。二當品自有序分。一都該一部者。即世主妙嚴品是。二當品自有序分。如經品品之中。會會之內。皆有爾時如是如是。序其品內之意。又此一部經。上下五度。序其世尊所居菩提場之處所。問。何以如是。答曰。從初第一卷。如是我聞。一時佛在摩竭提國。明初成佛處。在蘭若之中。次第二會中。又爾時世尊在摩竭提國。阿蘭若法菩提場中。始成正覺。明不移本處。而至報宅中居。爲普光明殿。明理智之行報得之宅。寄同世間。蘭若契證。方詣宅居。自此已去。上昇天宮。皆云不離本處。而身徧坐一切道場。或云而昇。如是天上昇天。明列位進修。不移本處者。明法界道理。以法性妙理。無往來內外故。大智體自徧周故。次四十卷初十定品。又云。爾時世尊在摩竭提國。阿蘭若法菩提場中。始成正覺。於普光明殿。入剎那際三昧。明以法界法身爲定體。無三世性故。從兜率天下降神。

及入涅槃。四十九年住世。轉一切法輪。總不出剎那際。以此三昧圓通始終。非三世古今故。如是敘致。以總言之。一切過現未來諸佛。皆盡一時成佛。并衆生生死。亦不移剎那。但衆生妄計。有年歲長短。如佛所說。即生即死。皆不移時。是故經云。一念普觀無量劫。無去無來亦無住。如是徧知三世事。超諸方便成十力。如此一品經。總括前後始終之際。無去來。今古性盡。明從凡夫地。一念發心。忽然見道。進修十住十行十迴向十地十一地。五位等法。成佛轉法輪。入涅槃。總不移剎那。爲以法界門爲開示悟入故。明實教一乘法界之門。法如是故。以三昧名目明之。此品都舉此一乘根本法界寂用之門。始終一際。無本末時分故。以爲成佛之頭。次離世間品亦然。敘致始成正覺。乃至普光明殿者。爲普賢菩薩入佛華三昧。佛華者。是所修佛行故。三昧者。明寂用無礙也。還同前敘致所在者。明修佛行。體用無始終。常圓滿無三世也。此品明修以普賢行。還以法界體大智。常隨衆行。圓該三世。還不移剎那際等故。明其衆行。即法界體用也。故如是敘致。皆明時不移。亦不移處。以菩提場無中邊故。所修衆行常等。如剎那三世。無增減故。無去來故。次入法界品。云爾時世尊在室羅筏國誓多林給孤獨

園者。此舉正宗。如來所乘。通前徹後。天上人間。十方世界。總以法界爲體。非虛妄體故。爲衆生隨迷不達故。此品之內。都舉天上人間十方世界。總不思議法界體。寂用自在故。故令衆生悟入。是故此之一品。如來但以不思議神力說。不藉口言。明世間總真總神。無出沒故。以明法界普該。前後本一際故。不須同敘菩提場。以菩提即法界故。前會總在法界會中故。故如是敘致也。十會之體用。總以此品通括一體一性一時一智之本母故。此五度敘其初成正覺者。總明此法界一時。無前後說。如此一部經內。世主妙嚴品。佛名號品。十定品。離世間品。四度皆重敘致始成正覺普光明殿。入法界品。但言給孤園。此五品經大意。有五種佛果徧周。總該餘品。此五品經意。是故重敘。但爲此五種徧周法界因果。一剎那際。五事頓彰。該收諸位。總在其內。成法界大智果故。以此有五箇經頭。題目相似。唯入法界品。獨言給孤園。云何爲五種徧周因果者。一世主妙嚴品。明始成佛果徧周。經云。不移本處。而身徧坐一切道場。二佛名號品。在普光明殿中說。明報身及國土名號法門。設化利物總徧周。此會說六品經。成就信位佛果。此明信心徧周。三十定品。如來入剎那際三昧。以此三昧。普該此經。及無

盡三世劫。總是一時。本來如是。爲佛道合然。相應現其本法。成佛說法。及滅度時分。無有遷移。此明佛大智本性自體寂用定體徧周。乃至入涅槃。四十九年住世說法。處母胎猶未出。在兜率天猶未下生。以實法際體然。無往來今古性故。四離世間品。明以法界自體本寂定大智。爲普賢行體。即明覺行徧周。佛華者。覺行也。三昧者。本覺體也。五入法界品。明根本法界本體大智佛果徧周。此五種徧周。總以法界爲體。總是一徧周法門。此五徧周。該收諸位諸差別故。恐人不解。失其意趣。故一部經內。五處敘致題目鉤連。前後相攝。爲明此經。以法界體。本無次第本末兩頭中間。時分長短故。如王寶印。一時普印。無前後成文也。以法界寶印。普印諸位。但明五位十住十行等。進修習氣不同故。性無差別。以總別同異成壞。十玄六相義融通。道理自明。此六字義。爲緣起三對。六字都該萬法。一總別一對。二同異一對。三成壞一對。總不相離。不可廢一留一。亦不可雙立。亦不可雙捨。總是斷常生滅中邊等見。皆是情量。不了任法自性緣生。此乃以無思正慧力方解。以思而知之者。且信心也。此是初地菩薩。觀察世間一切緣起法。雖總同時。不計俱有。雖總具別。皆無自性。不可計法俱無。餘兩對

亦然。皆是有無。非有無。俱不俱。常無常。情所計故。如一切緣生法。如空中響。本自無爲。應物成音。如善筮著龜者。無思無爲。不鬼不神。而應緣能知萬有。而告人古今吉凶。如指掌者也。應如是知。任法緣起。非如情也。一多總別。諸同異門。一切成壞。皆非前後同時等計。法界法門道理。亦復如是。皆非前後有無同時。俱不俱。或滅或留。情所計故。皆是性起大悲。無作大願。任法緣起。稱無作智。非故非新。施設轉正法輪。出生滅沒。皆不可作故新去來之解。皆是如來無生滅智自在力故。雖異二乘自寂取證。滅情亡智。即以起大願等利諸衆生。而無願想。雖以大慈大悲饒益衆生。而無愛想。雖入生死。不沒淤泥。雖在涅槃。十方世界利人不息。皆是如來無性無依無作智力。皆不可作去來現在古今之解。四定其正宗者。有三種正宗。一隨位正宗。二隨品正宗。三大體正宗。一若以隨位正宗。十信十住十行十迴向十地十一地。各有正宗。十信。以佛根本不動智。以爲正宗。十住。即以證入法界智。如來果德。理體妙慧。以爲正宗。十行。以佛根本智。起普賢行進修。以爲正宗。十迴向。以理智圓融真俗。起興大願。以成悲智。使令理智大悲均平。不偏靜亂。以爲正宗。十地。蘊修悲智。使令慣習

功濟。以爲正宗。十一地。普賢行等衆生情流。充滿法界海。任用利生。以爲正宗。此爲隨位正宗。二若以一部教門。四十品之內。當品自有正宗。隨品名目總是。可知。三以一部教大體正宗。以如來大智法界。性絕古今。體用圓滿。一乘佛果。以爲正宗。常以此佛果正宗。以爲開示悟入進修。使令慣習成就。又此經四十品中。以法界品爲正宗。餘品爲伴。爲十方諸佛。以自心分別煩惱。成一切智。一切種智。法界體用。以爲所乘。成正覺故。此根本煩惱。非三乘所知故。二乘且伏而不起。菩薩以空觀折伏。無現行故。廣如勝鬘經說。一切衆生。以法界門。以爲開示悟入。明如來根本智。是衆生分別心。契同無二故。則法界自在故。以是義故。十住初心。便成正覺。以將十行十迴向十地十一地法門。治令慣習智悲成就。更亦不離初心法界智體用故。但以此法界智體用無依住門。治諸習惑。惑薄智明。分殊殊勝。但須定慧照用。身心諸法內外無依。無根無本。諸貪恚癡。漸漸微薄。諸佛智慧。漸漸增明。法樂自娛。非貪世樂。此是法界中漸漸非始末也。五此經法門付囑何人者。此經法付囑大心凡夫。經云。此經法不入餘衆生手。解云。餘衆生者。三乘及外道。樂著人天。及求出世樂者。何以故。此

經不許三乘菩薩。具六神通。尙自未能聞經生信。何況二乘人天外道。經云。唯除生如來家。法王眞子。即大心凡夫。能生信證入故。生於佛家。不言已生佛家。諸大菩薩。諸大菩薩。常爲衆生說法。無大心凡夫信證。不名付囑。不名流通。爲無人信。無人悟入故。經云。若無此子。此經當滅者。解云。若無凡夫信證者。此經當滅。若不如是者。諸大菩薩已生佛家者。已有如是無量佛世界海微塵數故。如來何須念此經當滅。既不念已生佛家大菩薩衆。明知當念大心凡夫。非爲已入聖者。當知此經。付囑大心凡夫故。如出現品說。六明此經流通所在者。此經流通分。每在品末。有動地雨華。菩薩供養處總是。大都付囑流通分。在如來出現品。不在經末者。爲此品是經之末。爲此品是三十七品。是五位菩薩結會五位因果行門之終。以是義故。是經之末。又如來從前第六卷初。第二現相品內。齒間放光。令普賢菩薩。說衆生因果。如來因果。如來因果者。世界報得國土莊嚴。眉間放光。令文殊師利。覺首。賢首等。說十信之門。次後說十住十行十迴向十地十一地十定十通等法。從現相品至如來出現品。有三十六品經。等覺位中一會。在第三禪說。有一品經。來文未足。通取其數。有三十七品。前後總有四十品經。

至其如來出現品。是五位因果始終之末故。如來出現品中。示現法則。表其始終五位因果滿故。即以眉間光。灌文殊頂。口中光。灌普賢口。令此二人。體用因果。互相問答。以文殊爲法界體。普賢爲法界用。二人互爲體用。或文殊爲因。普賢爲果。或二人互爲因果。此一部經。常以此二人表體用因果。今古諸佛同然。皆依此跡。以明因果進修之益。故如來放果光明。及口中教光。加此二大士。即明五位教門始終之舉。口光。是付囑義。流通義。令教行流通故。眉間毫光。是果義。以放果光。付囑文殊。令文殊發問果法。普賢說佛出現。即是流通。此品之內。具說付囑流通。亦作輪王太子。福具王相。明能治王位等喻。釋文至品方明。爲如來出現品後。離世間品。即是佛自成果後。行普賢利他之行。訓俗之門。十一地果前。行普賢行。有自利利他。十一地果後。行普賢行。純是利他。如前七卷會釋中。略已釋訖。如法界一品。總該一部教。總是法界門。在祇園者。明衆生世間。即法界故。衆生性。即不思議故。衆生分別。即如來智故。即明就衆生世間。說是法界不思議故。

大方廣佛新華嚴經合論卷第八終

大方廣佛新華嚴經合論卷第九

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

世主妙嚴品第一之二

三明教體者。依涉法師釋出經教體云。一切聖教。四法爲體。名句文身語爲性故。以先慣習相領解故。此爲四。聞持流布。令法久住故。然此法依六處轉。一者依法。謂十二分教故。二者依義。隨位相故。三者依彼時。說去來今自他事故。四者依處。要在世界國城故。五者依數。一十百千至微塵故。六者依彼補特伽羅。必有說佛時故。由斯六處。得有正法久住。補特伽羅者。此云數取趣也。上依涉法師立教體竟。今通玄以自管闕。依此大方廣佛華嚴經。立其教體。約立十法。以爲教體。廣乃無盡。一。一切衆生根器。佛一圓音。一念三世。無始無終。常轉法輪。以爲教體。二。一切聖凡境界。莊嚴果報。以爲教體。此乃見境

發心。不待說故。見惡厭之。見善樂之。總能起善故。又一切法。無非佛事故。三。一切法自性清淨。以爲教體。以觀察力。心契自相應故。不待說故。四。以行住坐臥四威儀。以爲教體。見敬發心。不待語故。五。以佛菩薩出現涅槃。以爲教體。以此法事。令諸衆生見敬。及念戀發心故。六。以佛菩薩神通道力。以爲教體。現諸自在。見者發心。不待文句故。七。以無常苦空爲教體。觀者發心。不待語故。八。以無言寂然爲教體。即淨名居士默答。不待名句文及以語故。九。以名句文身語及衆生根爲教體。藉言方現故。十。以法界一切法本眞爲教體。衆生法之。能淨垢故。大要言之。一切衆生諸煩惱海。一切衆生隨分善根。人天樂果。聲聞緣覺菩薩佛乘。解脫涅槃。名句文身語業等。及一切善惡果報。虛空法界。言與無言。一切法無非教體。以自觀智。或以聞法。或自思惟。內薰智現。能離諸惡。及得涅槃。說與不說。皆是教體。若無煩惱。即無教體。四總陳衆會者。於中大意。其義有三。一總舉會數。二陳其會意。三說佛出世所由。一總舉會數者。其會有十。二陳其會意者。一初會在菩提場中。明示現初成正覺。爲化衆生故。第二會在普光明殿者。明法報及行所行報得依正二報所居之宅。是故於

此品初。重言如是我聞。顯起初會。爲初蘭若菩提場體。不離此體得道。此處報宅所居故。猶如世人於靜處得道。方始歸來。示現此法本無來去遷其時分。第三昇須彌山頂帝釋宮。是第三會。明從普光明殿中。說十信之位。於其地上。創起信心。今於帝釋天宮。表其進修之位。法行增勝。故於此天說十住之門。明十住之位。創始應真。心與空合。一分自得慧用。自在如天故。如上高山。身與空合。以處表法位勝。不即要在生天。明無相慧用。如天自在故。又明山體。於世間中。出高過俗也。表於十住初心。禪定如山不動。無相妙慧。出俗現前。能破障故。第四會在夜摩天宮者。明夜摩天居在空際。不與地連。明其十行。依空行行。不與貪欲痴愛繫著諸有之連。故於此處說十行位。表法如是。不要身生彼天。明在行恆空。無所依故。第五會在兜率天宮者。明此天處。是樂知足。故說十迴向。爲表迴向之位。均融理事。大願大悲大智。使不偏僻。不貪世樂。不貪涅槃。不著大悲。不著大願。不離其中。使令處世。如蓮華同塵而不污。又表此天。於欲界處中。下有忉利夜摩。上有化樂他化。以明上下此天處欲界之中。還說十迴向門。表令法身大智萬行。大願大悲。均調處中。不令同世慈悲有愛。不令如三乘

樂修出世心增。二乘趣寂。菩薩留生。及捨淨土等過。皆非稱其法爾故。表法如是。不即要生彼天。明迴真入俗。使悲智均平。第六會在他化自在天。爲於此天說其十地。爲此天。以他變化。用成已樂。以明十地。大悲大智。皆悉成滿。但化衆生。以爲自己涅槃之樂。無自樂故。問。何故超化樂。而於他化說十地之行。答曰。爲明從十迴向。均融理智大悲大願成滿增勝。不依次第而超化樂。不同下位次第而修。如世興易。初以十錢。得利一倍。後以二十。便成四十。即便超初及第二利故。又明十地果終。居欲界之際。而得自在。同而不染。出而不離。又明十地菩薩。功超欲縛故。此天同其魔梵。教化波旬故。同魔王位。攝魔眷屬。教化自在。故居此天。又明菩薩進修行相。十地之位。道力功行。階降合然。以無明住地。未純熟故。未明淨故。其無明住地。果極方終。設至十一地。二愚猶在。是故此經。阿僧祇品。如來隨好功德品。此二品之法。佛果已前。十一地普賢行滿。未能達盡。以是義故。如來自說。明果終始知算數之極。如來隨好功德。佛果方終。已前諸位法門。當位菩薩自說。最下入法界一品。如來神力說。表法界中。明一切法總神總真。總不思議。明法界體。凡聖一性。故於人中說。至文

方明。以此二愚佛果方息。是故十地之位。隨力所堪。堪至此天故。雖進修階降。位位差殊。然法界體。一時一念。一得一切得。爲明法界無始終法故。不可即作始終長短。存情思想。違理之見故。以定慧照之可見。第七會在第三禪說。此一會說百萬億偈。此會來文未足。如瓔珞本業經具云。彼經是化三乘人已後。如來領至菩提樹下。卻說初成佛時。說華嚴經會次第。彼經具言。計此一會。通爲十處十會四十品經。爲此經十成法。皆圓滿故。明三禪之中。初禪除憂。二禪滅苦。憂苦既無。三禪唯是法悅樂故。由法樂故。喜動還存。以喜動故。色心還在。此色心。是樂禪悅。樂無思之色。非如欲界之色故。心有無思樂禪之色。出入之息猶存。報得淨身。身如皓雪。衣如金色。過身一倍。行即遊空。足不履踐。初禪身長二里半。二禪身五里。三禪身十里。衣與身倍。至文廣明。明於此天說十地法門。表等覺位中順其法身。行其萬行。教化衆生。徧周法界。常法樂故。至第四禪。寄同是佛位故。稱眞法性。無出入息。隨理普周。任衆生見。習氣迷法之愚。一時總盡。世及出世法。無事不窮。號之爲種種光明徧照義也。以智滿故。表法如是。不即如是上下往來。但以法身大智虛空。一切智日對現色身。於

法界中。隨其器水。普現衆像。此之一會。超前十地。過初禪二禪二天。明此十地智。倍倍增故。已上昇天寄處。表法昇進漸漸自在。非是法屬彼天。皆徧一切處故。第八會在普光明殿。說十定法門。其定名入剎那際。如三乘說。八十生滅。爲一剎那。八十剎那。名爲一念。此明三乘說。如此一乘中。但以剎那是極短促。思慮不及之故。終不論別有生滅。明如來出世。始終不離剎那際。如離世間品說。如來正處胎時。住兜率天。并初生。出家。學道。成菩提。轉法輪。入涅槃。總一時。身猶處胎未出。爲此定體。稱法界本性。以爲定體。更無長短始終。三世總爲一際。更不許如世妄情。想佛出興。作長短計。違眞理故。即明時之極也。更不論剎那外別有生滅。此是當部經之意趣不同。古人釋此會爲重會普光法堂者。意不如是。不以見名言教中兩度二度重敘普光明殿。即云重會乃至三會等故。失其眞意。豈可令他作去來之見。如經意者。但以佛自體無作大悲爲母。以一切種智爲佛。以法無性無所依爲時日歲月。以一切衆生根器爲明鏡。佛於一切衆生心海。任物自見。各得自法。皆令向善。及得菩提。非是如來有重來重去相故。但明此普光明殿。是如來自性一切智種智之都體也。爲依報所居。此剎那

際定。是佛一切智種智之法性故。意在總括一切法界衆海會等總體。不令學者有往來自他故。今者卻作往來重會之見。此將不可也。總明如王寶印。一時頓印。不可作重會去來之見。經無此意。第九會在普光明殿者。明從此處而起信心。發行修十住十行十迴向十地十定十通十忍。乃至如來出現品佛果位終。皆悉不離普賢舊行。是故佛果向前。十住已上。自乘普賢行滿。即如來出現品前三十六品經至普賢行品是。佛果位後。自行已滿。純是利他普賢行故。出現品後離世間品是。爲從第二會普光明殿中。起信心已。經過五位。始終因果。不離本跡諸佛果滿舊普賢門。於十定品中。亦其此處。明以法身定體。圓通終始。一際一處。三法同一。不移普光明殿報居之宅。齊頭普印。無有重會三會去已還來。古人釋此會爲重會三會普光明殿。以法界門。不可作世情思想解故。如善財。從覺城東大塔廟處。妙德之所。初生信心。經過五十箇位門。至德生童子有德童女。爲未是佛果。已前自利利他普賢行終故。十二位中妙覺之位。見慈氏如來。是佛果終位。卻令其善財卻見文殊。明今至果。不離舊所初信之門菩提理智。便聞普賢名。便見其身等普賢身者。彼明果後普賢之行。經云更入無量三昧者。爲明證過佛果位內二

種愚故。二愚者。一迷阿僧祇廣大數愚。二佛位之內隨好功德廣大愚。此之二法。唯佛究竟。自利進修五位菩薩未過故。以是義故。此兩品經。如來自說。及法界品。如來不思議神力說。爲明法界。是一切諸佛共所究竟果故。以將此品。示悟衆生。餘三十七品。是當位菩薩說。勝鬘經云。無明住地。佛地方除。三乘三祇之果。及淨穢別報。菩薩還歸本土。二見順情。多不相似。如法界因果。當念不遷。不虧階級。總別一多通融。方便全殊。此普光明殿。說離世間品。明信心及究竟佛果普賢行。總不離舊跡。亦如慈氏樓閣內。普現三世。一念普觀三世諸佛。及以菩薩一切衆生。視如即夕。無有古今。即其義也。第十會在法界品。明此一會。普含諸會。及十方刹海法界虛空界。總之一會。重重無盡。無盡重重。一切諸佛海會。及一切衆生之海。總以此法界一品總爲一體。一切境界。隨衆生心。以此爲別。以六相十玄該之。以無思之心照之。觀之可見。或以世主妙嚴品爲一會。此普光明殿三會爲一會。通前世主妙嚴品爲二會。上昇須彌。夜摩。兜率。他化。第三禪等天。爲五會。通前兩會爲七會。法界品祇園人間爲第八會。善財大塔廟處爲第九會。以虛空法界一切處會爲十會。即該收前後十方總盡。亦是一

家所釋。亦不違道理。古人云九會者。爲未知有十一地在第三禪說。此經總十法爲准。不可說九也。如善財覺城東會。明前諸會。但且寄成五位之法。未寄顯能修行之人。如覺城一會。即明能修行之人。及菩薩攝生方便法則。第三說佛出世所由者。如來出世。寄位示真。若見如來始成正覺。及正像末三時教者。非正覺見。非見佛出興。此乃劣解衆生。且如是見。求正覺者。不應如是。問曰。云何見佛出興。答曰。當見自身。無身無心。無出無沒。無內無外。不動不寂。無思無求。世及出世。都無住處。無心所法。無法法心。心法無依。性無始末。以無依住智。說如斯法。教化衆生。皆令悟入。是名見佛出興。如光明覺品。文殊師利頌曰。世及出世見。一切皆超越。而能善知法。當成大光耀。若於一切智。發生迴向心。見心無所生。當獲大名稱。衆生無所生。亦復無有壞。若得如是智。當成無上道。一中解無量。無量中解一。了彼互生起。當成無所畏。前兩行頌。明佛出興。後兩行頌。明正覺中智。佛出興世。當知如是。不令衆生取佛出興滅沒之相。見初見末。但見自身衆生身心無生滅體。是出世間。

夫說一部之經。始終徒衆形相。總有二百二十八衆。形類部從。莊嚴道場。

形類各異。當會事意。皆有所表。至位方明。不可懸摸。且初一品。有四十五衆。表意如下。至文方釋。教文廣博。預陳難解。對事方指。目擊道存。如前長科經意十段門中。第一會中。始成正覺。總有六品經。經有十一卷。其中品名者。一世主妙嚴品。二如來現相品。三普賢三昧品。四世界成就品。五華藏世界品。六毘盧遮那品。此六品經。於初會中。有六種意。此初會中。從如是我聞已下。有序分。正說分。流通分。自餘會皆然。此初會中。從如是我聞六字義。至始成正覺。是序分。其地堅固金剛所成已下。是正說分。至動地雨華。是流通分。從正說分中。說如來成佛因果。菩薩神天五十衆。表佛自行利生之衆。令諸來菩薩。見如來因果。及示現得道入法。入即同佛所知見法。與後學者以爲樣式。從其凡夫入法。即同佛知見故。初發心時。便成正覺。從此義生。已後諸會。皆悉自有序分。至文方明。大都付囑流通分。從如是我聞至如來出現品是。前已敘竟。如輪王太子喻是。一初世主妙嚴品。明佛初成正覺。諸世間主來集。慶佛成道。又自求所益。又所表如來自行五位法門。二如來現相品。明佛初成正覺。口光告衆。毫光示法。三普賢三昧品。明佛令普賢長子。入如來藏身三昧。審諦觀法。從三

昧起。說佛果報。衆生業力。成就世界依正二報。國土莊嚴。四便說世界成就品。明由衆生業力起。五明華藏世界海。佛自智果報得莊嚴。六毘盧遮那品。即明引古證今。令衆信順。法不虛來。古今相照。令信不疑。今此初會六品經。皆有趣。就六品之中。還依會釋分爲二門。一從世主妙嚴一品經。明佛始成正覺。略示依正二報之所莊嚴。二如來現相品已下五品經。明示果勸修。於此二門。且於初門世主妙嚴一品。義分十門。第一明毘盧遮那始成正覺。依正二報之所莊嚴。第二明十普賢衆。常隨佛衆。第三明諸神八部諸天來集。第四明結衆已來。第五明十大天王。以自得益法門。歎佛十地行果。第六明日月天子八部王等。以自得法門。歎佛十迴向行果。第七明十衆諸神王。主緣神爲首。各以自所得法門。歎佛十行之果。第八明海月光大明菩薩等十大菩薩。通九衆諸神。以自得法門。歎佛十住行果。第九明座出自衆。明佛自行普賢行果。第十明華藏世界動地興供。明佛出興。大衆歡喜。福威感應。已上初會十門中。菩薩神天。總得如來五位法門。但化令人入位者。皆得一分應眞理智。總得稱之爲神。能主導衆生。非鬼神之神。已入如來智。法力自在故。十地如天。亦明自在。至文方明。

今釋初會中世主妙嚴一品。如前十段科文中第一段。明佛始成正覺。於此一段。復分爲二。一釋經題目。二隨文釋義。

一釋經題目者。何故名爲大方廣佛華嚴經。世主妙嚴品第一。解云。大者無方義。方者法則義。廣者理智徧周義。佛者智體無依住義。智自在義。華者徧法界無盡行義。以行能開敷自他果故。華是感果義。開敷義。嚴是莊飾義。明初發心住位。以十信中有作行華。開敷十住位中妙理智慧果故。復生無作十種行華。常以法行互嚴。用淨自利利他之道故。行爲嚴飾義。世主妙嚴者。以此初品。有諸神天八部之衆。皆爲世間主。各將十佛世界微塵數隨身部從。或但云無量。來嚴道場。此爲依衆成名也。故云世主妙嚴。又佛及菩薩。皆爲世間主故。以能主導衆生。總爲世間主。亦此初品。總標一部。一部都舉。總有二百二十八衆。形狀不同。各各部類。或言一佛世界微塵。或十佛刹微塵。或言無量。以嚴海會。故言世主妙嚴。或以佛福報境界。妙嚴依正。亦得稱爲世主妙嚴。爲如來亦爲世間主。主導衆生故。此爲依主得名。品者均別義。明五位及信心。同異差降。意類別敘。進修生熟。各有條貫。次第分明。令後學者。自識本行。進修不惑故。

爲品類均別義也。第一者。非是次第前後之第一。爲法界門中。無前頭在後之次第。皆是一時無二念。同時顯著諸品之第一。一多緣起同時之第一。是名同時具足相應門。一多相容不同門。以十玄門及六相義通融。品名亦如是可知。不可如情所計。故名第一。

第二隨文釋義者。從如是我聞。至如是無量功德已來。於中有七十一行經。長科爲四分。

如是我聞。一時佛在摩竭提國。阿蘭若法菩提場中。始成正覺。

第一從初如是我聞已下。至始成正覺。於中有八句經。二十四言。總明斷疑成信分。前之六字。明結集聞經之主。後之五句。敘致如來得道之處。義分爲三。一定傳教人。二定說經時分。三釋經文義。一定傳教人者。如三乘中。大智度論第二卷所釋。如來臨入涅槃時。告阿難。十二部經。汝當流通。復告優波離。一切戒律。汝當受持。告阿那律。汝得天眼。常守護舍利。勸人供養。告大眾言。我若住世一劫。若減一劫。會亦當滅。語已。雙林北首而臥。入般涅槃。阿難親屬。愛習未除。心沒憂海。阿泥盧豆語阿難。汝是守護佛法藏者。不應如凡夫人。

自沒憂海。諸有爲法。並是無常。汝何愁憂。又佛世尊手付汝法。汝今愁悶。失所受事。世尊今日雖在。明朝即無。汝當問佛未來要事。盧豆教問要事有四。一問如來在世。親自說法。人皆信受。如來滅後。一切經首。當置何言。二問如來在世。諸比丘等。以佛爲師。如來滅後。以何爲師。三問佛在世。諸比丘依佛而住。如來滅後。依誰而住。四問如來在世。惡性車匿。佛自治之。佛滅度後。云何共住。阿難如教。請問世尊。世尊答云。經首當置如是我聞一時等六字爲句。二云。比丘皆以波羅提木叉爲師。三云。諸比丘皆以四念處住。四云。惡性比丘以梵檀治之。此云默擯。若心軟伏。爲說迦旃延經。此云離有無破我慢心。又如五卷大悲經中。阿難請佛。云何結集法眼。佛告阿難。我滅度後。大德比丘應如是問。世尊何處說大阿陀那等經。汝應如是答。如是我聞。一時佛在摩伽陀國。菩提樹下。初成正覺說法。乃至娑羅雙樹間說。如是等二十餘處。所說之經。佛自重教阿難結集如是。是故此六字句義。佛教立故。斷後聞經者疑。知非是他餘人說故。亦非阿難自說故。依涅槃安立。如經初。准科文。從如是我聞。至始成正覺。有八句。依五卷經說。令斷衆疑。一者。從如是是一句。我聞是二句。一

時是三句。佛在是四句。摩竭提國。阿蘭若法。菩提場中。此之三句。義唯是一。但陳一處。三法是一。并始成正覺。爲六句。是故如是。我聞。一時。佛在。菩提場。始成正覺。總爲六句。今言如是者。如即如佛所言。是者是佛所說。簡非異說。兩名相順。契信不殊。明真是佛說。非阿難自說。亦非魔梵所說。又我聞一句。是阿難從佛所聞。非轉轉傳聞故。亦非是非人所制故。又非如外道經書。青鳥銜來。石崖崩得。是斷疑成信分。如眞諦三藏云。依微細律。阿難當昇法座。結集法藏之時。其身如佛。具足相好。衆見此瑞。遂生三疑。一疑佛大師。從涅槃起。更爲衆生說法。二疑他方佛來。三疑阿難轉身成佛。今爲除此三疑故。安立六字。是阿難自稱。如是之法。我從佛聞知。非是佛重起所說法。亦非他方佛來。又非阿難自身成佛。但以法力故。令我似佛。是故下高座已復本形。以此義故。以此六字。用斷衆疑。問。如阿難既是如三乘中說。是佛得道夜生。年二十方爲佛弟子。其二十年已後經是親聞。已前傳聞故。轉法輪經云。阿難結集時。自說偈。佛初說法時。爾時我不見。如是展轉聞。佛遊波羅奈國。爲五比丘衆。轉四諦法輪。故知已前非親聞故。答。薩婆多論云。阿難爲佛作侍者時。請願言。

願佛二十年中所說之經。盡爲我說。勿與我故衣及殘食。將知此也是親聞。又如涅槃經云。阿難多聞士。若在若不在。自然當解了。常與無常義。又阿難得覺意三昧。佛所說經。遠近常聞。此已上阿難傳法。並是三乘經中所說。如此大方廣佛華嚴經。傳法阿難。非如上說。夫天中之天。十方調御。化儀主伴。豈是小緣。自非器類齊肩。示陰陽而影響。三世窮劫。一念而知。無盡古今。常如即夕。今以三乘情見延促始終者。未可詳其傳教之主。今此華嚴經。明傳教主伴者。皆是神洞玄源。道齊智海。如文殊普賢。互爲師範之者。所爲也。豈論生時年歲。作前後之見。如是佛出興世。轉法輪時。如來以性海大智之印。印衆生情欲爲文字。於一音中。無前後際。一時普印。隨樂不同。各隨自心所樂之法。皆得聞之。設阿難示行傳教之主伴者。是普賢行海。隨器高低。出沒任流。依根現跡。皆不得以三乘定例。同已凡夫。識達聖詮。簡權從實。如上所說。並是聖賢密潛同事。是應三乘權化。未爲了教。如阿闍世王懺悔經。有三種阿難。一阿難陀。此云慶喜。持聲聞法藏。於上二乘隨力隨分。二阿難陀跋陀羅。此云慶喜賢。持中乘法藏。於上大乘隨力隨分。於下小乘容與兼持。三名阿難陀娑伽羅。此云慶喜海。

持菩薩大乘法藏。於下小乘容與兼持。此者亦是三乘中傳教阿難。未爲實教。如是華嚴經傳教阿難者。正是阿難昇高座時。身同諸佛。一時頓演四乘等教。隨根總結集。即阿難與佛。體同不殊。此釋亦不違道理。又如涅槃經云。阿難所未聞經。弘廣菩薩。當爲流通。若望此經。非三乘所知。即此弘廣菩薩。傳教非謬。今此稱如是我聞者。弘廣菩薩也。又大智度論云。是文殊師利。稱如是我聞。以彼論中云。文殊師利。佛涅槃後。四百年中。時文殊師利。猶在世間故。又如智度論云。文殊師利與阿難。在餘清淨處。結集摩訶衍藏。如上所釋。總是聖者。隨方便言。若以大體論之。總是如來。文殊師利。普賢菩薩。隨事之行故。設言三身阿難。亦復如之。總是佛自普賢行中。隨根方便。隨器高低故。已上定傳教人竟。二定說經時分者。略立十種說教。前後不同。一如力士經說。佛初成道。一七日思惟已。即於鹿園說法。二如小品經說。佛初成道。鹿苑轉四諦法輪。無量衆生。發聲聞心。乃至獨覺心。大菩提等心。不言時日。三如法華經說。三七日詣鹿園說法。四如四分律。及薩婆多論。六七日方說法。五如興起行經。及出曜經。七七日方說法。六如五分律。八七日方說法。七如大智度論。五十日方說

法。八如十二遊經說。一年不說法。九如今唐朝藏法師。決定將如來成道。定二七日。說華嚴經。已上見佛說法。前後不同。皆是隨自見佛說法。前後不同。非是依本法界成實之說。十今通玄依此華嚴法界門。定說法時分。還依本教。定其時分。總不如上。如來依真出世。利物還令至真。若也各自隨逐自情。永劫迷輪苦趣。乖真逐妄。佛意不然。經自有文。何須違教。逐權背實。障業何休。如十定品說。如來於剎那際。出現於世。入涅槃。總無時也。言剎那際者。猶是寄言爾。以無時。即一切時出現。一切時說法。一切時涅槃。爲寂用無礙故。隨衆生心現故。又如法華經。吾從成佛已來。經無量阿僧祇劫。以無時可量。故言無量。此爲佛說法時也。以此爲定。不逐世情遠思。爲無量之想也。以無時。是佛說法時也。以本教。說本時。本時者。法界無時也。如十定品。以剎那際出現住世入涅槃者。意言時無可移。如剎那際。總明法界無可遷移時也。今定說經時分。只是三世古今情盡。以爲本說法時也。不可依前權教。逐情引接之說。三隨文釋義者。從初六字八句斷疑成信分中。依大智度論云。如者順也。又是者印也。即印順信受。故言如是。如是總舉一部文義。即指已所聞之法故。故云如是。又依

長耳三藏約三寶釋。一約佛。謂如佛所說。是我所聞。是佛所說。又依藏法師釋。約法云。謂如我所聞。是佛所說。又如稱理教。是我所聞。又今通玄約法釋云。如者。諸法如故。即是佛故。言如是以法界大智之真我。聞佛說法界大智之真經。故言如是我聞。即明師弟體一。此約華嚴法界門釋。爲明初發心因果理智不異佛故。又一切法如也。以法體如。所說法者及法亦如。此法界智是所聞之智。智亦如故。故言如是。心境不二。方聞佛所說經。若心境有差。不可聞佛所說。亦復不能信順領受故。我聞者。是法界智之真我。還見法界之真佛。還聞法界智之真經。總法界智之真人。互爲主伴。還化法界智之真衆生。悟入法界智之真性故。故言如是我聞。夫佛日出興。化群生之軌範。所有結集傳經之主伴。自非氣類齊光。道相知而利物。以弘廣菩薩。文殊師利。如來自行普賢等。傳持聖教是實也。非實是三乘種智等人。能傳教乎。設是阿難。亦是同流。皆以常樂我淨大智慧之真我。聞如來大智所說之真經。非假我故。皆如佛知見故。言如是我聞。不同涅槃具四緣和合之所聞故。云何四緣。一耳根不壞。二聲在可聞。三中間無障礙。四有欲欲聞。如是之聞。是凡夫聞故。又凡夫及三乘。有十種緣方得聞。一本識

爲依。二耳識種子爲因。三末那爲染污依。四意識相依。五自類耳識爲無間依。六耳根不壞爲境根。七作意欲聞。八境界爲所緣緣。九中間無障礙。十境近在可聞。如是之間。是凡夫及三乘有限量間。不同此教菩薩。以徧法界大智慧爲聞。更無能所。以一圓明智境。一念普聞三世劫無量等諸聲。皆不如上說凡夫及三乘計無量劫者。是法界聞中。一念一時聞。以智無裏外。一時聞故。一時者。依梁論。一時有三義。一平等時。無沈浮顛倒故。二和合時。謂今聞能聞正聞故。三轉法輪時。即正說正受時。如依諸古人說。正說法華經時。非是說餘經時。正說金剛般若經時。非是說餘經時。名爲一時。取正是說當部經時。名爲一時。今此說大方廣佛華嚴經時即不爾。即是以法界體。寄言一剎那際。出世及涅槃。以一言音。一時徧周十方國土。轉法輪時。名爲一時。非如上說一時之義。佛者覺也。覺有二義。一始覺。二本覺。此佛者。覺無始終。三世障盡。名之爲佛。不如權教。有出世涅槃。有始終故。又佛者。大智度論中有四義。一名有德。謂婆伽名德。婆名有故。二名巧分別。婆伽名分別。婆名巧故。三名有名聲。婆伽名名聲。婆名有故。四名能破姪怒癡。婆伽名破。婆名姪怒癡故。又佛地論說有六義。頌

云。自在熾盛與端嚴。名稱吉祥及尊貴。如是六種義差別。是故總號婆伽婆。在者。在何處所。在有二義。一指事。二舉法。指事者。在摩竭提國。且指其國。二舉法者。在何處。在法界。即事即法界無二故。爲法界無中邊大小彼此故。又摩竭提者。此云不害國。摩者云無。竭提云害。總云無害國。又云摩者不也。竭提者至也。言其此國。將謀兵勇。鄰國敵。不能侵至。又摩者偏也。竭提云聰慧。此國爲多有聰慧人。徧其國內故。又云摩者大也。竭提者體也。謂五印土中。此國最大。統攝諸國。故云大體也。又此國王。不行刑戮。其有罪者。送置寒林中。爲明佛大悲。以處表德故。阿蘭若法。此云寂靜處。寂靜有二義。一事。二理。一事者。在摩伽陀國。尼連河側。漚樓頻螺聚落中。去人間五里。一牛吼地。得阿耨多羅三藐三菩提。此處有一萬道場神。常在其處。一切諸佛。示成正覺。總在其中。表如來萬行圓滿。中道無偏故。此處是閻浮提之中心故。二理者。即一切法自體靜故。即動而常靜故。菩提道場者。有二義故。一事。二理。一事者。如前尼連河邊。二理者。徧法界也。法界無邊。道場亦無邊。於一切刹。皆示成佛故。如世間場簡穢故。法場治惑故。示現成佛。治衆生惑故。此場依主釋。爲

佛在其中。現成道故。依主得名。爲覺場也。始成正覺者。古今情盡。名之爲始。心無所依。名之爲正。理智相應。名之爲覺。得如是法。名之爲成。又自覺覺他。名之爲覺。已上釋八句中斷疑成信分竟。

大方廣佛新華嚴經合論卷第九終

大方廣佛新華嚴經合論卷第十

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

世主妙嚴品第一之三

其地堅固。金剛所成。上妙寶輪。及衆寶華。清淨摩尼。以為嚴飾。諸色相海。無邊顯現。摩尼為幢。常放光明。恆出妙音。衆寶羅網。妙香華纓。周匝垂布。摩尼寶王變現自在。雨無盡寶。及衆妙華。分散於地。寶樹行列。枝葉光茂。佛神力故。令此道場。一切莊嚴於中影現。其菩提樹高顯殊特。金剛為身。琉璃為幹。衆雜妙寶以為枝條。寶葉扶疏。垂蔭如雲。寶華雜色。分枝布影。復以摩尼而為其果。含輝發燄。與華間列。其樹周圍咸放光明。於光明中雨摩尼寶。摩尼寶內。有諸菩薩。其衆如雲。俱時出現。又以如來威神力故。其菩提樹恆出妙音。說種種法無有盡極。如來所處宮殿樓閣。廣博嚴麗。充徧十方。衆色摩尼之所集

成。種種寶華以為莊校。諸莊嚴具。流光如雲。從宮殿間。萃影成幢。無邊菩薩道場衆會咸集其所。以能出現諸佛光明。不思議音摩尼寶王而為其網。如來自在神通之力。所有境界。皆從中出。一切衆生居處屋宅。皆於此中現其影像。又以諸佛神力所加。一念之間悉包法界。其師子座。高廣妙好。摩尼為臺。蓮華為網。清淨妙寶以為其輪。衆色雜華而作纓絡。堂榭樓閣階砌戶牖。凡諸物像備體莊嚴。寶樹枝果。周迴間列。摩尼光雲。互相照耀。十方諸佛化現珠王。一切菩薩髻中妙寶。悉放光明而來瑩燭。復以諸佛威神所持。演說如來廣大境界。妙音遐暢。無處不及。

第二莊嚴道場分者。從其地堅固已下。至妙音遐暢無處不及。於中有二十六行半經。(四百五十二言)總明歎佛依正二報。及菩薩神力莊嚴道場分。此如帝網之重重。於此一段文中。明如來本性中。行四種因。感四種果報。於一心性中。有四種因。行十波羅蜜。又於其中。各得十種莊嚴。何者為四種因果。第一明法身因。報得金剛地果。經云其地堅固者是也。其地上有十種莊嚴。即以十波羅蜜以成依報。金剛地為正報。何者為十種莊嚴。一以法性中大智以為檀體。即一行

中具十行總圓故。以此經宗。一行即一切行。主伴恆圓滿故。故以寶輪圓滿。用嚴金地。明一即一切故。二以寶華以嚴金地。明其性戒清潔。猶如妙華開敷菡萏。令人樂見。發生自他善因果故。三摩尼寶以嚴金地。摩尼者。此云離垢寶也。以忍行清高。心無諸垢。所招依果故。四諸色相海以嚴金地。以精進波羅蜜。總該衆行。能招自他果故。以招報故。得諸色相海。以嚴金地。五摩尼爲幢莊嚴者。明定體恆淨。無傾動故。所招果也。禪波羅蜜能普寂故。六幢常放光明及出妙音。莊嚴法界者。明定能發慧。慧能說教。以爲依果。以嚴虛空。又明第六波羅蜜空慧滿故。七寶網莊嚴者。明方便波羅蜜。成就大悲。覆護衆生。施教行故。所招依果。爲明七住七地等。成大悲法門故。施教行之網。灑出衆生。安置於大般涅槃之岸故。因行如是。依果亦然。八妙香華纓垂布。莊嚴虛空。此網向下懸垂之飾也。明第八願波羅蜜。以任運之大智。入俗益生教行。所招依果也。如十地菩薩。七地已前。作七度鍊真金轉令明淨喻。八地即作種種莊嚴華鬘喻故。九摩尼寶王變現自在。莊嚴虛空者。明第九力波羅蜜。九住及九地等。爲大法師。說法自在。所招依果故。明十住第九。十行中第九。十迴向中第九。十地中第九。總

明法師位。說法自在所招報故。十雨寶及華。以嚴金地者。明十住十地等。大智法雲。雨衆法寶。及利衆生行普周徧故。所招依果。從第九摩尼寶變現自在。即雨十地法雲之寶者。明住住地地五位相即故。第二明萬行因果者。其如來自行普賢行爲因。所招寶樹行列。莊嚴金地。周徧十方。爲依果故。經云。令此道場一切嚴具樹中現像者。明覺行相徹。體用徹故。此總陳樹上莊嚴。後別舉菩提樹一箇。用明衆樹亦爾。其菩提樹有十種依果者。常以金剛地爲正報。其上莊嚴爲依報。又如來身爲正報。金剛地及地上一切莊嚴爲依報。今樹者。以如來行爲因。因行招報。樹爲依報。又樹上。其樹金剛爲身。金剛爲正報。幹枝條葉華果爲依。明以行樹。法華。智果。慈悲之葉。以十波羅蜜爲枝幹。法身以爲其莖。而隨十行之上。報得十種依果莊嚴。何者爲十。一金剛爲樹身。以法性爲檀行體故。所招金剛樹身依果。爲明一切行從法性生故。是故以金剛爲身。云樹高顯者。如下十地品說。十地菩薩行中依果。所招之樹。其莖周圍十萬三千大千世界。高百萬三千大千世界。如十地菩薩行中依果。尙自如是。況復如來。二琉璃爲幹者。生枝已上爲幹。向下無枝條處爲樹身。明自行淨戒爲因。外招琉璃爲樹幹故。直出

者爲幹。傍生者爲枝。枝上生者爲條。明萬行隨流。以淨戒爲體。以無染故。皆是法性身隨流而無染淨行果。所招報相。三衆妙雜寶以爲枝條。以嚴其幹者。明純雜萬行。對緣成忍。能利自他。所招依果故。四寶葉扶疏垂蔭如雲。而嚴其條者。扶疏者蔭映得所。明精進波羅蜜。自利利他教法門。覆護得所。不省不繁恰中故。外招依果樹葉以嚴。覆蔭衆生得所故也。五寶華雜色分枝布影。以嚴寶樹者。明如來以無量三昧方便。隨流利生。影應一切衆生之行。隨類現形。外招其華以嚴寶樹。亦明三昧能開敷故。六智慧果故。報得依果。以華爲嚴。摩尼爲果。與華間列者。明以定華。能敷慧果。寂用自在故。含輝發焰者。慧能照燭自他故。所招依果。華果間嚴。七樹出光嚴者。明方便波羅蜜。以大悲心。處纏同事。方便破闇故。所招依果。故樹出光嚴。八光出摩尼者。明第八願波羅蜜。與智自在。所招果故。九摩尼寶內有諸菩薩俱時出現者。明第九力波羅蜜。以無功智身。出應隨緣。利含識故。九地菩薩。爲大法師。所招依正。本末相似。以行果能招樹報。樹出菩薩衆。還明本行。明依正交參。具總別故。爲明本行萬行。報得樹嚴。樹出菩薩。以明因果徹故。以明摩尼寶中現菩薩身雲者。表八地無功

之淨智。九地出行設教利生故。以菩薩是行。樹是行中報得。還於樹中出菩薩故。十菩提樹恆出妙音說法莊嚴者。明如來十住十地等智波羅蜜。以大法雲雨法雨故。所招依果。第三明大悲因果者。以如來大悲爲因。如來所處宮殿爲依果。此中有五種德而共成之。一如來大悲含育德。以成其宮。二以正智利衆生德。以成其殿。三以智觀照利自他德。能成其樓。四以大智知根設教益生德。能成其閣。五以大悲弘願周徧利生德。報得宮殿樓閣周徧十方。又以十波羅蜜行。隨大悲生。復成十種依果。何者爲十。以隨法身。隨萬行。隨大悲。隨大智。所招依果。各自區分。不相障礙。猶如大地。生諸卉木。地唯一萬像不同。如水資生喻。思之可見。但十波羅蜜。理唯一性。隨其法身萬行大悲大智。報自差殊故。如法身大願大悲大智。十波羅蜜。廢一不可。至八地已來。其功未熟。若廢一。即一切不成。欲學佛菩提者。如此通融。不修一行。若偏修理。即滯寂。偏修智。即無悲。偏修悲。即染習便增。若但修大願。即有爲情起。菩薩於此衆行。不去不留。以法性均融得所即得。以定慧力善觀察之。不可懸情斟酌。長諸癡愛。其十種行。以爲十種依果莊嚴者。一以十方一切諸佛平等法性無著大慈大悲心。行檀波羅

蜜。所招依果。衆色摩尼之所集成。以大悲位中萬行。或染或淨。非一色故。所招依果。非一色故。以嚴宮殿。二以法性自體清淨無表戒體。隨大慈悲行。守護衆生。名爲行華。能感自他果故。所招寶華報。以嚴宮殿。三以忍波羅蜜。處世濟凡。毀譽不變動故。外招依果。諸寶流光。光化爲幢。幢者。不傾動義。勝怨義。勝於毀讚之怨故。四以精進波羅蜜。隨大悲行。外招依果。無邊菩薩道場衆會。以嚴宮殿咸集其所。五以禪波羅蜜。隨大悲行。外招依果。菩薩出現光明。以定能發大悲慧光明故。六以慧波羅蜜。隨大悲行。外招依果。得不思議摩尼寶王而爲其網。以慧能簡擇。成諸法網故。還得不思議音寶網。用嚴宮殿。七以方便波羅蜜。能隨大悲。同於染淨隨流之行。外招依果。得自在神通之力。所有境界皆從中出。明如來以法無依住智慧之門。成大悲方便之行爲因。所招神力。以嚴宮殿。如七地位中。所行方便行。成大悲門。經中喻云。猶如一國純穢。一國純淨。於此二國事。難可了知。明七地菩薩。以成就大悲方便萬行。於染淨二見。難斷難成故。爲此悲門。化利衆生。無休息故。八以願波羅蜜。外招依果。衆生所居屋宅現宮殿中。明如來大願應衆生爲因。所招依果。如斯顯現故。又以此中

明智悲圓淨故。九如來以力波羅蜜門。隨大悲行。爲大法師故。諸佛神力所加。以嚴宮殿。以爲依果。十以如來行智波羅蜜爲因。外招神力。一念之間。宮殿悉皆包含十方方法界。明智隨悲用。普含覆故。已上十種行。用嚴宮殿上莊嚴。皆是如來隨大悲行所招依報故。文勢連貫。互體相依。明一行一切行互參故。一切報果。不可無因而得。以此知之故。但以智細細思之。本來因果。內外相似。第四明如來大智隨萬行因果者。即智通萬行。出現世間。示成正覺。爲正因也。師子座爲依果。從其師子座一段文中。義分爲三。一釋座名。二陳座高廣。三明座上莊嚴因果。一釋座名。師子者依主釋。如來於大眾中得無畏故。非於座上有師子莊嚴。設有者。但明依報故。二陳座高廣者。經但言高廣。不言量數。今以例比之。如下十住位中。帝釋天宮佛座。高十千層級。十行位中。夜摩天宮佛座。高百萬層級。十迴向位中。兜率天宮佛座。高百萬億層級。高廣隨位。各各相稱。以次類之。十地之位。他化天宮。其座高億萬億層級。彼天宮已超化樂故。第三禪中說十一地。又超二天倍倍更高。十地品。不言佛座層級高廣之量也。但以次類之。此之四位佛座高下層級不同者。以明隨十住十行十迴向十地進修階降。隨

位所見高下不同。以實而論。佛座高廣。無有決定大小高下可得。爲如來心量盡所繫故。無有量也。所招依果。亦不可以量度故。如無邊身菩薩。量佛身際不可得故。已出情際心數量故。以此義故。住毛孔中而身不小。居法界中而身不大。爲情量盡故。身若隨類。及座高廣。座亦隨類。若以如來自報體而言。以法界爲座體。因既如是。依果亦然。故亦非可量。如法界品中。等於法界座量爲定。三明座上莊嚴因果者。略有十種。皆以如來智隨萬行。一切處示成正覺爲因。一切處十種莊嚴爲依果故。其十者何。一摩尼爲臺者。明如來智隨法施。成檀波羅蜜門。明智體淨。所招依果。得離垢寶爲嚴故。摩尼者。此云離垢寶也。智能出俗。以此爲臺。明智體超塵迥出義也。二蓮華爲網者。以智隨萬行。成戒波羅蜜門。明其性戒。得真不證。處纏不污。猶如蓮華。處水無染。爲網者。明智隨戒體。教行灑衆生故。所招依果。報相似故。三清淨妙寶以爲其輪者。明如來以智隨行。成其忍門。生在王宮。及示成正覺。假令調達梵魔波旬。惱而不恚。所招依果。妙寶爲輪。明佛忍行圓滿故。果報圓滿也。四衆色雜華而作纓絡者。明如來以智隨衆行。成精進波羅蜜故。所招依果。衆色之華而作纓絡。以嚴寶座。爲明精進

行爲嚴。大智法身爲華纓故。明智行互嚴。五堂樹樓閣階砌戶牖。凡諸物像備體莊嚴者。明如來以智隨行。成禪波羅蜜門故。明其如來智隨禪行。無動不寂。明此禪門。總攝法身大悲大智。進修行門層級次第。總皆具足。所招依果。亦具足故。總舉凡諸物像備體莊嚴。俗書云。大屋曰榭。其狀上平。可以爲臺觀。四周置簷。上下以軒檻階砌嚴之。中虛爲其室。亦云臺上有木爲榭。此爲略言之。六寶樹枝果周迴間列者。明如來智隨慧用。依根同行。所招依果。樹嚴寶座。寶樹枝果周迴間列者。明理智悲願。互參同時。總別得所。不偏修故。以十玄門參之。七摩尼光雲互相照耀者。明如來智隨方便行。隨器與益。所招如是依果莊嚴。照耀者。知根同事。八十方諸佛化現珠王。一切菩薩髻中妙寶。悉放光明而來瑩燭者。明如來因中。八地大智。大願功終。大悲已滿。大智圓明。諸佛摩頂。能十方示成佛身。一切菩薩願行齊等。故招依果佛化珠王。明同十方諸佛自在故。菩薩妙寶共來瑩座者。明菩薩行圓。瑩者明淨義。燭者照耀義。以明如來因中。八地大智。隨本大願力。照衆生根。依根與益故。爲依果也。皆以十玄六相該通。總一剎那際同別具足故。不可順情而知。常不異理智而知。依無作定體方明。思

而知之者信位也。九復以諸佛威神所持者。如來大智隨行。成力波羅蜜。爲大法師。說佛法輪。同諸佛力故。所招依果。佛力持座。令座說法。十座出音聲說佛境界。妙音遐暢無處不及者。遐者遠也。暢者悅也。明座出音說佛境界。徧周法界。遠悅衆生故。此如來因位。十地法雲潤澤。所招依果故。

爾時世尊處於此座。於一切法成最正覺。智入三世悉皆平等。其身充滿一切世間。其音普順十方國土。譬如虛空具含衆像。於諸境界無所分別。又如虛空普徧一切。於諸國土平等隨入。身恆徧坐一切道場。菩薩衆中。威光赫奕。如日輪出照明世界。三世所行衆福大海。悉已清淨。而恆示生諸佛國土。無邊色相圓滿光明。周徧法界等無差別。演一切法如布大雲。一一毛端。悉能容受一切世界而無障礙。各現無量神通之力。教化調伏一切衆生。身徧十方而無來往。智入諸相了法空寂。三世諸佛所有神變。於光明中靡不咸覩。一切佛土不思議劫所有莊嚴。悉令顯現。

第三爾時世尊處於此座已下。至所有莊嚴悉令顯現。有十三行經。明歎佛成道。修行果滿。依正報得。悲智攝生。自在無邊分。於此分中。從爾時世尊已下。至所有莊嚴悉令顯現。於中有十三行經。（二百二十言）總明如來處座成佛。身

語智等三業自在。眷屬莊嚴。利生自在。如來所坐之座。以法界爲座體。以如來一切萬行報得。爲依果莊嚴。如來是大智之身。緣座上所有莊嚴。皆是如來大智隨行任運報得。如龍遊雲起。虎嘯風生。報感之應然。非物能與爲也。成最正覺者。爲簡非外道聲聞緣覺。於權教中。木樹草座。厭俗出纏。令劣解衆生。起三乘種。且拔分段苦。非究竟覺之正覺。簡非如是覺故。故言成最正覺。此正覺者。不忻不厭。不出不沒。染淨情盡。以大圓鏡智。稱法界性。自在教化。盡一切衆生。世界剎海。皆非限劑。所有報境。身國相徹。圓滿十方。諸佛衆生。自他同處。互相參入。影現重重。不云報滿三千大千之剎。不云淨土在於他方。略說大相。有九十七種大人之相。隨好無盡。頂著華冠。項著纓絡。手著環釧。非同三乘。厭俗出家。勸諸菩薩生於他方佛國淨土。簡非如是。故言成最正覺。號毘盧遮那。此云光明徧照佛。以其大智教光。依根破障故。如經一一自有其文。智入三世悉皆平等者。明智能隨俗。言入三世。即俗體本真。故言平等。以總別同異成壞六相義該括。即總而全別。即別而全總。即同而俱異。即異而恆同。即成而俱壞。即壞而俱成。皆非情計。一異。俱不俱。有無。非有無。常無常。生滅相

故。如是皆是如來理智體用。依正悉自在故。以自體無念力大智照之可見。此一段十三行經。總明如來身語智三業依正。隨用自在。經文自具。不煩更釋。

有十佛世界微塵數菩薩摩訶薩所共圍遶。其名曰。普賢菩薩摩訶薩。普德最勝燈光照菩薩摩訶薩。普光師子幢菩薩摩訶薩。普寶焰妙光菩薩摩訶薩。普音功德海幢菩薩摩訶薩。普智光照如來境菩薩摩訶薩。普寶髻華幢菩薩摩訶薩。普覺悅意聲菩薩摩訶薩。普清淨無盡福光菩薩摩訶薩。普光明相菩薩摩訶薩。海月光大明菩薩摩訶薩。雲音海光無垢藏菩薩摩訶薩。功德寶髻智生菩薩摩訶薩。功德自在王大光菩薩摩訶薩。善勇猛蓮華髻菩薩摩訶薩。普智雲曰幢菩薩摩訶薩。大精進金剛鬘菩薩摩訶薩。香焰光幢菩薩摩訶薩。大明德深美音菩薩摩訶薩。大福光智生菩薩摩訶薩。如是等而為上首。有十佛世界微塵數。此諸菩薩。往昔皆與毘盧遮那如來。共集善根。修菩薩行。皆從如來善根海生。諸波羅蜜悉已圓滿。慧眼明徹。等觀三世。於諸三昧。具足清淨。辯才如海。廣大無盡。具佛功德。尊嚴可敬。知衆生根。如應化伏。入法界藏。智無差別。證佛解脫甚深廣大。能隨方便入於一地。而以一切願海所持。恆與智俱。盡未來際。了達諸佛希有廣大祕密

之境。善知一切佛平等法。已踐如來普光明地。入於無量三昧海門。於一切處。皆隨現身。世法所行。悉同其事。總持廣大。集衆法海。辯才善巧。轉不退輪。一切如來功德大海。咸入其身。一切諸佛所在國土。皆隨願往。已曾供養一切諸佛。無邊際劫。歡喜無倦。一切如來得菩提處。常在其中親近不捨。恆以所得普賢願海。令一切衆生智身具足。成就如是無量功德。

第四從有十佛世界微塵數菩薩已下。至無量功德。於中有三十行經。五百一十一言。明菩薩大衆圍遶分。

於此分中。都顯初會總有四十七衆。皆是圍遶。皆有其意。於此四十七衆之內。從初菩提樹內流光衆已下。至普賢等十箇上名悉同名之爲普衆。具分爲三。一菩提樹內流光衆。是明本因。五位進修。建行利生。成報顯因衆。如前所釋。二如來所居宮殿內衆。明佛本因。大悲圓滿。覆育含生。利生之行等衆。顯因成報衆。三十佛世界微塵數菩薩衆中。普賢等上名悉同同名爲普者。十箇菩薩衆。明古今諸佛共行普賢行衆。已上三衆。皆是古今諸佛。共五萬行大悲大智。隨五位中進修自利利他。十波羅蜜。四攝四無量等。之常行普賢之道也。一切菩薩。

以此爲體。一切凡夫。以此爲所乘。如大王路。法則常然。行與不行。非道之異。從此十普賢衆已下。至第四從三十三天王至大自在天王衆已來。隨位復分爲五。第一從爾時世尊處於此座成最正覺。并十普賢衆。此是現果成因生信分。何以然者。爲如來是正覺之果。普賢等衆。是佛行果。如來所居華藏淨土。是佛報得依果。一切衆生。以自根性。觀如來三種因果。及行佛自行普賢門。而生信心故。若不如是。從何生信。是故如來以此三種因果。而令衆生信樂修行。以是義故。此之初會。及普光明殿中第二會。至賢首品已來。十二品經。總是舉果勸修生信分。第二從海月光大明菩薩等已下菩薩衆。并取已下第二執金剛神等九衆諸神。以明十住因果。何以然者。海月光大明菩薩。亦是普賢等衆。分爲異名意者。明還以佛果位內普賢行門。入俗利生。隨行名別。既以佛果位內諸佛共行普賢法。入俗利生。所堪利者。還得舊法。不移舊行。以是義故。還以普賢位內海月光異名菩薩。便爲十住初心。明從凡夫地。修學十信心。信諸佛正覺之果。無異自心。本性清淨。如諸佛性。所有分別本性清淨。名無依住智。如諸佛根本智。以禪波羅蜜無作印印之。即法界性自然相稱。所行諸行。即普賢行故。動靜無二故。所

轉法輪。即與十方諸佛智。契同不異。如是修習。慣習使熟。正覺不移。其本一故。會同諸佛舊覺本智。同一性故。行行不移舊普賢行故。以是義故。將普賢衆內十箇海月光等異名菩薩衆。爲成十住初心。明十住初心。不離舊法智故。以此下文。初發心時。便成正覺。又如海月光大明菩薩。向下獲益歎德中。經云。復次海月光大明菩薩摩訶薩。得出生菩薩諸地諸波羅蜜教化衆生及嚴淨一切佛國土方便解脫門。明以普賢行。成就衆生。入佛大智法界。行普賢行。五位次第。進修法門故。以普賢入俗果行。名海月光。通已下等。共成十衆。用成十住菩薩位門。已下通九衆諸神。至主藥神等。明是入十住之果行也。爲入十住應眞。稱之爲神。明入住菩薩。以自應眞。法合爲神。覆育含識故。以智靈通。救生自在故。稱之爲神。非世鬼神也。次後諸神天等。明五位進修增勝故。漸漸自在也。以此菩薩神天。總明十住已上入位菩薩。皆隨自位攝生因果自在行故。非鬼神之神。若自心達理。不與妄合。其智自神。不爲不思。而智善通萬有故。此諸神衆。皆是如來以五位行攝生得益之衆。還將行相法門次第。作法樣式。令其後學者。一一做之。善知因果故。第三從主稼神已下。至主晝神。此十衆諸神。明十行利生

法門因果故。第四從阿修羅王已下。至日天子中。有十衆。明十迴向利生法則因果。第五從三十三天王已下。至大自在天王。於中有十大天王。明十地利生因果。已上五衆。是寄位表佛果五位行門因果故。爲利衆生故。寄位顯法。寄位入法。與衆生作法樣。令衆生證修。

從如來座內衆。至如來眉間毫相中所出衆。於中有四種衆。其意如何。第一如來座內衆。明是如來往昔自行。與古同因彰果衆。二十方菩薩來集興供衆。三諸來菩薩毛孔光明衆。是法界性起無礙。一多同異自在。大悲無盡。不思議衆。明此法界門。法爾如此。體本如是。法行依正。重重無礙。以法界智境。身土一多。法爾相容故。四如來眉間毫中衆。是示果成因生信利生衆。此是成佛已後。以十信心位。乃至十住十行十迴向十地十一地。徧法界法門衆。舉此自修之因果。還令學者倣之。

已上諸衆。配位及來意。即通前樹內流光衆。宮殿樓閣衆。總有十一衆。隨位別配。即四十七衆。爲五位之內。十箇普賢總爲一衆。當位不分十部類故。海月光大明菩薩衆。及已下神天。十住十行十迴向十地。各各有十種部從故。都

爲四十。通十普賢爲一衆。取上四十。共爲四十一。并菩提樹內流光衆。如來所居宮殿衆。如來座內衆。十方諸來菩薩衆。菩薩毛孔衆。如來眉間臺中衆。都爲四十七衆。且長科衆意如是。於中義趣。至文方明。菩提樹內衆。如來宮殿內衆。前已釋訖。已上且長科初會衆竟。餘待至文。已上總明舉果行徧周。以成信位。

大方廣佛新華嚴經合論卷第十終

大方廣佛新華嚴經合論卷第十一

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

世主妙嚴品第一之四

第一。此已上四十七衆。若別列十普賢衆。即五十七衆。諸大衆海。皆是大衆圍遶分。從此初段中。有三十行經。分爲三段。一初有七行半經。總列菩薩之數。及陳同號普賢菩薩之名。二從海月光大明菩薩已下。至十佛世界微塵數。於此一段文中。有七行半經。陳異名菩薩衆。并都結已上諸菩薩數。三從此諸菩薩已下。至成就無量功德。於中有十五行半經。陳大衆本修行之因。及歎大衆之德。從初段中七行半經。列同號普賢之內。義分爲三。一釋菩薩名下之義。二釋菩薩同號之意。三舉衆所爲因緣。一釋菩薩名者。略釋普賢菩薩一號。餘可准知。行與理齊。利生皆徧。號之爲普。知根利俗。稱之爲賢。菩之言覺。薩言衆生。善

覺衆生。號名菩薩。廣云摩訶菩提薩埵也。摩訶云大。梵言摩訶薩。此云大覺衆生。爲常於生死海。覺悟無盡衆生故。已下九箇同號爲普者。普賢菩薩通號也。明一一菩薩。皆有此十種德行。約德爲名故。爲表德行圓滿。始終具十。一一菩薩。隨行之號無盡故。爲行無盡行故。但以其名下之義。即彰自行。餘准知之。總以十波羅蜜爲體。二釋同號之意者。明此十普之義。是一人之普。一一菩薩。具十普也。一切菩薩總然。下名別者。明一一普賢。能徧別故。方知普義得成也。總是十方諸佛同行之行。更無故新。如大王路。發跡登之者即是無奈不行之何。一念隨喜。少分見性。智慧現前。總是不離佛正覺根本智故。不離普賢行故。如普賢行一念中少分善心。總是向法流者故。如下經云。聞如來名號。及所說法門。聞而不信。猶能畢竟至於金剛智地。何況信修者也。三舉衆所爲因緣者。明佛出興世。所現依正二報。大集普賢菩薩衆海。意爲令衆生。見果生信修行故。此是舉果勸修生信分。如來是十方諸佛正覺根本智之果。十普賢等。是十方諸佛差別行果。舉此二法中因果報得。令衆生信樂。修行趣入故。如三轉法輪中。一示相。八相成道是。二勸修。以觀果知因。勸人天等修學。三證同。云我與汝等。同如

是三乘一乘等證。今此一乘中。將此佛乘根本智果。普賢徧法界行果。勸令大心衆生。生信修行。此乃即是五位中。十一地普賢等覺位門。十方諸佛成佛竟。亦行之不息。如初發菩提心者。行之不息。今將此位。以爲信門。若不如是。以何爲信入。故佛果後普賢行。純是利他。初發心已後普賢行。是自利利他行故。今此初衆。并佛所爲如是。舉果勸修。令生信樂。修行趣入故。今之經大意。爲若此也。將舊果勸初心。向下海月光大明菩薩。諸神天衆。即明信已入證。十住十地。修行進趣。漸漸增修因果也。明立隨位當分之因果。令後學者。見其體樣。信樂無疑。趣入隨位各異故。若不如是。滯在一法。智無增勝故。已上一段。且是初見佛成道。見佛果五位菩薩集衆。示現入法。入即同佛所知。與佛齊見。若信他佛然。初心菩薩未能然也。未是自信自心自身。是佛大智境界。是佛法身。是堪行普賢行者。從第二會光明覺品已後。一切處金色世界。寶色世界。即明自心法性。是金色白淨無染。名爲所居世界。不動智佛。即是自心。於無性理中。無分別之智。本來無動。上首菩薩文殊師利。明是自心無性之中。善能簡擇妙分別慧。覺首菩薩。即是自心如是真信之首。目首菩薩。即是自心明見可信之心。

心境俱佛。如海門國法。普見自他俱佛故。至文廣釋方明。是身作佛。是心作佛。心外見佛。不名信心。已上大衆圍遶分中。釋同號衆竟。

第二釋海月光等異名衆。其意如何。此七行半經。其中義分爲三。一陳菩薩衆意。二釋菩薩名號。三結衆數。一陳菩薩衆意者。此十箇異名衆。所以異名。爲表初發心住。前同號意況。如前段已釋竟。此一段異名意趣。爲明以彼普賢行。入俗利生。隨其行異。名亦還異。爲明以普徧別。方名爲普。其衆意。爲明入俗利生。教化衆生。還令衆生得自身之法。是故寄位在十住初心。以明用彰十住初心。一下頓乘古法。不移古跡故。無異舊道。如大王路。新舊同行以此。以舊古法。入俗利生。開悟迷流。還令學古。以是義故。還將佛果位內。普賢異名之衆。寄位成十住初心。爲彰後悟。不移舊跡故。又明前如來成正覺佛果。及普賢行果。古今諸佛。所乘常道。是明所信之門。此入俗利生異名之衆。即明所化衆生。入道初心。還同自法。不移古跡故。後有發心之士。一一自心以定慧力照之可見。不可以情信者堪爲。自非久種善根。應當聞而不惑。設使三乘根種。六通菩薩。尙自懷疑。凡流之中。一乘之性。處凡流而信入。如下經自有明文。爲三乘種性。

劣解。佛隨根性。且說此娑婆爲穢土。是五濁故。淨土在他方。或言此方是穢。向上第四禪已上。別有菩薩淨土。或說佛果在僧祇之後方成。未說淨穢含容。塵含法界。凡聖同居。各無妨礙等教。執權成實。難信此法界一乘之門。爲學假詮假教假觀。破麤現行無明繫著故。行一分麤波羅蜜門。得三種意生身。見諸佛國土。有自有他。有淨有穢。忻彼厭此。兼修淨行。修諸假真如觀。及空觀等。得一分神通。報勝諸天。神通亦勝。忻厭心勝。更亦不生惡國穢土。爲本願力。有佛成道處。暫來還去。如說三乘教中。多有此事。未迴心者。常常如是。學權教者。爲根下劣故。不聞此教。聞亦不信。如經下文自具說故。如維摩經法華經。爲破彼故。方始一分略說。猶未具論。是故學教者。慎勿偏習一門。諸部經文。總各深思意趣。大有一生學道。爲聞慧不妙不廣。返謗真宗。廣說云云。且略而陳爾。已上陳異名菩薩衆意趣竟。二釋菩薩名者。此十箇菩薩名。一箇是隨十住位中一箇波羅蜜之通稱。一一中具十。爲隨行成名故。此十箇菩薩。所行十箇波羅蜜。各是五位中菩薩通行。又隨五位行中。十住具十。十行具十。十迴向具十。十地具十。十一地具十。通爲百數。此明一波羅蜜中有十。十中有百。又十住中。

一一住中具十。十住中具百。五位總然。通爲五百箇波羅蜜門。隨其行位名目感果各別。通位總是此十箇菩薩之名號是也。何故號曰海月光大明菩薩摩訶薩。以法行無邊。大悲廣利如海。所有蒙益。總令見性清涼。號名月光。既得清涼之後。智無不照。號曰大明。一切世界。大覺衆生。故名摩訶菩提薩埵。摩訶云大。菩提此云覺也。薩埵此云衆生。爲不捨衆生生死故。廣云摩訶菩提薩埵也。略云菩薩。梵云摩訶薩。此云大覺道衆生。爲自覺道。不捨生死。大覺悟衆生故。又衆生生死。是菩薩菩提故。明法界一眞。無異相故。此是檀波羅蜜爲主。餘九菩薩名號爲伴。明以法界。行大施門。廣濟如海。利他得益。爲月光。除煩惱熱。得清涼故。以此名號。即是所行之行。即此十箇菩薩之號。是十住位中初發心住。十波羅蜜之主伴萬行故。此像下文十住品位內。菩薩本所事佛。下名號之爲月。十住位中。十箇佛。下名悉同。號之爲月。倣此法也。次戒波羅蜜中。菩薩號雲音海光無垢藏菩薩摩訶薩者。明性戒大悲。普雨法音。故號雲音。性戒無染。猶如大海。不宿死屍故。明法界無性。以爲戒體。無法不淨。如海廣大故。光者。明性戒之體。心境俱眞。名之爲光。又以淨智常當照俗。名之爲光。無垢者。法

性無染也。藏者。明法界性。常令萬象。無法不淨。明一真故。總別俱真。無垢淨故。故號雲音海光無垢藏故。菩薩如前。次忍波羅蜜中。菩薩號功德寶髻智生者。明法忍莊嚴其身故。號名功德寶髻。寶髻者。首上之飾。明菩薩發心。忍爲上首。故寶嚴其頂也。智生者。以能忍故。是智生也。菩薩如前。明忍爲華鬘義故。次精進波羅蜜中。菩薩號功德自在王大光者。明勤行饒益衆生。招多功德。所行萬行。無不益他故。自在如王。大光者。普照也。以常於生死海中。以智光明。益生無倦故。並令開曉。故號大光。菩薩如前。次禪波羅蜜中。號善勇猛蓮華髻菩薩者。明法勇爲禪體。從凡夫地。起信心已。入證之初。明一念無思。頓超諸想。眞智冥會。故云勇猛也。智能達俗。處世無染。故號蓮華也。髻者。明此位菩薩表法中。以蓮華冠頂。明禪體處世即眞。不染寂亂故。次般若波羅蜜中。號普智雲日幢菩薩者。明第六智慧如雲。雨法雨故。慧光破暗。名之爲日。摧邪顯正。號之爲幢。次方便波羅蜜中。號大精進金剛齋菩薩者。明第七住。第七行。第七迴向。第七地。五位中。凡是第七位。總修悲位故。以其眞理。圓融染淨。故名方便。如下十地中。第七地菩薩。舉喻云。譬如一國純淨。一國純穢。於此

淨穢事。難可了知。如善財童子。於第七住中。見休捨優婆夷。此云滿願。爲明此第七住位。成就深厚大悲。滿一切衆生願故。又告善財言。我有八萬四千那由他同行眷屬。常居此園。如是之意。明每住位中。第七方便波羅蜜。成大悲位。言八萬四千那由他同行眷屬者。八萬四千一切諸塵勞門。我皆同行。常以生死爲園林故。如此菩薩。即明是十住位中。初發心住。一住中十箇波羅蜜中。第七波羅蜜故。非是第七住中。第七波羅蜜故。十住之中。有十箇第七方便波羅蜜。當一一住中。各各以方便圓其悲智萬行故。餘波羅蜜亦同。於十住中。一一具十。十行十迴向十地十一地總然。各有十故。此十箇菩薩名號。且圓初發心住上。第一住內十波羅蜜中。第七方便門故。且圓一住中。悲智主伴十波羅蜜故。明大悲堅固。處生死而無疲倦。名大精進。壞他堅垢。號曰金剛。處俗同纏。無虧中道。號之曰齋。齋者。明處智悲中際。如佛放受生光在齋輪者。表智悲中際。廣意在下文方明。菩薩如前。此是十住位中。初發心住內。第七方便波羅蜜。且明一住中。十波羅蜜主伴也。治地住。修行住。如是十住。各自具十波羅蜜。主伴圓融。一住具十。十住具百。五位例然。通有五百。乃至無盡。次明第八願波羅蜜中。

菩薩名號。名香焰光幢者。大願弘芳。號之爲香。智能隨願。依根破惑。故名爲光。入邪破障。故號爲幢。如第八智住中。多作外道邪師。與邪同行。破邪師道。如八住中毘目多羅仙等。是善財第八住中善知識也。明智淨方能破邪故。次第九力波羅蜜中。菩薩名號。大明德深美音菩薩者。明力波羅蜜。爲大法師位。善說法故。故名大明德深美音也。菩薩如前釋。次第十智波羅蜜中。菩薩名大福光智生菩薩者。明此是智波羅蜜故。此上十菩薩名。明初發心住中。以十波羅蜜。用治初發心住中染淨。成法身悲智門故。計此修治。法合一法。今說諸波羅蜜。各各修行不同。明於一法上。以十法修治。慣習增明。以成一故。其法不離舊行也。時亦不移舊時也。故時無性故。三世無去來故。但於一法上。具十箇波羅蜜行門體用。但於一法上。修行生熟處。分一住二住。但於一法上。會悲智願行生熟。智者淺深不同。隨不同處。分其地位差別故。非是法異故。以總別同異成壞六相義。圓通可知。三都結衆數者。經云。如是等而爲上首。有十佛世界微塵數者是。

第三數德者。從此諸菩薩已下。十五行半經是也。經自具文。不煩更釋。

如是已上大衆之海。總是普賢行滿。常住世間。安立法則。成就菩薩十住十

行十迴向十地等位次第。令諸衆生開示悟入。常爲世間一切依護。如上歎德中具明。已下獲益中亦具明。如獲益中。總是作利生方便。入法次第。入則同佛所知。與後學者。作見道之樣。迷即是凡。悟即同佛知見。皆是本來舊達。並是影響衆也。已下神天。亦同是此例。皆是助佛揚化顯德。令佛法化流行。久住世間。衆生獲益故。

復有佛世界微塵數執金剛神。所謂妙色那羅延執金剛神。日輪速疾幢執金剛神。須彌華光執金剛神。清淨雲音執金剛神。諸根美妙執金剛神。可愛樂光明執金剛神。大樹雷音執金剛神。師子王光明執金剛神。密焰勝目執金剛神。蓮華光摩尼鬘執金剛神。如是等而為上首。有佛世界微塵數。皆於往昔無量劫中。恆發大願。願常親近供養諸佛。隨願所行。已得圓滿到於彼岸。積集無邊清淨福業。於諸三昧所行之境。悉已明達。獲神通力。隨如來往。入不思議解脫境界。處於衆會。威光特達。隨諸衆生所應現身。而往調伏。一切諸佛化形所在。皆隨化往。一切如來所住之處。常勤守護。

第二·復有佛世界微塵數執金剛神。此一段有十三行半經。(二百二十六言)

於中義意。分之爲四。一舉衆數。二寄位表法。三釋名配行。四列數並歎神德。一舉衆數者。初行是。明神衆是道。以性齊諸佛。智同眞理。隨普賢行。處世護持。稱之爲神。護持正法故。二隨行表法者。爲表十住位內。第二治地住門。主戒波羅蜜。明戒爲防護義故。以法身爲戒體。稱眞不壞。號曰金剛。前海月光大明菩薩。爲十住中初發心住。於中意義。如前段文已釋。此一衆有十神。明第二治地住。法門主戒。爲防護義故。號爲執金剛神。執者。執持不犯。名之爲執。其智應眞。號之爲神。三釋名配行者。此之一衆神。以戒波羅蜜爲體。十箇神名。即是隨戒體上。十箇波羅蜜名。一箇神。是一行。第一妙色那羅延執金剛神。主戒波羅蜜中檀波羅蜜門。以性戒成檀。感招妙色。法空破惑故號那羅延。是不壞義。此位明以持性戒故。得不壞身。執者。執持義。金剛者。不壞義也。二日輪速疾幢執金剛神。主性戒中戒波羅蜜。爲戒光無缺。名號日輪。見者應眞。名爲速疾。自他惑盡。名之爲幢。心無異念。名之爲執。性不可破。號曰金剛。稱眞自在。名之爲神。以智爲神故。三須彌華光執金剛神。主戒波羅蜜中忍波羅蜜。爲法忍高勝。號曰須彌。以忍嚴行。人見皆悅。號之爲華。觀之破慢。號之爲光。

忍心無失。名之爲執。法性爲忍。猶如金剛。智無思而知萬有。號之爲神。四清淨雲音執金剛神。主戒波羅蜜中精進波羅蜜。履俗恆真。名爲清淨。演法無懈。潤澤含識。號曰雲音。聞法破惑。號之金剛。智不爲而知萬有。稱之名神。五諸根美妙執金剛神。主戒波羅蜜中禪波羅蜜。爲禪無思。六根隨智而用。故名諸根美妙也。用而寂恆。名之爲執。無思可破。號曰金剛。又無思之智。能破自他惑。故號金剛。寂然智不動。正慧隨用。號之爲神。六可愛樂光明執金剛神。主慧能破闇故。七大樹雷音。主第七大悲門。樹是覆蔭義。明方便波羅蜜門。覆蔭衆生故。八師子王光明者。主願波羅蜜。起無功用智。自在如師子王。能破外道諸邪論故。九密焰勝目者。主力波羅蜜。法力自在。潛流同事。或作外道邪師。同事破所繫故。此位是大法師位。凡第九波羅蜜。徧入五位中五百箇波羅蜜門。皆第九爲法師位。十住第九爲法王子住。如善財童子善知識。十住中第九住法師位中。作勝熱婆羅門。示入外道。五熱炙身。上刀山入火聚等。此名密燄勝目。密潛同事。設教破愚。故名密燄。智目知根。故名勝目。十蓮華光摩尼髻執金剛神者。主戒波羅蜜中智波羅蜜。如善財童子。第十灌頂住中善知識。作童女。名曰慈行。

得真不證。處俗無污。名曰蓮華。大智知根。名之爲光。位昇灌頂。名曰摩尼髻。摩尼者。此云離垢寶也。此是第二治地住中。十住十波羅蜜。主伴十住。主伴萬行。號曰十箇執金剛神名。皆以行位立名之故。明十住中。一住具十。十住具百。五位皆然。一一次第。以名義配當。法合如然。第四有佛刹已下七行經。列數數德二門。如文可知。

復有佛世界微塵數身衆神。所謂華髻莊嚴身衆神。光照十方身衆神。海音調伏身衆神。淨華嚴髻身衆神。無量威儀身衆神。最上光嚴身衆神。淨光香雲身衆神。守護攝持身衆神。普現攝取身衆神。不動光明身衆神。如是等而為上首。有佛世界微塵數。皆於往昔成就大願。供養承事一切諸佛。

第三是十住中修行住。於中有六行半經。(一百一十三言)義分爲四。一列數。二寄位表法。三釋名配行。四重結其數。并歎神德。一列數者。如上初行是。二寄位表法者。此十箇身衆神。寄位表十住中忍波羅蜜。以法忍成就。於生死中。利生自在。號曰爲神。下文歎德中。成就大願。供養承事一切諸佛。明於往昔以調忍心。承事一切衆生。令其成佛。爲諸佛衆生。體無有二故。已成諸佛。何須

藉其供養。以無量身無量衆。供養承事。於一切時中。供養一切衆生。令其成佛。是調忍義。是身衆義。三釋名配行者。此十箇神。是忍波羅蜜中十波羅蜜故。明一一行。徧一切行故。第一所謂華髻莊嚴身衆神者。主忍波羅蜜中檀波羅蜜門。明忍辱爲華髻。報得以嚴其頂上之飾故。身衆者。爲忍位中行檀。明以衆多身雲。衆多嚴具。徧周法界。承事供養。廣利衆生故。神者。智隨忍行自在故。號之爲神。此十波羅蜜。以忍爲體。二光照十方身衆神者。主忍波羅蜜中戒波羅蜜。此位中以法忍爲戒體。明忍戒圓明。見者歡喜。法忍戒光。號之爲光照十方。身衆神如前釋。三海音調伏身衆神者。主忍波羅蜜中忍波羅蜜故。明海音者。聞諸善惡毀讚音聲廣多。猶如海潮之音。不生憂喜。是調伏義。是爲能忍也。又以自聲如海潮音。知時教化衆生。令無失時故。四淨華嚴髻身衆神者。主忍波羅蜜中精進波羅蜜。以法忍進。名之爲淨也。進行可觀。名之爲華。因行招果。用嚴頂髻。明精進是長道之首故。故以華嚴頂飾。五無量威儀身衆神。主忍波羅蜜中禪波羅蜜。稱根現法。名爲無量。動止常寂。名爲威儀。明行住坐臥。不離定體。名曰威儀。六最上光嚴身衆神。主智慧照耀自他故。明以定慧光明。照燭心境。以嚴

法身。七淨光香雲身衆神。明第七大悲方便。染淨不拘。名爲淨光。慈悲含覆。出言成法。悅可衆心。號曰香雲。明法雨潤衆生故。即明雨戒。定。慧。解脫。解脫知見。五分法身之香也。八守護攝持身衆神。明智隨大願。攝持一切衆生故。八住八地。但五位第八位中。明無功之智。功成即得十方諸佛手灌其頂。是諸佛攝持義故。九普現攝取身衆神。明第九力波羅蜜。法力自在。法王之位。普現諸教。九十六種邪流。及一切衆生。悉同行故。名普現攝取也。即勝熱婆羅門等是。十不動光明身衆神。明第十智波羅蜜。名不動光明。亦爲灌頂位。名不動光也。且明此忍位中十波羅蜜之一終。四結數數德。如文可知。已上十波羅蜜。以忍爲體。此明善惡毀讚。得不動智也。

復有佛世界微塵數足行神。所謂寶印手足行神。蓮華光足行神。清淨華鬘足行神。攝諸善見足行神。妙寶星幢足行神。樂吐妙音足行神。栴檀樹光足行神。蓮華光明足行神。微妙光明足行神。積集妙華足行神。如是等而爲上首。有佛世界微塵數。皆於過去無量劫中。親近如來。隨逐不捨

第四段中。有六行半經。（一百一十一言）義分爲四。一舉衆數。二寄位表

法。三釋名配行。四結數歎德。一舉衆數者。如初一行都列數是。二寄位表法者。此十箇足行神。表十住位中生貴住。主精進波羅蜜。如下歎德中。無量劫中。親近如來。隨逐不捨。是精進義。爲明以法性真如。爲行之體。以此法行。用嚴法身。足行者。表精勤義。以衆行滿足故。名足行神。神者是隨行之智。三釋名配行者。一寶印手足行神。主精進波羅蜜中檀波羅蜜門。明以法寶之智印。行精勤之行。引接衆生故。手爲引取之義。二蓮華光足行神者。明生貴住中精進波羅蜜中戒波羅蜜。常居生死之海。猶如蓮華。無所染故。見者發心。名之爲光。足行是精進修行。無疲勞義。智自在故。號之爲神。三清淨華髻足行神。主精進波羅蜜中忍波羅蜜。法忍無垢。名爲清淨也。忍招依果。華嚴頂飾。爲忍爲華鬘義故。四攝諸善見足行神。主精進波羅蜜中精進波羅蜜。攝諸見者。是精進義。爲常攝諸根。不令起見。即無見不善。五妙寶星幢足行神。主禪波羅蜜門。以妙理爲禪故。名爲妙寶。寶者道也。隨行破惑。故名星幢。爲萬行爲星。不離禪體。皆有光照。隨根破惑。知根了了。名之爲星。此位以精進行爲禪體。以禪能現智。智能知法。還以善知法故名星也。幢爲定也。六樂吐妙音足行神。主慧波羅蜜。樂

吐妙音者。謂以精進爲慧體故。常樂爲人說法故。七栴檀樹光足行神者。主第七方便波羅蜜。成大悲行故。以香樹爲名。表慈悲覆蔭義故。光者照燭衆生義。八蓮華光明足行神。主智隨大願。隨所利生。無所染故。九微妙光足行神。主力波羅蜜。法王之位。以微妙法光。化衆生故。十積集妙華足行神。主智波羅蜜。以智積集諸教。猶貫華結鬘。不令散失。教化衆生。已上十波羅蜜。皆以精進波羅蜜以爲體。位位內自有同別義。思之可見。不可作一概准之。四結數歎德。如文可知。

復有佛世界微塵數道場神。所謂淨莊嚴幢道場神。須彌寶光道場神。雷音幢相道場神。雨華妙眼道場神。華纓光髻道場神。雨寶莊嚴道場神。勇猛香眼道場神。金剛彩雲道場神。蓮華光明道場神。妙光照曜道場神。如是等而爲上首。有佛世界微塵數。皆於過去值無量佛。成就願力。廣興供養。

第五段·有六行半經。(一百一十三言)義分爲四。一舉衆數。二寄位表法。三釋名配法。四結數歎德。一舉衆數者。如上初行是。二寄位表法者。此之一位。表具足方便住中十波羅蜜。以禪波羅蜜爲體。以道場是除蘊穢義。明禪能治蘊義。

故。如世間場也。爲明禪定淨六七識之取染。顯般若能開妙慧。簡擇理智體之本實故。以禪波羅蜜以爲場體。般若波羅蜜以爲人功。以普賢萬行爲馱。運至法界普光明智殿。爲大都居。以一切種種智爲大藏。此中十箇神。一神爲一波羅蜜。爲自益益人之行樣。三釋名配法者。一淨莊嚴幢道場神。主具足方便住禪波羅蜜中檀波羅蜜門故。以法性定體爲檀。名爲淨也。以無虧定體萬行。爲莊嚴幢也。幢名定體不動義。以法性無性爲所乘。名之爲道。以無性之禪定。能治所依之蘊。名之爲場。神者。是無依無性之中大智也。以不思不爲。無形無質。等周法界。而知萬有者。稱之爲神。二須彌寶光道場神。以須彌是高顯義。寶光是無垢義。以戒光照俗。見者發心故。以禪定爲戒。出過情識。是須彌義。以定能無妄。是無垢義。以定能發慧。寶光義。三雷音幢相道場神。主禪波羅蜜中忍波羅蜜。明毀譽之音如雷。法忍不動。名幢相。道場神如前釋。十波羅蜜。隨五位中。各各自具道場儀故。四雨華妙眼道場神。主禪波羅蜜中精進波羅蜜。明法身爲定體。依定體起萬行精進。名爲雨華。是精進義。定能起慧。故稱妙眼。以其法眼行華。利生無懈。是精進故。五華纓光髻道場神。主禪波羅蜜中禪波羅蜜。以法界自體

無動靜上。而起行禪。化諸亂意。名爲華纓。以定能發慧故。名之爲光。以行招果。用嚴其頂。以此爲名。又此十波羅蜜。皆爲頂法。何以然者。謂以十住初心。一一度門。至佛果故。無初中後故。以從佛果起勝進故。六雨寶莊嚴道場神。主慧波羅蜜。慧能雨法寶故。七勇猛香眼道場神。主方便波羅蜜。此位是慈悲位故。常處生死。名爲勇猛。慈眼視衆生。名爲香眼。以戒定慧解脫解脫知見五分法身之香。而視衆生。拔苦與樂。故名香眼。八金剛彩雲道場神。明第八願波羅蜜。以爲願雲覆衆生故。以此位是無功用智。能破邪流。號曰金剛彩雲。明能同異道故。九蓮華光明道場神。主力波羅蜜。是法王之位。處世如蓮華。說法爲光明故。十妙光照曜道場神。主智波羅蜜。以大智知根。名爲妙光。知根破惑。故名照曜。已上十波羅蜜。皆禪波羅蜜爲體。四結數歎德。如文可知。

復有佛世界微塵數主城神。所謂寶峰光曜主城神。妙嚴宮殿主城神。清淨喜寶主城神。離憂清淨主城神。華燈焰眼主城神。焰幢明現主城神。盛福光明主城神。清淨光明主城神。香鬢莊嚴主城神。妙寶光明主城神。如是等而爲上首。有佛世界微塵數。皆於無量不思議劫。嚴淨如來所居宮殿。

第六正心住。主般若波羅蜜爲體。十箇主城神。爲此般若波羅蜜中十波羅蜜。於中有六行半經。(一百一十三言)義分爲四。一舉衆數。二寄位表法。三釋名配行。四結數歎德。一舉衆數者。如初行是。二寄位表法者。寄此神衆。表正心住。空觀成就。明善守心城。名正心住。如善財童子十住之中。第六善知識海幢比丘是也。其在經行道側念止。端居寂默。出入息盡。膝出阿修羅。齋中出天身。頂上出諸佛等。以廣大身雲。周徧法界。教化衆生。又如十住位中正心住位。經云。此菩薩聞十種法。心定不動。即明正心住。善守護心城故。以主城神寄表正心之住也。三釋名配行者。所謂寶峰光曜主城神。主般若波羅蜜中檀波羅蜜。明以無性妙慧。廣施含生故。號寶峰光曜。如其山峰以至虛空相盡處故。明以法空慧至相盡處故。以無相妙慧。廣施衆生。名爲照曜。主者。空慧自在。名之爲主。城者。空有自在。不與涅槃生死合散故。名之爲城。又以法慧施人。不與情慾之漏合故。名之爲城。二妙嚴宮殿主城神。明以慧利含生。以爲戒體。以妙慧爲宮。治人爲殿。萬行爲嚴。又以菩薩正慧爲妙嚴。大慈大悲爲宮殿。心無思慮爲主城。無相妙慧。任理智而知。名之爲神。此以慧利爲主。以戒爲防護義。防護一切衆

生爲城。三清淨喜寶主城神。主慧波羅蜜中忍波羅蜜。明以法空慧而成忍故。故名清淨喜。以忍即喜故。以法喜即名爲寶故。明能忍爲寶也。自此下四衆神。准上排位配之。經文廣大。不可一一釋之。略知法則然爾。如主道場神。主城神。主地神等。總是女神。爲明慈悲故。而實體中。非男非女。但隨事示現。

復有佛世界微塵數主地神。所謂普德淨華主地神。堅福莊嚴主地神。妙華嚴樹主地神。普散衆寶主地神。淨目觀時主地神。妙色勝眼主地神。香毛發光主地神。悅意音聲主地神。妙華旋髻主地神。金剛嚴體主地神。如是等而爲上首。有佛世界微塵數。皆於往昔發深重願。願常親近諸佛如來。同修福業。

第七主地神。（有七行經一百一十七言）主第七不退住方便波羅蜜中十波羅蜜故。各以十箇神名配之。此以法身爲地體。能生萬行。以理智慈悲爲神性。無所退動故。大悲如地。養萬有故。

復有無量主山神。所謂寶峰開華主山神。華林妙髻主山神。高幢普照主山神。離塵淨髻主山神。光照十方主山神。大力光明主山神。威光普勝主山神。微密光輪主山神。普眼現見主山神。金剛密眼主山神。如是等而爲上首。其數無量。皆於

諸法得清淨眼。

第八主山神。（有六行經九十八言）是童眞住行願波羅蜜中十波羅蜜。山者。不動義。高勝義。神者。智體應眞自在。明第八住。第八行。第八迴向。第八地。總無功之智。不動如山故。以山神表之。其中十箇神。即是此位中十波羅蜜行。亦名智能出世。高勝如山。

復有不可思議數主林神。所謂布華如雲主林神。擢幹舒光主林神。生芽發曜主林神。吉祥淨葉主林神。垂布焰藏主林神。清淨光明主林神。可意雷音主林神。光香普徧主林神。妙光迴照主林神。華果光味主林神。如是等而為上首。不思議數。皆有無量可愛光明。

第九主林神。（有六行經一百一言）是法王子住。主力波羅蜜。明說法如林。廣多覆蔭故。是法師位也。

復有無量主藥神。所謂吉祥主藥神。栴檀林主藥神。清淨光明主藥神。名稱普聞主藥神。毛孔光明主藥神。普治清淨主藥神。大發吼聲主藥神。蔽日光幢主藥神。明見十方主藥神。益氣明目主藥神。如是等而為上首。其數無量。性皆離垢。仁

慈祐物。

第十主藥神。(有五行半經九十五言)明灌頂住。主智波羅蜜。於中十箇神。主智波羅蜜中十波羅蜜。明智能知根。與法藥故。第四歎德。如文可知。

已上從海月光大明菩薩。至此主藥神。表如來五位衆中。十住之智門。百波羅蜜竟。十行之衆。如下須知。如此一部之典。一切施設。總是法門。終不唐設一事一字。總是五位之中。信修悟入之法則故。入法方便門戶。此明佛果五位。入法益生覆育之樣式故。入之者。創與智合。名之爲神。亦以覆育衆生故。爲神祐物也。以修行自在處如天。亦以化利諸天故。於十方三界。示受天報。亦以迴向門。同修羅身。入諸鬼趣。亦表自在如王。

大方廣佛新華嚴經合論卷第十一終

大方廣佛新華嚴經合論卷第十二

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

世主妙嚴品第一之五

第三·從主稼神已下。至主晝神。此十衆神。明十行利生法門因果者。以主稼神爲表行爲資糧故。如世間以禾稼爲資糧。長養有爲之身。佛法即以十波羅蜜行爲資糧。長養法身。令使世間習氣漸微。出世習氣大慈大悲大智得辦。如資糧位。准三乘說。十信十住十行十迴向。爲道前四種資糧。初地已上。爲見道加行。爲三乘地前菩薩。經一大僧祇劫。修有爲有漏行。初地見道。如此經十信之中。全信自心與十方諸佛。性相大智無差別體。十住初心。以修方便三昧力見道。從初發心住。及已上諸住。總爲見道之位。十行十迴向十地。總爲加行。總爲資糧。爲資糧加行。與佛因果同進故。爲加行與佛果齊資。以普賢行。用資悲願成滿。

以十住初心。所見法身理智性果。資糧普賢行。不屬人天有爲無常。從初發心住。五位進修。如來法身理智性果。普賢行果。於一眞法界之中。互爲資糧。廢一二俱不成。即一垢一淨心起。是故以佛理智之果嚴行。以行嚴果。故爲佛華嚴也。是故已下十住十行十迴向位中。皆得十方諸佛。與入位菩薩同號。及與智摩頂。會同體智也。如三乘菩薩。多生他方淨土。及四禪向上。別有菩薩淨土。設在欲界。即言以悲願力故。留惑潤生。非如此經法門。乘如來法界乘。從初發心住。以如來大智法身性果。普賢行果。普周生死。動寂均平。理事普進。以法界體用。以治餘習。法無前卻故新等執。不如三乘別教。說他方別有淨土。留惑娑婆。加行即在初地位初。資糧即在十信十住十行十迴向。五位既無佛果。明知十地見道未眞。如此經於十信心中。自信心。有十種佛果。十種世界。即如金色世界。妙色世界。蓮華色世界。如有十箇色世界。爲十信心。是有爲故。所信佛境界是色也。本所事佛。不動智佛。無礙智佛。解脫智佛。如是十箇智佛。即是自心所信自心十種智果。以爲十種佛果號故。畢竟證修諸佛滿處。爲成此智。不異此智。除此十信位中。以生滅心。信十色世界。十智如來。至十住十行十迴向十地

等覺十一地。總有五十箇因果。皆以普賢行爲因。以如來法身理智性爲果。或更互參之。以相資發。以此二種因果。五位之中。共有一百重佛因果。通取本五位上。各有五重因。五重果。總爲一百一十重因果。如十住位中佛因果者。即因陀羅華世界。波頭摩華世界。寶華世界。佛號殊特月佛。無盡月佛。不動月佛。如是十華世界。十箇同號月佛。以爲佛果。法慧菩薩等。十箇慧菩薩。以爲普賢行修行之因。爲此十住。以入方便三昧力。眞證法身妙慧。即世界名華。以華開敷現果故。所現佛果。皆號之爲月者。爲明十住之中。創見法身。妙慧現前。無煩惱熱。得佛法身。清涼如月故。以所見道除惑處。爲作佛名。以心開悟處。而爲世界。如因陀羅華者。此云能主華也。明初發心住。生在佛家。能爲衆生設法主故。波頭摩華者。赤蓮華也。明治地住進修增勝。赫奕開敷可觀之義。總是以隨位入道處因果。爲佛及國土世界菩薩之名。皆非外有。總明自行所行也。如十住位中。十箇慧世界。十箇佛號。皆名之爲眼。以爲其佛果。功德林等十林菩薩。以爲其行行之因。以次十迴向十地。如經可知。至位方明。大要言之。以當位十佛。爲本位之果。當位十菩薩。爲當位修行之因。如此初會中。以如來爲當五位

之果。普賢菩薩。及諸神天等。爲五位修行之因。又普賢菩薩。及諸神天等。以毘盧遮那根本智。爲起修行本因。以自己修行之身。爲佛差別智果故。爲以佛性智果爲因。以現修之身。即理智之性果故。互爲因果。互爲體用。是故神天歎德中。先歎佛德。次歎自己與佛同智同德也。此爲入法之樣。令諸學者。迷即凡。悟即佛故。以智悲齊進也。如善財童子。十行初位中。歡喜行善知識。所居之國。名爲三眼。還同十行菩薩所居世界。名爲親慧世界。幢慧世界。寶慧世界等。十慧世界也。如三眼者。一摩訶般若。二解脫。三法身。亦以智眼慧眼法眼。爲三眼故。如世品字。如摩醯首羅天王面上三目故。爲一切佛法。不離此大智大慧法身故。此十慧世界義。通此三眼。以是善財十行之中。初善知識。國名三眼。比丘名善見。即同十行之位。佛號常住眼佛。無勝眼佛。名爲善見者。具三眼也。爲十行之中。以智眼知衆生根。而同行故。佛號爲眼。善知識名善見。目髮紺青。皮膚金色。圓光一尋。相好如佛者。明十行中。所行三眼行。因果即佛也。在林

中經行者。明萬行稠林。覆蔭衆生故。還如十行位中。菩薩號功德林慧林勝林等。十林菩薩也。善財十行中知識。即以比丘。爲十行位中之行。處林中經行。如下

文中。以功德林等十林菩薩爲所行。今此初會中。即以主稼神。爲佛果十行資糧。資糧衆生入佛位故。資糧見道菩薩長大悲故。如此初會佛果五位。與第二三會已後。諸菩薩進修五位。及善財童子示行五位。前後相參。體勢相似。總明佛果普賢行果。體用相資。始終不異。以是義故。五位中。五十種資糧。五十種佛果。互爲主伴。互爲因果。互爲體用。以如來理智性果。常資普賢行。使令無染。普賢行常資如來性果。使得圓滿悲智。廢一邊。一切不成。所有行門。即是人天因果。設得出世。即是聲聞二乘。及出世淨土菩薩。及留惑潤生等。此非是法爾理智。世及出世大悲。動靜染淨。自在圓融故。如此十行。與佛果資糧。猶如黃瓜。果華同出。華果相資。以無功而爲自在也。法爾理智行周故。復有無量主稼神。所謂柔軟勝味主稼神。時華淨光主稼神。色力勇健主稼神。增長精氣主稼神。普生根果主稼神。妙嚴環鬘主稼神。潤澤淨華主稼神。成就妙香主稼神。見者愛樂主稼神。離垢淨光主稼神。如是等而爲上首。其數無量。莫不皆得大喜成就。

於此主稼神一段文中。（有六行經九十八言）義分爲四。一舉其衆數。二寄

位表法。三釋名配行。四結數數德。一舉衆數者。如初行一句是。二寄位表法者。以主稼神。表資糧位中十行位也。三釋名配行者。所謂柔軟勝味主稼神者。主歡喜行中檀波羅蜜。於此檀中有二義。一法檀。二事檀。一法檀者。見來求法者。歡善無厭故。名柔軟勝味。以法味資人。令心調伏故。二事檀者。即主稼神是。后稷神之流也。以神祐五穀。令生勝味。資益含生故。徧十方世界。隨處異名。二時華淨光主稼神者。即是歡喜行檀波羅蜜中戒波羅蜜。知根同行。號曰時華。令得性戒開敷。名之淨光。亦是世間五穀之華。依時祐之。令光淨開敷故。三色力勇健主稼神。明檀波羅蜜中忍波羅蜜。明法忍功成。名爲勇健。隨忍成果。故得色力嚴身。諸力之中。風力爲最。諸行之內。忍力爲最。八風不能動故。以能隨行成忍。故名勇健。如善財十行中第三行。具足優婆夷是其行。以明忍爲諸行中果故。故名具足。四增長精氣主稼神。主檀波羅蜜中精進波羅蜜。以精進力。資糧法力。大慈大悲力。處生死海。教化衆生。而無勞倦。自無所求故。名增長精氣主稼神。表無精進力。即諸行不成故。五普生根果主稼神。主檀波羅蜜中禪波羅蜜。以法性爲禪。出生萬行理智妙慧。名普生根果。以法性理禪。生智慧萬

行故。即根即果。以明根從果生。本末無異故。如佛果普賢行果。互相資故。明從果生根。以根資果。六妙嚴環髻主稼神。主檀波羅蜜中慧波羅蜜。明以妙慧嚴行。行復嚴慧。行慧互嚴。將用利生。以招依果。以環其髻。用嚴其首。此是垂髻如環。明解行圓滿故。七潤澤淨華主稼神。主檀波羅蜜中方便波羅蜜。此位明成就大悲故。爲潤澤淨華。利他行故。令他解行法開敷故。此爲檀波羅蜜中方便門。成大慈悲故。八成就妙香主稼神。主檀波羅蜜中願波羅蜜。十行第八位中。同於八地智無功用。五分法身香。悉成就故。又以淨智知根。依根設教。用成戒定慧之妙香故。九見者愛樂主稼神。主檀波羅蜜中力波羅蜜。明法師位成。說法利生。見聞法者。皆愛樂故。十離垢淨光主稼神。主檀波羅蜜中智波羅蜜。以智能離自他垢故。諸法灌頂。同十住十地中灌頂位也。四結數歎德。如文可知。已上十箇主稼神。總是歡喜行中檀波羅蜜中十波羅蜜資糧從行成號。已下例然。法則如上。

復有無量主河神。所謂普發迅流主河神。普潔泉澗主河神。離塵淨眼主河神。十方徧吼主河神。救護衆生主河神。無熱淨光主河神。普生歡喜主河神。廣德勝幢

主河神。光照普世主河神。海德光明主河神。如是等而為上首。有無量數。皆勤作意利益衆生。

第二十箇主河神。（有六行經九十八言）是饒益行行戒波羅蜜中十波羅蜜。第一普發迅流主河神。明十行中戒波羅蜜中檀波羅蜜。若以其事。如此孟母是也。如善財童子。饒益行中善知識。於河渚中。一萬童子。釋天為首。聚沙為戲。以河為行。主戒體。明饒益故。此初會中。河神為戒體。前後相似。普發迅流。明應一乘之種。第二普潔泉澗主河神。明應三乘及人天等善法。主十行中戒波羅蜜中戒波羅蜜。已下諸神。依行位名號。以名下義。如前配之可知。如十行中戒體者。如釋天童子。以算數法。相繫子法。五行陰陽。以利人之巧術。以為十行之中戒體故。名普潔泉澗義。若不如是。行行不滿故。明人天及三乘總化。以巧術利生。是普潔義。

復有無量主海神。所謂出現寶光主海神。成金剛幢主海神。遠塵離垢主海神。普水宮殿主海神。吉祥寶月主海神。妙華龍鬘主海神。普持光味主海神。寶焰華光主海神。金剛妙鬘主海神。海潮雷聲主海神。如是等而為上首。其數無量。悉以

如來功德大海。充滿其身。

第三主海神。（有六行經一百二言）明無違逆行。明忍波羅蜜。如海能納衆流。是無違逆也。主忍波羅蜜。有十箇海神。即明忍波羅蜜中十波羅蜜也。各隨名下義。如前配之。大意此十行中忍。以法性大悲。以爲忍體。是故如海含潤。處其下流。能容一切無明高慢生死之流。皆爲法流。而無妨礙。故名無違逆行。如善財童子。無違逆行中善知識。南方有城。名曰海住。有優婆夷名具足。素服垂髮者。慈忍之貌。具足成忍。無行不周。故名具足。海神者女神。明慈悲柔軟。處行能忍。其心如海。福智具足。饒益衆生。是故忍爲萬行中果也。能容衆流。復有無量主水神。所謂普興雲幢主水神。海潮雲音主水神。妙色輪髻主水神。善巧漩瀆主水神。離垢香積主水神。福橋光音主水神。知足自在主水神。淨喜善音主水神。普現威光主水神。吼音徧海主水神。如是等而爲上首。其數無量。常勤救護一切衆生。而爲利益。

第四主水神。（有六行經一百二言）明無屈撓行。主精進波羅蜜。爲明水體能淨諸垢。以明此位菩薩。以法性之水。常勤精進教化衆生。一一知根而益。而

無屈撓其心。如水潤生。隨物而益。各得其所。而無屈撓。於中十箇水神。即是精進波羅蜜中十波羅蜜。明其萬行如水。同事潤生。各各隨名下義配之。常以十行中精進爲體。如十住中精進門。樂勤觀法性爲體。此十行中。以精進門。處世益生。以行潤物爲體。位位中各隨當位主行爲體。餘九於主忍行體上作別。不得一向解故。即體意不當。如十迴向中精進波羅蜜。圓融理智大悲。使令均平自在。如是五位。得一即五位俱有齊等。以慣習生熟。須有次第。雖立次第。以法界智體。而無前卻。是無前後中次第。是一性無差別中同異。不可以情作前卻解也。以實而論。初發心住中。如一滯之水。入大海水中。總同海體。諸龍魚寶藏。咸在其中。爲教化衆生故。教網筌罟。方法不可不具。以名言竹帛著錄。即似如前後義生。體道者明鑒。即如持寶鏡普臨萬象。十地即明使慣習功成。等覺位中。即明自在行周法界。若但置十住一位。但明見道初功。又安十行修行。但有出世心勝。加十迴向興大願雲。使令悲智萬行圓滿。十地但蘊功成德。使令慣習。須成十一地。入俗自在行周。任法饒益。明張教網。學者有所歸依。若不如斯。發心者何措。

復有無數主火神。所謂普光焰藏主火神。普集光幢主火神。大光普照主火神。衆妙宮殿主火神。無盡光髻主火神。種種焰眼主火神。十方宮殿如須彌山主火神。威光自在主火神。光明破闇主火神。雲音電光主火神。如是等而為上首。不可稱數。皆能示現種種光明。令諸衆生熱惱除滅。

第五主火神。（有六行經一百十言）明無癡亂行。主禪波羅蜜。於中十神。明禪波羅蜜中十波羅蜜。皆以十行位禪為行體。即明普智照而恆寂故。即以火神為定體。即寂而常照。即事而常理。悲智照用而無礙故。以火神為定體。若其世間事也。即南方離神是也。若其人也。是其心也。離法心故。若其法也。是虛無之智也。若外事。是其日也。若在其身也。是其目也。若在方法也。為中道。為正。為明。為虛無。為智照萬有。為普光明殿。是女神故。善財童子南行意者。為若此也。明無癡亂行。以火神。能破暗故。不迷惑故。無暗障故。此一段約用而為定也。

復有無量主風神。所謂無礙光明主風神。普現勇業主風神。飄擊雲幢主風神。淨光莊嚴主風神。力能竭水主風神。大聲徧吼主風神。樹梢垂髻主風神。所行無礙

主風神。種種宮殿主風神。大光普照主風神。如是等而為上首。其數無量。皆勤散滅我慢之心。

第六主風神。（有六行經九十八言）明善現行。以般若波羅蜜為體。十箇風神。明智慧波羅蜜中十波羅蜜也。若世間也。即辰巳之間巽神也。是女神故。為法則也。為言說。為教令。如周易乾四世卦。巽上坤下曰觀。易云。風行地上。可以觀象。君子設政教。而衆人從之。而法之可以觀。以是義故。巽為風教。明第六波羅蜜。智慧功成。善現言教。教化衆生。此名善現行也。又辰巳之間。如來取之為齋戒法則。明吉凶之際。成善之終。至午即萬法為正也。上值角宿。角為天門。主僧尼道士在其中。明是設教。令成衆善之門也。一切風化。皆從此起。象以口。為天門。吐納風氣。成政教故。以智為神。又敷華發果。發生一切。能持世界。能成能壞。故名善現行也。此經下文云。如海有四種風。一名積集。能集衆寶。明大圓鏡智。二名能成。能成衆寶。明成所作智。三名揀擇。能揀衆寶。明妙觀察智。四名能散。能散衆寶。明平等性智。是故以四智為風神。能現法自在故。以風神為表善現行故。為此第六智慧法。以智慧風神。善現一切法行。悉

皆自在故。如十信位中第六信位。佛果配在東南方。佛號究竟智。爲東南方是巽。以巽爲風神。又易云。巽爲言說。以借物表法。將風神明智慧。能善現衆法故。方者法也。以取其法。大象無方也。

復有無量主空神。所謂淨光普照主空神。普遊深廣主空神。生吉祥風主空神。離障安住主空神。廣步妙髻主空神。無礙光焰主空神。無礙勝力主空神。離垢光明主空神。深遠妙音主空神。光徧十方主空神。如是等而為上首。其數無量。心皆離垢。廣大明潔。

第七主空神。（有六行經九十八言）明無著行。主方便波羅蜜。成大悲門。以法空起行。教化攝取一切衆生。故名方便。故名無著行。於中衆神。明方便波羅蜜中十波羅蜜。以一切法空爲體。以智爲神。故無所著。以一切法空。能生悲智故。即萬行無著。

復有無量主方神。所謂徧住一切主方神。普現光明主方神。光行莊嚴主方神。周行不礙主方神。永斷迷惑主方神。普遊淨空主方神。大雲幢音主方神。髻目無亂主方神。普觀世業主方神。周徧遊覽主方神。如是等而為上首。其數無量。能以

方便普放光明。恆照十方。相續不絕。

第八主方神。（有六行經一百六言）明難得行。爲智用無功。功難成故。主願波羅蜜。爲智體性淨。以願防之。念其本願。引智起行。令行周徧。使令不住涅槃。不住生死。於中十箇神。明願波羅蜜中十波羅蜜。方者法也。以第八行。大智成就。以智設法。饒益衆生。此是大智爲神。總以震坎兌離四維上下正方之神都舉。明無功之智圓攝故。

復有無量主夜神。所謂普德淨光主夜神。喜眼觀世主夜神。護世精氣主夜神。寂靜音海主夜神。普現吉祥主夜神。普發樹華主夜神。平等護育主夜神。遊戲快樂主夜神。諸根常喜主夜神。出生淨福主夜神。如是等而為上首。其數無量。皆勤修習。以法為樂

第九主夜神。（有六行經九十八言）明善法行。主力波羅蜜。法力已成。法王功辦。常處生死長夜。以法照明世間。故名善法行。於中十神。主力波羅蜜中十波羅蜜。是女神也。此爲善財童子十地中知識故。以明此位行體。徹十地法故。復有無量主晝神。所謂示現宮殿主晝神。發起慧香主晝神。樂勝莊嚴主晝神。香

華妙光主書神。普集妙藥主書神。樂作喜目主書神。普現諸方主書神。大悲光明主書神。善根光照主書神。妙華瓔珞主書神。如是等而為上首。其數無量。皆於妙法。能生信解。恆共精勤。嚴飾宮殿。

第十主書神。（有六行經一百六言）明眞實行。主智波羅蜜。於中十神。明智波羅蜜中十波羅蜜。以智日恆明名為主書。智無爲而應萬有。稱之爲神。歎德中。俱共精勤嚴飾宮殿者。以智普周。教化衆生。成法宮殿。悲爲宮。智爲殿。成就衆生悲智宮殿。展轉相益故。已上明十行位竟。

第四·從阿修羅王。至日天子。於中有十衆。用表十迴向。何以然者。爲阿修羅居大海中。不沒其身。表十迴向。圓融眞俗。常處生死大海。不沒其身。前之十住十行。但修出世悲智心增。加以迴向。迴眞入俗。以成處世悲智圓滿。故以阿修羅等十衆。以表十迴向。處大海而不溺。表此位菩薩。以大悲心。得眞不證。知眞同俗。處俗無染。利生自在。

復有無量阿修羅王。所謂羅睺阿修羅王。毘摩質多羅阿修羅王。巧幻術阿修羅王。大蒼屬阿修羅王。大力阿修羅王。徧照阿修羅王。堅固行妙莊嚴阿修羅王。廣大

因慧阿修羅王。出現勝德阿修羅王。妙好音聲阿修羅王。如是等而為上首。其數無量。悉已精勤摧伏我慢。及諸煩惱。

第一。從初一衆阿修羅王。（有六行經一百八言）義分爲四。一舉衆數。二寄位表法。三釋名配行。四結數歎德。一舉衆數者。如初一行是。二寄位表法者。寄阿修羅位。表救護一切衆生離衆生相迴向。爲明此初迴向。如阿修羅。雖處大海。而海水不沒。雖同天趣。無天妙樂故。如此位菩薩。處於生死。無生死中五欲樂。雖處涅槃。無涅槃中寂滅之樂故。名救護衆生離衆生相迴向。又如法界品云。成就如來高出世間阿修羅王。又王者自在義。明此位菩薩。於涅槃生死中。得自在故。又阿修羅。亦云阿素羅。阿之言無。素云遊故。又云妙。又羅云戲。如婆沙論釋。爲非天也。雖天趣攝。爲多詔詐。而無天妙樂。像此位菩薩。行大悲方便萬行。似如詔詐。似如生死。無有人天五欲樂。無常住涅槃出世寂滅之樂。主十迴向中檀波羅蜜門。舊名不須此。舊翻謬矣。或云。毘摩之母。以本從卵生故。故名劣天。如阿含經云。劫初成時。光音天來入海中洗浴。水觸其身。失精在水。還成肉卵。經八千歲。乃生一女。身若須彌山。有九百九十頭。頭有千眼。

有九百九十口。口有四牙。牙上出火。猶如霹靂。一十四手。九百九十腳。在海浮戲。水精入身。生一肉卵。經八千歲。生毘摩質多。身有九頭。頭有千眼。口中出水。有九百九十手。有八腳。其形四倍大於須彌山。純食淤泥。及以藕根。又與天諍。廣如正法念經說。然阿修羅住處有五。一地上衆寶山中。二云在須彌山北。下入大海二萬一千由旬。有阿修羅王。名羅睺。此云障礙。能以手障日月。領無量衆。三從此更下二萬一千由旬。有阿修羅王。名勇健。亦領多衆。四復過二萬一千由旬。有阿修羅王。名華鬘。亦領諸衆。第五復過是數。名毘摩質多羅。此云響高。是舍脂父。舍脂是天帝釋后。父身如須彌山。與天帝釋鬥戰時。發自海中。揚聲大叫云。我是毘摩質多。我是毘摩質多。時閻浮提山岳。一時震動。亦名究居。謂彼中有光明城。於中住故。或天趣攝。已上佛地論。依毘曇。鬼趣攝。又毘摩質多羅。此云種種事。又毘摩者。此云徧空。質多羅。云種種嚴儀。言此脩羅與帝釋戰時。嚴備種種軍仗之儀。空中而列。舊云響高。又曰究居者非。此依唐朝禮法師等翻。是第四惡趣攝。如經中十種阿修羅王。表位進修中。以明菩薩大悲徹下。如居大海而得其底。身出大海。明菩薩不沒惡道。能離自憍。

慢故。以真攝俗。真俗圓融。處苦海而恆出。寄其此位。表迴向法門。三釋名配行者。一羅睺阿修羅王。明十迴向中檀波羅蜜中檀波羅蜜門故。此迴向中十波羅蜜。以事表法中。取阿修羅。明此十迴向。純以大悲大願。以爲十度之體。無自求益之心。似彼脩羅。所居徹下。其身處海徹上。出身之半。總明託事表法。令易解故。似大悲門。用彰此位中。一一度門。純以大智大悲大願。徹真俗爲體。如羅睺者。此云能障。明此位菩薩。以大悲心。入生死趣。顯大法空。障諸惡趣故。二毘摩質多阿修羅王者。明檀波羅蜜中戒波羅蜜。毘摩質多者。此云響高。明以大悲大願音聲。誓度三界六道故。以悲願爲戒體。王者自在義。處苦海中。沈浮自在故。三巧幻術阿修羅王者。明忍波羅蜜。明此位菩薩。雖居生死大海。常得如幻忍故。四大眷屬阿修羅王者。主精進波羅蜜。明以萬行攝衆生徧故。五大力阿修羅王者。明以法性大禪定力。在苦海而無苦故。六徧照阿修羅王者。明慧光攝化衆生徧故。七堅固行妙莊嚴阿修羅王者。明大悲方便爲嚴故。八廣大因慧阿修羅王者。以智慧增明。以本願利生爲因。爲在第八位中。得智增明。皆須念初發心時。大願爲因故。令度衆生故。九出現勝德阿修羅王者。明法師位成。

力波羅蜜。十妙好声音阿修羅王者。明智位成就妙音。善說法故。四結數歎德。如文可知。已上十波羅蜜。皆是知真處俗。融會大悲性中十波羅蜜。如是十度。以大悲爲體。故託事顯法。在於阿修羅。喻菩薩處生死海。而得其底。而恆不沒生死海中。是故下文成就如來高出世間阿修羅王。又十住十行。但明達智應真。號之爲神。十迴向十地。皆以十王表之。明以慣習增長自在故。自餘廣意。至十迴向品方明。

復有不可思議數迦樓羅王。所謂大速疾力迦樓羅王。無能壞寶髻迦樓羅王。清淨速疾迦樓羅王。心不退轉迦樓羅王。大海處攝持力迦樓羅王。堅固淨光迦樓羅王。巧嚴冠髻迦樓羅王。普捷示現迦樓羅王。普觀海迦樓羅王。普音廣目迦樓羅王。如是等而爲上首。不思議數。悉已成就大方便力。善能救攝一切衆生。

第二·（有七行經一百二十二言）明不壞迴向。爲明以眞理智。而同纏利生。成大悲戒。爲達俗性眞。眞俗不二故。法華經。名妙法蓮華者。是其義也。此經名大方廣佛華嚴者。亦其義也。以理智大悲。法界自體清淨覺。而興萬行故。號佛華嚴經。明菩薩以法性大智大悲。不捨世流同事。名之爲水。具普賢行。名之

蓮華。以覺行同資。名爲妙法。故名不壞迴向。眞性無虧。同流入俗。名爲不壞。明無性菩提無依住智自在故。今以迦樓羅王。託事顯之。是金翅鳥也。於此一段文中。義分爲四。一舉衆數。二寄位表法。三釋名配行。四結數歎德。一舉衆數者。如初行可知。二寄位表法者。託事寄迦樓羅王位。明於大海上。以清淨目。觀命盡之龍。而以兩翼而搏取之。明勉濟義。如法界品云。恆願拔濟衆生出諸有海迦樓羅王。此云金翅鳥王。顯十迴向菩薩。常於生死大海之上。以法空清淨智目。觀有根熟衆生。而以止觀兩翼而搏取之。安置自性清淨涅槃之岸。此止觀。以法性爲止體。以自性無性智爲觀體。非能觀所觀而有二事。主戒波羅蜜。戒淨故。猶如大海不宿死屍。明大悲大智戒。不宿人天及三乘。染淨二見之死屍故。此金翅鳥。兩翼相去三百三十六萬里。三釋名配行者。大速疾力迦樓羅王。明戒波羅蜜中檀波羅蜜。明此位菩薩。以性起大悲。入生死海。度根熟衆生。以止觀力。如一念頃。至於佛果涅槃之岸。爲明於一念至法界性中。非古今三世所繫故。以金翅鳥取龍之喻。如速疾力者。以金翅鳥取龍之時。於一念頃。掇身入海水。水波未合。取龍而出。名爲速疾力也。故下文歎德中。善能救攝一切衆生。出生

死海。得道菩薩。亦復如是。以定慧觀察力。從無明大海之際。繫長短心。一念應真。古今三世。一時見盡。如是見道。如是修道。是名爲發心畢竟二不別。如是發心先心難。但明十住初心。從凡夫地。一念應真難故。非爲究竟佛果難故。至於究竟。不異初心故。明法不異。智慧不異。時復不遷故。以明法界體用故。以定慧照之可見。以情思之即迷也。已下以諸波羅蜜。依名義配之可知。四結數歎德。如文可知。

大方廣佛新華嚴經合論卷十二終

大方廣佛新華嚴經合論卷第十三

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

世主妙嚴品第一之六

復有無量緊那羅王。所謂善慧光明天緊那羅王。妙華幢緊那羅王。種種莊嚴緊那羅王。悅意吼聲緊那羅王。寶樹光明緊那羅王。見者欣樂緊那羅王。最勝光莊嚴緊那羅王。微妙華幢緊那羅王。動地力緊那羅王。攝伏惡衆緊那羅王。如是等而為上首。其數無量。皆勤精進。觀一切法。心恆快樂。自在遊戲。

第三緊那羅王。（有七行經一百一十七言）明等一切諸佛迴向。以一切諸佛。處於生死。以法忍門。以為萬行之主。令一切衆生。皆得菩提無上法樂故。寄表緊那羅王。此云疑神。亦為行主。似人而頂上有角。口似牛口。人見皆疑人耶非人耶。故曰疑神。明此位菩薩。以十迴向。成大慈心。以法忍力。生於六道。

同行益生。人見皆疑。爲凡爲聖。若是凡夫。有智如佛。若是賢聖。行同凡事。故以疑神。寄表其行也。此神能作行主。與天作戲。主忍波羅蜜門。以忍爲萬行主。若無忍者。萬行不成。是故忍爲行主。於中四義。如上准之。十箇疑神。以忍波羅蜜中十波羅蜜。以名下義配之可見。此類畜生道攝。

復有無量摩睺羅伽王。所謂善慧摩睺羅伽王。清淨威音摩睺羅伽王。勝慧莊嚴髻摩睺羅伽王。妙自主摩睺羅伽王。如燈幢爲衆所歸摩睺羅伽王。最勝光明幢摩睺羅伽王。師子臆摩睺羅伽王。衆妙莊嚴音摩睺羅伽王。須彌堅固摩睺羅伽王。可愛樂光明摩睺羅伽王。如是等而爲上首。其數無量。皆勤修習廣大方便。令諸衆生。永割癡網。

第四摩睺羅伽王。（有八行經一百三十一言）此云大蟒也。亦云大腹。羅伽云胸腹行也。主精進波羅蜜。胸腹行者。明趣求樂法。利人匍匐。離慢謙敬也。是精進義也。明至一切處迴向也。六道四生。無處不入。此是守護伽藍神。能護法故。如法界品云。見佛歡喜曲躬恭敬摩睺羅伽王。此中十王明精進波羅蜜中十波羅蜜。一一以名下義配之可見。此衆亦明方便同於衆生愛著所爲。明菩薩處生

死同行。令除愛網。如下歎德中。習廣大方便。令諸衆生。永割癡網故。

復有無量夜叉王。所謂毘沙門夜叉王。自在音夜叉王。嚴持器仗夜叉王。大智慧夜叉王。焰眼主夜叉王。金剛眼夜叉王。勇健臂夜叉王。勇敵大軍夜叉王。富資財夜叉王。力壞高山夜叉王。如是等而為上首。其數無量。皆勤守護一切衆生。

第五夜叉王。（有五行半經九十一言）明無盡功德藏迴向。主禪波羅蜜。以禪定夜叉。守護一切衆生心。令心不妄。得大功德藏故。夜叉者。此云苦活。或名伺察。明以禪門。守護伺察一切衆生苦活心。念心不妄。如法界品云。常勤守護衆生諸夜叉王。餘十王。是禪波羅蜜中十波羅蜜。以名下義隨位配之可見。又毘沙門夜叉。因主所管得名。毘沙門天王。領夜叉衆。在須彌山北面。

復有無量諸大龍王。所謂毘樓博叉龍王。娑竭羅龍王。雲音妙幢龍王。焰口海光龍王。普高雲幢龍王。德叉迦龍王。無邊步龍王。清淨色龍王。普運大髻龍王。無熱惱龍王。如是等而為上首。其數無量。莫不勤力興雲布雨。令諸衆生。熱惱銷滅。

第六（有五行半經九十二言）毘樓博叉龍王。亦依所管得名。毘樓博叉天

王。主領龍衆。在須彌山西。并富多那。此主熱病鬼。此之龍王。主隨順堅固迴向。明般若波羅蜜門。如龍遊空。能隱顯降雨。潤衆生故。以般若空慧。自在有無。雨諸法雨。益衆生故。以龍表之也。毘樓博叉者。具云毘路波呵迄叉。亦云雜語主。舊云醜目。新名毘者。種種也。路者。色也。波呵迄叉者。根也。以種種色莊嚴眼根。明以種種慧莊嚴諸見。令見無著。龍有五種龍。一象形。二蛇形。三馬形。四魚形。五蝦蟇形。一善住龍王。爲一切象形龍王。二難陀龍王。此云歡喜。爲一切蛇形龍主。三那婆達多龍王。此云無熱惱。亦名清涼。爲一切馬形龍主。此一箇龍王。遠離諸龍三種過患。一熱沙不墮其頭。二不以蛇形行欲。三無金翅鳥畏。又更有一苦。以風吹寶衣露身生苦。唯此龍王得免斯惱。故曰清涼。依智度論。此龍王是七住菩薩。四婆樓那龍王。此云水天。爲一切魚形龍主。五摩那蘇婆帝龍王。亦名摩那斯。此云慈心。慈心風不鳴條。雨不破塊。亦名得意。又云摩那。此云意高。以此龍有威德故。名爲意高。爲一切蝦蟇形龍主。如四分律文中。說諸龍初生時。睡時。瞋時。行欲時。此四時中。不能變形。餘時皆能變形。此約三乘中龍王。其事如是。如此一乘中龍王。其德並是入不思議乘。佛

果位中大菩薩等。爲化衆生故。徧於諸道。普現其身。今於此會。賀佛出興。酬其本緣。寄位表法。即如此經。毘樓博叉龍王。得銷滅一切諸龍趣熾然苦解脫門。爲明此位般若智慧之龍。常遊法空。以種種語言。設諸教網故。此是十迴向中檀波羅蜜。娑竭羅龍王。此云海也。得一念中轉自龍形示現無量衆生身解脫門。明此是入生死海。成大悲戒。報得願力神通故。此十迴向大體。成慈悲願行。得願力神通。雲音幢龍王。得一切諸有趣中以清淨音說佛無邊名號海解脫門。此明忍招名譽如是。獲益分中廣明。德又迦龍王者。此云能害。於所害爲德。又是所害聲。迦是能害聲。言此龍瞋時。噓視人畜。皆致命終故。舊云多舌龍者。由多言故。故云多舌。非是口中有多舌故。表進修中。此是第六般若波羅蜜門。善說多法故。故云多舌。託此龍位。寄顯法故。已下准上以名義配之可知。已上十龍王。以十迴向中般若波羅蜜爲體。表智慧遊空。雨法自在。

復有無量鳩槃荼王。所謂增長鳩槃荼王。龍主鳩槃荼王。善莊嚴幢鳩槃荼王。普饒益行鳩槃荼王。甚可怖畏鳩槃荼王。美目端嚴鳩槃荼王。高峰慧鳩槃荼王。勇健臂鳩槃荼王。無邊淨華眼鳩槃荼王。廣大天面阿修羅眼鳩槃荼王。如是等而為

上首。其數無量。皆勤修學無礙法門。放大光明。

第七（有六行半經一百十二言）等隨順一切衆生迴向。以鳩槃茶王主之。明此位菩薩。成大悲。徧入諸道。垂慈利生。此是魘魅鬼神。噉食精氣。亦名冬瓜鬼。依法念經。說其名字。如是惡衆生。菩薩亦皆隨順。是故名等隨順一切衆生迴向。乃至地獄。悉皆徧入。此神是南方天王領二部衆。一名鳩槃茶。二名辟荔鬼。此鳩槃茶。陰囊大如冬瓜。若行乃擊置肩上。坐時即踞之而坐。法界品云。常勤除滅諸餓鬼趣鳩槃茶王。明愛染貪求。猶如餓鬼。大悲菩薩。盡與隨行。斷一切貪求故。

復有無量乾闥婆王。所謂持國乾闥婆王。樹光乾闥婆王。淨日乾闥婆王。華冠乾闥婆王。普音乾闥婆王。樂搖動妙日乾闥婆王。妙音師子幢乾闥婆王。普放寶光明乾闥婆王。金剛樹華幢乾闥婆王。樂普現莊嚴乾闥婆王。如是等而為上首。其數無量。皆於大法深生信解。歡喜愛重。勤修不倦。

第八有六行半經一百十二言真如相迴向。寄乾闥婆王以表法。此云尋香。有香氣處。以作娛樂。而求其食。託事表真如相位菩薩。常以真如法界。戒定慧解脫解脫知見五分

法身無染之香。娛樂衆生。令其愛樂故。下文云。皆於大法深生信解。歡喜愛重。勤修不倦。入法界品云。常令衆生增長歡喜乾闥婆王。以法悅衆生義故。於中十王。明願波羅蜜中十波羅蜜。此位智增。隨根設教。悅衆生故。令歡喜也。

復有無量月天子。所謂月天子。華王髻光明天子。衆妙淨光明天子。安樂世間心天子。樹王眼光明天子。示現清淨光天子。普遊不動光天子。星宿王自在天子。淨覺月天子。大威德光明天子。如是等而為上首。其數無量。皆勤顯發衆生心寶。

第九（有五行半經九十二言）無縛無著解脫迴向。託事於月天子。表力波羅蜜。以無縛無著法性虛空智慧。照燭衆生。淨煩惱熱。得法清涼故。於中十個月天子。明力波羅蜜中十波羅蜜。隨名下義配之可見。

復有無量日天子。所謂日天子。火焰眼天子。須彌光可畏敬幢天子。離垢寶莊嚴天子。勇猛不退轉天子。妙華纓光明天子。最勝幢光明天子。寶髻普光明天子。光明眼天子。持勝德天子。普光明天子。如是等而為上首。其數無量。皆勤修習。利益衆生。增其善根。

第十。（有六行經九十九言）入法界無量迴向。以日天子託事表之。明十迴

向中智波羅蜜。如日處空。下臨照萬有。其位於上。其功益下。像此位菩薩。其智甚高。其行彌下。徹至人天神鬼。外道邪行。畜生地獄。盡同其行。猶如日月。其形在上。其功在下。善惡俱照故。於中十日天子。明智波羅蜜中十波羅蜜。一隨名義配之。常以智波羅蜜爲體。已上十王。配十迴向中十波羅蜜竟。如十住。十行。十迴向。乃至十地。一一位中波羅蜜。各隨當位取意即得。一例取之。即不知其趣。如日月二位。其形狀及高下者。如俱舍論。月去地四萬由旬。廣四十四由旬。以水精白銀。合爲兩面。迴轉相映。故有虧盈。此論如是說。未可爲定依。但依經說者爲指南。依長阿含經。其月上有城。其城正方一千九百六十里。高下亦爾。二分天金作。一分琉璃作。以遙看似圓。天子五百歲。子孫相襲一劫。日月相近。光影相映。即有虧盈。此可爲定。日廣五十由旬。其城正方二千四十里。高下亦爾。其城純金。七寶鑿飾。王坐二十里。壽命子孫。同月天子。以風持故。遶須彌山。日月天子。總是四天王所攝。此已上多依長阿含經說。如是日月天子。皆表十迴向。成大悲願行之門。明悲智無依。常以法空爲體。隨根普照。無有所爲。任無功之智日。稱萬有而成益。

第五·從三十三天王已下。至大自在天王。於中有十大天王。明十地利生因果者。

復有無量三十三天王。所謂釋迦因陀羅天王。普稱滿音天王。慈目寶髻天王。寶光幢名稱天王。發生喜樂髻天王。可愛樂止念天王。須彌勝音天王。成就念天王。可愛樂淨華光天王。智目眼天王。自在光明能覺悟天王。如是等而為上首。其數無量。皆勤發起一切世間廣大之業。

從初第一。三十三天十大天王。（有六行經一百七言）託事表初歡喜地。義分爲四。一舉天王名號。二寄位表法。三釋名配行。四結數數德。一舉天王名號者。如經云。所謂釋迦因陀羅天王等。十大天王名號是。二寄位表法者。寄託此天。表歡喜地菩薩。得歡喜地時。得法悅心。無有世間五欲等諸繫著故。樂唯是法樂。以此義故。多歡喜。多適悅。猶如世人。創得生於忉利天上。受天妙樂。又如昇山頂。至無相際。身與空合。明此位菩薩。從十住十行十迴向。習氣之有爲。而昇此初地之位。法空之際。一分習氣盡故。以須彌之頂。忉利之天。寄表其位。令易解故。十住十行。寄表如神。十迴向位。寄表如王。於此十地。寄表

如天。明其進修漸漸慣習殊勝。以總別同異成壞門。三對六字義該之。亦以十玄門該之。如是進修差別。總是一剎那中同異。皆不得如情所知。如理思之可見。又如仁王經云。習種銅輪二天下。銀輪三天性種性。道種堅德轉輪王。七寶金輪四天下。初地菩薩忉利王。二地菩薩夜摩王。以次寄位配當。明福智殊勝。不可以世間之樂爲比也。以實而言。如菩薩悲智所攝。周徧六道所生。不棄微流一切惡生之類。但以饒益故。法性自在故。寄表如天如王。自在之義。不忻世樂之所表之。如此華嚴經下文。初地菩薩。多作閻浮提王。今十大天王。但爲表法進修。不離一剎那間。漸漸殊勝故。又此天名妙高天。其山在大海中。出水高八億由旬。入水深八億由旬。四寶合成。北面黃金。南面琉璃。西面水精。東面白銀。形如腰鼓。上有四層級。四天王各隨方所居四面。其山頂上四埵。埵別八天王。各有自部衆。中頂帝釋居。衆寶所莊嚴。以是名妙高。亦名妙峰山。亦名忉利天。此云能主天。由帝釋能爲天主也。依主爲名故。下有七重海。重別金山圍遶。迦樓羅速飛七日方始達。金山有天居。皆四天王所攝。其上三十三天。所有天身。長一由旬。衣長二由旬。廣一由旬。衣重六銖。壽一千歲。一日一夜。同此人間一

百年。三十日。爲一月。十二月。爲一歲。已上依俱舍三法等論說。此天王有五種名。一名能主。一名釋提桓。一名憍尸迦。一名天帝釋。一名因陀羅天。此名天主。具云釋迦因陀羅。釋迦者。此名百也。爲先因百度設無遮齋。得作天主。此配歡喜地中檀波羅蜜。已下十天王。是檀波羅蜜中十波羅蜜。各隨名義配之可見。其四段配文。如前可知。此位菩薩。對治觀行。苦空無常。世法非實。皆從十二緣生。本無體相。成於捨法。身命財等。如是於諸佛法。信順修行。且治欲界羸慳悽業。行檀波羅蜜。於十二緣生。未善了知。六地菩薩。方明十二緣法。作如鍊真金。數數入火喻。明對治慳障。

復有無量須夜摩天王。所謂善時分天王。可愛樂光明天王。無盡慧功德幢天王。善變化端嚴天王。總持大光明天王。不思議智慧天王。輪齋天王。光焰天王。光照天王。普觀察大名稱天王。如是等而為上首。其數無量。皆勤修習廣大善根。心常喜足。

第二·復有無量須夜摩天王。(有五行半經九十五言)託事表離垢地。爲此天離地際故。依空而居。有衆妙樂也。像此位菩薩。戒波羅蜜增勝。有法妙樂。

以法身為戒體。故漸增進。離前地世間繫故。初地檀度為勝。此位上上十善淨戒為勝。名為離垢。初地須彌之頂。世界與人連。寄同世間。此位以空居。寄同出世間。故名離垢。初地喻鍊真金。未云加藥。但數數入火。轉轉明淨。此地鍊真金。加以礬石。轉令明淨。以戒為礬石。然金體無二。明以戒對治欲界中愛欲等羸障。但以法身大慈大悲大願四攝四無量十波羅蜜三十七道品之法藥。互相磨盪。使令智悲自在故。夜摩天者。此云時分天也。為此天無日月。天光自相照。不分晝夜。但蓮華開合。知其晝夜時分故。此天身長二由旬。衣長四由旬。廣二由旬。衣重三銖。壽二千歲。日月歲數。與前天倍。此天王有十天衆。即明此戒波羅蜜中十波羅蜜。各隨位名義配之可知。此位修上上十善戒。治欲界現行羸惑習氣。三地修九次第定。方無三界煩惱。生如來家。同如來性。

復有不可思議數兜率陀天王。所謂知足天王。喜樂海鬘天王。最勝功德幢天王。寂靜光天王。可愛樂妙目天王。寶峰淨月天王。最勝勇健力天王。金剛妙光明天王。星宿莊嚴幢天王。可愛樂莊嚴天王。如是等而為上首。不思議數。皆勤念持一切諸佛所有名號。

第三·復有不可思議兜率天王。(有六行經一百言)此託事表發光地。此名知足天。佛地論云。最後身菩薩。於此教化。如纓珞本業經。十一地等覺地。始名一生補處。方名最後身。配在第三禪。此知足天。爲最後身菩薩在中者。皆是如來隨時方便。設法利生。不可定也。前位明以上上十善淨戒。離欲界現行麤惑垢故。此位菩薩。以九次第定。淨色界無色界并欲界心習。得出三界心。作鍊金喻。善巧鍊之。不失銖兩。轉轉明淨。明以九次第定鍊之。以法眼觀之。以行加之。無虧本法。但轉明淨。欲界修定。以治欲障。上界修慧。以治定障。如是對治。即如六地菩薩。位在色界初禪。修十二緣觀。用治定障。隨順法行。方便利生。無所染著。名發光地。以忍波羅蜜爲體。於中十大天王。是忍波羅蜜中十波羅蜜。此天身長四由旬。衣長八由旬。廣四由旬。壽四千歲。日月歲數。皆與前天倍。此知足天。當修三法。得生其中。所謂戒定慧。若但修戒施。即生餘天。皆有放逸。若一乘法中。其事不爾。以智徧周。以爲天體故。

復有無量化樂天王。所謂善變化天王。寂靜音光明天王。變化力光明天王。莊嚴主天王。念光天王。最上雲音天王。衆妙最勝光天王。妙髻光明天王。成就喜慧

天王。華光髻天王。普見十方天王。如是等而為上首。其數無量。皆勤調伏一切衆生。令得解脫。

第四·化樂天王。（有五行半經九十七言）託事表焰慧地菩薩。以三十七助道品觀。以捨為體。以本願故。法如是故。不捨教化一切衆生。以三十七助道觀門。莊嚴慧業。將用化利一切衆生。以為自樂。像此天處。常以變化以悅自樂。亦名樂變化天。心外無境。從心變故。表此位菩薩。從初發心住。以法空現前。心外無境。為進修故。以三十七品助道法門。對治此天及三界邪見等障。鍊磨心地。用嚴慧業。使令明淨。將用教化一切衆生。以為自樂。故名焰慧地也。如菩薩纓珞本業經云。一歡喜地菩薩。名為逆流。二離垢地。名為道流。三明地。名為入流。四地須陀洹。五地斯陀含。六地阿那含。七地阿羅漢。八地變化生死。九地是智慧妙善地。十地是法雲地。又瓔珞經云。十住菩薩。入法流水。任運至佛。如此華嚴經。十住十行十迴向十地十一地五位之中。一一各有十重佛果。普賢行為因。十信位心。便信自心分別之性。為不動智佛無礙智佛等十箇佛果。總為自心之智。方名信心。如是和會。多諸同異。隨信解別。親疏不等。但依當部

進修行門。皆以總別同異成壞門。該通圓融。皆不離剎那際。即義通也。若延時取解。即違法界之道理。此天王衆。有十天王。皆是精進波羅蜜中十波羅蜜。各隨名義配之可見。常以精進波羅蜜爲體。此位作鍊真金作莊嚴具喻精進。明修三十七助道之觀。對治三界邪業習故。此天身長八由旬。衣長十六由旬。廣八由旬。壽八千歲。日月歲數。與前天倍。衣重一銖。食甘露味。歎德餘門。如前可解。

復有無數他化自在天王。所謂得自在天王。妙目主天王。妙冠幢天王。勇猛慧天王。妙音句天王。妙光幢天王。寂靜境界門天王。妙輪莊嚴幢天王。華藥慧自在天王。因陀羅力妙莊嚴光明天王。如是等而為上首。其數無量。皆勤修習自在方便廣大法門。

第五·復有無數他化自在天王。(有五行半經九十七言)託事表難勝地。爲此天在欲界頂。明菩薩欲境難超故。故曰難勝地。明五地已來菩薩。於五欲境界。未得全自在故。但爲觀照諸波羅蜜修行力故。不沒其中。未同八地無功法流自在故。此位菩薩。修十諦觀。以治三界染淨惑障餘習故。得工巧明門。五明方現。

此天處若不如是修十諦觀治之。便爲魔境。三界染淨業習。不能自在。故曰難勝地。此位菩薩。常以禪波羅蜜以爲觀體。魔王波旬。居此天中。修十諦觀。即爲菩薩位。不修觀者。是魔眷屬。又此天名他化自在。以他變化以爲自樂。像此位菩薩。常教化衆生。令他得樂。以爲己樂。此作碑礫磨金喻。明以十諦觀爲碑礫。於中十大天王。明禪波羅蜜中十波羅蜜。以名下之義配之可見。此天身長十六由旬。衣長三十二由旬。壽命歲月。悉與前倍。

復有不可數大梵天王。所謂尸棄天王。慧光天王。善慧光明天王。普雲音天王。觀世音自在天王。寂靜光明眼天王。光徧十方天王。變化音天王。光明照耀眼天王。悅意海音天王。如是等而爲上首。不可稱數。皆具大慈。憐愍衆生。舒光普照。令其快樂。

第六·復有不可數大梵天王。(有五行半經九十六言)明現前地。以十二緣生觀。得寂滅神通三解脫門。空無相無願。智慧增明。除其初禪樂靜迷眞障。明在欲界修定。如三地菩薩是也。在禪界修慧。心染勝處。即以法治之。不令障眞無依之性。故常處三界。不在其中也。名尸棄天王。此依新翻爲具梵摩。此云清

潔寂靜。以初禪是色界。無女人生。無欲界染故。依佛地論云。離欲寂靜。故名梵身。又依長阿含云。梵衆中以梵音語故。故名爲梵。又尸棄者。或云持髻。或云螺髻。或云火頂。以火災至此天故。修得初禪者。得生此天。此天王於梵衆中。發大梵音。諸天各自謂言。唯共我語。於大千界。最得自在。顏如童子。身如白銀色。長半由旬。衣如金色。無男女形。禪悅爲食。壽命一劫。此依長阿含經說。此位作毘琉璃寶磨眞金轉轉明淨喻。明十種逆順緣生觀。得十空定門。爲毘琉璃寶也。毘之云光明。此位菩薩。以十種十二緣生觀。及十空三昧。表以十二緣觀。如明淨琉璃。用磨智慧。轉轉明淨。明觀無明成根本智。更令明淨。於中有十大梵王。明般若波羅蜜中十波羅蜜。各各以名下義。如前配之可解。此第六地第六住等。總明出三界業現前。寂滅神通。三空自在。如十住中。以海幢比丘表之。如十地第六地。以夜神名守護一切城增長勝力是也。總如善財善知識表之。第七地。明入纏同事如下。

復有無量光音天王。所謂可愛樂光明天王。清淨妙光天王。能自在音天王。最勝念智天王。可愛樂清淨妙音天王。善思惟音天王。普音徧照天王。甚深光音天王。

無垢稱光明天王。最勝淨光天王。如是等而為上首。其數無量。皆住廣大寂靜喜樂無礙法門。

第七·復有無量光音天王。(有五行半經九十八言)明遠行地。如此二禪天。初禪滅憂。二禪滅苦。明此位菩薩在七地。諸行已終。大悲圓滿。四攝四無量十波羅蜜三十七助道法。常在現行。自苦已無。常度他苦。染淨二障。此位通過。譬如真金。飾以衆妙雜寶。轉更殊勝。明以法身為金體。悲智萬行圓滿。為衆妙寶。互為莊嚴。常以行網教光。普化一切衆生故。故像此天。已滅憂苦。以心淨故。出語口中光生。用明此位菩薩。教光破暗故。於此有十大光音天。以明方便波羅蜜中十波羅蜜。各隨名下義配之可解。此天身長二由旬。壽二劫。此天水災至。

復有無量徧淨天王。所謂清淨名稱天王。最勝見天王。寂靜德天王。須彌音天王。淨念眼天王。可愛樂最勝光照天王。世間自在主天王。光焰自在天王。樂思惟法變化天王。變化幢天王。星宿音妙莊嚴天王。如是等而為上首。其數無量。悉已安住廣大法門。於諸世間。勤作利益。

第八·復有無量徧淨天。(有六行經一百六言)明不動地菩薩。明此天憂苦已無。唯有禪悅。像此位菩薩。功用已終。唯有法悅。法悅習氣。十地始無。此天風災至。爲有禪悅。喜動其性。像此位菩薩。無功智現前。猶有無生法樂智淨習氣。以諸佛三加七種勸發。令憶本願。方始隨智行廣利衆生。十方世界。度生無限。此乃如來設教防之。防護初發心之際。圓融悲智。非獨是此位方有滯淨之功。是一即一切中防護也。望七地中。萬事總具。何得第八地中。佛果知見。猶自未終。還以十玄六相通融。不可違法界體。作前後解。凡夫妄作無量劫。只是法界中無始終。此位作治真金作人王寶冠。諸臣冠不勝喻。明八地法性無功智勝故。十力四無畏。猶十地方終。普賢行海。十一地方滿。

復有無量廣果天王。所謂愛樂法光明幢天王。清淨莊嚴海天王。最勝慧光明天王。自在智慧幢天王。樂寂靜天王。普智眼天王。樂旋慧天王。善種慧光明天王。無垢寂靜光天王。廣大清淨光天王。如是等而為上首。其數無量。莫不皆以寂靜之法。而為宮殿。安住其中。

第九·復有無量廣果天。有六行經一百二言明善慧地。爲此第四禪。無出入息。三災不及。

又此十天。如歎德中。莫不皆以寂靜法門。而作宮殿。表九地善慧莊嚴。以百千阿僧祇陀羅尼門法寶宮殿。教化衆生。能以一箇言音。爲一切衆生說種種法。無心意識。爲大法師。任智法明。一切具足。故像此天。無思意識。能爲語言。此天無下界意識。有色界意識。乃至非想天。皆有微識。若識想盡。即非三界業收故。此位作如真金用作輪王寶冠喻。一切小王寶冠不勝喻。以此位菩薩智慧寶冠。下地菩薩無有能勝。於中有十天王。明力波羅蜜中十波羅蜜。各隨名義配之可解。此天身衣及壽。與前天皆倍。明此位菩薩。常以法宮而爲安止。以福德廣大。名爲廣果天。

復有無數大自在天王。所謂妙焰海天王。自在名稱光天王。清淨功德眼天王。可愛樂大慧天王。不動光自在天王。妙莊嚴眼天王。善思惟光明天王。可愛樂大智天王。普音莊嚴幢天王。極精進名稱光天王。如是等而爲上首。不可稱數。皆勤觀察無相之法。所行平等。

第十·大自在天王。有六行經一百一十言表第十法雲地。如下歎德中。皆勤觀察無相之法。所行平等。明此位無相智成。如菩薩本業瓔珞經云。三賢菩薩。能伏三界麤業麤

相續果。初地已上。亦伏亦斷。八地已去。色因業勝。因境緣法執習故。明猶有於境。見未純熟。猶執法習在故。九地已去。心因業勝。內心自緣法執習故。九地有內心緣法執習故。十地之中。心色二習。一時總盡。十一地。方心境二緣中。得無礙自在故。從八地至十地。無功用中。緣真法執。內外習亡。於十一地普賢門。猶未自在。如十定品中。求覓普賢不見者是。又智度論云。第九天外。更別有十地菩薩天。名摩醯首羅。此天有八臂三目。騎白牛。一念知三千大千世界雨滴之數。此是引進菩薩。方便設法。託事表法。及攝化境界。漸增勝故。望一乘法界。理事同參。一微塵內。諸佛國土。人天同處。身塵毛孔。如影相入。修眞之者。須當如實而知。莫隨化相。應須以同時具足相應門。一多相容不同門。諸法相即自在門。因陀羅網境界門。微細相容安立門。祕密隱顯俱得門。十世隔別異成門。主伴交參無礙門。託事現法生解門。唯心迴轉善成門。以此十玄門該之。即理順故。已上神天之位。但利生門中。託事表法。令易解故。如如來實非牛王龍王象王。以託事表之。令生解故。望得道處。其智無形無爲。而能知萬有。即爲神也。以此神性。隨行祐生。即行非虛也。以智常居三界。不隨染淨。以此

自在。寄位如王。以通化無方。福過群品。寄位同天。即隨行徧生。行非虛也。同異總得。表實無妨。

大方廣佛新華嚴經合論卷第十三終

大方廣佛新華嚴經合論卷第十四

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

世主妙嚴品第一之七

從大眾圍遶常隨佛衆之中。從普賢菩薩。至大自在天已來。此四十一衆。義分爲二。一現果成因彰位分。（如已前列衆是）二從位舉法進修寄同獲益分。（如向下直至普賢海月光等是）今從第二卷初。爾時如來道場衆海。悉已雲集已下。至第五卷中。海月光大明菩薩衆已來。此四十一衆。是從位舉法進修寄同獲益分。此中合有五十衆。爲普賢等衆十箇菩薩。當等覺十一地法門。十箇互參。自具十衆。爲一人具十。總爲五十衆。如下獲益分中。入則同佛知見。爲與後學者作樣式。令倣之也。不悟是凡。悟已同佛知見。故名初發心時。便成正覺。如已下神天獲益之中。各有二十行頌。皆初兩行歎佛之德。後十八行。皆三句歎佛。一句

自歎與佛同知。其例如是。隨時科文。隨時稱歎。無煩更釋。唯普賢菩薩一人。獨入十法者。普賢衆。明一位普周衆行也。海月光衆。但歎佛德。與自所入之法相似。以此頌中。更不別歎自德。如普賢衆中。加淨德妙光菩薩。是文殊師利別號。文殊師利。此云妙德。又法華經內。往昔號妙光。又妙德與光。其意相似。以德爲光。以能破暗發明故。今在普賢衆內表法。明因果理智。萬行圓融故。普賢獨獲十種益者。明一即一切故。明一多自在。延促自由故。是總攝義也。

爾時如來道場衆海。悉已雲集。無邊品類。周匝徧滿。形色部從。各各差別。隨所來方。親近世尊。一心瞻仰。此諸衆會。已離一切煩惱心垢。及其餘習。摧重障山。見佛無礙。如是皆以毗盧遮那如來。往昔之時。於劫海中。修菩薩行。以四攝事。而曾攝受。一一佛所。種善根時。皆已善攝。種種方便。教化成熟。令其安立一切智道。種無量善。獲衆大福。悉已入於方便願海。所行之行。具足清淨。於出離道。已能善出。常見於佛。分明照了。以勝解力。入於如來功德大海。得於諸佛解脫之門。遊戲神通。所謂妙燄海自在天王。得法界虛空界寂靜方便力解脫門。自在名稱光天王。得普觀一切法悉自在解脫門。清淨功德眼天王。得

知一切法不生不滅不來不去無功用行解脫門。可愛樂大慧天王。得現見一切法真實相智慧海解脫門。不動光自在天王。得與衆生無邊安樂大方便定解脫門。妙莊嚴眼天王。得令觀寂靜法滅諸癡暗怖解脫門。善思惟光明天王。得善入無邊境界不起一切諸有思惟業解脫門。可愛樂大智天王。得普往十方說法而不動無所依解脫門。普音莊嚴幢天王。得入佛寂靜境界普現光明解脫門。名稱光善精進天王。得住自所悟處而以無邊廣大境界為所緣解脫門。爾時妙燄海天王。承佛威力。普觀一切自在天衆。而說頌言。

一、從爾時如來道場衆海已下。有二十六行經。（四百四十一言）義分爲二。

第一。從初爾時已下。有十一行經。明衆已雲集。於此段中。義有其五。一陳衆雲集。二陳部類各別。三都歎衆德。四明本因佛化。五明今以勝解力入佛所知。

第二。從所謂妙燄海大自在天王已下。有十五行經。於此段中。義有其二。一明天王獲益。二明天王乘威說頌。

佛身普徧諸大會 充滿法界無窮盡 寂滅無性不可取 爲救世間而出現
如來法王出世間 能然照世妙法燈 境界無邊亦無盡 此自在名之所證

佛不思議離分別

了相十方無所有

爲世廣開清淨道

如是淨眼能觀見

如來智慧無邊際

一切世間莫能測

永滅衆生癡暗心

大慧入此深安住

如來功德不思議

衆生見者煩惱滅

普使世間獲安樂

不動自在天能見

衆生癡闇常迷覆

如來爲說寂靜法

是則照世智慧燈

妙眼能知此方便

如來清淨妙色身

普現十方無有比

此身無性無依處

善思惟天所觀察

如來音聲無限礙

堪受化者靡不聞

而佛寂然恆不動

此樂智天之解脫

寂靜解脫天人主

十方無處不現前

光明照耀滿世間

此無礙法嚴幢見

佛於無邊大劫海

爲衆生故求菩提

種種神通化一切

名稱光天悟斯法

於此二十行頌中。有其二義。第一。兩行頌。純歎佛德。第二。十八行頌。

皆三句歎佛。一句自歎與佛同知。已下例然。唯普賢少異。前已敘意訖。

復次可愛樂法光明幢天王。得普觀一切衆生根爲說法斷疑解脫門。淨莊嚴海天

王。得隨憶念令見佛解脫門。最勝慧光明天王。得法性平等無所依莊嚴身解脫門。

自在智慧幢天王。得了知一切世間法一念中安立不思議莊嚴海解脫門。樂寂靜天

王。得於一毛孔現不思議佛刹無障礙解脫門。普智眼天王。得入普門觀察法界解

脫門。樂旋慧天王。得為一切衆生種種出現無邊劫常現前解脫門。善種慧光明天王。得觀一切世間境界入不思議法解脫門。無垢寂靜光天王。得示一切衆生出要法解脫門。廣大清淨光天王。得觀察一切應化衆生令入佛法解脫門。爾時可愛樂法光明幢天王。承佛威力。普觀一切少廣天無量廣天廣果天衆。而說頌言。

諸佛境界不思議

一切衆生莫能測

普令其心生信解

廣大意樂無窮盡

若有衆生堪受法

佛威神力開導彼

令其恆覩佛現前

嚴海天王如是見

一切法性無所依

佛現世間亦如是

普於諸有無依處

此義勝智能觀察

隨諸衆生心所欲

佛神通力皆能現

各各差別不思議

此智幢王解脫海

過去所有諸國土

一毛孔中皆示現

此是諸佛大神通

愛樂寂靜能宣說

一切法門無盡海

同會一法道場中

如是法性佛所說

智眼能明此方便

十方所有諸國土

悉在其中而說法

佛身無去亦無來

愛樂慧旋之境界

佛觀世法如光影

入彼甚深幽奧處

說諸法性常寂然

善種思惟能見此

佛善了知諸境界

隨衆生根雨法雨

爲啓難思出要門

此寂靜天能悟入

世尊恆以大慈悲

利益衆生而出現

等雨法雨充其器

清淨光天能演說

復次清淨慧名稱天王。得了達一切衆生解脫道方便解脫門。最勝見天王。得隨一切諸天衆所樂如光影普示現解脫門。寂靜德天王。得普嚴淨一切佛境界大方便解脫門。須彌音天王。得隨諸衆生永流轉生死海解脫門。淨念眼天王。得憶念如來調伏衆生行解脫門。可愛樂普照天王。得普門陀羅尼海所流出解脫門。世間自在主天王。得能令衆生值佛生信藏解脫門。光焰自在天王。得能令一切衆生聞法信喜而出離解脫門。樂思惟法變化天王。得入一切菩薩調伏行如虛空無邊無盡解脫門。變化幢天王。得觀衆生無量煩惱普悲智解脫門。星宿音妙莊嚴天王。得放光現佛三輪攝化解脫門。爾時清淨慧名稱天王。承佛威力。普觀一切少淨天無量淨天徧淨天衆。而說頌言。

了知法性無礙者	普現十方無量刹	說佛境界不思議	令衆同歸解脫海
如來處世無所依	譬如光影現衆國	法性究竟無生起	此勝見王所入門
無量劫海修方便	普淨十方諸國土	法界如如常不動	寂靜德天之所悟
衆生愚癡所覆障	盲闇恆居生死中	如來示以清淨道	此須彌音之解脫
諸佛所行無上道	一切衆生莫能測	示以種種方便門	淨眼諦觀能悉了

如來恆以總持門	譬如刹海微塵數	示教衆生徧一切	普照天王此能入
如來出世甚難值	無量劫海時一遇	能令衆生生信解	此自在天之所得
佛說法性皆無性	甚深廣大不思議	普使衆生生淨信	光焰天王能善了
三世如來功德滿	化衆生界不思議	於彼思惟生慶悅	如是樂法能開演
衆生沒在煩惱海	愚癡見濁甚可怖	大師哀愍令永離	此化幢王所觀境
如來恆放大光明	一一光中無量佛	各各現化衆生事	此妙音天所入門
復次可愛樂光明天王。得恆受寂靜樂而能降現銷滅世間苦解脫門。清淨妙光天王。得大悲心相應海一切衆生喜樂藏解脫門。自在音天王。得一念中普現無邊劫一切衆生福德力解脫門。最勝念智天王。得普使成住壞一切世間皆悉如虛空清淨解脫門。可愛樂淨妙音天王。得愛樂信受一切聖人法解脫門。善思惟音天王。得能經劫住演說一切地義及方便解脫門。演莊嚴音天王。得一切菩薩從兜率天宮沒下生時大供養方便解脫門。甚深光音天王。得觀察無盡神通智慧海解脫門。廣大名稱天王。得一切佛功德海滿足出現世間方便力解脫門。最勝淨光天王。得如來往昔誓願力發生深信愛樂藏解脫門。爾時可愛樂光明天王。承佛威力。普觀一切			

少光天無量光天極光天衆。而說頌言。

我念如來昔所行

承事供養無邊佛

如本信心清淨業

以佛威神今悉見

佛身無相離衆垢

恆住慈悲哀愍地

世間憂患悉使除

此是妙光之解脫

佛法廣大無涯際

一切刹海於中現

如其成壞各不同

自在音天解脫力

佛神通力無與等

普現十方廣大刹

悉令嚴淨常現前

勝念解脫之方便

如諸刹海微塵數

所有如來咸敬奉

聞法離染不唐捐

此妙音天法門用

佛於無量大劫海

說地方便無倫匹

所說無邊無有窮

善思音天知此義

如來神變無量門

一念現於一切處

降神成道大方便

此莊嚴音之解脫

威力所持能演說

及現諸佛神通事

隨其根欲悉令淨

此光音天解脫門

如來智慧無邊際

世中無等無所著

慈心應物普現前

廣大名天悟斯道

佛昔修習菩提行

供養十方一切佛

一一佛所發誓心

最勝光聞大歡喜

復次尸棄梵王。得普住十方道場中說法而所行清淨無染著解脫門。慧光梵王。得

使一切衆生入禪三昧住解脫門。善思慧光明梵王。得普入一切不思議法解脫門。

普雲音梵王。得入諸佛一切音聲海解脫門。觀世言音自在梵王。得能憶念菩薩教

化一切衆生方便解脫門。寂靜光明眼梵王。得現一切世間業報相各差別解脫門。
普光明梵王。得隨一切衆生品類差別皆現前調伏解脫門。變化音梵王。得住一切
法清淨相寂滅行境界解脫門。光曜眼梵王。得於一切有無所著無邊際無依止常勤
出現解脫門。悅意海音梵王。得常思惟觀察無盡法解脫門。爾時尸棄大梵王。承
佛威力。普觀一切梵身天梵輔天梵衆天大梵天衆。而說頌言。

佛身清淨常寂滅

光明照耀徧世間

無相無行無影像

譬如空雲如是見

佛身如是定境界

一切衆生莫能測

示彼難思方便門

此慧光王之所悟

佛刹微塵法門海

一言演說盡無餘

如是劫海演不窮

善思慧光之解脫

諸佛圓音等世間

衆生隨類各得解

而於音聲不分別

普音梵天如是悟

三世所有諸如來

趣入菩提方便行

一切皆於佛身現

自在音天之解脫

一切衆生業差別

隨其因感種種殊

世間如是佛皆現

寂靜光天能悟入

無量法門皆自在

調伏衆生徧十方

亦不於中起分別

此是普光之境界

佛身如空不可盡

無相無礙徧十方

所有應現皆如化

變化音王悟斯道

如來身相無有邊

智慧音聲亦如是

處世現形無所著

光曜天王入此門

法王安處妙法宮

法身光明無不照

法性無比無諸相

此海音王之解脫

復次自在天王。得現前成熟無量衆生自在藏解脫門。善目主天王。得觀察一切衆生樂令入聖境界樂解脫門。妙寶幢冠天王。得隨諸衆生種種欲解令起行解脫門。勇猛慧天王。得普攝為一切衆生所說義解脫門。妙音句天王。得憶念如來廣大慈增進自所行解脫門。妙光幢天王。得示現大悲門摧滅一切憍慢幢解脫門。寂靜境天王。得調伏一切世間瞋害心解脫門。妙輪莊嚴幢天王。得十方無邊佛隨憶念悉來赴解脫門。華光慧天王。得隨衆生心念普現成正覺解脫門。因陀羅妙光天王。得普入一切世間大威力自在法解脫門。爾時自在天王。承佛威神。普觀一切自在天衆。而說頌言。

佛身周徧等法界

普應衆生悉現前

種種教門常化誘

於法自在能開悟

世間所有種種樂

聖寂滅樂為最勝

住於廣大法性中

妙眼天王觀見此

如來出現徧十方

普應群心而說法

一切疑念皆除斷

此妙幢冠解脫門

諸佛徧世演妙音

無量劫中所說法

能以一言咸說盡

勇猛慧天之解脫

世間所有廣大慈

不及如來一毫分

佛慈如空不可盡

此妙音天之所得

一切衆生慢高山 十力摧殄悉無餘 此是如來大悲用 妙光幢王所行道
慧光清淨滿世間 若有見者除癡闇 令其遠離諸惡道 寂靜天王悟斯法
毛孔光明能演說 等衆生數諸佛名 隨其所樂悉得聞 此妙輪幢之解脫
如來自在不可量 法界虛空悉充滿 一切衆會皆明覩 此解脫門華慧入
無量無邊大劫海 普現十方而說法 未曾見佛有去來 此妙光天之所悟
復次善化天王。得開示一切業變化力解脫門。寂靜音光明天王。得捨離一切攀緣
解脫門。變化力光明天王。得普滅一切衆生癡暗心令智慧圓滿解脫門。莊嚴主天
王。得示現無邊悅意聲解脫門。念光天王。得了知一切佛無盡福德相解脫門。最
上雲音天王。得普知過去一切劫成壞次第解脫門。勝光天王。得開悟一切衆生智
解脫門。妙髻天王。得舒光疾滿十方虛空界解脫門。喜慧天王。得一切所作無能
壞精進力解脫門。華光髻天王。得知一切衆生業所受報解脫門。普見十方天王。
得示現不思議衆生形類差別解脫門。爾時善化天王。承佛威力。普觀一切善化天
衆。而說頌言。

世間業性不思議

佛爲群迷悉開示

巧說因緣真實理

一切衆生差別業

種種觀佛無所有

十方求覓不可得

法身示現無眞實

此法寂音之所見

佛於劫海修諸行

爲滅世間癡闇惑

是故清淨最照明

此是力光心所悟

世間所有妙音聲

無有能比如來音

佛以一音徧十方

入此解脫莊嚴主

世間所有衆福力

不與如來一相等

如來福德同虛空

此念光天所觀見

三世所有無量劫

如其成敗種種相

佛一毛孔皆能現

最上雲音所了知

十方虛空可知量

佛毛孔量不可得

如是無礙不思議

妙髻天王已能悟

佛於曩世無量劫

具修廣大波羅蜜

勤行精進無厭怠

喜慧能知此法門

業性因緣不可思

佛爲世間皆演說

法性本淨無諸垢

此是華光之入處

汝應觀佛一毛孔

一切衆生悉在中

彼亦不來亦不去

此普見王之所了

復次知足天王。得一切佛出興世圓滿教輪解脫門。喜樂海髻天王。得盡虛空界清

淨光明身解脫門。最勝功德幢天王。得銷滅世間苦淨願海解脫門。寂靜光天王。

得普現身說法解脫門。善目天王。得普淨一切衆生界解脫門。寶峰月天王。得普

化世間常現前無盡藏解脫門。勇健力天王。得開示一切佛正覺境界解脫門。金剛

妙光天王。得堅固一切衆生菩提心令不可壞解脫門。星宿幢天王。得一切佛出興

咸親近觀察調伏衆生方便解脫門。妙莊嚴天王。得一念悉知衆生心隨機應現解脫門。爾時知足天王。承佛威力。普觀一切知足天衆。而說頌言。

如來廣大徧法界

於諸衆生悉平等

普應群情闡妙門

令人難思清淨法

佛身普現於十方

無著無礙不可取

種種色像世咸見

此喜髻天之所入

如來往昔修諸行

清淨大願深如海

一切佛法皆令滿

勝德能知此方便

如來法身不思議

如影分形等法界

處處闡明一切法

寂靜光天解脫門

衆生業惑所纏覆

憍慢放逸心馳蕩

如來爲說寂靜法

善日照知心喜慶

一切世間眞導師

爲救爲歸而出現

普示衆生安樂處

峰月於此能深入

諸佛境界不思議

一切法界皆周徧

入於諸法到彼岸

勇慧見此生歡喜

若有衆生堪受化

聞佛功德越菩提

令住福海常清淨

妙光於此能觀察

十方刹海微塵數

一切佛所皆往集

恭敬供養聽聞法

此莊嚴幢之所見

衆生心海不思議

無住無動無依處

佛於一念皆明見

妙莊嚴天斯善了

復次時分天王。得發起一切衆生善根令永離憂惱解脫門。妙光天王。得普入一切

境界解脫門。無盡慧功德幢天王。得滅除一切患大悲輪解脫門。善化端嚴天王。

得了知三世一切衆生心解脫門。總持大光明天王。得陀羅尼門光明憶持一切法無忘失解脫門。不思議慧天王。得善入一切業自性不思議方便解脫門。輪齋天王。得轉法輪成就衆生方便解脫門。光焰天王。得廣大眼普觀衆生而往調伏解脫門。光照天王。得超出一切業障不隨魔所作解脫門。普觀察大名稱天王。得善誘誨一切諸天衆令受行心清淨解脫門。爾時時分天王。承佛威力。普觀一切時分天衆。而說頌言。

佛於無量久遠劫	已竭世間憂惱海	廣闢離塵清淨道	永耀衆生智慧燈
如來法身甚廣大	十方邊際不可得	一切方便無限量	妙光明天智能入
生老病死憂悲苦	逼迫世間無暫歇	大師哀愍誓悉除	無盡慧光能覺了
佛如幻智無所礙	於三世法悉明達	普入衆生心行中	此善化天之境界
總持邊際不可得	辯才大海亦無盡	能轉清淨妙法輪	此是大光之解脫
業性廣大無窮盡	智慧覺了善開示	一切方便不思議	如是慧天之所入
轉不思議妙法輪	顯示修習菩提道	永滅一切衆生苦	此是輪齋方便地
如來真身本無二	應物隨形滿世間	衆生各見在其前	此是焰天之境界

若有衆生一見佛

必使淨除諸業障

離諸魔業永無餘

光照天王所行道

一切衆會廣如海

佛在其中最威耀

普雨法雨潤衆生

此解脫門名稱入

復次釋迦因陀羅天王。得憶念三世佛出興乃至刹成壞皆明見大歡喜解脫門。普稱

滿音天王。得能令佛色身最清淨廣大世無能比解脫門。慈目寶髻天王。得慈雲普

覆解脫門。寶光幢名稱天王。得恆見佛於一切世主前現種種形相威德身解脫門。

發生喜樂髻天王。得知一切衆生城邑宮殿從何福業生解脫門。端正念天王。得開

示諸佛成熟衆生事解脫門。高勝音天王。得知一切世間成壞劫轉變相解脫門。成

就念天王。得憶念當來菩薩調伏衆生行解脫門。淨華光天王。得了知一切諸天快

樂因解脫門。智日眼天王。得開示一切諸天子受生善根俾無疑惑解脫門。自在光

明天王。得開悟一切諸天衆令永斷種種疑解脫門。爾時釋迦因陀羅天王。承佛威

力。普觀一切三十三天衆。而說頌言。

我念三世一切佛

所有境界悉平等

如其國土壤與成

以佛威神皆得見

佛身廣大徧十方

妙色無比利群生

光明照耀靡不及

此道普稱能觀見

如來方便大慈海

往劫修行極清淨

化導衆生無有邊

寶髻天王斯悟了

我念法王功德海

世中最上無與等

發生廣大歡喜心

此寶光天之解脫

佛知衆生善業海

種種勝因生大福

皆令顯現無有餘

此喜髻天之所見

諸佛出現於十方

普徧一切世間中

觀衆生心示調伏

正念天王悟斯道

如來智身廣大眼

世界微塵無不見

如是普徧於十方

此勝音天之解脫

一切佛子菩提行

如來悉現毛孔中

如其無量皆具足

此念天王所明見

世間所有安樂事

一切皆由佛出生

如來功德勝無等

此解脫處華王入

若念如來少功德

乃至一念心專仰

諸惡道怖悉永除

智眼於此能深悟

寂滅法中大神通

普應群心靡不周

所有疑惑皆令斷

此光明王之所得

復次曰天子。得淨光普照十方衆生盡未來劫常為利益解脫門。光焰眼天子。得以

一切隨類身開悟衆生令入智慧海解脫門。須彌光歡喜幢天子。得為一切衆生主令

勤修無邊淨功德解脫門。淨寶月天子。得修一切苦行深心歡喜解脫門。勇猛不退

轉天子。得無礙光普照令一切衆生益其精爽解脫門。妙華纓光明天子。得淨光普

照衆生身令生歡喜信解海解脫門。最勝幢光明天子。得光明普照一切世間令成辦

種種妙功德解脫門。寶髻普光明天子。得大悲海現無邊境界種種色相寶解脫門。

光明眼天子。得淨治一切衆生眼令見法界藏解脫門。持德天子。得發生清淨相續心令不失壞解脫門。普運行光明天子。得普運曰宮殿照十方一切衆生令成就所作業解脫門。爾時曰天子。承佛威力。徧觀一切曰天子衆。而說頌言。

如來廣大智慧光

普照十方諸國土

一切衆生咸見佛

種種調伏多方便

如來色相無有邊

隨其所樂悉現身

普爲世間開智海

焰眼如是觀於佛

佛身無等無有比

光明照耀徧十方

超過一切最無上

如是法門歡喜得

爲利世間修苦行

往來諸有無量劫

光明徧淨如虛空

寶月能知此方便

佛演妙音無障礙

普徧十方諸國土

以法滋味益群生

勇猛能知此方便

放光明網不思議

普淨一切諸含識

悉使發生深信解

此華纓天所入門

世間所有諸光明

不及佛一毛孔光

佛光如是不思議

此勝幢光之解脫

一切諸佛法如是

悉坐菩提樹王下

令非道者住於道

寶髻光明如是見

衆生盲闇愚癡苦

佛欲令其生淨眼

是故爲然智慧燈

善目於此深觀察

解脫方便自在尊

若有曾見一供養

悉使修行至於果

此是德天方便力

一法門中無量門

無量千劫如是說

所演法門廣大義

普運光天之所了

復次月天子。得淨光普照法界攝化衆生解脫門。華王髻光明天子。得觀察一切衆生界令普入無邊法解脫門。衆妙淨光天子。得了知一切衆生心海種種攀緣轉解脫門。安樂世間心天子。得與一切衆生不可思議樂令踊躍大歡喜解脫門。樹王眼光明天子。得如田家作業種芽莖等隨時守護令成就解脫門。出現淨光天子。得慈悲救護一切衆生令現見受苦受樂事解脫門。普遊不動光天子。得能持清淨月普現十方解脫門。星宿王自在天子。得開示一切法如幻如虛空無相無自性解脫門。淨覺月天子。得普為一切衆生起大業用解脫門。大威德光明天子。得普斷一切疑惑解脫門。爾時月天子。承佛神力。普觀一切月宮殿中諸天衆會。而說頌言。

佛放光明徧世間	照耀十方諸國土	演不思議廣大法	永破衆生癡惑闇
境界無邊無有盡	於無量劫常開導	種種自在化群生	華髻如是觀於佛
衆生心海念念殊	佛智寬廣悉了知	普為說法令歡喜	此妙光明之解脫
衆生無有聖安樂	沈迷惡道受諸苦	如來示彼法性門	安樂思惟如是見
如來希有大慈悲	為利衆生入諸有	說法勸善令成就	此目光天所了知
世尊開闡法光明	分別世間諸業性	善惡所行無失壞	淨光見此生歡喜

佛爲一切福所依 譬如大地持宮室 巧示離憂安隱道 不動能知此方便
智火大明周法界 現形無數等衆生 普爲一切開真實 星宿王天悟斯道
佛如虛空無自性 爲利衆生現世間 相好莊嚴如影像 淨覺天王如是見
佛身毛孔普演音 法雲覆世悉無餘 聽聞莫不生歡喜 如是解脫光天悟

大方廣佛新華嚴經合論卷第十四終

大方廣佛新華嚴經合論卷第十五

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

世主妙嚴品第一之一八

復次持國乾闥婆王。得自在方便攝一切衆生解脫門。樹光乾闥婆王。得普現一切功德莊嚴解脫門。淨目乾闥婆王。得永斷一切衆生憂苦出生歡喜藏解脫門。華冠乾闥婆王。得永斷一切衆生邪見惑解脫門。喜步普音乾闥婆王。得如雲廣布普蔭澤一切衆生解脫門。樂搖動美目乾闥婆王。得現廣大妙好身令一切獲安樂解脫門。妙音師子幢乾闥婆王。得普散十方一切大名稱寶解脫門。普放寶光明乾闥婆王。得現一切大歡喜光明清淨身解脫門。金剛樹華幢乾闥婆王。得普滋榮一切樹令見者歡喜解脫門。普現莊嚴乾闥婆王。得善入一切佛境界與衆生安樂解脫門。爾時持國乾闥婆王。承佛威力。普觀一切乾闥婆衆。而說頌言。

諸佛境界無量門	一切衆生莫能入	善逝如空性清淨	普爲世間開正道
如來一一毛孔中	功德大海皆充滿	一切世間咸利樂	此樹光王所能見
世間廣大憂苦海	佛能消竭悉無餘	如來慈愍多方便	淨目於此能深解
十方刹海無有邊	佛以智光咸照耀	普使滌除邪惡見	此樹華王所入門
佛於往昔無量劫	修習大慈方便行	一切世間咸慰安	此道普音能悟入
佛身清淨皆樂見	能生世間無盡樂	解脫因果次第成	美目於斯善開示
衆生迷惑常流轉	愚癡障蓋極堅密	如來爲說廣大法	師子幢王能演暢
如來普現妙色身	無量差別等衆生	種種方便照世間	普放寶光如是見
大智方便無量門	佛爲群生普開闡	入勝菩提眞實行	此金剛幢善觀察
一刹那中百千劫	佛力能現無所動	等以安樂施群生	此樂莊嚴之解脫
復次增長鳩槃荼王。	得滅一切怨害力解脫門。	龍主鳩槃荼王。	得修習無邊行門海
解脫門。	莊嚴幢鳩槃荼王。	得知一切衆生心所樂解脫門。	饒益行鳩槃荼王。
得普	成就清淨大光明所作業解脫門。	可怖畏鳩槃荼王。	得開示一切衆生安隱無畏道解
脫門。	妙莊嚴鳩槃荼王。	得消竭一切衆生愛欲海解脫門。	高峰慧鳩槃荼王。
得普			

現諸趣光明雲解脫門。勇健臂鳩槃荼王。得普放光明滅如山重障解脫門。無邊淨華眼鳩槃荼王。得開示不退轉大悲藏解脫門。廣大面鳩槃荼王。得普現諸趣流轉身解脫門。爾時增長鳩槃荼王。承佛威力。普觀一切鳩槃荼衆。而說頌言。

成就忍力世導師

爲物修行無量劫

永離世間憍慢惑

是故其身最嚴淨

佛昔普修諸行海

教化十方無量衆

種種方便利群生

此解脫門龍主得

佛以大智救衆生

莫不明了知其心

種種自在而調伏

嚴幢見此生歡喜

神通應現如光影

法輪真實同虛空

如是處世無央劫

此饒益王之所證

衆生癡翳常蒙惑

佛光照現安隱道

爲作救護令除苦

可畏能觀此法門

欲海漂淪具衆苦

智光普照滅無餘

既除苦已爲說法

此妙莊嚴之所悟

佛身普應無不見

種種方便化群生

音如雷震雨法雨

如是法門高慧入

清淨光明不唐發

若遇必令消重障

演佛功德無有邊

勇臂能明此深理

爲欲安樂諸衆生

修習大悲無量劫

種種方便除衆苦

如是淨華之所見

神通自在不思議

其身普現徧十方

而於一切無來去

此廣面王心所了

復次毘樓博叉龍王。得銷滅一切諸龍趣熾然苦解脫門。娑竭羅龍王。得一念中轉

自龍形示現無量衆生身解脫門。雲音幢龍王。得於一切諸有趣中以清淨音說佛無邊名號海解脫門。焰口龍王。得普現無邊佛世界建立差別解脫門。燄龍王。得一切衆生瞋癡蓋纏如來慈愍令除滅解脫門。雲幢龍王。得開示一切衆生大喜樂福德海解脫門。德叉迦龍王。得以清淨救護音滅除一切怖畏解脫門。無邊步龍王。得示現一切佛色身及住劫次第解脫門。清淨色速疾龍王。得出生一切衆生大愛樂歡喜海解脫門。普行大音龍王。得示現一切平等悅意無礙音解脫門。無熱惱龍王。得以大悲普覆雲滅一切世間苦解脫門。爾時毘樓博叉龍王。承佛威力。普觀一切諸龍衆已。即說頌言。

汝觀如來法常爾	一切衆生咸利益	能以大慈哀愍力	拔彼畏塗淪墜者
一切衆生種種別	於一毛端皆示現	神通變化滿世間	娑竭如是觀於佛
佛以神通無限力	廣演名號等衆生	隨其所樂普使聞	如是雲音能悟解
無量無邊國土衆	佛能令入一毛孔	如來安坐彼會中	此焰口龍之所見
一切衆生瞋恚心	纏蓋愚癡深若海	如來慈愍皆除滅	焰龍觀此能明見
一切衆生福德力	佛毛孔中皆顯現	現已令歸大福海	此高雲幢之所觀

佛身毛孔發智光

其光處處演妙音

衆生聞者除憂畏

德又迦龍悟斯道

三世一切諸如來

國土莊嚴劫次第

如是皆於佛身現

廣步見此神通力

我觀如來往昔行

供養一切諸佛海

於彼咸增喜樂心

此速疾龍之所入

佛以方便隨類音

爲衆說法令歡喜

其音清雅衆所悅

普行聞此心欣悟

衆生逼迫諸有中

業惑漂轉無人救

佛以大悲令解脫

無熱大龍能悟此

復次毘沙門夜叉王。

得以無邊方便救護惡衆生解脫門。自在音夜叉王。得普觀察

衆生方便救護解脫門。嚴持器仗夜叉王。得能資益一切甚羸惡衆生解脫門。大智

慧夜叉王。得稱揚一切聖功德海解脫門。焰眼主夜叉王。得普觀察一切衆生大悲

智解脫門。金剛眼夜叉王。得種種方便利益安樂一切衆生解脫門。勇健臂夜叉王。

得普入一切諸法義解脫門。勇敵大軍夜叉王。得守護一切衆生令住於道無空過者

解脫門。富財夜叉王。得增長一切衆生福德聚令恆受快樂解脫門。力壞高山夜叉

王。得隨順憶念出生佛力智光明解脫門。爾時多聞大夜叉王。承佛威力。普觀一

切夜叉衆會。而說頌言。

衆生罪惡深可怖

於百千劫不見佛

漂流生死受衆苦

爲救是等佛與世

如來救護諸世間	悉現一切衆生前	息彼畏塗輪轉苦	如是法門音王入
衆生惡業爲重障	佛示妙理令開解	譬以明燈照世間	此法嚴仗能觀見
佛昔劫海修諸行	稱讚十方一切佛	故有高遠大名聞	此智慧王之所了
智慧如空無有邊	法身廣大不思議	是故十方皆出現	焰目於此能觀察
一切趣中演妙音	說法利益諸群生	其聲所暨衆苦滅	入此方便金剛眼
一切甚深廣大義	如來一句能演說	如是教理等世間	勇健慧王之所悟
一切衆生住邪道	佛示正道不思議	普使世間成法器	此勇敵軍能悟解
世間所有衆福業	一切皆由佛光照	佛智慧海難測量	如是富財之解脫
憶念往劫無央數	佛於是中修十力	能令諸力皆圓滿	此高幢王所了知
復次善慧摩睺羅伽王。得以一切神通方便令衆生集功德解脫門。淨威音摩睺羅伽	王。得使一切衆生除煩惱得清涼悅樂解脫門。勝慧莊嚴髻摩睺羅伽王。得普使一	切善不善思覺衆生入清淨法解脫門。妙自主摩睺羅伽王。得了達一切無所著福德	自在平等相解脫門。燈幢摩睺羅伽王。得開示一切衆生令離黑闇怖畏道解脫門。
最勝光明幢摩睺羅伽王。得了知一切佛功德生歡喜解脫門。師子臆摩睺羅伽王。			

得勇猛力為一切衆生救護主解脫門。衆妙莊嚴音摩睺羅伽王。得令一切衆生隨憶念生無邊喜樂解脫門。須彌臆摩睺羅伽王。得於一切所緣決定不動到彼岸滿足解脫門。可愛樂光明摩睺羅伽王。得為一切不平等衆生開示平等道解脫門。爾時善慧威光摩睺羅伽王。承佛威力。普觀一切摩睺羅伽衆。而說頌言。

汝觀如來性清淨

普現威光利群品

示甘露道使清涼

衆苦永滅無所依

一切衆生居有海

諸惡業惑自纏覆

示彼所行寂靜法

離塵威音能善了

佛智無等叵思議

知衆生心無不盡

爲彼闡明清淨法

如是嚴髻心能悟

無量諸佛現世間

普爲衆生作福田

福海廣大深難測

妙目大王能悉見

一切衆生憂畏苦

佛普現前而救護

法界虛空靡不周

此是燈幢所行境

佛一毛孔諸功德

世間共度不能了

無邊無盡同虛空

如是廣大光幢見

如來通達一切法

於彼法性皆明照

如須彌山不傾動

入此法門師子臆

佛於往昔廣大劫

集歡喜海深無盡

是故見者靡不欣

此法嚴音之所入

了知法界無形相

波羅蜜海悉圓滿

大光普救諸衆生

山臆能知此方便

汝觀如來自在力

十方降現罔不均

一切衆生咸照悟

此妙光明能善入

復次善慧光明天緊那羅王。得普生一切喜樂業解脫門。妙華幢緊那羅王。得能生無上法喜令一切受安樂解脫門。種種莊嚴緊那羅王。得一切功德滿足廣大清淨信解藏解脫門。悅意吼聲緊那羅王。得恆出一切悅意聲令聞者離憂怖解脫門。寶樹光明緊那羅王。得大悲安立一切衆生令覺悟所緣解脫門。普樂見緊那羅王。得示現一切妙色身解脫門。最勝光莊嚴緊那羅王。得了知一切殊勝莊嚴果所從生業解脫門。微妙華幢緊那羅王。得善觀察一切世間業所生報解脫門。動地力緊那羅王。得恆起一切利益衆生事解脫門。威猛主緊那羅王。得善知一切緊那羅心巧攝御解脫門。爾時善慧光明天緊那羅王。承佛威力。普觀一切緊那羅衆。而說頌言。

世間所有安樂事	一切皆由見佛興	導師利益諸衆生	普作救護歸依處
出生一切諸喜樂	世間咸得無有盡	能令見者不唐捐	此是華幢之所悟
佛功德海無有盡	求其邊際不可得	光明普照於十方	此莊嚴王之解脫
如來大音常演暢	開示離憂眞實法	衆生聞者咸欣悅	如是吼聲能信受
我觀如來自在力	皆由往昔所修行	大悲救物令清淨	此寶樹王能悟入
如來難可得見聞	衆生億劫時乃遇	衆相爲嚴悉具足	此樂見王之所覩

汝觀如來大智慧

普應群生心所欲

一切智道靡不宣

最勝莊嚴此能了

業海廣大不思議

衆生苦樂皆從起

如是一切能開示

此華幢王所了知

諸佛神通無間歇

十方大地恆震動

一切衆生莫能知

此廣大力恆明見

處於衆會現神通

放大光明令覺悟

顯示一切如來境

此威猛主能觀察

復次大速疾力迦樓羅王。得無著無礙眼普觀察衆生界解脫門。不可壞寶髻迦樓羅王。得普安住法界教化衆生解脫門。清淨速疾迦樓羅王。得普成就波羅蜜精進力解脫門。不退心莊嚴迦樓羅王。得勇猛力入如來境界解脫門。大海處攝持力迦樓羅王。得入佛行廣大智慧海解脫門。堅法淨光迦樓羅王。得成就無邊衆生差別智解脫門。妙嚴冠髻迦樓羅王。得莊嚴佛法城解脫門。普捷示現迦樓羅王。得成就不可壞平等力解脫門。普觀海迦樓羅王。得了知一切衆生身而為現形解脫門。龍音大目精迦樓羅王。得普入一切衆生歿生行智解脫門。爾時大速疾力迦樓羅王。承佛威力。普觀一切迦樓羅衆。而說頌言。

佛眼廣大無邊際

普現十方諸國土

其中衆生不可量

現大神通悉調伏

佛神通力無所礙

徧坐十方覺樹下

演法如雲悉充滿

寶髻聽聞心不逆

佛於往昔修諸行	普淨廣大波羅蜜	供養一切諸如來	此速疾王深信解
如來一一毛孔中	一念普現無邊行	如是難思佛境界	不退莊嚴悉明靚
佛行廣大不思議	一切衆生莫能測	導師功德智慧海	此執持王所行處
如來無量智慧光	能滅衆生癡惑網	一切世間咸救護	此是堅法所持說
法城廣大不可窮	其門種種無數量	如來處世大開闡	此妙冠髻能明入
一切諸佛一法身	眞如平等無分別	佛以此力常安住	普捷現王斯具演
佛昔諸有攝衆生	普放光明徧世間	種種方便示調伏	此勝法門觀海悟
佛觀一切諸國土	悉依業海而安住	普雨法雨於其中	龍音解脫能如是
復次羅睺阿修羅王。得現為大會尊勝主解脫門。毘摩質多羅阿修羅王。得示現無量劫解脫門。巧幻術阿修羅王。得消滅一切衆生苦令清淨解脫門。大眷屬阿修羅王。得修一切苦行自莊嚴解脫門。婆稚阿修羅王。得震動十方無邊境界解脫門。徧照阿修羅王。得種種方便安立一切衆生解脫門。堅固行妙莊嚴阿修羅王。得普集不可壞善根淨諸染著解脫門。廣大因慧阿修羅王。得大悲力無疑惑主解脫門。現勝德阿修羅王。得普令見佛承事供養修諸善根解脫門。善音阿修羅王。得普入			

一切趣決定平等行解脫門。爾時羅睺阿修羅王。承佛威力。普觀一切阿修羅衆。而說頌言。

十方所有廣大衆

佛在其中最殊特

光明徧照等虛空

普現一切衆生前

百千萬劫諸佛土

一剎那中悉明現

舒光化物靡不周

如是毘摩深讚喜

如來境界無與等

種種法門常利益

衆生有苦皆令滅

苦末羅王此能見

無量劫中修苦行

利益衆生淨世間

由是牟尼智普成

大眷屬王斯見佛

無礙無等大神通

徧動十方一切刹

不使衆生有驚怖

大力於此能明了

佛出於世救衆生

一切智道咸開示

悉令捨苦得安樂

此義徧照所弘闡

世間所有衆福海

佛力能生普令淨

佛能開示解脫處

堅行莊嚴入此門

佛大悲身無與等

周行無礙悉令見

猶如影像現世間

因慧能宣此功德

希有無等大神通

處處現身充法界

各在菩提樹下坐

此義勝德能宣說

如來往修三世行

諸趣輪迴靡不經

脫衆生苦無有餘

此妙音王所稱讚

復次示現宮殿主晝神。得普入一切世間解脫門。發起慧香主晝神。得普觀察一切

衆生皆利益令歡喜滿足解脫門。樂勝莊嚴主晝神。得能放無邊可愛樂法光明解脫

門。華香妙光主晝神。得開發無邊衆生清淨信解心解脫門。普集妙藥主晝神。得積集莊嚴普光明力解脫門。樂作喜目主晝神。得普開悟一切苦樂衆生皆令得法樂解脫門。觀方普現主晝神。得十方法界差別身解脫門。大悲威力主晝神。得救護一切衆生令安樂解脫門。善根光照主晝神。得普生喜足功德力解脫門。妙華纓珞主晝神。得聲稱普聞衆生見者皆獲益解脫門。爾時示現宮殿主晝神。承佛威力。普觀一切主晝神衆。而說頌言。

佛智如空無有盡	光明照耀徧十方	衆生心行悉了知	一切世間無不入
知諸衆生心所樂	如應爲說衆法海	句義廣大各不同	具足慧神能悉見
佛放光明照世間	見聞歡喜不唐捐	示其深廣寂滅處	此樂莊嚴心悟解
佛雨法雨無邊量	能令見者大歡喜	最勝善根從此生	如是妙光心所悟
普入法門開悟力	曠劫修治悉清淨	如是皆爲攝衆生	此妙藥神之所了
種種方便化群生	若見若聞咸受益	皆令踊躍大歡喜	妙眼晝神如是見
十力應現徧世間	十方方法界悉無餘	體性非無亦非有	此觀方神之所入
衆生流轉險難中	如來哀愍出世間	悉令除滅一切苦	此解脫門悲力住

衆生闍覆淪永夕

佛爲說法大開曉

皆使得樂除衆苦

大善光神入此門

如來福量同虛空

世間衆福悉從生

凡有所作無空過

如是解脫華纓得

復次普德淨光主夜神。得寂靜禪定樂大勇健解脫門。喜眼觀世主夜神。得廣大清

淨可愛樂功德相解脫門。護世精氣主夜神。得普現世間調伏衆生解脫門。寂靜海

音主夜神。得積集廣大歡喜心解脫門。普現吉祥主夜神。得甚深自在悅意言音解

脫門。普發樹華主夜神。得光明滿足廣大歡喜藏解脫門。平等護育主夜神。得開

悟衆生令成熟善根解脫門。遊戲快樂主夜神。得救護衆生無邊慈解脫門。諸根常

喜主夜神。得普現莊嚴大悲門解脫門。示現淨福主夜神。得普使一切衆生所樂滿

足解脫門。爾時普德淨光主夜神。承佛威力。徧觀一切主夜神衆。而說頌言。

汝等應觀佛所行

廣大寂靜虛空相

欲海無涯悉治淨

離垢端嚴照十方

一切世間咸樂見

無量劫海時一遇

大悲念物靡不周

此解脫門觀世覩

導師救護諸世間

衆生悉見在其前

能令諸趣皆清淨

如是護世能觀察

佛昔修治歡喜海

廣大無邊不可測

是故見者咸欣樂

此是寂音之所了

如來境界不可量

寂而能演徧十方

普使衆生意清淨

尸利夜神聞踊悅

佛於無福衆生中 大福莊嚴甚威曜 示彼離塵寂滅法 普發華神悟斯道
十方普現大神通 一切衆生悉調伏 種種色相皆令見 此護育神之所觀
如來往昔念念中 悉淨方便慈悲海 救護世間無不徧 此福樂神之解脫
衆生愚癡常亂濁 其心堅毒甚可畏 如來慈愍爲出興 此滅怨神能悟喜
佛昔修行爲衆生 一切願欲皆令滿 由是具成功德相 此現福神之所入
復次徧住一切主方神。得普救護力解脫門。普現光明主方神。得成辦化一切衆生
神通業解脫門。光行莊嚴主方神。得破一切閻障生喜樂大光明解脫門。周行不礙
主方神。得普現一切處不唐勞解脫門。永斷迷惑主方神。得示現等一切衆生數名
號發生功德解脫門。徧遊淨空主方神。得恆發妙音令聽者皆歡喜解脫門。雲幢大
音主方神。得如龍普雨令衆生歡喜解脫門。鬚目無亂主方神。得示現一切衆生業
無差別自在力解脫門。普觀世業主方神。得觀察一切趣生中種種業解脫門。周徧
遊覽主方神。得所作事皆究竟生一切衆生歡喜解脫門。爾時徧住一切主方神。承
佛威力。普觀一切主方神衆。而說頌言。

如來自在出世間

教化一切諸群生

普示法門令悟入

悉使當成無上智

神通無量等衆生

隨其所樂示諸相

見者皆蒙出離苦

此現光神解脫力

佛於闍障衆生海

爲現法炬大光明

其光普照無不見

此行莊嚴之解脫

具足世間種種音

普轉法輪無不解

衆生聽者煩惱滅

此徧住神之所悟

一切世間所有名

佛名等彼而出生

悉使衆生離癡惑

此斷迷神所行處

若有衆生至佛前

得聞如來美妙音

莫不心生大歡喜

徧遊虛空悟斯法

佛於一一剎那中

普雨無邊大法雨

悉使衆生煩惱滅

此雲幢神所了知

一切世間諸業海

佛悉開示等無異

普使衆生除業惑

此髻目神之所了

一切智地無有邊

一切衆生種種心

如來照見悉明了

此廣大門觀世入

佛於往昔修諸行

無量諸度悉圓滿

大慈哀愍利衆生

此徧遊神之解脫

復次淨光普照主空神。得普知諸趣一切衆生心解脫門。普遊深廣主空神。得普入

法界解脫門。生吉祥風主空神。得了達無邊境界身相解脫門。離障安住主空神。

得能除一切衆生業惑障解脫門。廣步妙髻主空神。得普觀察思惟廣大行海解脫

門。無礙光焰主空神。得大悲光普救護一切衆生厄難解脫門。無礙勝力主空神。

得普入一切無所著福德力解脫門。離垢光明主空神。得能令一切衆生心離諸蓋清

淨解脫門。深遠妙音主空神。得普見十方智光明解脫門。光徧十方主空神。得不動本處而普現世間解脫門。爾時淨光普照主空神。承佛威力。普觀一切主空神衆。而說頌言。

如來廣大目	清淨如虛空	普見諸衆生	一切悉明了
佛身大光明	徧照於十方	處處現前住	普遊觀此道
佛身如虛空	無生無所取	無得無自性	吉祥風所見
如來無量劫	廣說諸聖道	普滅衆生障	圓光悟此門
我觀佛往昔	所集菩提行	悉爲安世間	妙髻行斯法
一切衆生界	流轉生死海	佛放滅苦光	無礙神能見
清淨功德藏	能爲世福田	隨以智開覺	力神於此悟
衆生癡所覆	流轉於險道	佛爲放光明	離垢神能證
智慧無邊際	悉現諸國土	光明照世間	妙音斯見佛
佛爲度衆生	修行徧十方	如是大願心	普現能觀察

復次無礙光明主風神。得普入佛法及一切世間解脫門。普現勇業主風神。得無量

國土佛出現咸廣大供養解脫門。飄擊雲幢主風神。得以香風普滅一切衆生病解脫門。淨光莊嚴主風神。得普生一切衆生善根令摧滅重障山解脫門。力能竭水主風神。得能破無邊惡魔衆解脫門。大聲徧吼主風神。得永滅一切衆生怖解脫門。樹杪垂髻主風神。得入一切諸法實相辯才海解脫門。普行無礙主風神。得調伏一切衆生方便藏解脫門。種種宮殿主風神。得入寂靜禪定門滅極重愚癡闇解脫門。大光普照主風神。得隨順一切衆生行無礙力解脫門。爾時無礙光明主風神。承佛威力。普觀一切主風神衆。而說頌言。

一切諸佛法甚深

無礙方便普能入

所有世間常出現

無相無形無影像

汝觀如來於往昔

一念供養無邊佛

如是勇猛菩提行

此普現神能悟了

如來救世不思議

所有方便無空過

悉使衆行離諸苦

此雲幢神之解脫

衆生無福受衆苦

重蓋密障常迷覆

一切皆令得解脫

此淨光神所了知

如來廣大神通力

克殄一切魔軍衆

所有調伏諸方便

勇健威力能觀察

佛於毛孔演妙音

其音普徧於世間

一切苦畏皆令息

此徧吼神之所了

佛於一切衆刹海

不思議劫常演說

此如來地妙辯才

樹杪髻神能悟解

佛於一切方便門

智入其中悉無礙

境界無邊無與等

此普行神之解脫

如來境界無有邊

處處方便皆令見

而身寂靜無諸相

種種宮神解脫門

如來劫海修諸行

一切諸力皆成滿

能隨世法應衆生

此普照神之所見

復次普光焰藏主火神。得悉除一切世間闇解脫門。普集光幢主火神。得能息一切

衆生諸惑漂流熱惱苦解脫門。大光徧照主火神。得無動福力大悲藏解脫門。衆妙

宮殿主火神。得觀如來神通力示現無邊際解脫門。無盡光髻主火神。得光明照耀

無邊虛空界解脫門。種種焰眼主火神。得種種福莊嚴寂靜光解脫門。十方宮殿如

須彌山主火神。得能滅一切世間諸趣熾然苦解脫門。威光自在主火神。得自在開

悟一切世間解脫門。光照十方主火神。得永破一切愚癡執著見解脫門。雷音電光

主火神。得成就一切願力大震吼解脫門。爾時普光焰藏主火神。承佛威力。普觀

一切主火神衆。而說頌言。

汝觀如來精進力

廣大億劫不思議

爲利衆生現世間

所有闍障皆令滅

衆生愚癡起諸見

煩惱如流及火然

導師方便悉滅除

普集光幢於此悟

福德如空無有盡

求其邊際不可得

此佛大悲無動力

光照悟入心生喜

我觀如來之所行

經於劫海無邊際

如是示現神通力

衆妙宮神所了知

億劫修成不可思

求其邊際莫能知

演法實相令歡喜

無盡光神所觀見

十方所有廣大衆

一切現前瞻仰佛

寂靜光明照世間

此妙焰神所能了

牟尼出現諸世間

坐於一切宮殿中

普雨無邊廣大法

此十方神之境界

諸佛智慧最甚深

於法自在現世間

能悉闡明真實理

威光悟此心欣慶

諸見愚癡爲暗蓋

衆生迷惑常流轉

佛爲開闡妙法門

此照方神能悟入

願門廣大不思議

力度修治已清淨

如昔願心皆出現

此震音神之所了

復次普興雲幢主水神。得平等利益一切衆生慈解脫門。海潮雲音主水神。得無邊

法莊嚴解脫門。妙色輪鬘主水神。得觀所應化方便普攝解脫門。善巧漩復主水神。

得普演諸佛甚深境界解脫門。離垢香積主水神。得普現清淨大光明解脫門。福橋

光音主水神。得清淨法界無相無性解脫門。知足自在主水神。得無盡大悲海解脫

門。淨喜善音主水神。得於菩薩衆會道場中爲大歡喜藏解脫門。普現威光主水神。

得以無礙廣大福德力普出現解脫門。吼聲徧海主水神。得觀察一切衆生發起如虛

空調伏方便解脫門。爾時普興雲幢主水神。承佛威力。普觀一切主水神衆。而說

頌言。

清淨慈門剎塵數	共生如來一妙相	一一諸相莫不然	是故見者無厭足
世尊往昔修行時	普詣一切如來所	種種修治無懈倦	如是方便雲音入
佛於一切十方中	寂然不動無來去	應化衆生悉令見	此是髻輪之所知
如來境界無邊量	一切衆生不能了	妙音演說徧十方	此善漩神所行處
世尊光明無有盡	充徧法界不思議	說法教化度衆生	此淨香神所觀見
如來清淨等虛空	無相無形徧十方	而令衆會靡不見	此福光神善觀察
佛昔修習大悲門	其心廣徧等衆生	是故如雲現於世	此解脫門知足了
十方所有諸國土	悉見如來坐於座	朗然開悟大菩提	如是喜音之所入
如來所行無罣礙	徧往十方一切剎	處處示現大神通	普現威光已能悟
修習無邊方便行	等衆生界悉充滿	神通妙用靡暫停	吼聲徧海斯能入

大方廣佛新華嚴經合論卷第十五終

大方廣佛新華嚴經合論卷第十六

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

世主妙嚴品第一之九

復次出現寶光主海神。得以等心施一切衆生福德海衆寶莊嚴身解脫門。不可壞金剛幢主海神。得巧方便守護一切衆生善根解脫門。不雜塵垢主海神。得能竭一切衆生煩惱海解脫門。恆住波浪主海神。得令一切衆生離惡道解脫門。吉祥寶月主海神。得普滅大癡闇解脫門。妙華龍鬘主海神。得滅一切諸趣苦與安樂解脫門。普持光味主海神。得淨治一切衆生諸見愚癡性解脫門。寶焰華光主海神。得出生一切寶種性菩提心解脫門。金剛妙鬘主海神。得不動心功德海解脫門。海潮雷音主海神。得普入法界三昧門解脫門。爾時出現寶光主海神。承佛威力。普觀一切主海神衆。而說頌言。

不可思議大劫海	供養一切諸如來	普以功德施群生	是故端嚴最無比
一切世間皆出現	衆生根欲靡不知	普爲弘宣大法海	此是堅幢所欣悟
一切世間衆導師	法雲大雨不可測	消竭無窮諸苦海	此離垢塵入此門
一切衆生煩惱覆	流轉諸趣受衆苦	爲其開示如來境	普水宮神入此門
佛於難思劫海中	修行諸行無有盡	永截衆生癡惑網	寶月於此能明入
佛見衆生常恐怖	流轉生死大海中	示彼如來無上道	龍髻悟解生欣悅
諸佛境界不思議	法界虛空平等相	能淨衆生癡惑網	如是持味能宣說
佛眼清淨不思議	一切境界悉該覽	普示衆生諸妙道	此是華光心所悟
魔軍廣大無央數	一剎那中悉摧滅	心無傾動難測量	金剛妙髻之方便
普於十方演妙音	其音法界靡不周	此是如來三昧境	海潮音神所行處

復次普發迅流主河神。得普雨無邊法雨解脫門。普潔泉澗主河神。得普現一切衆生前令永離煩惱解脫門。離塵淨眼主河神。得以大悲方便普滌一切衆生諸惑塵垢解脫門。十方徧吼主河神。得恆出饒益衆生音解脫門。普救護衆生主河神。得於一切含識中恆起無惱害慈解脫門。無熱淨光主河神。得普示一切清涼善根解脫

門。普生歡喜主河神。得修行具足施令一切衆生永離慳著解脫門。廣德勝幢主河神。得作一切歡喜福田解脫門。光照普世主河神。得能令一切衆生雜染者清淨瞋毒者歡喜解脫門。海德光明主河神。得能令一切衆生入解脫海恆受具足樂解脫門。爾時普發迅流主河神。承佛威力。普觀一切主河神衆。而說頌言。

如來往昔爲衆生

修治法海無邊行

譬如霏澤清炎暑

普滅衆生煩惱熱

佛昔難宣無量劫

以願光明淨世間

諸根熟者令悟道

此普潔神心所悟

大悲方便等衆生

悉現其前常化誘

普使淨治煩惱垢

淨眼見此深歡悅

佛演妙音普使聞

衆生愛樂心歡喜

悉使滌除無量苦

此徧吼神之解脫

佛昔修習菩提行

爲利衆生無量劫

是故光明徧世間

護神憶念生歡喜

佛昔修行爲衆生

種種方便令成熟

普淨福海除衆苦

無熱見此心欣慶

施門廣大無窮盡

一切衆生咸利益

能令見者無慳著

此普喜神之所悟

佛昔修行實方便

成就無邊功德海

能令見者靡不欣

此勝幢神心悟悅

衆生有垢咸淨治

一切怨害等生慈

故得光照滿虛空

普世河神見歡喜

佛是福田功德海

能令一切離諸惡

乃至成就大菩提

此海光神之解脫

復次柔軟勝味主稼神。得與一切衆生法滋味令成就佛身解脫門。時華淨光主稼神。得能令一切衆生受廣大喜樂解脫門。色力勇健主稼神。得以一切圓滿法門淨諸境界解脫門。增益精氣主稼神。得見佛大悲無量神通變化力解脫門。普生根果主稼神。得普現佛福田令下種無失壞解脫門。妙嚴環髻主稼神。得普發衆生淨信華解脫門。潤澤淨華主稼神。得大慈愍濟諸衆生令增長福德海解脫門。成就妙香主稼神。得廣開示一切行法解脫門。見者愛樂主稼神。得能令法界一切衆生捨離懈怠憂惱等諸惡普清淨解脫門。離垢光明主稼神。得觀察一切衆生善根隨應說法令衆會歡喜滿足解脫門。爾時柔軟勝味主稼神。承佛威力。普觀一切主稼神衆。而說頌言。

如來無上功德海	普現明燈照世間	一切衆生咸救護	悉與安樂無遺者
世尊功德無有邊	衆生聞者不唐捐	悉使離苦常歡喜	此是時華之所入
善逝諸力皆圓滿	功德莊嚴現世間	一切衆生悉調伏	此法勇力能明證
佛昔修治大悲海	其心念念等世間	是故神通無有邊	增益精氣能觀見
佛徧世間常現前	一切方便無空過	悉淨衆生諸惑惱	此普生神之解脫

佛是世間大智海

放淨光明無不徧

廣大信解悉從生

如是嚴髻能明入

如來觀世起慈心

爲利衆生而出現

示彼恬怡最勝道

此淨華神之解脫

善逝所修清淨行

菩提樹下具宣說

如是教化滿十方

此妙香神能聽受

佛於一切諸世間

悉使離憂生大喜

所有根欲皆治淨

可愛樂神斯悟入

如來出現於世間

普觀衆生心所樂

種種方便而成熟

此淨光神解脫門

復次吉祥主藥神。得普觀一切衆生心而勤攝取解脫門。栴檀林主藥神。得以光明

攝取衆生俾見者無空過解脫門。離塵光明主藥神。得能以淨方便滅一切衆生煩惱

解脫門。名稱普聞主藥神。得能以大名稱增長無邊善根海解脫門。毛孔現光主藥

神。得大悲幢速赴一切病境界解脫門。破闇清淨主藥神。得療治一切盲冥衆生令

智眼清淨解脫門。普發吼聲主藥神。得能演佛音說諸法差別義解脫門。蔽日光幢

主藥神。得能作一切衆生善知識令見者咸生善根解脫門。明見十方主藥神。得清

淨大悲藏能以方便令生信解解脫門。普發威光主藥神。得方便令念佛滅一切衆生

病解脫門。爾時吉祥主藥神。承佛威力。普觀一切主藥神衆。而說頌言。

如來智慧不思議

悉知一切衆生心

能以種種方便力

滅彼群迷無量苦

大雄善巧難測量	凡有所作無空過	必使衆生諸苦滅	梅檀林神能悟此
汝觀諸佛法如是	往昔勤修無量劫	而於諸有無所著	此離塵光所入門
佛百千劫難可遇	若有得見及聞名	必令獲益無空過	此普稱神之所了
如來一一毛孔中	悉放光明滅衆患	世間煩惱皆令盡	此現光神所入門
一切衆生癡所盲	惑業衆苦無量別	佛悉燭除開智照	如是破暗能觀見
如來一音無限量	能開一切法門海	衆生聽者悉了知	此是大音之解脫
汝觀佛智難思議	普現諸趣救群生	能令見者皆從化	此蔽日幢深悟了
如來大悲方便海	爲利世間而出現	廣開正道示衆生	此見方神能了達
如來普放大光明	一切十方無不照	令隨念佛生功德	此發威光解脫門
復次布華如雲主林神。	得廣大無邊智海藏解脫門。	擢幹舒光主林神。	得廣大修治
普清淨解脫門。	生芽發曜主林神。	得增長種種淨信芽解脫門。	吉祥淨葉主林神。
得一切清淨功德莊嚴解脫門。	垂布焰藏主林神。	得普門清淨慧恆周覽法界解脫	門。
妙莊嚴光主林神。	得普知一切衆生行海而興布法雲解脫門。	可意雷聲主林神。	
得忍受一切不可意聲演清淨音解脫門。	香光普徧主林神。	得十方普現昔所修治廣	

大行境界解脫門。妙光迴曜主林神。得以一切功德法饒益世間解脫門。華果光味主林神。得能令一切見佛出興常敬念不忘莊嚴功德藏解脫門。爾時布華如雲主林神。承佛威力。普觀一切主林神衆。而說頌言。

佛昔修習菩提行

福德智慧悉成滿

一切諸力皆具足

放大光明出世間

悲門無量等衆生

如來往昔普淨治

是故於世能爲益

此擢幹神之所了

若有衆生一見佛

必使入於深信海

普示一切如來道

此妙芽神之解脫

一毛所集諸功德

劫海宣揚不可盡

諸佛方便難思議

淨葉能明此深義

我念如來於往昔

供養剎塵無量佛

一一佛所智漸明

此焰藏神之所了

一切衆生諸行海

世尊一念悉了知

如是廣大無礙智

妙莊嚴神能悟入

恆演如來寂妙音

普生無等大歡喜

隨其解欲皆令悟

此是雷音所行法

如來示現大神通

十方國土皆周徧

佛昔修行悉令見

此普香光所入門

衆生諛誑不修德

迷惑沈流生死中

爲彼闡明衆智道

此妙光神之所見

佛爲業障諸衆生

經於億劫時乃現

其餘念念常令見

此味光神所觀察

復次寶峰開華主山神。得入大寂定光明解脫門。華林妙髻主山神。得修習慈善根

成熟不可思議數衆生解脫門。高幢普照主山神。得觀察一切衆生心所樂嚴淨諸根解脫門。離塵寶髻主山神。得無邊劫海勤精進無厭怠解脫門。光照十方主山神。得以無邊功德光普覺悟解脫門。大力光明主山神。得能自成熟復令衆生捨離愚迷行解脫門。威光普勝主山神。得拔一切苦使無有餘解脫門。微密光輪主山神。得演教法光明顯示一切如來功德解脫門。普眼現見主山神。得令一切衆生乃至於夢中增長善根解脫門。金剛堅固眼主山神。得出現無邊大義海解脫門。爾時開華匝地主山神。承佛威力。普觀一切主山神衆。而說頌言。

往修勝行無有邊

今獲神通亦無量

法門廣闢如塵數

悉使衆生深悟喜

衆相嚴身徧世間

毛孔光明悉清淨

大慈方便示一切

華林妙髻悟此門

佛身普現無有邊

十方世界皆充滿

諸根嚴淨見者喜

此法高幢能悟入

歷劫勤修無懈倦

不染世法如虛空

種種方便化群生

悟此法門名寶髻

衆生盲闇入險道

佛哀愍彼舒光照

普使世間從睡覺

威光悟此心生喜

昔在諸有廣修行

供養剎塵無數佛

令衆生見發大願

此地大力能明入

見諸衆生流轉苦

一切業障恆纏覆

以智慧光悉滅除

此普勝神之解脫

一一毛孔出妙音

隨衆生心讚諸佛

悉徧十方無量劫

此是光輪所入門

佛徧十方普現前

種種方便說妙法

廣益衆生諸行海

此現見神之所悟

法門如海無邊量

一音爲說悉令解

一切劫中演不窮

入此方便金剛目

復次普德淨華主地神。得以慈悲心念念普觀一切衆生解脫門。堅福莊嚴主地神。

得普現一切衆生福德力解脫門。妙華嚴樹主地神。得普入諸法出生一切佛刹莊嚴

解脫門。普散衆寶主地神。得修習種種諸三昧令衆生除障垢解脫門。淨目觀時主

地神。得令一切衆生常遊戲快樂解脫門。金色妙眼主地神。得示現一切清淨身調

伏衆生解脫門。香毛發光主地神。得了知一切佛功德海大威力解脫門。寂音悅意

主地神。得普攝持一切衆生言音海解脫門。妙華旋鬘主地神。得充滿佛刹離垢性

解脫門。金剛普持主地神。得一切佛法輪所攝持普出現解脫門。爾時普德淨華主

地神。承佛威力。普觀一切主地神衆。而說頌言。

如來往昔念念中

大慈悲門不可說

如是修行無有已

故得堅牢不壞身

三世衆生及菩薩

所有一切衆福聚

悉現如來毛孔中

福嚴見已生歡喜

廣大寂靜三摩地

不生不滅無來去

嚴淨國土示衆生

此樹華神之解脫

佛於往昔修諸行	爲令衆生銷重障	普散衆寶主地神	見此解脫生歡喜
如來境界無邊際	念念普現於世間	淨目觀時主地神	見佛所行心慶悅
妙音無限不思議	普爲衆生滅煩惱	金色眼神能了悟	見佛無邊勝功德
一切色形皆化現	十方法界悉充滿	香毛發光常見佛	如是普化諸衆生
妙音普徧於十方	無量劫中爲衆說	悅意地神心了達	從佛得聞深敬喜
佛毛孔出香焰雲	隨衆生心徧世間	一切見者皆成熟	此是華旋所觀處
堅固難壞如金剛	不可傾動踰須彌	佛身如是處世間	普持得見生歡喜
復次寶峰光耀主城神。得方便利益衆生解脫門。妙嚴宮殿主城神。得知衆生根教	化成熟解脫門。清淨喜寶主城神。得常歡喜令一切衆生受諸福德解脫門。離憂清	淨主城神。得救諸怖畏大悲藏解脫門。華燈焰眼主城神。得普明了大智慧解脫門。	焰幢明現主城神。得普方便示現解脫門。盛福威光主城神。得普觀察一切衆生令
修廣大福德海解脫門。淨光明身主城神。得開悟一切愚闇衆生解脫門。香鬢莊嚴	主城神。得觀如來自在力普徧世間調伏衆生解脫門。寶峰光目主城神。得能以大	光明破一切衆生障礙山解脫門。爾時寶峰光耀主城神。承佛威力。普觀一切主城	

神衆。而說頌言。

導師如是不思議

光明徧照於十方

衆生現前悉見佛

教化成熟無央數

諸衆生根各差別

佛悉了知無有餘

妙嚴宮殿主城神

入此法門心慶悅

如來無量劫修行

護持往昔諸佛法

意常承奉生歡喜

妙寶城神悟此門

如來昔已能除遣

一切衆生諸恐怖

而恆於彼起慈悲

此離憂神心悟喜

佛智廣大無有邊

譬如虛空不可量

華目城神斯悟悅

能學如來之妙慧

如來色相等衆生

隨其樂欲皆令見

焰幢明現心能悟

習此方便生歡喜

如來往修衆福海

清淨廣大無邊際

福德幢光於此門

觀察了悟心欣慶

衆生愚迷諸有中

如世生盲卒無覩

佛爲利益興於世

清淨光神入此門

如來自在無有邊

如雲普徧於世間

乃至現夢令調伏

此是香幢所觀見

衆生癡暗如盲瞽

種種障蓋所纏覆

佛光照徹普令開

如是寶峰之所入

復次淨莊嚴幢道場神。得出現供養佛廣大莊嚴具誓願力解脫門。須彌寶光道場

神。得現一切衆生前成就廣大菩提行解脫門。雷音幢相道場神。得隨一切衆生心

所樂令見佛於夢中為說法解脫門。雨華妙眼道場神。得能雨一切難捨衆寶莊嚴具

解脫門。清淨焰形道場神。得能現妙莊嚴道場廣化衆生令成熟解脫門。華纓垂髻道場神。得隨根說法令生正念解脫門。雨寶莊嚴道場神。得能以辯才普雨無邊歡喜法解脫門。勇猛香眼道場神。得廣稱讚諸佛功德解脫門。金剛彩雲道場神。得示現無邊色相樹莊嚴道場解脫門。蓮花光明道場神。得菩提樹下寂然不動而充徧十方解脫門。妙光照耀道場神。得顯示如來種種力解脫門。爾時淨莊嚴幢道場神。承佛威力。普觀一切道場神衆。而說頌言。

我念如來往昔時	於無量劫所修行	諸佛出興咸供養	故獲如空大功德
佛昔修行無盡施	無量刹土微塵等	須彌光照菩提神	憶念善逝心欣慶
如來色相無有窮	變化周流一切刹	乃至夢中常示現	雷幢見此生歡喜
昔行捨行無量劫	能捨難捨眼如海	如是捨行爲衆生	此妙眼神能悟悅
無邊色相寶焰雲	現菩提場徧世間	焰形清淨道場神	見佛自在生歡喜
衆生行海無有邊	佛普彌綸雨法雨	隨其根解除疑惑	華纓悟此心歡喜
無量法門差別義	辯才大海皆能入	雨寶嚴具道場神	於心念念恆如是
於不可說一切土	盡世言詞稱讚佛	故獲名譽大功德	此勇眼神能憶念

種種色相無邊樹

普現菩提樹王下

金剛彩雲悟此門

恆觀道樹生歡喜

十方邊際不可得

佛坐道場智亦然

蓮華步光淨信心

入此解脫深生喜

道場一切出妙音

讚佛難思清淨力

及以成就諸因行

此妙光神能聽受

復次寶印手足行神。得普雨衆寶生廣大歡喜解脫門。蓮華光足行神。得示現佛身坐一切光色蓮華座令見者歡喜解脫門。最勝華髻足行神。得一心中建立一切如來衆會道場解脫門。攝諸善見足行神。得舉足發步悉調伏無邊衆生解脫門。妙寶星幢足行神。得念念中化現種種蓮華網光明普雨衆寶出妙音聲解脫門。樂吐妙音足行神。得出生無邊歡喜海解脫門。栴檀樹光足行神。得以香風普覺一切道場衆會解脫門。蓮華光明足行神。得一切毛孔放光明演微妙法音解脫門。微妙光明足行神。得其身徧出種種光明網普照耀解脫門。積集妙華足行神。得開悟一切衆生令生善根海解脫門。爾時寶印手足行神。承佛神力。普觀一切足行神衆。而說頌言。

佛昔修行無量劫

供養一切諸如來

心恆慶悅不疲厭

喜門深大猶如海

念念神通不可量

化現蓮華種種香

佛坐其上普遊往

紅色光神皆覩見

諸佛如來法如是	廣大衆會徧十方	普現神通不可議	最勝華神悉明矚
十方國土一切處	於中舉足若下足	悉能成就諸群生	此善見神心悟喜
如衆生數普現身	此一一身充法界	悉放淨光雨衆寶	如是解脫星幢入
如來境界無邊際	普雨法雨皆充滿	衆會覩佛生歡喜	此妙音聲之所見
佛音聲量等虛空	一切音聲悉在中	調伏衆生靡不徧	如是梅檀能聽受
一切毛孔出化音	闡揚三世諸佛名	聞此音者皆歡喜	蓮華光神如是見
佛身變現不思議	步步色相猶如海	隨衆生心悉令見	此妙光明之所得
十方普現大神通	一切衆生悉開悟	衆妙華神於此法	見已心生大歡喜
復次淨喜境界身衆神。得憶佛往昔誓願海解脫門。光照十方身衆神。得光明普照	無邊世界解脫門。海音調伏身衆神。得大音普覺一切衆生令歡喜調伏解脫門。淨	華嚴髻身衆神。得身如虛空周徧住解脫門。無量威儀身衆神。得示一切衆生諸佛	境界解脫門。最勝光嚴身衆神。得令一切飢乏衆生色力滿足解脫門。淨光香雲身
衆神。得除一切衆生煩惱垢解脫門。守護攝持身衆神。得轉一切衆生愚癡魔業解	脫門。普現攝化身衆神。得普於一切世主宮殿中顯示莊嚴相解脫門。不動光明身		

衆神。得普攝一切衆生皆令生清淨善根解脫門。爾時淨喜境界身衆神。承佛威力。普觀一切身衆神衆。而說頌言。

我憶須彌塵劫前

有佛妙光出與世

世尊於彼如來所

發心供養一切佛

如來身放大光明

其光法界靡不充

衆生遇者心調伏

此照方神之所見

如來聲震十方國

一切言音悉圓滿

普覺群生無有餘

調伏聞此心歡慶

佛身清淨恆寂滅

普現衆色無諸相

如是徧住於世間

此淨華神之所入

導師如是不思議

隨衆生心悉令見

或坐或行或時住

無量威儀所悟門

佛百千劫難逢遇

出興利益能自在

令世悉離貧窮苦

最勝光嚴入斯處

如來一一齒相間

普放香燈光焰雲

滅除一切衆生惑

離垢雲神如是見

衆生染惑爲重障

隨逐魔徑常流轉

如來開示解脫道

守護執持能悟入

我觀如來自在力

光布法界悉充滿

處王宮殿化衆生

此普現神之境界

衆生迷妄具衆苦

佛在其中常救護

皆令滅惑生喜心

不動光神所觀見

復次妙色那羅延執金剛神。得見如來示現無邊色相身解脫門。日輪速疾幢執金剛

神。得佛身一一毛如日輪現種種光明雲解脫門。須彌華光執金剛神。得化現無量

身大神變解脫門。清淨雲音執金剛神。得無邊隨類音解脫門。妙臂天主執金剛神。得現為一切世間主開悟衆生解脫門。可愛樂光明執金剛神。得普開示一切佛法差別門咸盡無遺解脫門。大樹雷音執金剛神。得以可愛樂莊嚴具攝一切樹神解脫門。師子王光明執金剛神。得如來廣大福莊嚴聚皆具足明了解脫門。密焰吉祥目執金剛神。得普觀察險惡衆生心為現威嚴身解脫門。蓮華摩尼髻執金剛神。得普雨一切菩薩莊嚴具摩尼髻解脫門。爾時妙色那羅延執金剛神。承佛威力。普觀一切執金剛神衆。而說頌言。

汝應觀法王	法王法如是	色相無有邊	普現於世間
佛身一一毛	光網不思議	譬如淨日輪	普照十方國
如來神通力	法界悉周徧	一切衆生前	示現無盡身
如來說法音	十方莫不聞	隨諸衆生類	悉令心滿足
衆見牟尼尊	處世宮殿中	普爲諸群生	闡揚於大法
法海漩渦處	一切差別義	種種方便門	演說無窮盡
無邊大方便	普應十方國	遇佛淨光明	悉見如來身

供養於諸佛

億刹微塵數

功德如虛空

一切所瞻仰

神通力平等

一切刹皆現

安坐妙道場

普現衆生前

焰雲普照明

種種光圓滿

法界無不及

示佛所行處

復次普賢菩薩摩訶薩。入不思議解脫門方便海。入如來功德海。所謂有解脫門。

名嚴淨一切佛國土調伏衆生令究竟出離。有解脫門。名普詣一切如來所修具足功

德境界。有解脫門。名安立一切菩薩地諸大願海。有解脫門。名普現法界微塵數

無量身。有解脫門。名演說徧一切國土不可思議數差別名。有解脫門。名一切微

塵中悉現無邊諸菩薩神通境界。有解脫門。名一念中見三世劫成壞事。有解脫門。

名示現一切菩薩諸根海各入自境界。有解脫門。名能以神通力化現種種身徧無邊

法界。有解脫門。名顯示一切菩薩修行法次第門入一切智廣大方便。爾時普賢菩

薩摩訶薩。以自功德。復承如來威神之力。普觀一切衆會海已。即說頌言。

佛所莊嚴廣大刹

等於一切微塵數

清淨佛子悉滿中

雨不思議最妙法

如於此會見佛坐

一切塵中悉如是

佛身無去亦無來

所有國土皆明見

顯示菩薩所修行

無量趣地諸方便

及說難思眞實理

令諸佛子入法界

出生化佛如塵數	普應群生心所欲	入深法界方便門	廣大無邊悉開演
如來名號等世間	十方國土悉充徧	一切方便無空過	調伏衆生皆離垢
佛於一切微塵中	示現無邊大神力	悉坐道場能演說	如佛往昔菩提行
三世所有廣大劫	佛念念中皆示現	彼諸成壞一切事	不思議智無不了
佛子衆會廣無限	欲共測量諸佛地	諸佛法門無有邊	能悉了知甚爲難
佛如虛空無分別	等眞法界無所依	化現周行靡不至	悉坐道場成正覺
佛以妙音廣宣暢	一切諸地皆明了	普現一一衆生前	盡與如來平等法
復次淨德妙光菩薩摩訶薩。得徧往十方菩薩衆會莊嚴道場解脫門。普德最勝燈光	照菩薩摩訶薩。得一念中現無盡成正覺門教化成熟不思議衆生界解脫門。普光師	子幢菩薩摩訶薩。得修習菩薩福德莊嚴出生一切佛國土解脫門。普寶焰妙光菩薩	摩訶薩。得觀察佛神通境界無迷惑解脫門。普音功德海幢菩薩摩訶薩。得於一衆
會道場中示現一切佛土莊嚴解脫門。普智光照如來境菩薩摩訶薩。得隨逐如來觀	察甚深廣大法界藏解脫門。普覺悅意聲菩薩摩訶薩。得親近承事一切諸佛供養藏	解脫門。普清淨無盡福威光菩薩摩訶薩。得出生一切神變廣大加持解脫門。普寶	

髻華幢菩薩摩訶薩。得普入一切世間行出生菩薩無邊行門解脫門。普相最勝光菩薩摩訶薩。得能於無相法界中出現一切諸佛境界解脫門。爾時淨德妙光菩薩摩訶薩。承佛威力。普觀一切菩薩解脫門海已。即說頌言。

十方所有諸國土

一剎那中悉嚴淨

以妙音聲轉法輪

普徧世間無與等

如來境界無邊際

一念法界悉充滿

一一塵中建道場

悉證菩提起神變

世尊往昔修諸行

經於百千無量劫

一切佛刹皆莊嚴

出現無礙如虛空

佛神通力無限量

充滿無邊一切劫

假使經於無量劫

念念觀察無疲厭

汝應觀佛神通境

十方國土皆嚴淨

一切於此悉現前

念念不同無量種

觀佛百千無量劫

不得一毛之分限

如來無礙方便門

此光普照難思刹

如來往劫在世間

承事無邊諸佛海

是故一切如川鷺

咸來供養世所尊

如來出現徧十方

一一塵中無量土

其中境界皆無量

悉住無邊無盡劫

佛於曩劫爲衆生

修習無邊大悲海

隨諸衆生入生死

普化衆會令清淨

佛住眞如法界藏

無相無形離諸垢

衆生觀見種種身

一切苦難皆銷滅

復次海月光大明菩薩摩訶薩。得出生菩薩諸地諸波羅蜜教化衆生及嚴淨一切佛國

土方便解脫門。雲音海光離垢藏菩薩摩訶薩。得念念中普入法界種種差別處解脫門。智生寶髻菩薩摩訶薩。得不可思議劫於一切衆生前現清淨大功德解脫門。功德自在王淨光菩薩摩訶薩。得普見十方一切菩薩初詣道場時種種莊嚴解脫門。善勇猛蓮華髻菩薩摩訶薩。得隨諸衆生根解海普為顯示一切佛法解脫門。普智雲曰幢菩薩摩訶薩。得成就如來智永住無量劫解脫門。大精進金剛齋菩薩摩訶薩。得普入一切無邊法印力解脫門。香焰光幢菩薩摩訶薩。得顯示現在一切佛始修菩薩行乃至成就智慧聚解脫門。大明德深美音菩薩摩訶薩。得安住毘盧遮那一切大願海解脫門。大福光智生菩薩摩訶薩。得顯示如來徧法界甚深境界解脫門。爾時海月光大明菩薩摩訶薩。承佛威力。普觀一切菩薩衆莊嚴海已。即說頌言。

諸波羅蜜及諸地	廣大難思悉圓滿	無量衆生盡調伏	一切佛土皆嚴淨
如佛教化衆生界	十方國土皆充滿	一念心中轉法輪	普應群情無不徧
佛於無量廣大劫	普現一切衆生前	如其往昔廣修治	示彼所行清淨處
我觀十方無有餘	亦見諸佛現神通	悉坐道場成正覺	衆會聞法共圍遶
廣大光明佛法身	能以方便現世間	普隨衆生心所樂	悉稱其根而雨法

眞如平等無相身

離垢光明淨法身

智慧寂靜身無量

普應十方而演法

法王諸力皆清淨

智慧如空無有邊

悉爲開示無遺隱

普使衆生同悟入

如佛往昔所修治

乃至成於一切智

今放光明徧法界

於中顯現悉明了

佛以本願現神通

一切十方無不照

如佛往昔修治行

光明網中皆演說

十方境界無有盡

無等無邊各差別

佛無礙力發大光

一切國土皆明顯

已上諸衆。皆悉如上。以義科文。隨義稱歎。教門弘大。不用文繁。得意即得。此初會之內。四十七衆之中。已前七衆。前已釋訖。

大方廣佛新華嚴經合論卷第十六終

大方廣佛新華嚴經合論卷第十七

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

世主妙嚴品第一之十

爾時如來師子之座。衆寶妙華。輪臺基陛。及諸戶牖。如是一切莊嚴具中。一一各出佛刹微塵數菩薩摩訶薩。其名曰。海慧自在神通王菩薩摩訶薩。雷音普震菩薩摩訶薩。衆寶光明髻菩薩摩訶薩。大智曰勇猛慧菩薩摩訶薩。不思議功德寶智印菩薩摩訶薩。百目蓮華髻菩薩摩訶薩。金焰圓滿光菩薩摩訶薩。法界普音菩薩摩訶薩。雲音淨月菩薩摩訶薩。善勇猛光明幢菩薩摩訶薩。如是等而為上首。有衆多佛刹微塵數。同時出現。此諸菩薩。各興種種供養雲。所謂一切摩尼寶華雲。一切蓮華妙香雲。一切寶圓滿光雲。無邊境界香焰雲。日藏摩尼輪光明雲。一切悅意樂音雲。無邊色相一切寶燈光焰雲。衆寶樹枝華果雲。無盡寶清淨光明摩尼

王雲。一切莊嚴具摩尼王雲。如是等諸供養雲。有佛世界微塵數。彼諸菩薩。一皆興如是供養雲。雨於一切道場衆海。相續不絕。現是雲已。右邊世尊。經無量百千匝。隨其方面。去佛不遠。化作無量種種寶蓮華師子之座。各於其上結跏趺坐。是諸菩薩。所行清淨。廣大如海。得智慧光。照普門法。隨順諸佛所行無礙。能入一切辯才法海。得不思議解脫法門。住於如來普門之地。已得一切陀羅尼門。悉能容受一切法海。善住三世平等智地。已得深信廣大喜樂。無邊福聚。極善清淨。虛空法界。靡不觀察。十方世界一切國土。所有佛興。咸勤供養。爾時海慧自在神通王菩薩摩訶薩。承佛威力。普觀一切道場衆海。即說頌言。

如來座內衆。經云。如來師子之座。衆寶妙華。輪臺基陸。及諸戶牖。如是一切莊嚴具中。一一各出佛刹微塵數菩薩摩訶薩。於此段中。義分爲二。一述衆來意。二長科經文。一述衆來意者。是中其意有三。一明諸菩薩是古佛舊行。二明今佛契同。三明古今不二爲門。所坐之座合古。所行菩薩行依舊故。如下頌中。諸佛所悟我已知。常以法身爲座體。以普賢萬行爲莊嚴。以無作大悲之智爲座上佛。前佛後佛。皆同此也。明今佛契同古跡。定衆生狐疑。是故須來。是名爲如

來自行與古同。因衆爲座體。體是法界。所行行亦是法界。以此無礙自在故。座身是正報。座上莊嚴。是行所招依報。今還從本行報得之果內。還出本自行因菩薩衆也。亦明因果不二體故。如法界品。如來師子之座。普徧法界爲座體故。第二長科經文者。從爾時如來師子座已下。有二十九行經。(四百九十言今二十五行)於中其義有七。一明座上莊嚴出衆。二列所出衆名。三來衆興供。四其衆遶佛致敬。五致敬已昇座而坐。六歎來衆之德。七乘威說頌。從此已下。有十菩薩各說二十行頌。歎如來成道。福智依正。及往昔所修之因。任其後哲。隨文隨義稱歎。不煩更釋。此一段。明今佛合古行。古行合今佛。明座外普賢之衆。是佛利他之行。座內之人。是佛自行所契普賢之衆。此之大衆。古今一切諸佛同道。更無二路。衆生乘之。即名乘不思議乘。如來乘。最勝乘。無上乘。至於道場。此以一切法。皆爲道場也。以法界爲場地。諸波羅蜜爲人功。治一切垢本自淨故。治無明成根本智故。教文弘廣。略申體意。隨文讚歎。任在後賢。此十箇頌中。向下歎佛十波羅蜜及十地。有二十行頌。自餘皆二十行也。准知。

諸佛所悟悉已知

如空無礙皆明照

光徧十方無量土

處於衆會普嚴潔

如來功德不可量

十方法界悉充滿

普坐一切樹王下

諸大自在共雲集

佛有如是神通力

一念現於無盡相

如來境界無有邊

各隨解脫能觀見

如來往昔經劫海

在於諸有勤修行

種種方便化衆生

令彼受行諸佛法

毘盧遮那具嚴好

坐蓮華藏師子座

一切衆會皆清淨

寂然而住同瞻仰

摩尼寶藏放光明

普發無邊香焰雲

無量華纓共垂布

如是座上如來坐

種種嚴飾吉祥門

恆放燈光寶焰雲

廣大熾然無不照

牟尼處上增嚴好

種種摩尼綺麗窗

妙寶蓮華所垂飾

恆出妙音聞者悅

佛坐其上特明顯

寶輪承座半月形

金剛爲臺色焰明

持髻菩薩常圍遶

佛在其中最光耀

種種變化滿十方

演說如來廣大願

一切影像於中現

如是座上佛安坐

爾時雷音普震菩薩摩訶薩。承佛威力。普觀一切道場衆海。即說頌言。

世尊往集菩提行

供養十方無量佛

善逝威力所加持

如來座中無不覩

香焰摩尼如意王

填飾妙華師子座

種種莊嚴皆影現

一切衆會悉明矚

佛座普現莊嚴相

念念色類各差別

隨諸衆生解不同

各見佛坐於其上

寶枝垂布蓮華網

華開踊現諸菩薩

各出微妙悅意聲

稱讚如來坐於座

佛功德量如虛空

一切莊嚴從此生

一一地中嚴飾事

一切衆生不能了

金剛爲地無能壞

廣博清淨極夷坦

摩尼爲網垂布空

菩提樹下皆周徧

其地無邊色相殊

眞金爲末布其中

普散名華及衆寶

悉以光瑩如來座

地神歡喜而踊躍

剎那示現無有盡

普興一切莊嚴雲

恆在佛前瞻仰住

寶燈廣大極熾然

香焰流光無斷絕

隨時示現各差別

地神以此爲供養

十方一切剎土中

彼地所有諸莊嚴

今此道場無不現

以佛威神故能爾

爾時衆寶光明鬢菩薩摩訶薩。承佛威力。普觀一切道場衆海。即說頌言。

世尊往昔修行時

見諸佛土皆圓滿

如有所見地無盡

此道場中皆顯現

世尊廣大神通力

舒光普雨摩尼寶

如是寶藏散道場

其地周迴悉嚴麗

如來福德神通力

摩尼妙寶普莊嚴

其地及以菩提樹

遞發光音而演說

寶燈無量從空雨

寶王間錯爲嚴飾

悉吐微妙演法音

如是地神之所現

寶地普現妙光雲

寶炬焰明如電發

寶網遐張覆其上

寶枝雜布爲嚴好

汝等普觀於此地

種種妙寶所莊嚴

顯示衆生諸業海

令彼了知眞法性

普徧十方一切佛

所有圓滿菩提樹

莫不皆現道場中

演說如來清淨法

隨諸衆生心所樂

其地普出妙音聲

如佛座上所應演

一一法門咸具說

其地恆出妙香光

光中普演清淨音

若有衆生堪受法

悉使得聞煩惱滅

一一莊嚴悉圓滿

假使億劫無能說

如來神力靡不周

是故其地皆嚴淨

爾時大智曰勇猛慧菩薩摩訶薩。承佛威力。普觀一切道場衆海。即說頌言。

世尊凝睇處法堂

炳然照耀宮殿中

隨諸衆生心所樂

其身普現十方土

如來宮殿不思議

摩尼寶藏爲嚴飾

諸莊嚴具咸光耀

佛坐其中特明顯

摩尼爲柱種種色

眞金鈴鐸如雲布

寶階四面列成行

門闢隨方咸洞啓

妙華繪綺莊嚴帳

寶樹枝條共嚴飾

摩尼纓珞四面垂

智海於中湛然坐

摩尼爲網妙香幢

光焰燈明若雲布

覆以種種莊嚴具

超世正知於此坐

十方普現變化雲

其雲演說徧世間

一切衆生悉調伏

如是皆從佛宮現

摩尼爲樹發妙華

十方所有無能匹

三世國土莊嚴事

莫不於中現其影

處處皆有摩尼聚

光焰熾然無量種

門牖隨方相間開

棟宇莊嚴極殊麗

如來宮殿不思議

清淨光明具衆相

一切宮殿於中現

一一皆有如來坐

如來宮殿無有邊

自然覺者處其中

十方一切諸衆會

莫不向佛而來集

爾時不思議功德寶智印菩薩摩訶薩。承佛威力。普觀一切道場衆海。即說頌言。
 佛昔修治衆福海 一切刹土微塵數 神通願力所出生 道場嚴淨無諸垢
 如意珠王作樹根 金剛摩尼以爲身 寶網遐施覆其上 妙香氤氳共旋遶
 樹枝嚴飾備衆寶 摩尼爲幹爭聳擢 枝條密布如重雲 佛於其下坐道場
 道場廣大不思議 其樹周迴盡彌覆 密葉繁華相庇映 華中悉結摩尼果
 一切枝間發妙光 其光徧照道場中 清淨熾然無有盡 以佛願力如斯現
 摩尼寶藏以爲華 布影騰輝若綺雲 匝樹垂芳無不徧 於道場中普嚴飾
 汝觀善逝道場中 蓮華寶網俱清淨 光焰成輪從此現 鈴音鐸響雲間發
 十方一切國土中 所有妙色莊嚴樹 菩提樹中無不現 佛於其下離衆垢
 道場廣大福所成 樹枝兩寶恆無盡 寶中出現諸菩薩 悉往十方供事佛
 諸佛境界不思議 普令其樹出樂音 如昔所集菩提道 衆會聞音咸得見
 爾時百目蓮華髻菩薩摩訶薩。承佛威力。普觀一切道場衆海。即說頌言。
 一切摩尼出妙音 稱揚三世諸佛名 彼佛無量神通事 此道場中皆現覩
 衆華競發如纓布 光雲流演徧十方 菩提樹神持向佛 一心瞻仰爲供養

摩尼光焰悉成幢

幢中熾然發妙香

其香普熏一切衆

是故其處皆嚴潔

蓮華垂布金色光

其光演佛妙聲雲

普蔭十方諸刹土

永息衆生煩惱熱

菩提樹王自在力

常放光明極清淨

十方衆會無有邊

莫不影現道場中

寶枝光焰若明燈

其光演音宣大願

如佛往昔於諸有

本所修行皆具說

樹下諸神刹塵數

悉共依於此道場

各各如來道樹前

念念宣揚解脫門

世尊往昔修諸行

供養一切諸如來

本所修行及名聞

摩尼寶中皆悉現

道場一切出妙音

其音廣大徧十方

若有衆生堪受法

莫不調伏令清淨

如來往昔普修治

一切無量莊嚴事

十方一切菩提樹

一一莊嚴無量種

爾時金焰圓滿光菩薩摩訶薩。承佛威力。普觀一切道場衆海。即說頌言。

佛昔修習菩提行

於諸境界解明了

處與非處淨無疑

此是如來初智力

如昔等觀諸法性

一切業海皆明徹

如是今於光網中

普徧十方能具演

往劫修治大方便

隨衆生根而化誘

普使衆會心清淨

故佛能成根智力

如諸衆生解不同

欲樂諸行各差別

隨其所應爲說法

佛以智力能如是

普盡十方諸刹海

所有一切衆生界

佛智平等如虛空

悉能顯現毛孔中

一切處行佛盡知

一念三世畢無餘

十方剎劫衆生時

悉能開示令現了

禪定解脫力無邊

三昧方便亦復然

佛爲示現令歡喜

普使滌除煩惱闇

佛智無礙包三世

剎那悉現毛孔中

佛法國土及衆生

所現皆由隨念力

佛眼廣大如虛空

普見法界盡無餘

無礙地中無等用

彼眼無量佛能演

一切衆生具諸結

所有隨眠與習氣

如來出現徧世間

悉以方便令除滅

爾時法界普音菩薩摩訶薩。承佛威力。普觀一切道場衆會海已。即說頌言。

佛威神力徧十方

廣大示現無分別

大菩提行波羅蜜

昔所滿足皆令見

昔於衆生起大悲

修行布施波羅蜜

以是其身最殊妙

能令見者生歡喜

昔在無邊大劫海

修治淨戒波羅蜜

故獲淨身徧十方

普滅世間諸重苦

往昔修行忍清淨

信解真實無分別

是故色相皆圓滿

普放光明照十方

往昔勤修多劫海

能轉衆生深重障

故能分身徧十方

悉現菩提樹王下

佛久修行無量劫

禪定大海普清淨

故令見者心歡喜

煩惱障垢悉除滅

如來往修諸行海

具足般若波羅蜜

是故舒光普照明

克殄一切愚癡暗

種種方便化衆生

令所修治悉成就

一切十方皆徧往

無邊際劫不休息

佛昔修行大劫海

淨治諸願波羅蜜

是故出現徧世間

盡未來際救衆生

佛無量劫廣修治

一切法力波羅蜜

由是能成自然力

普現十方諸國土

佛昔修治普門智

一切智性如虛空

是故得成無礙力

舒光普照十方刹

爾時雲音淨月菩薩摩訶薩。承佛威力。普觀一切道場衆會海已。即說頌言。

神通境界等虛空

十方衆生靡不見

如昔修行所成地

摩尼果中咸具說

清淨勤修無量劫

入於初地極歡喜

出生法界廣大智

普見十方無量佛

一切法中離垢地

等衆生數持淨戒

已於多劫廣修行

供養無邊諸佛海

積集福德發光地

奢摩他藏堅固忍

法雲廣大悉已聞

摩尼果中如是說

焰海慧明無等地

善了境界起慈悲

一切國土平等身

如佛所治皆演暢

普藏等門難勝地

動寂相順無違反

佛法境界悉平等

如佛所淨皆能說

廣大修行慧海地

一切法門咸徧了

普現國土如虛空

樹中演暢此法音

周徧法界虛空身

普照衆生智慧燈

一切方便皆清淨

昔所遠行今具演

一切願行所莊嚴

無量刹海皆清淨

所有分別無能動

此無等地咸宣說

無量境界神通力

善入教法光明力

此是清淨善慧地

劫海所行皆備闡

法雲廣大第十地

含藏一切徧虛空

諸佛境界聲中演

此聲是佛威神力

爾時善勇猛光幢菩薩摩訶薩。承佛威神。普觀一切道場衆會海已。即說頌言。

無量衆生處會中

種種信解心清淨

悉能悟入如來智

了達一切莊嚴境

各起淨願修諸行

悉曾供養無量佛

能見如來真實體

及以一切諸神變

或有能見佛法身

無等無礙普周徧

所有無邊諸法性

悉入其身無不盡

或有見佛妙色身

無邊色相光熾然

隨諸衆生解不同

種種變現十方中

或見無礙智慧身

三世平等如虛空

普隨衆生心樂轉

種種差別皆令見

或有能了佛音聲

普徧十方諸國土

隨諸衆生所應解

爲出言音無障礙

或見如來種種光

種種照耀徧世間

或有於佛光明中

復見諸佛現神通

或有見佛海雲光

從毛孔出色熾然

示現往昔修行道

令生深信入佛智

或見佛相福莊嚴

及見此福所從生

往昔修行諸度海

皆佛相中明了見

如來功德不可量

充滿法界無邊際

及以神通諸境界

以佛力故能宣說

爾時華藏莊嚴世界海。以佛神力。其地一切六種十八相震動。所謂動。徧動。普

徧動。起。徧起。普徧起。踊。徧踊。普徧踊。震。徧震。普徧震。吼。徧吼。

普徧吼。擊。徧擊。普徧擊。此諸世主。一一皆現不思議諸供養雲。雨於如來道
 場象海。所謂一切香華莊嚴雲。一切摩尼妙飾雲。一切寶焰華網雲。無邊種類摩
 尼寶圓光雲。一切衆色寶真珠藏雲。一切寶栴檀香雲。一切寶蓋雲。清淨妙聲摩
 尼王雲。日光摩尼纓絡輪雲。一切寶光明藏雲。一切各別莊嚴具雲。如是等諸供
 養雲。其數無量不可思議。此諸世主。一一皆現如是供養雲。雨於如來道場象海。
 靡不周徧。如此世界中。一一世主。心生歡喜。如是供養。其華藏莊嚴世界海中。
 一切世界所有世主。悉亦如是而為供養。其一切世界中。悉有如來坐於道場。一
 一世主。各各信解。各各所緣。各各三昧方便門。各各修習助道法。各各成就。
 各各歡喜。各各趣入。各各悟解諸法門。各各入如來神通境界。各各入如來力境
 界。各各入如來解脫門。如於此華藏世界海。十方盡法界虛空界。一切世界海中。
 悉亦如是。

從爾時華藏莊嚴世界海已下。有二十一行經。（三百六十二言今十八行半）
 明動地興供。於此一段經文。其意有七。一明舉世界之名。二推佛神力地六震動。
 三世主興供歡喜。四明以此例同多土。五明佛徧興於世。六明世主各隨自解。七

明法會興供普同十方。問曰。何爲地動。答曰。其地動大意有五。一此會大衆得道。二智人出現。三智人去世。四世間災變。五得道歡悅。此明大衆獲益歡悅故地動。推佛神力者。明師弟之敬。推德於上。問曰。何故於此段中地動興供。答曰。爲至此中一段。明初會中常隨佛衆。當境之內神天衆。及如來座內古今諸佛同因衆。菩提樹內流光衆。并如來宮殿內大悲衆。如是當佛自衆來集復得益。及賀佛出興心歡喜故。衆心喜動故。地亦隨心動故。此明初會當境之內大集一終。然後面門放光。普集他土亦來此會。此是無自他中他也。以明化儀主伴。此乃龍行雲應。法事合然。爲化衆生。軌模如是。以眞法性。塵刹普周。一刹那之中。三世同際。還以一多相容不同門該括。如是放光集衆。意令知佛境界相參無二。已上是初成正覺。顯示五位行門一終因果。此一部之經。總有六重因果。一從世主妙嚴品。及至華藏世界品。五品經。明初成正覺。顯示五位行門報得。及示現入法一重因果。二毘盧遮那品。是古佛因果。引古證今。明佛佛相襲。道不虛來。三第二會普光明殿。顯示十信因果。四從須彌之頂。直至離世間品。顯菩薩證修因果。五入法界品。明古今本法。不思議因果。此是一切諸佛共所乘宗。爲一切

佛之本體。衆生同具。只爲迷之。六覺城東會。明顯示菩薩利生行門。善知識攝生形狀。法則進修因果。若但說其法。在行猶迷。此經設教及行證修。前後六度。總舉解行證修因果。令使啓蒙易解。不滯其功。

大方廣佛新華嚴經合論卷第十七終

大方廣佛新華嚴經合論卷第十八

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

如來現相品第二

釋此一品。義分爲三。一釋品名目。二釋品來意。三隨文釋義。一釋品名目者。此品何故名現相品。爲諸菩薩神天衆皆悉已集。默思心念請法。問有三十七問。如來知念。即於面門舒光現相。及集十方衆。答前所問。此品之內。如來兩度放光。齒光告衆令集。毫光示法。令信佛境界。及所行因果行門。又諸來菩薩毛孔放光。通爲三度放光故。又集十方衆海。佛境界相。菩薩境界相。答前衆所問。故名現相品。此經表法及集衆如來放光。前後總十度放光故。一面門齒光集他方之衆。二眉間毫光示果成因。三足下輪中放光成十信。四帝釋宮中足指端放光。集衆入道成十住位。五夜摩天宮足趺上放光成十行門。六兜率天宮膝上放光

成十迴向。七他化天宮眉間毫相放光成十地。八如來出現品眉間放光入文殊頂。九口中放光入普賢口。令此二人問答如來出現始終因果道理。十法界品中放眉間光。名普照三世法界門。是爲十。如隨好光明功德品。常放光明。隨根普照。此光非獨緣五位進修表法也。是常依根攝化光也。二釋品來意者。此品爲前世間主等默念三十七問。此品放光集衆。示其法相。答前衆所問三十七法。此品故來。三隨文釋義者。復分爲二。一長科經意。二科其當品。一長科經意者。自此現相品。乃至普賢三昧品。世界成就品。華藏世界品。毘盧遮那品。此五品經。總是答前三十七問。明舉果勸修分。二科其當品者。於此當品。其意有四。

爾時諸菩薩。及一切世間主。作是思惟。云何是諸佛地。云何是諸佛境界。云何是諸佛加持。云何是諸佛所行。云何是諸佛力。云何是諸佛無所畏。云何是諸佛三昧。云何是諸佛無能攝取。云何是諸佛眼。云何是諸佛耳。云何是諸佛鼻。云何是諸佛舌。云何是諸佛身。云何是諸佛意。云何是諸佛身光。云何是諸佛光明。云何是諸佛聲。云何是諸佛智。唯願世尊。哀愍我等。開示演說。又十方世界海一切諸佛。皆為諸菩薩說世界海。衆生海。佛海。佛波羅蜜海。佛解脫海。佛變

化海。佛演說海。佛名號海。佛壽量海。及一切菩薩誓願海。一切菩薩發趣海。一切菩薩助道海。一切菩薩乘海。一切菩薩行海。一切菩薩出離海。一切菩薩神通海。一切菩薩波羅蜜海。一切菩薩地海。一切菩薩智海。願佛世尊。亦為我等。如是而說。爾時諸菩薩威神力故。於一切供養具雲中。自然出音。而說頌言。

無量劫中修行滿

菩提樹下成正覺

為度衆生普現身

如雲充徧盡未來

衆生有疑皆使斷

廣大信解悉令發

無邊際苦普使除

諸佛安樂咸令證

菩薩無數等剎塵

俱來此會同瞻仰

願隨其意所應受

演說妙法除疑惑

云何了知諸佛地

云何觀察如來境

佛所加持無有邊

願示此法令清淨

云何是佛所行處

而以智慧能明入

佛力清淨廣無邊

為諸菩薩應開示

云何廣大諸三昧

云何淨治無畏法

神通力用不可量

願隨衆生心樂說

諸佛法王如世主

所行自在無能制

及餘一切廣大法

為利益故當開演

佛眼云何無有量

耳鼻舌身亦復然

意無有量復云何

願示能知此方便

如諸剎海衆生海

法界所有安立海

及諸佛海亦無邊

願為佛子咸開暢

永出思議衆度海

普入解脫方便海

所有一切法門海

此道場中願宣說

第一·從爾時諸菩薩及一切世間主已下。一段長行并偈頌。是世主請法分。

義分爲三。一從爾時已下。至唯願世尊哀愍我等。於中長行。有八行半經。純請十八種佛法。二又十方世界海已下。有六行半經。問佛海菩薩海有十九問。通爲三十七問。三願佛世尊已下。可兩行經。明菩薩神力故。一切供具放光。光中說頌。請佛斷疑分。第一。從初爾時諸菩薩。及一切世間主。作是思惟。明心念默請。云何是諸佛地。法界不思議地。是佛地故。下文云。法性如虛空。諸佛於中住。此爲如來地也。云何是諸佛境界。如下經云。如來處此菩提座。一毛示現多刹海。一一毛現悉亦然。此是如來之境界。又法界是如來境界。云何是諸佛加持。下如來加普賢菩薩。入於三昧說佛持故。云何是諸佛所行。經云。無礙行是如來行。又普賢行。是一切諸佛共所行行故。云何是諸佛力。經云。如來有處非處十種力是。云何是諸佛無所畏。如來無五怖畏。及四無畏是。云何是諸佛無能攝取。如來無性妙智。是無能攝取。云何是諸佛眼。知一切法智。知一切衆生根智。名一切種智。是佛眼故。又此經下文說十眼等是。又如十身相海云。如來眼有大人相。名自在普見雲。云何是諸佛耳。如法界品云。一切諸佛有無障礙耳。悉能解

了一切音聲。云何是諸佛鼻。如來鼻有大人相。名一切神通智慧。於中出現無量化佛。坐寶蓮華往諸世界。云何是諸佛舌。如下經云。如來舌有大人相。名示現音聲影像雲。云何是諸佛身。下文云。諸佛同法身。無依無差別。又佛身充滿於法界。普現一切衆生前。云何是諸佛意。如來出現品云。云何知如來應正等覺心。佛子。如來心意識無量。俱不可得。但智無量故。知如來心。云何是諸佛身光。如來隨好常光。隨根照物。普周法界。云何是諸佛光明。光有二種。一教光。二如此經光明覺品是。及前後十度表法光明是。云何是諸佛智。一切智一切種種分別智是。又如下文。如來甚深智。普入於法界。能隨三世轉。與世爲明導。此已上問十八種法竟。第二。經云。唯願世尊哀愍我等。有三句經文。結請佛說十九種海。經云。一切諸佛。皆爲諸菩薩說世界海。總舉問竟。衆生海。釋曰。如世間衆生廣多如海故。佛海。經云。如來安處菩提座。一毛示現多刹海。一一毛現悉亦然。如是普周於法界。佛波羅蜜海。十波羅蜜。徧一切菩薩行故。佛解脫海。如來法身。是佛解脫。又智慧解脫。乃至五分法身。戒。定。慧。解脫。解脫知見等。是佛變化海。如下文。無體無住處。亦無生可得。無相亦無形。所現皆如

影。又一切剎土微塵數。常現身雲悉充滿。又云。於一佛身上。化爲無量身。佛演說海。下文。一一毛孔中。光網徧十方。演佛妙音聲。調彼難調者。又一音徧諸根故。然如來音聲。不從心出。不從身出。佛名號海。如下名號品是。如來名號。等一切衆生心也。佛壽量海。如下文。佛身如影現。生滅不可得。是佛壽量海。又下文壽量品是。及一切菩薩誓願海。淨行品等是。又十迴向品中大願是。一切菩薩發趣海。如下文云。此會諸佛子。善修衆智慧。其人已能入。如斯方便門。又下文云。從地而得地。住於力地中。億劫勤修行。所獲法如是。明從地而得地者。不離眞法界自體清淨性地。而行進修十住十行等法。故云從地而得地。又十行品是十發趣。加行成就。令菩提心智悲純熟故。一切菩薩助道海。三十七助道品是。觀身受心法爲首。一切菩薩乘海。乘如來乘。不思議乘。法界乘是。乃至八萬四千乘等。一切菩薩行海。普賢行是。如下經云。如是分身智境界。普賢行中能建立。一切菩薩出離海。如五位中加行方便是。如下經云。此會諸菩薩。入佛難思地。一一皆能見。一切佛神力。又下文云。普賢諸行願。修治已明潔。能於一切剎。普見佛神變。身住一切處。一切皆平等。智能如是行。入佛之境界。

一切菩薩神通海。如下十方佛刹來集菩薩衆。及毛孔出衆。隨行利生等事是。又下十通品亦是。又下文。一一佛刹中。往詣悉無餘。見佛神通力。入佛所行處。一切菩薩波羅蜜海。如下經中。十方來集大衆。身諸毛孔。各出十佛世界微塵數光。一一光。出十佛世界微塵數菩薩。悉能徧入一切法界諸安立海。教化衆生。廣如經具說。是波羅蜜海也。此是與發心者作普賢樣。一切菩薩地海。如下經云。從地而得地是也。又十地品是答。又如來地是菩薩地。如下經云。此會諸菩薩。入佛難思地。一切菩薩智海。根本智是如來智。於根本智。起差別智。教化衆生。是菩薩智海。乃至十無盡智是也。唯願世尊已下三句。總結勸請。准例十方諸佛既說。今佛世尊亦合同說。又爾時已下四句。明供具說頌。已上三十七問。向下至毘盧遮那品已來。有三種答前所問。一如下齒間放光集衆。現相神通答。二如下眉間毫光出衆現相。及十菩薩偈頌答。三普賢入定出定。以言詮示佛業衆生業。因果古今相襲答。如世界成就品。菩薩衆生染淨報業。答前三十七問。佛海。菩薩行海。不離其中。又說華藏莊嚴世界海。說佛報得所居之土。答前三十七問。佛境界海。衆生海。菩薩行海。波羅蜜海。總不離其中。又說古往毘盧遮那品。

是引古印今。令衆生信。承襲不斷。法不虛來。若古無舊跡。今從何得。以是義故。引古佛。用印今時成信。從此初會一會。至毘盧遮那品。六品經。總明舉果勸修。信他已成佛者。果德悲智境界。行普賢行。及報得莊嚴身土分。從佛名號品。重問二十八問。即是舉古佛果門。令今世及未來發心者。自信自心佛果。與古佛果不異。及菩薩十信十住十行十迴向十地十一地。佛眼耳鼻舌身意不異故。信自今修。不異古法。有此二十八種不異之法。具如佛名號品。所問二十八問之法。今古不異。令初發心者。應如是依古證修。使令道不謬故。直至法界品。總是其答所問之法故。若依五位法上。有一百一十重佛果菩薩行。古今不異。若通信位。即一百二十重古今佛因果不異。至位方明。三從供具雲中出音說二十行頌。於中義分爲四。初兩行頌。歎佛行滿成佛。行徧三世。次兩行頌。明勸佛爲衆除疑得證。次兩行頌。明大衆已集。勸請除疑。次云何已下十四行頌。明重頌前三十七問。問曰。大衆何不以言自問。因何默念致疑。何不自以言讚勸請。云何供具雲出音請佛。答曰。明佛得法界心。與一切衆生同心故。以心不異故。知彼此疑。供具說頌者。明一切法總法界體也。法界不思議。一切法不思議故。明聖衆

心境無二故。凡夫迷法界。自見心境有二。故顛倒生也。

爾時世尊。知諸菩薩心之所念。即於面門衆齒之間。放佛刹微塵數光明。所謂衆寶華徧照光明。出種種音莊嚴法界光明。垂布微妙雲光明。十方佛坐道場現神變光明。一切寶焰雲蓋光明。充滿法界無礙光明。徧莊嚴一切佛刹光明。迴建立清淨金剛寶幢光明。普莊嚴菩薩衆會道場光明。妙音稱揚一切佛名號光明。如是等佛刹微塵數。一一復有佛刹微塵數光明。以為眷屬。其光悉具衆妙寶色。普照十方各一億佛刹微塵數世界海。彼世界海諸菩薩衆。於光明中。各得見此華藏莊嚴世界海。以佛神力。其光於彼一切菩薩衆會之前。而說頌言。

無量劫中修行海	供養十方諸佛海	化度一切衆生海	今成妙覺徧照尊
毛孔之中出化雲	光明普照於十方	應受化者咸開覺	令趣菩提淨無礙
佛昔往來諸趣中	教化成熟諸群生	神通自在無邊量	一念皆令得解脫
摩尼妙寶菩提樹	種種莊嚴悉殊特	佛於其下成正覺	放大光明普威耀
大音震吼徧十方	普爲弘宣寂滅法	隨諸衆生心所樂	種種方便令開曉
往修諸度皆圓滿	等於千刹微塵數	一切諸力悉已成	汝等應往同瞻禮

十方佛子等剎塵

悉共歡喜而來集

已雨諸雲爲供養

今在佛前專觀仰

如來一音無有量

能演契經深大海

普雨妙法應群心

彼兩足尊宜往見

三世諸佛所有願

菩提樹下皆宣說

一剎那中悉現前

汝可速詣如來所

毘盧遮那大智海

面門舒光無不見

今待衆集將演音

汝可往觀聞所說

第二·從爾時世尊知諸菩薩心之所念已下。有一段長行并一偈頌。是如來放齒光。十方告衆。令衆咸集現法。答前所問分。於此分中。大意有十。一如來知衆心念有疑。二齒光普照。三其光有十名。四明光具眷屬。五陳光色相。六明光照遠近。七明大衆蒙光彼此相見。八明光徧他方衆會。九明光能出聲告衆。十明十方之衆聞告咸來。問曰。何故如來面門齒間出光告衆。答曰。面門及齒。明言音出於中。故於中出光。今欲答衆所疑。普告十方佛土大衆來集示法。答前三十七問中。云何是諸佛地佛境界佛加持佛行佛力等。故須口中齒間放光。光者除暗義。又答前云何是佛光明。除現在未來衆心疑暗故。口齒者。吐納言音。說法表告之所由也。故於中出光。於此光明。說其二十行頌。於中大意。歎如來道滿利生。光明出音告衆。令集聞法。

爾時十方世界海一切衆會。蒙佛光明所開覺已。各共來詣毘盧遮那如來所。親近供養。所謂此華藏莊嚴世界海東。次有世界海。名清淨光蓮華莊嚴。彼世界種中。有國土。名摩尼纓珞金剛藏。佛號法水覺虛空無邊王。於彼如來大衆海中。有菩薩摩訶薩。名觀察勝法蓮華幢。與世界海微塵數諸菩薩俱。來詣佛所。各現十種菩薩身相雲。徧滿虛空而不散滅。復現十種雨一切寶蓮華光明雲。復現十種須彌寶峰雲。復現十種日輪光雲。復現十種寶華纓珞雲。復現十種一切音樂雲。復現十種栴香樹雲。復現十種塗香燒香衆色相雲。復現十種一切香樹雲。如是等世界海微塵數諸供養雲。悉徧虛空而不散滅。現是雲已。向佛作禮。以為供養。即於東方。各化作種種華光明藏師子之座。於其座上結跏趺坐。此華藏世界海南。次有世界海。名一切寶月光明莊嚴藏。彼世界種中。有國土。名無邊光圓滿莊嚴。佛號普智光明德須彌王。於彼如來大衆海中。有菩薩摩訶薩。名普照法海慧。與世界海微塵數諸菩薩俱。來詣佛所。各現十種一切莊嚴光明藏摩尼王雲。徧滿虛空而不散滅。復現十種雨一切寶莊嚴具普照耀摩尼王雲。復現十種寶焰熾然稱揚佛名號摩尼王雲。復現十種說一切佛法摩尼王雲。復現十種衆妙樹莊嚴道場摩尼

王雲。復現十種寶光普照現衆化佛摩尼王雲。復現十種普現一切道場莊嚴像摩尼王雲。復現十種密焰燈說諸佛境界摩尼王雲。復現十種不思議佛剎宮殿像摩尼王雲。復現十種普現三世佛身像摩尼王雲。如是等世界海微塵數摩尼王雲。悉徧虛空而不散滅。現是雲已。向佛作禮。以為供養。即於南方。各化作帝青寶闍浮檀金蓮華藏師子之座。於其座上結跏趺坐。此華藏世界海西。次有世界海。名可愛樂寶光明。彼世界種中。有國土。名出生上妙資身具。佛號香焰功德寶莊嚴。於彼如來大衆海中。有菩薩摩訶薩。名月光香焰普莊嚴。與世界海微塵數諸菩薩俱。來詣佛所。各現十種一切寶香衆妙華樓閣雲。徧滿虛空而不散滅。復現十種無邊色相衆寶王樓閣雲。復現十種寶燈香焰樓閣雲。復現十種一切真珠樓閣雲。復現十種一切寶華樓閣雲。復現十種寶纓珞莊嚴樓閣雲。復現十種普現十方一切莊嚴光明藏樓閣雲。復現十種衆寶牀間錯莊嚴樓閣雲。復現十種衆寶周徧十方一切莊嚴樓閣雲。復現十種華門鐸網樓閣雲。如是等世界海微塵數樓閣雲。悉徧虛空而不散滅。現是雲已。向佛作禮。以為供養。即於西方。各化作真金葉大寶藏師子之座。於其座上結跏趺坐。此華藏世界海北。次有世界海。名毘琉璃蓮華光圓滿

藏。彼世界種中。有國土。名優鉢羅華莊嚴。佛號普智幢音王。於彼如來大眾海中。有菩薩摩訶薩。名師子奮迅光明。與世界海微塵數諸菩薩俱。來詣佛所。各現十種一切香摩尼衆妙樹雲。徧滿虛空而不散滅。復現十種密葉妙香莊嚴樹雲。復現十種化現一切無邊色相樹莊嚴樹雲。復現十種一切華周布莊嚴樹雲。復現十種一切寶焰圓滿光莊嚴樹雲。復現十種現一切栴檀香菩薩身莊嚴樹雲。復現十種現往昔道場處不思議莊嚴樹雲。復現十種衆寶衣服藏如日光明樹雲。復現十種普發一切悅意音聲樹雲。如是等世界海微塵數樹雲。悉徧虛空而不散滅。現是雲已。向佛作禮。以為供養。即於北方。各化作摩尼燈蓮華藏師子之座。於其座上結跏趺坐。此華藏世界海東北方。次有世界海。名閻浮檀金玻璃色幢。彼世界種中。有國土。名衆寶莊嚴。佛號一切法無畏燈。於彼如來大眾海中。有菩薩摩訶薩。名最勝光明燈無盡功德藏。與世界海微塵數諸菩薩俱。來詣佛所。各現十種無邊色相寶蓮華藏師子座雲。徧滿虛空而不散滅。復現十種摩尼王光明藏師子座雲。復現十種一切莊嚴具種種校飾師子座雲。復現十種衆寶鬘燈焰藏師子座雲。復現十種普兩寶纓珞師子座雲。復現十種一切香華寶纓珞藏師子座雲。復現十種示現

一切佛座莊嚴摩尼王藏師子座雲。復現十種戶牖階砌及諸纓絡一切莊嚴師子座雲。復現十種一切摩尼樹寶枝莖藏師子座雲。復現十種寶香間飾日光明藏師子座雲。如是等世界海微塵數師子座雲。悉徧虛空而不散滅。現是雲已。向佛作禮。以為供養。即於東北方。各化作寶蓮華摩尼光幢師子之座。於其座上結跏趺坐。此華藏世界海東南方。次有世界海。名金莊嚴琉璃光普照。彼世界種中。有國土。名清淨香光明。佛號普喜深信王。於彼如來大眾海中。有菩薩摩訶薩。名慧燈普明。與世界海微塵數諸菩薩俱。來詣佛所。各現十種一切如意王摩尼帳雲。徧滿虛空而不散滅。復現十種帝青寶一切華莊嚴帳雲。復現十種一切香摩尼帳雲。復現十種寶焰燈帳雲。復現十種示現佛神通說法摩尼王帳雲。復現十種現一切衣服莊嚴色像摩尼帳雲。復現十種一切寶華叢光明帳雲。復現十種寶網鈴鐸音帳雲。復現十種摩尼為臺蓮華為網帳雲。復現十種現一切不思議莊嚴具色像帳雲。如是等世界海微塵數眾寶帳雲。悉徧虛空而不散滅。現是雲已。向佛作禮。以為供養。即於東南方。各化作寶蓮華藏師子之座。於其座上結跏趺坐。此華藏世界海西南方。次有世界海。名日光徧照。彼世界種中。有國土。名師子日光明。佛號普智

光明音。於彼如來大眾海中。有菩薩摩訶薩。名普華光焰鬘。與世界海微塵數諸菩薩俱。來詣佛所。各現十種衆妙莊嚴寶蓋雲。徧滿虛空而不散滅。復現十種光明莊嚴華蓋雲。復現十種無邊色真珠藏蓋雲。復現十種出一切菩薩悲愍音摩尼王蓋雲。復現十種衆妙寶焰鬘蓋雲。復現十種妙寶嚴飾垂網鐸蓋雲。復現十種摩尼樹枝莊嚴蓋雲。復現十種日光普照摩尼王蓋雲。復現十種一切塗香燒香蓋雲。復現十種栴檀藏蓋雲。復現十種廣大佛境界普光明莊嚴蓋雲。如是等世界海微塵數衆寶蓋雲。悉徧虛空而不散滅。現是雲已。向佛作禮。以為供養。即於西南方。各化作帝青寶光焰莊嚴師子之座。於其座上結跏趺坐。此華藏世界海西北方。次有世界海。名寶光照耀。彼世界種中。有國土。名衆香莊嚴。佛號無量功德海光明。於彼如來大眾海中。有菩薩摩訶薩。名無盡光摩尼王。與世界海微塵數諸菩薩俱。來詣佛所。各現十種一切寶圓滿光雲。徧滿虛空而不散滅。復現十種一切寶焰圓滿光雲。復現十種一切妙華圓滿光雲。復現十種一切化佛圓滿光雲。復現十種十方佛土圓滿光雲。復現十種佛境界雷聲寶樹圓滿光雲。復現十種一切琉璃寶摩尼王圓滿光雲。復現十種一念中現無邊衆生相圓滿光雲。復現十種演一切

如來大願音圓滿光雲。復現十種演化一切衆生音摩尼王圓滿光雲。如是等世界海微塵數圓滿光雲。悉徧虛空而不散滅。現是雲已。向佛作禮。以為供養。即於西方。各化作無盡光明威德藏師子之座。於其座上結跏趺坐。此華藏世界海下方。次有世界海。名蓮華香妙德藏。彼世界種中。有國土。名寶師子光明照耀。佛號法界光明。於彼如來大衆海中。有菩薩摩訶薩。名法界光焰慧。與世界海微塵數諸菩薩俱。來詣佛所。各現十種一切摩尼藏光明雲。徧滿虛空而不散滅。復現十種一切香光明雲。復現十種一切寶焰光明雲。復現十種出一切佛說法音光明雲。復現十種現一切佛土莊嚴光明雲。復現十種一切妙華樓閣光明雲。復現十種現一切劫中諸佛教化衆生事光明雲。復現十種一切無盡寶華藥光明雲。復現十種一切莊嚴座光明雲。如是等世界海微塵數光明雲。悉徧虛空而不散滅。現是雲已。向佛作禮。以為供養。即於下方。各化作寶焰燈蓮華藏師子之座。於其座上結跏趺座。此華藏世界海上方。次有世界海。名摩尼寶照耀莊嚴。彼世界種中。有國土。名無相妙光明。佛號無礙功德光明王。於彼如來大衆海中。有菩薩摩訶薩。名無礙力精進慧。與世界海微塵數諸菩薩俱。來詣佛所。各現十種無邊色相寶光焰雲。

徧滿虛空而不散滅。復現十種摩尼寶網光焰雲。復現十種一切廣大佛土莊嚴光焰雲。復現十種一切妙香光焰雲。復現十種一切莊嚴光焰雲。復現十種諸佛變化光焰雲。復現十種衆妙樹華光焰雲。復現十種一切金剛光焰雲。復現十種說無邊菩薩行摩尼光焰雲。復現十種一切真珠燈光焰雲。如是等世界海微塵數光焰雲。悉徧虛空而不散滅。現是雲已。向佛作禮。以為供養。即於上方。各化作演佛音聲光明蓮華藏師子之座。於其座上。結跏趺坐。如是等十億佛刹微塵數世界海中。有十億佛刹微塵數菩薩摩訶薩。一一各有世界海微塵數諸菩薩衆。前後圍遶。而來集會。是諸菩薩。一一各現世界海微塵數種種莊嚴諸供養雲。悉徧虛空而不散滅。現是雲已。向佛作禮。以為供養。隨所來方。各化作種種寶莊嚴師子之座。於其座上結跏趺坐。如是坐已。其諸菩薩身毛孔中。一一各現十世界海微塵數一切寶種種色光明。一一光中。悉現十世界海微塵數諸菩薩。皆坐蓮華藏師子之座。此諸菩薩。悉能徧入一切法界諸安立海所有微塵。彼一一塵中。皆有十佛世界微塵數諸廣大刹。一一刹中。皆有二世諸佛世尊。此諸菩薩。悉能徧往親近供養。於念念中以夢自在示現法門。開悟世界海微塵數衆生。念念中以示現一切諸天殑

生法門。開悟世界海微塵數衆生。念念中以說一切菩薩行法門。開悟世界海微塵數衆生。念念中以普震動一切剎歎佛功德神變法門。開悟世界海微塵數衆生。念念中以嚴淨一切佛國土顯示一切大願海法門。開悟世界海微塵數衆生。念念中以普攝一切衆生言辭佛音誓法門。開悟世界海微塵數衆生。念念中以能雨一切佛法雲法門。開悟世界海微塵數衆生。念念中以光明普照十方國土周徧法界示現神變法門。開悟世界海微塵數衆生。念念中以普現佛身。充徧法界一切如來解脫力法門。開悟世界海微塵數衆生。念念中以普賢菩薩建立一切衆會道場海法門。開悟世界海微塵數衆生。如是普徧一切法界。隨衆生心。悉令開悟。念念中一一國土。各令如須彌山微塵數衆生。墮惡道者。永離其苦。各令如須彌山微塵數衆生。住邪定者。入正定聚。各令如須彌山微塵數衆生。隨其所樂生於天上。各令如須彌山微塵數衆生。安住聲聞辟支佛地。各令如須彌山微塵數衆生。事善知識。具衆福行。各令如須彌山微塵數衆生。發於無上菩提之心。各令如須彌山微塵數衆生。趣於菩薩不退轉地。各令如須彌山微塵數衆生。得淨智眼。見於如來所見一切諸平等法。各令如須彌山微塵數衆生。安住諸力諸願海中。以無盡智而為方便。淨

諸佛國。各令如須彌山微塵數衆生。皆得安住毘盧遮那廣大願海。生如來家。爾時諸菩薩光明中。同時發聲。說此頌言。

諸光明中出妙音	普徧十方一切國	演說佛子諸功德	能入菩提之妙道
劫海修行無厭倦	令苦衆生得解脫	心無下劣及勞疲	佛子善入斯方便
盡諸劫海修方便	無量無邊無有餘	一切法門無不入	而恆說彼性寂滅
三世諸佛所有願	一切修治悉令盡	即以利益諸衆生	而爲自行清淨業
一切諸佛衆會中	普徧十方無不往	皆以甚深智慧海	入彼如來寂滅法
一一光明無有邊	悉入難思諸國土	清淨智眼普能見	是諸菩薩所行境
菩薩能住一毛端	徧動十方諸國土	不令衆生有怖想	是其清淨方便地
一一塵中無量身	復現種種莊嚴刹	一念歿生普令見	獲無礙慧莊嚴者
三世所有一切劫	一剎那中悉能現	知身如幻無體相	證明法性無礙者
普賢勝行皆能入	一切衆生悉樂見	佛子能住此法門	諸光明中大音吼

第三·從爾時十方世界海已下。一段長行並一偈頌。是十方世界海。蒙光所照。皆來雲集示法分。於此段中。大意有十。一明佛光普照。二明十方衆來。三

明來已興供。四明興供不同。五明衆海影像相參。六明大衆自他同異自在。七明大衆毛孔出光。八明光出菩薩。九明菩薩同事利生。十明衆生發心得果。此之十事。如文可知。如毛孔流光衆。明法界體性。自在不思議。自他無礙。能同能異衆。於中菩薩同行利生。即明古今已成正覺者菩薩。及行十波羅蜜海佛地佛海等。舉其已成佛者悲智境界。答前大衆三十七疑。用成來世與今。同悟身心境界。自在無礙。如帝網境界門。如此一段。以佛神力放光集衆。答前所問。後之一段。毫光示法。及菩薩偈頌。答前所問。於此十方來衆。光明中同時發聲。說二十行頌。於此中大意。歎佛光明道行已滿。身口意耳鼻總徧周利海。滿普賢行。答前三十七問。如文可知。

大方廣佛新華嚴經合論卷第十八終

大方廣佛新華嚴經合論卷第十九

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

如來現相品第二之餘

爾時世尊。欲令一切菩薩大眾。得於如來無邊境界神通力故。放眉間光。此光名一切菩薩智光明普照耀十方藏。其狀猶如寶色燈雲。徧照十方一切佛刹。其中國土。及以衆生。悉令顯現。又普震動諸世界網。一一塵中。現無數佛。隨諸衆生性欲不同。普雨三世一切諸佛妙法輪雲。顯示如來波羅蜜海。又雨無量諸出離雲。令諸衆生永度生死。復雨諸佛大願之雲。顯示十方諸世界中普賢菩薩道場衆會。作是事已。右遶於佛。從足下入。爾時佛前。有大蓮華。忽然出現。其華具有十種莊嚴。一切蓮華所不能及。所謂衆寶間錯以為其莖。摩尼寶王以為其藏。法界衆寶普作其葉。諸香摩尼而作其鬚。闍浮檀金莊嚴其臺。妙網覆上。光色清淨。

於一念中。示現無邊諸佛神變。普能發起一切音聲。摩尼寶王。影現佛身。於音聲中。普能演說一切菩薩所修行願。此華生已。一念之間。於如來白毫相中。有菩薩摩訶薩。名一切法勝音。與世界海微塵數諸菩薩衆。俱時而出。右邊如來經無量匝。禮佛足已。時勝音菩薩坐蓮華臺。諸菩薩衆坐蓮華鬚。各於其上次第而坐。其一切法勝音菩薩。了深法界。生大歡喜。入佛所行。智無疑滯。入不可測佛法身海。往一切剎諸如來所。身諸毛孔。悉現神通。念念普觀一切法界。十方諸佛。共與其力。令普安住一切三昧。盡未來劫。常見諸佛無邊法界功德海身。乃至一切三昧解脫神通變化。即於衆中。承佛威神。觀察十方。而說頌曰。

佛身充滿於法界

普現一切衆生前

隨緣赴感靡不周

而恆處此菩提座

如來一一毛孔中

一切剎塵諸佛坐

菩薩衆會共圍遶

演說普賢之勝行

如來安處菩提座

一毛示現多剎海

一一毛現悉亦然

如是普周於法界

一一剎中悉安坐

一切剎土皆周徧

十方菩薩如雲集

莫不成來詣道場

一切剎土微塵數

功德光明菩薩海

普在如來衆會中

乃至法界咸充徧

法界微塵諸剎土

一切衆中皆出現

如是分身智境界

普賢行中能建立

一切諸佛衆會中 勝智菩薩僉然坐 各各聽法生歡喜 處處修行無量劫
 已入普賢廣大願 各各出生衆佛法 毘盧遮那法海中 修行克證如來地
 普賢菩薩所開覺 一切如來同讚喜 已獲諸佛大神通 法界周流無不徧
 一切剎土微塵數 常現身雲悉充滿 普爲衆生放大光 各雨法雨稱其心
 爾時衆中。復有菩薩摩訶薩。名觀察一切勝法蓮華光慧王。承佛威神。觀察十方。
 而說頌曰。

如來甚深智	普入於法界	能隨三世轉	與世爲明導
諸佛同法身	無依無差別	隨諸衆生意	令見佛色形
具足一切智	徧知一切法	一切國土中	一切無不現
佛身及光明	色相不思議	衆生信樂者	隨應悉令見
於一佛身上	化爲無量佛	雷音徧衆刹	演法深如海
一一毛孔中	光網徧十方	演佛妙音聲	調彼難調者
如來光明中	常出深妙音	讚佛功德海	及菩薩所行
佛轉正法輪	無量無有邊	所說法無等	淺智不能測

一切世界中 現身成正覺 各各起神變 法界悉充滿

如來一一身 現佛等衆生 一切微塵刹 普現神通力

爾時衆中。復有菩薩摩訶薩。名法喜慧光明。承佛威神。觀察十方。而說頌曰。

佛身常顯現 法界悉充滿 恆演廣大音 普震十方國

如來普現身 徧入於世間 隨衆生樂欲 顯示神通力

佛隨衆生心 普現於其前 衆生所見者 皆是佛神力

光明無有邊 說法亦無量 佛子隨其智 能入能觀察

佛身無有生 而能示出生 法性如虛空 諸佛於中住

無住亦無去 處處皆見佛 光明靡不周 名稱悉遠聞

無體無住處 亦無生可得 無相亦無形 所現皆如影

佛隨衆生心 爲興大法雲 種種方便門 示悟而調伏

一切世界中 見佛坐道場 大衆所圍遶 照曜十方國

一切諸佛身 皆有無盡相 示現雖無量 色相終不盡

爾時衆中。復有菩薩摩訶薩。名香焰光普明慧。承佛威神。觀察十方。而說頌曰。

此會諸菩薩 入佛難思地 一一皆能見 一切佛神力
 智身能徧入 一切刹微塵 見身在彼中 普見於諸佛
 如影現衆刹 一切如來所 於彼一切中 悉現神通事
 普賢諸行願 修治已明潔 能於一切刹 普見佛神變
 身住一切處 一切皆平等 智能如是行 入佛之境界
 已證如來智 等照於法界 普入佛毛孔 一切諸刹海
 一切佛國土 皆現神通力 示現種種身 及種種名號
 能於一念頃 普現諸神變 道場成正覺 及轉妙法輪
 一切廣大刹 億劫不思議 菩薩三昧中 一念皆能現
 一切諸佛土 一一諸菩薩 普入於佛身 無邊亦無盡

爾時衆中。復有菩薩摩訶薩。名師子奮迅慧光明。承佛威神。徧觀十方。而說頌。

曰。

毘盧遮那佛 能轉正法輪 法界諸國土 如雲悉周徧
 十方中所有 諸大世界海 佛神通願力 處處轉法輪

一切諸刹土 廣大衆會中 名號各不同 隨應演妙法

如來大威力 普賢願所成 一切國土中 妙音無不至

佛身等剎塵 普雨於法雨 無生無差別 現一切世間

無數諸億劫 一切塵刹中 往昔所行事 妙音咸具演

十方塵國土 光網悉周徧 光中悉有佛 普化諸群生

佛身無差別 充滿於法界 能令見色身 隨機善調伏

三世一切刹 所有衆導師 種種名號殊 爲說皆令見

過未及現在 一切諸如來 所轉妙法輪 此會皆得聞

爾時衆中。復有菩薩摩訶薩。名法海慧功德藏。承佛威神。觀察十方。而說頌曰。

此會諸佛子 善修衆智慧 斯人已能入 如是方便門

一一國土中 普演廣大音 說佛所行處 周聞十方刹

一一心念中 普觀一切法 安住真如地 了達諸法海

一一佛身中 億劫不思議 修習波羅蜜 及嚴淨國土

一一微塵中 能證一切法 如是無所礙 周行十方國

爾時衆中。復有菩薩摩訶薩。名慧燈普明。承佛威神。觀察十方。而說頌曰。

一一佛剎中	往詣悉無餘	見佛神通力	入佛所行處
諸佛廣大音	法界靡不聞	菩薩能了知	善入音聲海
劫海演妙音	其音等無別	智周三世者	入彼音聲地
衆生所有音	及佛自在聲	獲得音聲智	一切皆能了
從地而得地	住於力地中	億劫勤修行	所獲法如是
一切諸如來	遠離於衆相	若能知是法	乃見世導師
菩薩三昧中	慧光普明了	能知一切佛	自在之體性
見佛真實體	則悟甚深法	普觀於法界	隨願而受身
從於福海生	安住於智地	觀察一切法	修行最勝道
一切佛剎中	一切如來所	如是徧法界	悉見真實體
十方廣大剎	億劫勤修行	能遊正徧知	一切諸法海
唯一堅密身	一切塵中見	無生亦無相	普現於諸國
隨諸衆生心	普現於其前	種種示調伏	速令向佛道

以佛威神故 出現諸菩薩 佛力所加持 普見諸如來

一切衆導師 無量威神力 開悟諸菩薩 法界悉周徧

爾時衆中。復有菩薩摩訶薩。名華焰髻普明智。承佛威神。觀察十方。而說頌曰。

一切國土中 普演微妙音 稱揚佛功德 法界悉充滿

佛以法爲身 清淨如虛空 所現衆色形 令入此法中

若有深信喜 及爲佛攝受 當知如是人 能生了佛智

諸有少智者 不能知此法 慧眼清淨人 於此乃能見

以佛威神力 觀察一切法 入住及出時 所見皆明了

一切諸法中 法門無有邊 成就一切智 入於深法海

安住佛國土 出興一切處 無去亦無來 諸佛法如是

一切衆生海 佛身如影現 隨其解差別 如是見導師

一切毛孔中 各各現神通 修行普賢願 清淨者能見

佛以一一身 處處轉法輪 法界悉周徧 思議莫能及

爾時衆中。復有菩薩摩訶薩。名威德慧無盡光。承佛威神。觀察十方。而說頌曰。

一一佛刹中	處處坐道場	衆會共圍遶	魔軍悉摧伏
佛身放光明	徧滿於十方	隨應而示現	色相非一種
一一微塵內	光明悉充滿	普見十方土	種種各差別
十方諸刹海	種種無量刹	悉平坦清淨	帝青寶所成
或覆或傍住	或似蓮華合	或圓或四方	種種衆形相
法界諸刹土	周行無所礙	一切衆會中	常轉妙法輪
佛身不思議	國土悉在中	於其一切處	導世演眞法
所轉妙法輪	法性無差別	依於一實理	演說諸法相
佛以圓滿音	闡明眞實理	隨其解差別	現無盡法門
一切刹土中	見佛坐道場	佛身如影現	生滅不可得

爾時衆中。復有菩薩摩訶薩。名法界普明慧。承佛威神。觀察十方。而說頌曰。

如來微妙身	色相不思議	見者生歡喜	恭敬信樂法
佛身一切相	悉現無量佛	普入十方界	一一微塵中
十方國土海	無量無邊佛	咸於念念中	各各現神通

大智諸菩薩 深入於法海 佛力所加持 能知此方便

若有已安住 普賢諸行願 見彼衆國土 一切佛神力

若人有信解 及以諸大願 具足深智慧 通達一切法

能於諸佛身 一一而觀察 色聲無所礙 了達於諸境

能於諸佛身 安住智所行 速入如來地 普攝於法界

佛刹微塵數 如是諸國土 能令一念中 一一塵中現

一切諸國土 及以神通事 悉現一刹中 菩薩力如是

爾時衆中。復有菩薩摩訶薩。名精進力無礙慧。承佛威神。觀察十方。而說頌曰。

佛演一妙音 周聞十方刹 衆音悉具足 法雨皆充徧

一切言詞海 一切隨類音 一切佛刹中 轉於淨法輪

一切諸國土 悉見佛神變 聽佛說法音 聞已趣菩提

法界諸國土 一一微塵中 如來解脫力 於彼普現身

法身同虛空 無礙無差別 色形如影像 種種衆相現

影像無方所 如空無體性 智慧廣大人 了達其平等

佛身不可取 無生無起作 應物普現前 平等如虛空

十方所有佛 盡入一毛孔 各各現神通 智眼能觀見

毘盧遮那佛 願力周法界 一切國土中 恆轉無上輪

一毛現神變 一切佛同說 經於無量劫 不得其邊際

如此四天下道場中。以佛神力。十方各有一億世界海微塵數諸菩薩衆。而來集會。應知一切世界海。一一四天下諸道場中。悉亦如是。

第四·從爾時世尊欲令一切菩薩大衆得如來無邊境界已下。一段長行。有二十八行半經。(四百八十四言)於中分爲兩段。一從初十行經。明光之德。二二十八行半經。明蓮華出現。第一。從初明光之德。大意有十。一令衆除疑獲益。二顯光出處。三顯光之名。四顯光之色。五明光所照遠近。六明光所照威動世界。七光照塵中現無數佛。隨根與益。八光雨十種法輪雲。九光明遶佛。十光入佛足輪。以成大衆信心。明足下是初信入。故說十種智佛。以爲自己信心。以不動智爲首。

第二·爾時佛前已下。十八行半經。明蓮華出現。於此一段文中。大意有十。

一明華現所由。二明華具十種嚴飾。三明毫光出衆來坐。四明勝音菩薩爲主。餘者爲伴。五明上首菩薩勝音之德。六明諸佛與勝音之力。七明勝音常見諸佛。八明勝音神變自在。九明勝音觀衆說頌。十明正申頌意。此之一段經文。如來眉間毫出光明。名一切菩薩光明普照耀十方藏者。明是十地菩薩智滿中道教行之光。又毫相中出衆菩薩。有世界海微塵數。上首名曰一切法勝音。即是其十地滿足中道果行。將此中道覺行悲智圓滿法界行門。毫塵剎海無障礙法。答前大衆三十七問。使令現在及以未來。信此十地法界因果法門行滿十方。使令得益。是故經云。欲令一切菩薩大衆。得於如來無邊境界神通力故。放眉間光。又光體是法界之理。勝音大衆之海。是其法界之行用故。明從十住初心。以理智萬行。體用不相離也。故從十信即與果行。令修理智體用。法合然故。從果行信進。又勝音菩薩坐蓮華臺。諸菩薩衆坐蓮華鬚。明主伴萬行。明勝音一行徧一切行。一切萬行是勝音一行。明法界理智中。圓滿無礙自在行故。還如前菩薩毛孔流光出菩薩行相似。體性一多重重自在。無體可礙。諸波羅蜜。一中具十。乃至無盡故。緣起互爲因果。主伴自在故。以理智照之可見。大意明法界行門。一行徧一切行故。同別自在。

十正申頌意中。通勝音菩薩。有十菩薩。各申一段偈頌。初二十行頌。歎佛身充徧普現衆生前。及毛孔刹土衆會無盡相入。兩行一頌。如文具明。無煩更釋。大體得。大綱紀即得。經文自具。此十段頌。後九段總十行一段。總是答前世主所問。又明此會菩薩。能入如來之境。最下有三行經。（五十一言）明都結十方世界同然一時雲集。已上現神通及語。答前大衆所疑竟。示業及法答者。如已下世界成就品。蓮華藏世界品。毘盧遮那品。神通法業俱示。若通當類。總自具法業答故。普賢三昧品。世界成就品。華藏世界品。毘盧遮那品。此初會六品經。是以佛果勸修門。

普賢三昧品第三

將釋此品。略作三門分別。一釋品之名。二釋品來意。三隨文釋義。一釋品名者。理智無邊。名之爲普。智隨根益。稱之曰賢。三之云正。昧之云定。亦云正受。爲正定不亂。能受諸法。憶持簡擇。故名正受。亦云等持。爲正定能發生正慧。等持諸法。是故名之等持也。爲普賢爲佛紹法界大智之家。諸佛萬行徧周

之長子。以答前所問三十七問中。云何一切菩薩行海出離海神通海波羅蜜海世界海等。故須入定。善簡衆法。答前所問。令衆迷解故。故須入定。然普賢菩薩。恆無定亂。以示法則。故須如是。又以初舉果勸修中。以入定爲法則。後十定品中。明十地道滿。起諸想念方眞。二釋品來意者。明普賢菩薩。常在三昧。靜亂總眞。然教化衆生。故成法則。答所問疑故。爲善簡擇諸三昧出入同異相故。爲善擇衆生業海果報。佛行業海果報。故須入定。從定起已。說世界成就品。華藏世界品。毘盧遮那品。答前所問故。此品須來。意明初入法。須加定業。以顯眞門。後十定品中。明十地眞智已終。智隨一切衆生想念。應根接物方是。修道者應如是知。三隨文釋義者。於此一品經文中。義分爲二。一科其經意。二釋三昧名。一科其經意者。

爾時普賢菩薩摩訶薩。於如來前。坐蓮華藏師子之座。承佛神力。入于三昧。此三昧名一切諸佛毘盧遮那如來藏身。普入一切佛平等性。能於法界。示衆影像。廣大無礙。同於虛空。法界海漩。靡不隨入。出生一切諸三昧法。普能包納十方法界。三世諸佛智光明海。皆從此生。十方所有諸安立海。悉能示現。含藏一切

佛力解脫諸菩薩智。能令一切國土微塵。普能容受無邊法界。成就一切佛功德海。顯示如來諸大願海。一切諸佛所有法輪。流通護持。使無斷絕。如此世界中。普賢菩薩於世尊前入此三昧。如是盡法界虛空界。十方三世微細無礙廣大光明。佛眼所見佛力能到佛身所現一切國土。及此國土所有微塵。一一塵中有世界海微塵數佛刹。一一刹中。有世界海微塵數諸佛。一一佛前。有世界海微塵數普賢菩薩。皆亦入此一切諸佛毘盧遮那如來藏身三昧。爾時一一普賢菩薩。皆有十方一切諸佛而現其前。彼諸如來。同聲讚言。善哉善哉。善男子。汝能入此一切諸佛毘盧遮那如來藏身菩薩三昧。佛子。此是十方一切諸佛共加於汝。以毘盧遮那如來本願力故。亦以汝修一切諸佛行願力故。所謂能轉一切佛法輪故。開顯一切如來智慧海故。普照十方諸安立海悉無餘故。令一切衆生淨治雜染得清淨故。普攝一切諸大國土無所著故。深入一切諸佛境界無障礙故。普示一切佛功德故。能入一切諸法實相增智慧故。觀察一切諸法門故。了知一切衆生根故。能持一切諸佛如來教文海故。爾時十方一切諸佛。即與普賢菩薩摩訶薩能入一切智性力智。與入法界無邊量智。與成就一切佛境界智。與知一切世界海成壞智。與知一切衆生界廣

大智。與住諸佛甚深解脫無差別諸三昧智。與入一切菩薩諸根海智。與知一切衆生語言海轉法輪辯智。與普入法界一切世界海身智。與得一切佛音聲智。如此世界中如來前普賢菩薩。蒙諸佛與如是智。如是一切世界海。及彼世界海一一塵中。所有普賢。悉亦如是。何以故。證彼三昧。法如是故。是時十方諸佛。各舒右手。摩普賢菩薩頂。其手皆以相好莊嚴。妙網光舒。香流焰發。復出諸佛種種妙音。及以自在神通之事。過現未來一切菩薩普賢願海。一切如來清淨法輪。及三世佛所有影像。皆於中現。如此世界中普賢菩薩。為十方佛所共摩頂。如是一切世界海。及彼世界海一一塵中。所有普賢。悉亦如是。為十方佛之所摩頂。爾時普賢菩薩。即從是三昧而起。從此三昧起時。即從一切世界海微塵數三昧海門起。所謂從知三世念念無差別善巧智三昧門起。從知三世一切法界所有微塵三昧門起。從現三世一切佛刹三昧門起。從現一切衆生舍宅三昧門起。從知一切衆生心海三昧門起。從知一切衆生各別名字三昧門起。從知十方法界處所各差別三昧門起。從知一切微塵中各有無邊廣大佛身雲三昧門起。從演說一切法理趣海三昧門起。普賢菩薩從如是等三昧門起時。其諸菩薩。一一各得世界海微塵數三昧海

雲。世界海微塵數陀羅尼海雲。世界海微塵數諸法方便海雲。世界海微塵數辯才門海雲。世界海微塵數修行海雲。世界海微塵數普照法界一切如來功德藏智光明海雲。世界海微塵數一切如來諸力智慧無差別方便海雲。世界海微塵數一切如來一一毛孔中各現衆刹海雲。世界海微塵數一一菩薩示現從兜率天宮沒下生成佛轉正法輪般涅槃等海雲。如此世界中。普賢菩薩從三昧起。諸菩薩衆獲如是益。如是一切世界海。及彼世界海所有微塵。一一塵中。悉亦如是。爾時十方一切世界海。以諸佛威神力。及普賢菩薩三昧力故。悉皆微動。一一世界衆寶莊嚴。及出妙音演說諸法。復於一切如來衆會道場海中。普雨十種大摩尼王雲。何等為十。所謂妙金星幢摩尼王雲。光明照耀摩尼王雲。寶輪垂下摩尼王雲。衆寶藏現菩薩像摩尼王雲。稱揚佛名摩尼王雲。光明熾盛普照一切佛刹道場摩尼王雲。光照十方種種變化摩尼王雲。稱讚一切菩薩功德摩尼王雲。如日光熾盛摩尼王雲。悅意樂音周聞十方摩尼王雲。普雨如是十種大摩尼王雲已。一切如來諸毛孔中。咸放光明。於光明中。而說頌言。

普賢徧住於諸刹

坐寶蓮華衆所觀

一切神通靡不現

無量三昧皆能入

普賢恆以種種身

法界周流悉充滿

三昧神通方便力

圓音廣說皆無礙

一切剎中諸佛所

種種三昧現神通

一一神通悉周徧

十方國土無遺者

如一切剎如來所

彼剎塵中悉亦然

所現三昧神通事

毘盧遮那之願力

普賢身相如虛空

依真而住非國土

隨諸衆生心所欲

示現普身等一切

普賢安住諸大願

獲此無量神通力

一切佛身所有剎

悉現其形而詣彼

一切衆海無有邊

分身住彼亦無量

所現國土皆嚴淨

一剎那中見多劫

普賢安住一切剎

所現神通勝無比

震動十方靡不周

令其觀者悉得見

一切佛智功德力

種種大法皆成滿

以諸三昧方便門

示已往昔菩提行

如是自在不思議

十方國土皆示現

爲顯普入諸三昧

佛光雲中讚功德

爾時。一切菩薩衆。皆向普賢合掌瞻仰。承佛神力。同聲讚言

從諸佛法而出生

亦因如來願力起

眞如平等虛空藏

汝已嚴淨此法身

一切佛刹衆會中

普賢徧住於其所

功德智海光明者

等照十方無不見

普賢廣大功德海

徧往十方親近佛

一切塵中所有剎

悉能詣彼而明現

佛子我曹常見汝

諸如來所悉親近

住於三昧實境中

一切國土微塵劫

佛子能以普徧身

悉詣十方諸國土

衆生大海咸濟度

法界微塵無不入

入於法界一切塵

其身無盡無差別

譬如虛空悉周徧

演說如來廣大法

一切功德光明者

如雲廣大殊勝

衆生海中皆往詣

說佛所行無等法

爲度衆生於劫海

普賢勝行皆修習

演一切法如大雲

其音廣大靡不聞

國土云何得成立

諸佛云何而出現

及以一切衆生海

願隨其義如實說

此中無量大衆海

悉在尊前恭敬住

爲轉清淨妙法輪

一切諸佛皆隨喜

此一段經有八十三行一千三百五十六言其意有十一。一從爾時普賢菩薩已下。一行半經。明承佛

威神入定。二此三昧已下。八行半經。明舉三昧名。及歎三昧之德。三如此世界

已下。可七行經。明都舉普賢入定。此界如是。十方總然。四爾時一一普賢菩薩

已下。有十一行半經。明普賢入定。諸佛現前。佛力所加。佛言讚歎普賢之德。

五爾時十方一切諸佛已下。有七行經。明諸佛與普賢十種智。六如此世界中已下。

可三行經。明都舉十方世界中普賢。一切諸佛一時同與其智。法如是故。七是時

已下。可六行經。明諸佛以手加持。摩普賢頂。八如是一切世界海已下。可兩行

經。都舉十方世界同然。九爾時普賢菩薩已下。九行半經。明普賢從三昧起。并

陳三昧之名。十普賢菩薩從如是三昧門起時已下。十二行半經。明大眾獲益。并都結與十方同然。十一爾時十方一切世界海已下。至偈頌已來。有十二行半經。明佛力三昧力。其地微動及興供。未後諸佛毛孔光明。說頌歎普賢之德。問曰。何故前世主妙嚴品末。其地六種十八相大動。此品何故其地微動。答曰。前明如來始成正覺。大眾賀佛。及自皆得佛果之益。其益廣大。明位極行終。以此其地大動。此品答世主所問之疑。爲成初信故。其地微動。於中菩薩。示有疑問。寄同得益。皆是成其凡夫始信之心。是故名爲舉果勸修生信分。仍是信他佛及菩薩得然。未是信自心得也。第二會中金色世界不動智佛已去。方明信自心得亦然也。至第十二卷中。諸世間主更作二十八問。方明信自心是佛不動智等。至文方明。此經直至法界品覺城東已來。菩薩及一切大眾。皆是寄法同迷。示行修證。唯覺城人間五百童子童女。優婆塞優婆夷各具五百。一萬諸龍。寄位是凡。表其凡夫有得入者故。若無實得者。佛教豈是虛行者哉。聖者立樣。令凡實得。終不虛施。應如是知。應如是信。不自欺誑。若有人言。此經非是凡夫境界。是菩薩所行。是人當知。滅佛知見。破滅正法。令其正教世不流通。令其世間正見不生。斷滅

佛種。諸有智者。不應如是不勸修行。設行不得。不失善種。猶成來世積習勝緣故。於此佛毛孔光明說頌中已下。有兩段頌。於初二十行頌。明佛毛孔光明。讚普賢德。如文具明。毛孔光是萬行光。還歎普賢萬行。二爾時一切諸菩薩已下。有二十行頌。明大眾歎普賢。并請說後三品之法。亦如文具明。第二釋三昧之名者。於此三昧名中。義分爲三。一釋三昧名。二釋三昧體用。三歎三昧之德。一釋三昧之名者。名毘盧遮那如來藏身。毘盧云光。遮那云種種徧照。如來是法性之體。藏身是含容衆法之智。明以理智種種教行之光。照燭衆生之器。隨根與益。如經歎德中具明。二釋三昧之體用者。此三昧體者。以法界根本智爲體。以差別智爲大用。又以法界根本智爲體。隨衆生智爲用。又以入三昧爲體。出定爲用。又以無入無出爲體。又入出俱爲用。又以入出俱爲體。以義准之可見。大要言之。且以爲化衆生法則之中。以入定明體。後從定起。顯示十種定名是用。於十箇定名中。總以法界無依住智性爲體。此體亦名首楞嚴定。與不可說一切諸三昧諸智慧門爲體。如歎德中具明。如經云世界海漩無不隨入者。是三昧之用。徧徧一切衆法之名故。海者廣大義。漩者甚深義。明此三昧。體用廣大。甚深無盡。諸佛

菩薩及一切十方六道衆生中行皆徧故。此一三昧。答前三十七問總盡。向前以佛神力。答前三十七問中。云何是佛地佛海佛眼佛耳鼻等。今普賢三昧。答前三十七問中。云何菩薩行海三昧海等問。爲欲明佛行菩薩行體用徹故。以佛爲體。普賢行海爲用。以此體用。該通諸法。無法不盡故。佛眼耳鼻舌身意爲體。能徧知衆生事業爲用。已下如來與普賢智。明普賢智契合佛根本智。二智不殊。令後信者。信自智佛根本智。一體無二無疑故。十方諸佛手摩其頂者。明接引忍可。言普賢從三昧起者。明定體隨根用處。彼復依根獲益。名起。其用無盡。略舉其十。以表無盡故。餘義經文自具廣明。意明佛根本智是定體。普賢是用。

大方廣佛新華嚴經合論卷第十九終

大方廣佛新華嚴經合論卷第二十

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

世界成就品第四

今釋此品。略作三門分別。一釋品名目。二釋品來意。三隨文釋義。一釋品名目者。爲明世界海。依住形相。苦樂淨穢。皆是衆生自業果報之所莊嚴。不從他有。佛菩薩世界海。依大願力。依自體清淨法性力。依諸波羅蜜諸行海等自體清淨力。依爲度衆生大慈悲智力。以不思議變化力之所成就。故名世界成就品。二釋品來意者。此品所來。大意有五。一答前世主三十七問佛海衆生海波羅蜜海等。此品示業果報。示法果報。答前所問故。明向前是佛光明神力答。此品示其佛行海。眼耳鼻舌波羅蜜海。徧法界海。衆生業行海故。三十七問。一時總答。令大衆海。悟佛所行。入普賢菩薩所行也。故號佛華嚴經。二令諸現在未來始發

菩提心者。識佛所行。及菩薩行海。佛菩薩大慈悲海。能普遍法界海。衆生行業海。而利益之。令到究竟岸故。既見是已。而倣效之。學佛行故。令始發心者。悲智圓滿。行解不錯謬故。三令始發心菩薩。知衆生業報。同異差別。由心造故。四令始發心者。知衆生界廣大。等法界虛空界。如影相入。重重無盡。依住各別。佛菩薩行。悉充滿故。五令始發心菩薩。知諸佛菩薩境界海。衆生境界。一異不可得故。隨衆生自業轉變。刹海轉變故。隨自業成壞。刹海成壞故。以衆因緣故。此品須來。發初蒙故。若無此品。初心菩薩。云何知其如來攝生。如來行門。及以衆行業世界廣狹之相。若不知者。依何發心。乘佛大悲普濟。願行廣度。以是義故。如下頌云。離諸諂誑心清淨。常樂慈悲性歡喜。志欲廣大深信人。彼聞此法生欣悅。安住普賢諸願地。修行菩薩清淨道。觀察法界虛空界。此乃能知佛行處。若不說衆生界法界佛界菩薩境界虛空界。無二無盡。如影重重依住者。所有發心者。設不入二乘道。修菩薩行。但得權教菩薩。心常染淨。而有限礙。不入佛境界故。有自佛他佛。及以國刹分劑。有往來所依處故。如三乘中所說淨土在於他方。菩薩願生其中是也。說此品者。意欲令初發菩提心者。知衆生境界諸佛

境界廣大之相。重重無礙。無盡之相。佛及菩薩願行。含覆利益。纖塵無遺故。此品須來。三隨文釋義者。此之一品。有十一段經文。從初一段長行。一段偈頌。是此品中敘分。後十段長行。及十段偈頌。是正說。乃至華藏世界海。總通此品。爲世界成就品。總爲正說分。

爾時普賢菩薩摩訶薩。以佛神力。徧觀察一切世界海。一切衆生海。一切諸佛海。一切法界海。一切衆生業海。一切衆生根欲海。一切諸佛法輪海。一切三世海。一切如來願力海。一切如來神變海。如是觀察已。普告一切道場衆海諸菩薩言。佛子。諸佛世尊。知一切世界海成壞清淨智不可思議。知一切衆生業海智不可思議。知一切法界安立海智不可思議。說一切無邊佛海智不可思議。入一切欲解根海智不可思議。一念普知一切三世智不可思議。顯示一切如來無量願海智不可思議。示現一切佛神變海智不可思議。轉法輪智不可思議。建立演說海不可思議。清淨佛身不可思議。無邊色相海普照明不可思議。相及隨好皆清淨不可思議。無邊色相光明輪海具足清淨不可思議。種種色相光明雲海不可思議。殊勝寶焰海不可思議。成就言音海不可思議。示現三種自在海調伏成熟一切衆生不可思議。勇

猛調伏諸衆生海無空過者不可思議。安住佛地不可思議。入如來境界不可思議。威力護持不可思議。觀察一切佛智所行不可思議。諸力圓滿無能摧伏不可思議。無畏功德無能過者不可思議。住無差別三昧不可思議。神通變化不可思議。清淨自在智不可思議。一切佛法無能毀壞不可思議。如是等一切法。我當承佛神力。及一切如來威神力故。具足宣說。為令衆生入佛智慧海故。為令一切菩薩。於佛功德海中得安住故。為令一切世界海。一切佛自在所莊嚴故。為令一切劫海中。如來種性恆不斷故。為令於一切世界海中。顯示諸法真實性故。為令隨一切衆生無量解海而演說故。為令隨一切衆生諸根海。方便令生諸佛法故。為令隨一切衆生樂欲海。摧破一切障礙山故。為令隨一切衆生心行海。令淨修治出要道故。為令一切菩薩。安住普賢願海中故。是時普賢菩薩。復欲令無量道場衆海生歡喜故。令於一切法增長愛樂故。令生廣大真實信解海故。令淨治普門法界藏身故。令安立普賢願海故。令淨治入三世平等智眼故。令增長普照一切世間藏大慧海故。令生陀羅尼力持一切法輪故。令於一切道場中盡佛境界悉開示故。令開闡一切如來法門故。令增長法界廣大甚深一切智性故。即說頌言。

智慧甚深功德海

普現十方無量國

隨諸衆生所應見

光明徧照轉法輪

十方利海叵思議

佛無量劫皆嚴淨

爲化衆生使成熟

出興一切諸國土

佛境甚深難可思

普示衆生令得入

其心樂小著諸有

不能通達佛所悟

若有淨信堅固心

常得親近善知識

一切諸佛與其力

此乃能入如來智

離諸諂誑心清淨

常樂慈悲性歡喜

志欲廣大深信人

彼聞此法生欣悅

安住普賢諸願地

修行菩薩清淨道

觀察法界如虛空

此乃能知佛行處

此諸菩薩獲善利

見佛一切神通力

修餘道者莫能知

普賢行人方得悟

衆生廣大無有邊

如來一切皆護念

轉正法輪靡不至

毘盧遮那境界力

一切刹土入我身

所住諸佛亦復然

汝應觀我諸毛孔

我今示汝佛境界

普賢行願無邊際

我已修行得具足

普眼境界廣大身

是佛所行應諦聽

從初敘分中。長科爲六段。一爾時已下。四行半經。是普賢觀察十海分。二如是觀察已下。可八行經。明普賢告衆。歎諸佛十種之智海。十不可思議。三建立演說海已下。可六行經。明普賢歎佛十種身業教化不可思議。四從勇猛調伏諸衆生海無空過者已下。七行經。是普賢歎佛身智二業。隨轉法輪成就之衆。入佛

之地十不可思議。五如是等一切法已下。十八行半經。明普賢乘佛神力。說佛智業身業。教化饒益成就衆生海之德。令多菩薩一切衆生。入佛境界海故。六明普賢說頌。重明前法。於此二十行頌中。兩行爲一頌。於中意有二十。總答前三十七問。爲頌含多義故。一明佛智慧甚深。二明佛身業。隨根普應。三明佛語業普周。四明佛行。多利徧嚴。五明諸佛大悲。成熟衆生。六明佛普現出興與益。七明衆生根劣隨迷。八明大心淨信堅固者堪爲。九明諸佛與力方知。十明離諂慈悲志欲深廣能入。十一明觀察法界如虛空而獲善利。十二簡修餘道者不堪。普賢行人得入。十三明衆生界廣大。法輪普至。十四明普賢自示身廣大。十五勸衆令觀毛孔。十六明普賢示法與衆之益。十七明普賢行願無邊。十八明普賢自歎行具。十九歎法眼智眼法身智身廣大。二十歎是佛所行應諦聽。此已上。經文自具可知。略科眉目如是。第二正說分中。有十段經。

爾時普賢菩薩摩訶薩。告諸大衆言。諸佛子。世界海有十種事。過去現在未來諸佛。已說現說當說。何者爲十。所謂世界海起具因緣。世界海所依住。世界海形狀。世界海體性。世界海莊嚴。世界海清淨。世界海佛出興。世界海劫住。世界

海劫轉變差別。世界海無差別門。諸佛子。略說世界海有此十事。若廣說者。與世界海微塵數等。過去現在未來諸佛。已說現說當說。諸佛子。略說以十種因緣故。一切世界海。已成現成當成。何者為十。所謂如來神力故。法應如是故。一切衆生行業故。一切菩薩成一切智所得故。一切衆生及諸菩薩同集善根故。一切菩薩嚴淨國土願力故。一切菩薩成就不退行願故。一切菩薩清淨勝解自在故。一切如來善根所流。及一切諸佛成道時自在勢力故。普賢菩薩自在願力故。諸佛子。是為略說十種因緣。若廣說者。有世界海微塵數。爾時普賢菩薩。欲重宣其義。承佛威力。觀察十方而說頌言。

所說無邊衆刹海	毘盧遮那悉嚴淨	世尊境界不思議	智慧神通力如是
菩薩修行諸願海	普隨衆生心所欲	衆生心行廣無邊	菩薩國土徧十方
菩薩趣於一切智	勤修種種自在力	無量願海普出生	廣大刹土皆成就
修諸行海無有邊	入佛境界亦無量	爲淨十方諸國土	一一土經無量劫
衆生煩惱所擾濁	分別欲樂非一相	隨心造業不思議	一切刹海斯成立
佛子刹海莊嚴藏	離垢光明寶所成	斯由廣大信解心	十方所住咸如是

菩薩能修普賢行

遊行法界微塵道

塵中悉現無量刹

清淨廣大如虛空

等虛空界現神通

悉詣道場諸佛所

蓮華座上示衆相

一身包一切刹

一念普現於三世

一切刹海皆成立

佛以方便悉入中

此是毘盧所嚴淨

第一段中。長行有十八行半經。於中大意有六。一明普賢告衆。欲說其法。

二正說世界海有十事之法。一切三世諸佛同敷。三正舉世界形狀體性有十。廣大無盡。四正說世界已成現成當成。具十種因緣。五正說由如來神方法如是等。如下十事因緣是也。六承佛神力說頌。於此十八行頌中。重頌前長行之法。明衆生界廣多。佛菩薩悲願含覆故。以行廣大故。莊嚴國土廣大。以衆生業無量故。菩薩行無量。以菩薩信心廣大離垢。所住國刹。光明寶成。清淨無垢。此明淨穢同居。業現各異。如文可知。是故經云。菩薩修行諸願海。普隨衆生心所欲。衆生心行廣無邊。菩薩國土徧十方。

爾時普賢菩薩。復告大衆言。諸佛子。一一世界海。有世界海微塵數所依住。所謂或依一切莊嚴住。或依虛空住。或依一切寶光明住。或依一切佛光明住。或依一切寶色光明住。或依一切佛音聲住。或依如幻業生大力阿修羅形金剛手住。或

依一切世主身住。或依一切菩薩身住。或依普賢菩薩願所生一切差別莊嚴海住。諸佛子。世界海有如是等世界海微塵數所依住。爾時普賢菩薩。欲重宣其義。承佛威力。觀察十方而說頌言。

徧滿十方虛空界	所有一切諸國土	如來神力之所加	處處現前皆可見
或有種種諸國土	無非離垢寶所成	清淨摩尼最殊妙	熾然普現光明海
或有清淨光明刹	依止虛空界而住	或在摩尼寶海中	復有安住光明藏
如來處此衆會海	演說法輪皆巧妙	諸佛境界廣無邊	衆生見者心歡喜
有以摩尼作嚴飾	狀如華燈廣分布	香焰光雲色熾然	覆以妙寶光明網
或有刹土無邊際	安住蓮華深大海	廣博清淨與世殊	諸佛妙善莊嚴故
或有刹海隨輪轉	以佛威神得安住	諸菩薩衆徧在中	常見無央廣大寶
或有住於金剛手	或復有住天主身	毘盧遮那無上尊	常於此處轉法輪
或依寶樹平均住	香焰雲中亦復然	或有依諸大水中	有住堅固金剛海
或有依止金剛幢	或有住於華海中	廣大神變無不周	毘盧遮那此能現
或脩或短無量種	其相旋環亦非一	妙莊嚴藏與世殊	清淨修治乃能見

如是種種各差別

一切皆依願海住

或有國土常在空

諸佛如雲悉充滿

或有有空懸覆住

或時而有或無有

或有國土極清淨

住於菩薩寶冠中

十方諸佛大神通

一切皆於此中見

諸佛音聲咸徧滿

斯由業力之所化

或有國土周法界

清淨離垢從心起

如影如幻廣無邊

如因陀網各差別

或現種種莊嚴藏

依止虛空而建立

諸業境界不思議

佛力顯示皆令見

一一國土微塵內

念念示現諸佛刹

數皆無量等衆生

普賢所作恆如是

爲欲成熟衆生故

是中修行經劫海

廣大神變靡不興

法界之中悉周徧

法界國土一一塵

諸大刹海住其中

佛雲平等悉彌覆

於一切處咸充滿

如一塵中自在用

一切塵內亦復然

諸佛菩薩大神通

毘盧遮那悉能現

一切廣大諸刹土

如影如幻亦如焰

十方不見所從生

亦復無來無去處

滅壞生成互循環

於虛空中無暫已

莫不皆由清淨願

廣大業力之所持

第二段中。爾時已下九行半經。并四十四行頌。明世界依住。如文具明。

爾時普賢菩薩。復告大衆言。諸佛子。世界海有種種差別形相。所謂或圓或方。

或非圓方。無量差別。或如水漩形。或如山焰形。或如樹形。或如華形。或如宮

殿形。或如衆生形。或如佛形。如是等有世界海微塵數。爾時普賢菩薩。欲重宣其義。承佛威力。觀察十方而說頌言。

諸國土海種種別 種種莊嚴種種住 殊形共美徧十方 汝等咸應共觀察

其狀或圓或有方 或復三維及八隅 摩尼輪狀蓮華等 一切皆由業令異

或有清淨焰莊嚴 眞金間錯多殊好 門闥競開無擁滯 斯由業廣意無雜

刹海無邊差別藏 譬如雲布在虛空 寶輪布地妙莊嚴 諸佛光明照耀中

一切國土心分別 種種光明而照現 佛於如是刹海中 各各示現神通力

或有雜染或清淨 受苦受樂各差別 斯由業海不思議 諸流轉法恆如是

一毛孔內難思刹 等微塵數種種住 一一皆有徧照尊 在衆會中宣妙法

於一塵中大小刹 種種差別如塵數 平坦高下各不同 佛悉往詣轉法輪

一切塵中所現刹 皆是本願神通力 隨其心樂種種殊 於虛空中悉能作

一切國土所有塵 一一塵中佛皆入 普爲衆生起神變 毘盧遮那法如是

第三段中。爾時已下有六行經。并二十行頌。明世界差別形由業。如文具明。

爾時普賢菩薩。復告大衆言。諸佛子。應知世界海有種種體。所謂或以一切寶莊

嚴為體。或以一寶種種莊嚴為體。或以一切寶光明為體。或以種種色光明為體。或以一切莊嚴光明為體。或以不可壞金剛為體。或以佛力持為體。或以妙寶相為體。或以佛變化為體。或以曰摩尼輪為體。或以極微細寶為體。或以一切寶焰為體。或以種種香為體。或以一切寶華冠為體。或以一切寶影像為體。或以一切莊嚴所示現為體。或以一念心普示現境界為體。或以菩薩形寶為體。或以寶華葉為體。或以佛言音為體。爾時普賢菩薩。欲重宣其義。承佛威力。觀察十方而說頌言。

或有諸剎海	妙寶所合成	堅固不可壞	安住寶蓮華
或是淨光明	出生不可知	一切光莊嚴	依止虛空住
或淨光為體	復依光明住	光雲作嚴飾	菩薩共遊處
或有諸剎海	從於願力生	猶如影像住	取說不可得
或以摩尼成	普放日藏光	珠輪以嚴地	菩薩悉充滿
有利寶焰成	焰雲覆其上	衆寶光殊妙	皆由業所得
或從妙相生	衆相莊嚴地	如冠共持戴	斯由佛化起

或從心海生 隨心所解住 如幻無處所 一切是分別

或以佛光明 摩尼光爲體 諸佛於中現 各起神通力

或普賢菩薩 化現諸刹海 願力所莊嚴 一切皆殊妙

第四段·爾時已下有十三行經。十行頌。明世界體差別。

爾時普賢菩薩。復告大衆言。諸佛子。應知世界海有種種莊嚴。所謂或以一切莊嚴具中出上妙雲莊嚴。或以說一切菩薩功德莊嚴。或以說一切衆生業報莊嚴。或以示現一切菩薩願海莊嚴。或以表示一切三世佛影像莊嚴。或以一念頃示現無邊劫神通境界莊嚴。或以出現一切佛身莊嚴。或以出現一切寶香雲莊嚴。或以示現一切道場中諸珍妙物光明照耀莊嚴。或以示現一切普賢行願莊嚴。如是等有世界海微塵數。爾時普賢菩薩。欲重宣其義。承佛威力。觀察十方而說頌言。

廣大刹海無有邊 皆由清淨業所成 種種莊嚴種種住 一切十方皆徧滿

無邊色相寶焰雲 廣大莊嚴非一種 十方刹海常出現 普演妙音而說法

菩薩無邊功德海 種種大願所莊嚴 此土俱時出妙音 普震十方諸刹網

衆生業海廣無量 隨其感報各不同 於一切處莊嚴中 皆由諸佛能演說

三世所有諸如來 神通普現諸刹海

一一事中一切佛

如是嚴淨汝應觀

過去未來現在劫

十方一切諸國土

於彼所有大莊嚴

一一皆於刹中見

一切事中無量佛

數等衆生徧世間

爲令調伏起神通

以此莊嚴國土海

一切莊嚴吐妙雲

種種華雲香焰雲

摩尼寶雲常出現

刹海以此爲嚴飾

十方所有成道處

種種莊嚴皆具足

流光布迴若彩雲

於此刹海咸令見

普賢願行諸佛子

等衆生劫勤修習

無邊國土悉莊嚴

一切處中皆顯現

第五段·爾時已下有十一行經。二十行頌。明世界莊嚴差別。

爾時普賢菩薩。復告大衆言。諸佛子。應知世界海有世界海微塵數清淨方便海。所謂諸菩薩親近一切善知識同善根故。增長廣大功德雲徧法界故。淨修廣大諸勝解故。觀察一切菩薩境界而安住故。修治一切諸波羅蜜悉圓滿故。觀察一切菩薩諸地而入住故。出生一切淨願海故。修習一切出要行故。入於一切莊嚴海故。成就清淨方便力故。如是等有世界海微塵數。爾時普賢菩薩。欲重宣其義。承佛威力。觀察十方而說頌言。

一切刹海諸莊嚴

無數方便願力生

一切刹海常光曜

無量清淨業力起

久遠親近善知識

同修善業皆清淨

慈悲廣大徧衆生

以此莊嚴諸刹海

一切法門三昧等

禪定解脫方便地

於諸佛所悉淨治

以此出生諸刹海

發生無量決定解

能解如來等無異

忍海方便已修治

故能嚴淨無邊刹

爲利衆生修勝行

福德廣大常增長

譬如雲布等虛空

一切刹海皆成就

諸度無量等刹塵

悉已修行令具足

願波羅蜜無有盡

清淨刹海從此生

淨修無等一切法

生起無邊出要行

種種方便化群生

如是莊嚴國土海

修習莊嚴方便地

入佛功德法門海

普使衆生竭苦源

廣大淨刹皆成就

力海廣大無與等

普使衆生種善根

供養一切諸如來

國土無邊悉清淨

第六段·爾時已下有十行經。并有二十行頌。明所修行方便願力故。出生諸

世界海莊嚴。故業清淨故。莊嚴清淨。業垢濁故。莊嚴垢濁。

爾時普賢菩薩。復告大衆言。諸佛子。應知一一世界海。有世界海微塵數佛出現

差別。所謂或現小身。或現大身。或現短壽。或現長壽。或唯嚴淨一佛國土。或

有嚴淨無量佛土。或唯顯示一乘法輪。或有顯示不可思議諸乘法輪。或現調伏少

分衆生。或示調伏無邊衆生。如是等有世界海微塵數。爾時普賢菩薩。欲重宣其

義。承佛威力。觀察十方而說頌言。

諸佛種種方便門 出興一切諸刹海

皆隨衆生心所樂

此是如來善權力

諸佛法身不思議 無色無形無影像

能爲衆生現衆相

隨其心樂悉令見

或爲衆生現短壽 或現住壽無量劫

法身十方普現前

隨宜出現於世間

或有嚴淨不思議 十方所有諸刹海

或唯嚴淨一國土

於一示現悉無餘

或隨衆生心所樂 示現難思種種乘

或有唯宣一乘法

一中方便現無量

或有自然成正覺 令少衆生住於道

或有能於一念中

開悟群迷無有數

或於毛孔出化雲 示現無量無邊佛

一切世間皆現觀

種種方便度群生

或有言音普周徧 隨其心樂而說法

不可思議大劫中

調伏無量衆生海

或有無量莊嚴國 衆會清淨儼然坐

佛如雲布在其中

十方刹海靡不充

諸佛方便不思議 隨衆生心悉現前

普住種種莊嚴刹

一切國土皆周徧

第七段·爾時已下有八行經。并二十行頌。明諸世界。諸佛出現差別。依衆

生業行。壽命脩短。佛出現不同。

爾時普賢菩薩。復告大衆言。諸佛子。應知世界海有世界海微塵數劫住。所謂或

有阿僧祇劫住。或有無量劫住。或有無邊劫住。或有無等劫住。或有不可數劫住。或有不可稱劫住。或有不可思劫住。或有不可量劫住。或有不可說劫住。或有不可說不可說劫住。如是等有世界海微塵數。爾時普賢菩薩。欲重宣其義。承佛威力。觀察十方而說頌言。

世界海中種種劫	廣大方便所莊嚴	十方國土咸觀見	數量差別悉明了
我見十方世界海	劫數無量等衆生	或長或短或無邊	以佛音聲今演說
或有純淨或純染	或住國土微塵劫	或有一劫或無數	以願種種各不同
往昔修行剎塵劫	或復染淨二俱雜	願海安立種種殊	住於衆生心想中
有名種種寶光明	獲大清淨世界海	諸佛境界具莊嚴	永住無邊廣大劫
有清淨劫一佛興	或名等音焰眼藏	離塵光明及賢劫	此清淨劫攝一切
或無量劫入一劫	或一劫中無量現	無盡方便大願力	入於一切種種劫
或一切劫莊嚴事	或復一劫入多劫	一切劫海種種門	十方國土皆明現
始從一念終成劫	於一劫中皆現觀	或一劫內所莊嚴	普入一切無邊劫
	悉依衆生心想生	一切剎海劫無邊	以一方方便皆清淨

第八段·爾時已下有七行經。并二十行頌。明世界劫住不同由業。

爾時普賢菩薩。復告大眾言。諸佛子。應知世界海有世界海微塵數劫轉變差別。所謂法如是故。世界海無量成壞劫轉變。染污衆生住故。世界海成染淨劫轉變。信解菩薩住故。世界海成染淨劫轉變。修廣大福衆生住故。世界海成染淨劫轉變。諸菩薩各各遊諸世界故。世界海無量衆生發菩提心故。世界海純清淨劫轉變。諸菩薩各各遊諸世界故。世界海無邊莊嚴劫轉變。十方一切世界海諸菩薩雲集故。世界海無量大莊嚴劫轉變。諸佛世尊入涅槃故。世界海莊嚴滅劫轉變。諸佛出現於世故。一切世界海廣博嚴淨劫轉變。如來神通變化故。世界海普清淨劫轉變。如是等有世界海微塵數。爾時普賢菩薩。欲重宣其義。承佛威力。觀察十方而說頌言。

一切諸國土	皆隨業力生	汝等應觀察	轉變相如是
染污諸衆生	業惑纏可怖	彼心令剎海	一切成染污
若有清淨心	修諸福德行	彼心令剎海	雜染及清淨
信解諸菩薩	於彼劫中生	隨其心所有	雜染清淨者
無量諸衆生	悉發菩提心	彼心令剎海	住劫恆清淨

無量億菩薩 往詣於十方 莊嚴所有殊 劫中差別見

一一微塵內 佛刹如塵數 菩薩共雲集 國土皆清淨

世尊入涅槃 彼土莊嚴滅 衆生無法器 世界成雜染

若有佛興世 一切悉珍好 隨其心清淨 莊嚴皆具足

諸佛神通力 示現不思議 是時諸刹海 一切普清淨

第九段·爾時已下有十四行經。并十行頌。明劫隨業轉變淨穢。

爾時普賢菩薩。復告大衆言。諸佛子。應知世界海有世界海微塵數無差別。所謂
一一世界海中。有世界海微塵數世界無差別。一一世界海中。諸佛出現所有威力
無差別。一一世界海中。一切道場徧十方法界無差別。一一世界海中。一切如來
道場衆會無差別。一一世界海中。一切佛光明徧法界無差別。一一世界海中。一
切佛變化名號無差別。一一世界海中。一切佛音聲普徧世界海無邊劫住無差別。
一一世界海中。法輪方便無差別。一一世界海中。一切世界海普入一塵無差別。
一一世界海中。一一微塵一切三世諸佛世尊廣大境界皆於中現無差別。諸佛子。
世界海無差別。略說如是。若廣說者。有世界海微塵數無差別。爾時普賢菩薩。

欲重宣其義。承佛神力。觀察十方而說頌言。

一微塵中多刹海 處所各別悉嚴淨 如是無量入一中 一一區分無雜越

一一塵內難思佛 隨衆生心普現前 一切刹海靡不周 如是方便無差別

一一塵中諸樹王 種種莊嚴悉垂布 十方國土皆同現 如是一切無差別

一一塵內微塵衆 悉共圍遶人中主 出過一切徧世間 亦不迫隘相雜亂

一一塵中無量光 普徧十方諸國土 悉現諸佛菩提行 一切刹海無差別

一一塵中無量身 變化如雲普周徧 以佛神通導群品 十方國土亦無別

一一塵中說衆法 其法清淨如輪轉 種種方便自在門 一切皆演無差別

一塵普演諸佛音 充滿法器諸衆生 徧住刹海無央劫 如是音聲亦無異

刹海無量妙莊嚴 於一塵中無不入 如是諸佛神通力 一切皆由業性起

一一塵中三世佛 隨其所樂悉令見 體性無來亦無去 以願力故徧世間

第十·爾時已下有十五行半經。二十行頌。明一切世界海。如來出現無差別。

一一如文具明。此之一品。答前三十七問。意令現在未來發菩提心者。識佛所行。

衆生業海無際。如來以普賢行普濟。以法性理智無礙。從初發心。興大願雲。悲

智普覆。以波羅蜜海。無刹不現其身。無行不同其事。塵毫內刹。影現重重。平等智身。莫不隨入。以法界之體。而無往來。法常如是。令學者做之。趣求不謬。此乃如大王路。法爾常然。更有異求。偏僻不當也。

大方廣佛新華嚴經合論卷第二十終

大方廣佛新華嚴經合論卷第二十一

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

華藏世界品第五之一

將釋此品。略作十門分別。一釋品來意。二釋品名目。三釋華藏世界海因何報得。四釋華藏世界形狀安立。五配華藏世界安立屬因。六釋華藏世界海純雜無礙。七釋華藏世界海圓攝三世業境。八釋華藏世界本空出生所緣。九明華藏世界因何得隱現自在。十隨文釋義。一釋品來意者。此品答前三十七問中佛世界海衆生海波羅蜜海等。此品舉如來五位中行業因果報得。答前三十七問故。此品須來。二釋品名目者。爲說此佛境界報得之土。蓮華所持。含藏一切淨穢境界。皆在其中。故名華藏。三釋華藏世界因何報得者。以從初信心至於八地已來。恆以大志願力持。令其不退菩提。諸波羅蜜海。教化饒益一切衆生。至於八地。任利無功。當

知風輪。是大願波羅蜜所成報故。衆生世間。妄想業風所持。如來世間。以大願力智風。能持諸境。爲以智能隨願。願能成智。還以大願法身大智之所報。成風輪之體。若不以法身。一切諸行總有爲故。若無志願。法身無性。不能自成。何況成他。以此三事爲緣。方堪利生。不滯空有。進修功熟。任利無功。且取初因大願爲首。令持萬境。總以大願智風。以爲持境。是故此品下文。普散摩尼妙寶華。以昔願力空中住。如是華藏世界所有莊嚴。總是風輪上持諸境。由諸福行本從願生。還將本因以持諸果。以此用願波羅蜜。能成一切諸波羅蜜海。以本因如此。故因果相持。今以第八及初發心時。願波羅蜜中十波羅蜜。以成十種風輪。用持其上十種一切莊嚴。以願波羅蜜互體相參。能持其上諸行報得一切莊嚴。如最下風輪名平等。是願波羅蜜中檀波羅蜜報得故。能持其上一切寶焰熾然莊嚴。還是願波羅蜜中檀度門法財惠施之所報生。還自相持。因果相徹。法不虛得。因不唐捐。以此准此。用願波羅蜜中十度法門配之。十種風輪報得。因果相持故。還如衆生世間。妄想業風最居其下。上持水際金剛地山。令其安住。李像玄光。以成天文。運遊不墮。蓮華藏體。是法身隨行無依住智體之所報得。及宮殿。總

大悲含育之所報得。樓閣。即是智照觀根順悲濟物之所報得。其地金剛。平等自性法身之所報得。但是諸莊嚴中。所有金剛爲莊嚴者。皆法身隨行之報。但是摩尼莊嚴。皆法身成戒體隨行報得。金剛輪圍山。即是大悲戒防護之業之所報得。衆華莊嚴者。萬行利生開敷衆善之所報得故。寶樹莊嚴者。建行利生覆蔭含識之所報得。如十行位中。功德林等十箇菩薩。下名悉同名之曰林。爲行覆蔭故。師子座莊嚴者。即是以法身隨智建法輪報得故。略而言之。且復如是。廣說報業所因。不可具悉。夫報不虛得。皆有所因。若不知因。云何修果。是故此品之初云。此華藏莊嚴世界海。是毘盧遮那如來。往昔於世界海微塵數佛。一一佛所。淨修世界海微塵數大願之所嚴淨。但云願者。爲行由願成。又下云。普賢智地行悉成。一切莊嚴從此出。如香水海。大慈悲業之所報得。香水河。是進修之行之所報得。如下文殊師利常隨衆中。總以名表法。即見名知行。如此華藏世界海。見果知因。不可別引餘經。將來證此。此經見名即知法。見果即知因。方可識此經之意趣。餘經法相門戶。多不與此經相應。餘經云苦諦。此經云苦聖諦。即義有餘。餘經說四諦。此經說十種聖諦。及十二因緣。若廣說無量差別。不可卒申。以是義

故。此配因果。不可引於餘教。配此經文。此經見名知行。以果識因。如文殊師利常隨之衆云。明練十方儀式主方神。除滅無明黑闇主夜神。一心匪懈闡明佛日主晝神。即其例矣。此華藏世界報得之體。大要總言大願。法身大智。萬行。大慈。大悲。以此五事。成滿盡法界虛空界。乃至塵毫之內。重重刹海中。一切衆生行。皆悉等利。至八地任用無功。自常充徧。以此爲體。非是滯寂自安。及人天自求樂果者之所境界故。亦非樂生淨土菩薩者境界故。此淨土。菩薩設修六波羅蜜。得六神通。亦未能生信故。爲本不以法界根本智差別智乘。發生信進修行故。四釋華藏世界海形狀者。以無盡大願風輪。持大悲水。生無邊行華。以法性虛空。能容萬境。重疊無礙。於其水上。生一大蓮華。周空法界。名種種藥香幢。明根本智。起差別智。行差別行。名藥香幢。於蓮華內。日珠王寶上。有大輪圍山。經云日珠王蓮華之上者。只是華內有寶。名日珠王。非別有華也。具寶所成林樹香水。妙華開敷。經自有文。具陳其事。其華內地。金剛所成。地具衆寶。間錯嚴飾。經自具言。於其地上。無數香水海。衆寶爲底。如經具說。一一香水海外。各有四天下微塵數香水河右旋圍遶。從南向東以次遶之。如六甲等爲右。

其河巖飾。經自具言。於不可說香水海中。一一海內。各有一大世界種而住其中。其世界種者。同流所居。名之曰種。種者類也。如先德釋云。三千大千世界數至恆沙。爲一世界海。海世界數至恆沙。爲一世界性。性數至恆沙。爲一世界種。此中世界種。有不可說佛刹微塵數。一一香水海中。各有其一世界種。如經且略舉世界種。於最中心香水海名。名無邊妙華光。明中道智慧之妙用。爲作名也。即是風輪向上。種種藥香幢大蓮華之內。處中香水海也。此中海內出大蓮華。名一切香摩尼王莊嚴。有世界種於中而住。名普照十方熾然寶光明。此世界種。上下有二十重世界。各各相去佛刹微塵數。此娑婆世界。在第十三重中。最下重中。有佛刹微塵數世界周匝圍遶。次上重。有二佛刹塵。次上重中。三佛刹塵數世界周匝圍遶。一重增一。至最上二十重。有二十佛刹微塵數世界圍遶。如是周旋。通中心有十一箇世界種。各有二十重。上下相去遠近相似。此十一箇世界種外。周圍至輪圍山。復有一百箇世界種。隨方各十。於中布列。直往隨方。行列而住。近輪圍山周匝十箇世界種。各各上下四重。重數雖少。上下相去極遠。每第三重。與此娑婆世界齊等。最上重。或言相去七佛刹塵。向下第二重。與下相去多言十

佛刹微塵數。計四重世界。還與中心十一箇二十重世界種。高下齊等。此近輪圍山十箇世界種。即有四重。餘九十箇世界種。不言重數。且略舉世界種中心有十一箇世界種。周圍有一百箇世界種。共有一百一十一箇世界種。如天帝網。分布而住。大都總數有不可說佛刹微塵數諸世界種。總於種種藥香幢大蓮華之上。諸香水海。各出蓮華。諸世界種。各各而住。即於其大華之上。別華而居。即是第二重各別蓮華之上。布列而住。最下有須彌山微塵數風輪。而持其上種種莊嚴。及持其上重重世界。猶如日月衆星。以風所持處空而住。餘廣者經自有文。若廣引文繁。恐見不當。略陳綱紀。麤而言之。五配華藏世界海安立屬因者。夫果不自生。從因而得。經云。廣大願雲周法界。於一切劫化群生。普賢智地行悉成。所有莊嚴從此出。如經總舉不可說佛刹微塵數世界種者。明普賢行。攝化之境。徧法界故。即是座內衆眉間衆。所行覺行報得之境。總是都舉果行圓周之境。於彼但言佛世界微塵衆。對不可說佛刹微塵數。於彼是略舉數。此是廣數。如說普賢之行。且但言萬行。此是略言。意在無盡等法界行也。即此二重舉果中普賢滿行。即如座內衆眉間衆。即此華藏莊嚴世界海不可說佛刹微塵世界種。如天帝網。

分布在種種藥香幢大蓮華之中。是其彼果行所攝生報滿果所得之境。今在經中不舉大數。但舉中心十一箇世界種。上下二十重。重別相去一佛剎塵。最下重世界。各有一佛剎塵世界周匝圍遶而住其中。次上第二重中。即云二佛剎世界周匝圍遶。次上第三重中。即言三佛剎塵數世界周匝圍遶。以次向上。一重加一。直至最上重世界中。有二十佛剎塵世界周匝圍遶。此中心十一箇世界種。總皆如是。此明十一地行門進修攝化境界報得。中心十一箇。即十一地報得。上下二十重漸增廣者。明十一地行門中。一地有兩重因果。爲地地進修中。皆一正果一向果。其二十重中所有佛號。皆是勝進中因果佛也。所有世界。是隨位中所化之境界也。即明十一地進修攝化層降佛果故。各隨位配之可見。除此十一箇世界外。周圍別舉出一百箇世界種者。即明此十一地攝化十波羅蜜行。徧輪圍山法界內故。且隨方次第。各有其十。都言一百。明徧不可說佛剎塵境界滿故。近金剛輪圍山。周圍有十箇世界種。上下有四重者。明十一地中四攝法徧故。餘九十箇世界種。不云重數者。明但是十波羅蜜。十中具百。所攝化境故。此是一個因果竟。自餘十箇四重世界。配四攝法。更作一配。總舉中心十一箇世界種。并周圍直至金剛輪

圍山一百箇世界種。總共有一百一十一箇世界種。配十住十行十迴向十地十一地五位法。各有佛因果。都有一百。本五位中。本自有十重因果。爲本五位中。各有兩重因果。即是十。此爲本五位佛因果。與五位中作進修故。即如此初會五位佛果是。都有一百一十。更有一箇世界種。爲明佛位。是一徧一切中作一故。若無此一位。諸位不成故。又明緣生之法。皆須有一故。緣生之法始成。如一三五七九。與十作緣。但置二四六八十。具滿數故。是圓數不可加減。是佛法世間法皆相似故。如一日三日五日七日九日。皆一三五七九爲法者。成緣生無盡。一多相徹故。明其一者。非同時無前後中間故。爲一不自一。與萬法作一故。爲萬法不自多。爲一作多故。爲成緣起。法合如是。一多自在。無作任相成故。如俗法。一爲陽二爲陰。陽動陰隨。不可自用。陰若自用。即天地兩乖。雲不興。雨不施。皆主伴陰陽。動靜相順。互爲主伴。方成緣生。兩剛即缺。兩柔即離。爲不成濟故。是如來出世。意在利生。真不隨俗。故行無所設也。德無所濟也。即佛自佛。衆生自衆生。若爲利生。施設法則。即佛爲陽德。所設教爲陰。是故此經名爲圓教。佛處坎之一。而設教即十。以坎爲師卦故。是故普賢菩薩。爲明設教利生。

因果緣起。法須自在。不滯緣生。故舉一百一十一世界種。配其五位因果有一百一十之門。爲攝生報得。有一箇世界種。明其佛位與五位及一切諸行作多故。還如眉間之衆。勝音菩薩獨坐蓮華臺。諸菩薩衆坐其華鬚。明主伴萬行。一多相即故。定慧觀之可見。十下作一。是其土字。明仁士之法。法合十一。今以十一箇世界。安立十一地法門。四重世界。明十波羅蜜四攝法之方便。大意舉前座內衆及眉間衆。明其所行之行。此華藏世界。明彼行中報得依果。於中雜類世界。即明所攝之衆生。同住一處。而境各異者。約法界理智。眞俗不殊。六釋華藏世界純雜無礙者。爲佛所行之行。徧法界衆生界故。既是行徧。所得依果亦徧。但業不相應者。同住居而不見。猶如靈神及諸鬼趣。與人同處。人不能見。如經云。譬如人身。常有二天隨逐。天常見人。人不見天。此經爲佛行周徧。依正亦徧。不同三乘。推淨土於餘方。而致去來自他之相。爲彼小心根劣者。且如是設教網故。畢竟求大菩提心者。還須歸此不二之門。興徧周法界之行願也。七明華藏世界圓攝三世業境者。此華藏世界海。明此教法。一念三世故。一念者。爲無念也。無念。即無三世古今等法。以明法身無念。一切衆生妄念三世多劫之法。不離無

念之中。以是義故。此華藏世界所有莊嚴境界。能現諸佛業。衆生三世所行行業。因果總現其中。或過去業。現未來中。或未來業。現過去中。或過去未來業。現現在中。或現在業。現過去未來中。如百千明鏡俱懸。四面前後。影像互相徹故。爲法界之體性無時故。妄計三世之業。頓現無時法中。是故經言。智入三世而無來往。經云。佛子女應觀。刹種威神力。未來諸國土。如夢悉令見。十方諸世界。過去國土海。咸於一刹中。現像猶如化。三世一切佛。及其國土。於一刹種中。一切悉觀見。論主頌曰。三世無有時。妄計三世法。以真無妄想。一念現三世。三世無時者。亦無有一念。計著二世法。總現無時中。了達無時法。一念成正覺。八釋佛國本空何爲華藏世界出生所緣者。緣何事意。緣意有四。一爲明二乘雖得解脫三界羸業。無有福智。不利衆生。滯於涅槃。二爲三乘菩薩。有樂生淨土。淨相常存。障法性如理。染淨當情。知見不普。情存淨土。不得自在。不如此法。隱現自在。爲利衆生。顯勝福德故。即具相萬差。光明顯照。若令衆生。情無取著。如幻雲散。一物便無。無有所得。存其繫故。三爲怖一切法空衆生。爲法空無相之理。謂言斷見。空無福智。不樂觀空。樂取相縛。隨境存業。不能解脫者。

所現福德依正果故。令觀空法。空卻無明。成福德業。四總爲一切三乘。及一切凡夫。現廣大願行。福智境界。量度樣式。令其做學。不偏執故。經云。諸佛國土如虛空。無等無生無有相。爲利衆生普嚴淨。本願力故住其中。九明華藏世界因何得隱現自在者。爲從一切法空之理。隨智現故。得隱現自在。世間龍鬼。具有三毒。猶能隱現。何況法空。空諸三毒。純清淨智。不能隱現自在。如善財入彌勒樓閣。以三昧力。具見衆莊嚴。從三昧起。忽然不見。一相都無。善財白言。此莊嚴何處去。彌勒答言。從來處去。曰。從何處來。曰。從菩薩智慧神通來。依菩薩智慧神力而住。無有去處。亦無住處。非集非常。遠離一切。又如幻師。作諸幻事。無所從來。無所至去。雖無來去。以幻力故。分明可見。彼莊嚴事。亦復如是。無所從來。亦無所去。雖無來去。然以慣習不可思議幻智力故。及往昔大願力故。如是顯現。華藏世界。亦復如是。以如來大願智力。法性自體空無性力。隱現自在。若隨法性。萬相都無。隨願智力。衆相隨現。隱現隨緣。都無作者。但以理智。法爾自具。不思議功。不思議變。無能作者。自在隱現。凡夫執著。用作無明。執障既無。智用自在。順法身。萬象俱寂。隨智用。萬象俱生。

隨大悲。常居生死。但隨理智。生死恆真。以此三事。隱顯萬端。不離一真之智。化儀百變。十隨文釋義者。此一品經。長科爲十二段。

爾時普賢菩薩。復告大衆言。諸佛子。此華藏莊嚴世界海。是毘盧遮那如來。往昔於世界海微塵數劫。修菩薩行時。一一劫中。親近世界海微塵數佛。一一佛所。淨修世界海微塵數大願之所嚴淨。諸佛子。此華藏莊嚴世界海。有須彌山微塵數風輪所持。其最下風輪。名平等住。能持其上一切寶焰熾然莊嚴。次上風輪。名出生種種寶莊嚴。能持其上淨光照曜摩尼王幢。次上風輪。名寶威德。能持其上一切寶鈴。次上風輪。名平等焰。能持其上日光明相摩尼王輪。次上風輪。名種種普莊嚴。能持其上光明輪華。次上風輪。名普清淨。能持其上一切華焰師子座。次上風輪。名警徧十方。能持其上一切珠王幢。次上風輪。名一切寶光明。能持其上一切摩尼王樹華。次上風輪。名速疾普持。能持其上一切香摩尼須彌雲。次上風輪。名種種宮殿遊行。能持其上一切寶色香臺雲。諸佛子。彼須彌山微塵數風輪。最在上者。名殊勝威光藏。能持普光摩尼莊嚴香水海。此香水海。有大蓮華。名種種光明藥香幢。華藏莊嚴世界海。住在其中。四方均平。清淨堅固。金

剛輪山。周匝圍遶。地海衆樹。各有區別。是時普賢菩薩。欲重宣其義。承佛神力。觀察十方而說頌言。

世尊往昔於諸有

微塵佛所修淨業

故獲種種寶光明

華藏莊嚴世界海

廣大悲雲徧一切

捨身無量等剎塵

以昔劫海修行力

今此世界無諸垢

放大光明徧住空

風力所持無動搖

佛藏摩尼普嚴飾

如來願力令清淨

普散摩尼妙藏華

以昔願力空中住

種種堅固莊嚴海

光雲垂布滿十方

諸摩尼中菩薩雲

普詣十方光熾然

光焰成輪妙華飾

法界周流靡不徧

一切寶中放淨光

其光普照衆生海

十方國土皆周徧

咸令出苦向菩提

寶中佛數等衆生

從其毛孔出化形

梵主帝釋輪王等

一切衆生及諸佛

化現光明等法界

光中演說諸佛名

種種方便示調伏

普應群心無不盡

華藏世界所有塵

一一塵中見法界

寶光現佛如雲集

此是如來刹自在

廣大願雲周法界

於一切劫化群生

普賢智地行悉成

所有莊嚴從此出

第一爾時普賢菩薩已下。長行有二十四行經。并二十行頌。明歎佛往因。行菩薩行。修淨大願力。報得風輪。以持華藏世界。及衆莊嚴。

爾時普賢菩薩。復告大眾言。諸佛子。此華藏莊嚴世界海。大輪圍山。住日珠王蓮華之上。栴檀摩尼以為其身。威德寶王以為其峰。妙香摩尼而作其輪。焰藏金剛所共成立。一切香水流注其間。衆寶為林。妙華開敷。香草布地。明珠間飾。種種香華。處處盈滿。摩尼為網。周匝垂覆。如是等有世界海微塵數衆妙莊嚴。爾時普賢菩薩。欲重宣其義。承佛神力。觀察十方而說頌言。

世界大海無有邊

寶輪清淨種種色

所有莊嚴盡奇妙

此由如來神力起

摩尼寶輪妙香輪

及以眞珠燈焰輪

種種妙寶爲嚴飾

清淨輪圍所安住

堅固摩尼以爲藏

閻浮檀金作嚴飾

舒光發焰徧十方

內外映徹皆清淨

金剛摩尼所集成

復雨摩尼諸妙寶

其寶精奇非一種

放淨光明普嚴麗

香水分流無量色

散諸華寶及栴檀

衆蓮競發如衣布

珍草羅生悉芬馥

無量寶樹普莊嚴

開華發藥色熾然

種種名衣在其內

光雲四照常圓滿

無量無邊大菩薩

執蓋焚香充法界

悉發一切妙音聲

普轉如來正法輪

諸摩尼樹寶栳成

一一寶栳現光明

毘盧遮那清淨身

悉入其中普令見

諸莊嚴中現佛身

無邊色相無央數

悉往十方無不徧

所化衆生亦無限

一切莊嚴出妙音

演說如來本願輪

十方所有淨刹海

佛自在力咸令徧

二爾時已下。有八行半經。并二十行頌。明歎蓮華之上。寶輪圍山。具衆嚴飾。由如來神力所生。

爾時普賢菩薩。復告大衆言。諸佛子。此世界海大輪圍山內。所有大地。一切皆以金剛所成。堅固莊嚴。不可沮壞。清淨平坦。無有高下。摩尼為輪。衆寶為藏。一切衆生種種形狀。諸摩尼寶以為間錯。散衆寶糝。布以蓮華。香藏摩尼。分置其間。諸莊嚴具。充徧如雲。三世一切諸佛國土。所有莊嚴。而為校飾。摩尼妙寶以為其網。普現如來所有境界。如天帝網。於中布列。諸佛子。此世界海地。有如是等。世界海微塵數莊嚴。爾時普賢菩薩。欲重宣其義。承佛神力。觀察十方而說頌言。

其地平坦極清淨

安住堅固無能壞

摩尼處處以為嚴

衆寶於中相間錯

金剛為地甚可悅

寶輪寶網具莊嚴

蓮華布上皆圓滿

妙衣彌覆悉周徧

菩薩天冠寶纓珞

悉布其地為嚴好

梅檀摩尼普散中

咸舒離垢妙光明

寶華發焰出妙光

光焰如雲照一切

散此妙華及衆寶

普覆於地為嚴飾

密雲興布滿十方

廣大光明無有盡

普至十方一切土

演說如來甘露法

一切佛願摩尼內

普現無邊廣大劫

最勝智者昔所行

於此寶中無不見

其地所有摩尼寶

一切佛刹咸來入

彼諸佛刹一一塵

一切國土亦入中

妙寶莊嚴華藏界

菩薩遊行徧十方

演說大士諸弘願

此是道場自在力

摩尼妙寶莊嚴地

放淨光明備衆飾

充滿法界等虛空

佛力自然如是現

諸有修治普賢願

入佛境界大智人

能知於此刹海中

如是一切諸神變

三爾時已下。十行半經。并二十行頌。歎輪圍山內平地。金剛所成。具足衆

寶間錯。其地華網莊嚴。

爾時普賢菩薩。復告大眾言。諸佛子。此世界海大地中。有十不可說佛刹微塵數香水海。一切妙寶莊嚴其底。妙香摩尼莊嚴其岸。毘盧遮那摩尼寶王以為其網。香水映徹。具衆寶色。充滿其中。種種寶華旋布其上。栴檀細末澄近其下。演佛言音。放寶光明。無邊菩薩。持種種蓋。現神通力。一切世界所有莊嚴。悉於中現。十寶階陛。行列分布。十寶欄楯。周匝圍遶。四天下微塵數一切寶莊嚴芬陀利華。敷榮水中。不可說百千億那由他數十寶尸羅幢。恆河沙數一切寶衣鈴網幢。

恆河沙數無邊色相寶華樓閣。百千億那由他數十寶蓮華城。四天下微塵數衆寶樹林。寶焰摩尼以為其網。恆河沙數栴檀香諸佛言音光焰摩尼。不可說百千億那由他數衆寶垣牆。悉共圍遶。周徧嚴飾。爾時普賢菩薩。欲重宣其義。承佛神力。觀察十方而說頌言。

此世界中大地上	有香水海摩尼嚴	清淨妙寶布其底	安住金剛不可壞
香藏摩尼積成岸	日焰珠輪布若雲	蓮華妙寶爲纓絡	處處莊嚴淨無垢
香水澄渟具衆色	寶華旋布放光明	普震音聲聞遠近	以佛威神演妙法
階陛莊嚴具衆寶	復以摩尼爲間飾	周迴欄楯悉寶成	蓮華珠網如雲布
摩尼寶樹列成行	華葉敷榮光赫奕	種種樂音恆競奏	佛神通力令如是
種種妙寶芬陀利	敷布莊嚴香水海	香焰光明無暫停	廣大圓滿皆充徧
明珠寶幢恆熾盛	妙衣垂布爲嚴飾	摩尼鈴網演法音	令其聞者趣佛智
妙寶蓮華作城廓	衆彩摩尼所嚴瑩	眞珠雲影布四隅	如是莊嚴香水海
垣牆繚繞皆周匝	樓閣相望布其上	無量光明恆熾然	種種莊嚴清淨海
毘盧遮那於往昔	種種刹海皆嚴淨	如是廣大無有邊	悉是如來自在力

四爾時已下。一十六行半經。二十行頌。明金剛寶地。有衆香水海。衆寶爲底。妙香巖岸。具衆莊飾。

爾時普賢菩薩。復告大衆言。諸佛子。一一香水海。各有四天下微塵數香水河。右旋圍遶。一切皆以金剛爲岸。淨光摩尼以爲巖飾。常現諸佛寶色光雲。及諸衆生所有言音。其河所有漩澓之處。一切諸佛所修因行。種種形相。皆從中出。摩尼爲網。衆寶鈴鐸。諸世界海所有莊嚴。悉於中現。摩尼寶雲以覆其上。其雲普現華藏世界毘盧遮那十方化佛。及一切佛神通之事。復出妙音。稱揚三世佛菩薩名。其香水中。常出一切寶焰光雲。相續不絕。若廣說者。一一河各有世界海微塵數莊嚴。爾時普賢菩薩。欲重宣其義。承佛神力。觀察十方而說頌言。

清淨香流滿大河	金剛妙寶爲其岸	寶珠爲輪布其地	種種嚴飾皆珍好
寶階行列妙莊嚴	欄楯周迴悉殊麗	眞珠爲藏衆華飾	種種纓鬘共垂下
香水寶光清淨色	恆吐摩尼競疾流	衆華隨浪皆搖動	悉奏樂音宣妙法
細秣梅檀作泥塗	一切妙寶同洄澓	香藏氛氳布在中	發焰流芬普周徧
河中出生諸妙寶	悉放光明色熾然	其光布影成臺座	華蓋珠纓皆具足

摩尼王中現佛身

光明普照十方刹

以此爲輪嚴飾地

香水映徹常盈滿

摩尼爲網金爲鐸

遍覆香河演佛音

克宣一切菩提道

及以普賢之妙行

寶岸摩尼極清淨

恆出如來本願音

一切諸佛曩所行

其音普演皆令見

其河所有漩流處

菩薩如雲常踊出

悉往廣大刹土中

乃至法界咸充滿

清淨珠王布若雲

一切香河悉彌覆

其珠等佛眉間相

炳然顯現諸佛影

五爾時已下。十二行半經。二十行頌。明各各香海。具衆香河。其河底岸。

具諸嚴飾。右旋遶海。

爾時普賢菩薩。復告大衆言。諸佛子。此諸香水河兩間之地。悉以妙寶種種莊嚴。

一一各有四天下微塵數衆寶莊嚴。芬陀利華。周匝徧滿。各有四天下微塵數衆寶

樹林。次第行列。一一樹中。恆出一切諸莊嚴雲。摩尼寶王。照耀其間。種種華

香。處處盈滿。其樹復出微妙音聲。說諸如來一切劫中所修大願。復散種種摩尼

寶王。充徧其地。所謂蓮華輪摩尼寶王。香焰光雲摩尼寶王。種種嚴飾摩尼寶王。

現不可思議莊嚴色摩尼寶王。日光明衣藏摩尼寶王。周徧十方普垂布光網雲摩尼

寶王。現一切諸佛神變摩尼寶王。現一切衆生業報海摩尼寶王。如是等有世界海

微塵數。其香水河兩間之地。一切悉具如是莊嚴。爾時普賢菩薩。欲重宣其義。承佛神力。觀察十方而說頌言。

其地平坦極清淨 眞金摩尼共嚴飾 諸樹行列蔭其中 聳幹垂條萃若雲

枝條妙寶所莊嚴 華焰成輪光四照 摩尼爲果如雲布 普使十方常現靚

摩尼布地皆充滿 衆華寶糝共莊嚴 復以摩尼作宮殿 悉現衆生諸影像

諸佛影像摩尼王 普散其地靡不周 如是赫奕徧十方 一一塵中咸見佛

妙寶莊嚴善分布 眞珠燈網相間錯 處處悉有摩尼輪 一一皆現佛神通

衆寶莊嚴放大光 光中普現諸化佛 一一周行靡不徧 悉以十力廣開演

摩尼妙寶芬陀利 一切水中咸徧滿 其華種種各不同 悉現光明無盡歇

三世所有諸莊嚴 摩尼果中皆顯現 體性無生不可取 此是如來自在力

此地一切莊嚴中 悉現如來廣大身 彼亦不來亦不去 佛昔願力皆令見

此地一一微塵中 一切佛子修行道 各見所記當來刹 隨其意樂悉清淨

六爾時已下。十五行半經。二十行頌。明香河兩間平地。具樹華果衆妙莊嚴。

芬陀利華。此云百葉白蓮華。

爾時普賢菩薩。復告大眾言。諸佛子。諸佛世尊世界海莊嚴不可思議。何以故。諸佛子。此華藏莊嚴世界海一切境界。一一皆以世界海微塵數清淨功德之所莊嚴。爾時普賢菩薩。欲重宣其義。承佛神力。觀察十方而說頌言。

此刹海中一切處 悉以衆寶爲嚴飾 發焰騰空布若雲 光明洞徹常彌覆

摩尼吐雲無有盡 十方佛影於中現 神通變化靡暫停 一切菩薩咸來集

一切摩尼演佛音 其音美妙不思議 毘盧遮那昔所行 於此寶內恆聞見

清淨光明徧照尊 莊嚴具中皆現影 變化分身衆圍遶 一切刹海咸周徧

所有化佛皆如幻 求其來處不可得 以佛境界威神力 一切刹中如是現

如來自在神通事 悉徧十方諸國土 以此刹海淨莊嚴 一切皆於寶中見

十方所有諸變化 一切皆如鏡中像 但由如來昔所行 神通願力而出生

若有能修普賢行 入於菩薩勝智海 能於一切微塵中 普現其身淨衆刹

不可思議億大劫 親近一切諸如來 如其一切之所行 一刹那中悉能現

諸佛國土如虛空 無等無生無有相 爲利衆生普嚴淨 本願力故住其中

七爾時已下。五行經。二十行頌。都結總歎此世界海。如來無量功德莊嚴。

大方廣佛新華嚴經合論卷第二十一終

大方廣佛新華嚴經合論卷第二十二

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

華嚴世界品第五之二

爾時普賢菩薩。復告大眾言。諸佛子。此中有何等世界住。我今當說。諸佛子。此十不可說佛刹微塵數香水海中。有十不可說佛刹微塵數世界種安住。一一世界種。復有十不可說佛刹微塵數世界。諸佛子。彼諸世界種。於世界海中。各各依住。各各形狀。各各體性。各各方所。各各趣入。各各莊嚴。各各分齊。各各行列。各各無差別。各各力加持。諸佛子。此世界種。或有依大蓮華海住。或有依無邊色寶華海住。或有依一切真珠藏寶纓珞海住。或有依香水海住。或有依一切華海住。或有依摩尼寶網海住。或有依旋流光海住。或有依菩薩寶莊嚴冠海住。或有依種種衆生身海住。或有依一切佛音聲摩尼王海住。如是等若廣說者。有世

界海微塵數。諸佛子。彼一切世界種。或有作須彌山形。或作江河形。或作迴轉形。或作漩流形。或作輪輞形。或作壇墀形。或作樹林形。或作樓閣形。或作山幢形。或作普方形。或作胎藏形。或作蓮華形。或作法勒迦形。或作衆生身形。或作雲形。或作諸佛相好形。或作圓滿光明形。或作種種珠網形。或作一切門闥形。或作諸莊嚴具形。如是等若廣說者。有世界海微塵數。諸佛子。彼一切世界種。或有以十方摩尼雲為體。或有以衆色焰為體。或有以諸光明為體。或有以寶香焰為體。或有以一切寶莊嚴多羅華為體。或有以菩薩影像為體。或有以諸佛光明為體。或有以佛色相為體。或有以一寶光為體。或有以衆寶光為體。或有以一切衆生福德海音聲為體。或有以一切衆生諸業海音聲為體。或有以一切佛境界清淨音聲為體。或有以一切菩薩大願海音聲為體。或有以一切佛方便音聲為體。或有以一切刹莊嚴具成壞音聲為體。或有以無邊佛音聲為體。或有以一切佛變化音聲為體。或有以一切衆生善音聲為體。或有以一切佛功德海清淨音聲為體。如是等若廣說者。有世界海微塵數。爾時普賢菩薩。欲重宣其義。承佛神力。觀察十方而說頌言。

刹種堅固妙莊嚴

廣大清淨光明藏

依止蓮華寶海住

或有住於香海等

須彌成樹壇墀形

一切刹種徧十方

種種莊嚴形相別

各各布列而安住

或有體是淨光明

或是華藏及寶雲

或有刹種焰所成

安住摩尼不壞藏

燈雲焰彩光明等

種種無邊清淨色

或有言音以爲體

是佛所演不思議

或是願力所出音

神變音聲爲體性

一切衆生大福業

佛功德音亦如是

刹種一一差別門

不可思議無有盡

如是十方皆徧滿

廣大莊嚴現神力

十方所有廣大刹

悉來入此世界種

雖見十方普入中

而實無來無所入

以一刹種入一切

一切入一亦無餘

體相如本無差別

無等無量悉周徧

一切國土微塵中

普見如來在其所

願海言音若雷震

一切衆生悉調伏

佛身周徧一切刹

無數菩薩亦充滿

如來自在無等倫

普化一切諸含識

八爾時已下。三十八行經。二十行頌。明世界種體性形狀依住。

爾時普賢菩薩。復告大衆言。諸佛子。此十不可說佛刹微塵數香水海。在華藏莊嚴世界海中。如天帝網。分布而住。諸佛子。此最中央香水海。名無邊妙華光。以現一切菩薩形摩尼王幢為底。出大蓮華。名一切香摩尼王莊嚴。有世界種而住。

其上。名普照十方熾然寶光明。以一切莊嚴具為體。有十不可說佛刹微塵數世界。於中布列。其最下方。有世界名最勝光徧照。以一切金剛莊嚴光曜輪為際。依衆寶摩尼華而住。其狀猶如摩尼寶形。一切寶華莊嚴雲彌覆其上。佛刹微塵數世界周匝圍遶。種種安住。種種莊嚴。佛號淨眼離垢燈。此上過佛刹微塵數世界。有世界名種種香蓮華妙莊嚴。以一切莊嚴具為際。依寶蓮華網而住。其狀猶如師子之座。一切寶色珠帳雲彌覆其上。一佛刹微塵數世界周匝圍遶。佛號師子光勝照。此上過佛刹微塵數世界。有世界名一切寶莊嚴普照光。以香風輪為際。依種種寶華纓珞住。其形八隅。妙光摩尼曰輪雲而覆其上。二佛刹微塵數世界周匝圍遶。佛號淨光智勝幢。此上過佛刹微塵數世界。有世界名種種光明華莊嚴。以一切寶王為際。依衆色金剛尸羅幢海住。其狀猶如摩尼蓮華。以金剛摩尼寶光雲而覆其上。四佛刹微塵數世界周匝圍遶。純一清淨。佛號金剛光明無量精進力善出現。此上過佛刹微塵數世界。有世界名普放妙華光。以一切寶鈴莊嚴網為際。依一切樹林莊嚴寶輪網海住。其形普方而多有隅角。梵音摩尼王雲以覆其上。五佛刹微塵數世界周匝圍遶。佛號香光喜力海。此上過佛刹微塵數世界。有世界名淨妙光

明。以寶王莊嚴幢為際。依金剛宮殿海住。其形四方。摩尼輪鬘帳雲而覆其上。六佛刹微塵數世界周匝圍遶。佛號普光自在幢。此上過佛刹微塵數世界。有世界名衆華焰莊嚴。以種種華莊嚴為際。依一切寶色焰海住。其狀猶如樓閣之形。一切寶色衣真珠欄楯雲而覆其上。七佛刹微塵數世界周匝圍遶。純一清淨。佛號歡喜海功德名稱自在光。此上過佛刹微塵數世界。有世界名出生威力地。以出一切聲摩尼王莊嚴為際。依種種寶色蓮華座虛空海住。其狀猶如因陀羅網。以無邊色華網雲而覆其上。八佛刹微塵數世界周匝圍遶。佛號廣大名稱智海幢。此上過佛刹微塵數世界。有世界名出妙音聲。以心王摩尼莊嚴輪為際。依恆出一切妙音聲莊嚴雲摩尼王海住。其狀猶如梵天身形。無量寶莊嚴師子座雲而覆其上。九佛刹微塵數世界周匝圍遶。佛號清淨月光明相無能摧伏。此上過佛刹微塵數世界。有世界名金剛幢。以無邊莊嚴真珠藏寶纓珞為際。依一切莊嚴寶師子座摩尼海住。其狀周圓。十須彌山微塵數一切香摩尼華須彌雲彌覆其上。十佛刹微塵數世界周匝圍遶。純一清淨。佛號一切法海最勝王。此上過佛刹微塵數世界。有世界名恆出現帝青寶光明。以極堅牢不可壞金剛莊嚴為際。依種種殊異華海住。其狀猶如

半月之形。諸天寶帳雲而覆其上。十一佛刹微塵數世界周匝圍遶。佛號無量功德法。此上過佛刹微塵數世界。有世界名光明照耀。以普光莊嚴為際。依華旋香水海住。狀如華旋。種種衣雲而覆其上。十二佛刹微塵數世界周匝圍遶。佛號超釋梵。此上過佛刹微塵數世界。至此世界。名娑婆。以金剛莊嚴為際。依種種色風輪所持蓮華網住。狀如虛空。以普圓滿天宮殿莊嚴虛空雲而覆其上。十三佛刹微塵數世界周匝圍遶。其佛即是毘盧遮那如來世尊。此上過佛刹微塵數世界。有世界名寂靜離塵光。以一切寶莊嚴為際。依種種寶衣海住。其狀猶如執金剛形。無邊色金剛雲而覆其上。十四佛刹微塵數世界周匝圍遶。佛號徧法界勝音。此上過佛刹微塵數世界。有世界名衆妙光明燈。以一切莊嚴帳為際。依淨華網海住。其狀猶如卍字之形。摩尼樹香水海雲而覆其上。十五佛刹微塵數世界周匝圍遶。純一清淨。佛號不可摧伏力普照幢。此上過佛刹微塵數世界。有世界名清淨光徧照。以無盡寶雲摩尼王為際。依種種香焰蓮華海住。其狀猶如龜甲之形。圓光摩尼輪栴檀雲而覆其上。十六佛刹微塵數世界周匝圍遶。佛號清淨日功德眼。此上過佛刹微塵數世界。有世界名寶莊嚴藏。以一切衆生形摩尼王為際。依光明藏摩尼王

海住。其形八隅。以一切輪圍山寶莊嚴華樹網彌覆其上。十七佛刹微塵數世界周匝圍遶。佛號無礙智光明徧照十方。此上過佛刹微塵數世界。有世界名離塵。以一切殊妙相莊嚴為際。依衆妙華師子座海住。狀如珠纓。以一切寶香摩尼王圓光雲而覆其上。十八佛刹微塵數世界周匝圍遶。純一清淨。佛號無量方便最勝幢。此上過佛刹微塵數世界。有世界名清淨光普照。以出無盡寶雲摩尼王為際。依無量色香焰須彌山海住。其狀猶如寶華旋布。以無邊色光明摩尼王帝青雲而覆其上。十九佛刹微塵數世界周匝圍遶。佛號普照法界虛空光。此上過佛刹微塵數世界。有世界名妙寶焰。以普光明日月寶為際。依一切諸天形摩尼王海住。其狀猶如寶莊嚴具。以一切寶衣幢雲及摩尼燈藏網而覆其上。二十佛刹微塵數世界周匝圍遶。純一清淨。佛號福德相光明。諸佛子。此徧照十方熾然寶光明世界種。有如是等不可說佛刹微塵數廣大世界。各各所依住。各各形狀。各各體性。各各方面。各各趣入。各各莊嚴。各各分齊。各各行列。各各無差別。各各力加持。周匝圍遶。所謂十佛刹微塵數迴轉形世界。十佛刹微塵數江河形世界。十佛刹微塵數旋流形世界。十佛刹微塵數輪轉形世界。十佛刹微塵數壇墀形世界。十佛刹微

塵數樹林形世界。十佛刹微塵數樓觀形世界。十佛刹微塵數尸羅幢形世界。十佛刹微塵數普方形世界。十佛刹微塵數胎藏形世界。十佛刹微塵數蓮華形世界。十佛刹微塵數法勒迦形世界。十佛刹微塵數種種衆生形世界。十佛刹微塵數佛相形世界。十佛刹微塵數圓光形世界。十佛刹微塵數雲形世界。十佛刹微塵數網形世界。十佛刹微塵數門闍形世界。如是等有不可說佛刹微塵數。此一一世界。各有十佛刹微塵數廣大世界周匝圍遶。此諸世界。一一復有如上所說微塵數世界而為眷屬。如是所說一切世界。皆在此無邊妙華光香水海。及圍遶此海香水河中。

九爾時以下。直至卷末及初。都結諸世界種。於此大蓮華上分布而住。并別舉此中心華藏世界海。有世界種。名普照十方熾然寶光明。上下二十重世界。於中大意。如前已釋。

爾時普賢菩薩。復告大衆言。諸佛子。此無邊妙華光香水海東。次有香水海。名離垢焰藏。出大蓮華。名一切香摩尼王妙莊嚴。有世界種而住其上。名徧照刹旋。以菩薩行吼音為體。此中最下方。有世界名宮殿莊嚴幢。其形四方。依一切寶莊嚴海住。蓮華光網雲彌覆其上。佛刹微塵數世界圍遶。純一清淨。佛號眉間光徧

照。此上過佛刹微塵數世界。有世界名德華藏。其形周圓。依一切寶華藥海住。真珠幢師子座雲彌覆其上。二佛刹微塵數世界圍遶。佛號一切無邊法海慧。此上過佛刹微塵數世界。有世界名善變化妙香輪。形如金剛。依一切寶莊嚴鈴網海住。種種莊嚴圓光雲彌覆其上。三佛刹微塵數世界圍遶。佛號功德相光明普照。此上過佛刹微塵數世界。有世界名妙色光明。其狀猶如摩尼寶輪。依無邊色寶香水海住。普光明真珠樓閣雲彌覆其上。四佛刹微塵數世界圍遶。純一清淨。佛號善眷屬出興徧照。此上過佛刹微塵數世界。有世界名善蓋覆。狀如蓮華。依金剛香水海住。離塵光明香水雲彌覆其上。五佛刹微塵數世界圍遶。佛號法喜無盡慧。此上過佛刹微塵數世界。有世界名尸利華光輪。其形三角。依一切堅固寶莊嚴海住。菩薩摩尼冠光明雲彌覆其上。六佛刹微塵數世界圍遶。佛號清淨普光明。此上過佛刹微塵數世界。有世界名寶蓮華莊嚴。形如半月。依一切蓮華莊嚴海住。一切寶華雲彌覆其上。七佛刹微塵數世界圍遶。純一清淨。佛號功德華清淨眼。此上過佛刹微塵數世界。有世界名無垢焰莊嚴。其狀猶如寶燈行列。依寶焰藏海住。常雨香水種種身雲彌覆其上。八佛刹微塵數世界圍遶。佛號慧力無能勝。此上過

佛刹微塵數世界。有世界名妙梵音。形如卍字。依寶衣幢海住。一切華莊嚴帳雲彌覆其上。九佛刹微塵數世界圍遶。佛號廣大目如空中淨月。此上過佛刹微塵數世界。有世界名微塵數音聲。其狀猶如因陀羅網。依一切寶水海住。一切樂音寶蓋雲彌覆其上。十佛刹微塵數世界圍遶。純一清淨。佛號金色須彌燈。此上過佛刹微塵數世界。有世界名寶色莊嚴。形如卍字。依帝釋形寶王海住。日光明華雲彌覆其上。十一佛刹微塵數世界圍遶。佛號迴照法界光明智。此上過佛刹微塵數世界。有世界名金色妙光。其狀猶如廣大城郭。依一切寶莊嚴海住。道場寶華雲彌覆其上。十二佛刹微塵數世界圍遶。佛號寶燈普照幢。此上過佛刹微塵數世界。有世界名徧照光明輪。狀如華旋。依寶衣旋海住。佛音聲寶王樓閣雲彌覆其上。十三佛刹微塵數世界圍遶。純一清淨。佛號蓮華焰徧照。此上過佛刹微塵數世界。有世界名寶藏莊嚴。狀如四洲。依寶纓珞須彌住。寶焰摩尼雲彌覆其上。十四佛刹微塵數世界圍遶。佛號無盡福開敷華。此上過佛刹微塵數世界。有世界名如鏡像普現。其狀猶如阿修羅身。依金剛蓮華海住。寶冠光影雲彌覆其上。十五佛刹微塵數世界圍遶。佛號甘露音。此上過佛刹微塵數世界。有世界名栴檀月。其形

八隅。依金剛栴檀寶海住。真珠華摩尼雲彌覆其上。十六佛刹微塵數世界圍遶。純一清淨。佛號最勝法無等智。此上過佛刹微塵數世界。有世界名離垢光明。其狀猶如香水漩流。依無邊色寶光海住。妙香光明雲彌覆其上。十七佛刹微塵數世界圍遶。佛號徧照虛空光明音。此上過佛刹微塵數世界。有世界名妙華莊嚴。其狀猶如旋遶之形。依一切華海住。一切樂音摩尼雲彌覆其上。十八佛刹微塵數世界圍遶。佛號普現勝光明。此上過佛刹微塵數世界。有世界名勝音莊嚴。其狀猶如師子之座。依金師子座海住。衆色蓮華藏師子座雲彌覆其上。十九佛刹微塵數世界圍遶。佛號無邊功德稱普光明。此上過佛刹微塵數世界。有世界名高勝燈。狀如佛掌。依寶衣服香幢海住。日輪普照寶王樓閣雲彌覆其上。二十佛刹微塵數世界圍遶。純一清淨。佛號普照虛空燈。諸佛子。此離垢焰藏香水海南。次有香水海。名無盡光明輪。世界種名佛幢莊嚴。以一切佛功德海音聲為體。此中最下方。有世界名愛見華。狀如寶輪。依摩尼樹藏寶王海住。化現菩薩形寶藏雲彌覆其上。佛刹微塵數世界圍遶。純一清淨。佛號蓮華光歡喜面。此上過佛刹微塵數世界。有世界名妙音。佛號須彌寶燈。此上過佛刹微塵數世界。有世界名衆寶莊

嚴光。佛號法界音聲幢。此上過佛刹微塵數世界。有世界名香藏金剛。佛號光明音。此上過佛刹微塵數世界。有世界名淨妙音。佛號最勝精進力。此上過佛刹微塵數世界。有世界名寶蓮華莊嚴。佛號法城雲雷音。此上過佛刹微塵數世界。有世界名與安樂。佛號大名稱智慧燈。此上過佛刹微塵數世界。有世界名無垢網。佛號師子光功德海。此上過佛刹微塵數世界。有世界名華林幢徧照。佛號大智蓮華光。此上過佛刹微塵數世界。有世界名無量莊嚴。佛號普眼法界幢。此上過佛刹微塵數世界。有世界名普光明寶莊嚴。佛號勝智大商主。此上過佛刹微塵數世界。有世界名華王。佛號月光幢。此上過佛刹微塵數世界。有世界名離垢藏。佛號清淨覺。此上過佛刹微塵數世界。有世界名寶光明。佛號一切智虛空燈。此上過佛刹微塵數世界。有世界名出生寶纓絡。佛號諸度福海相光明。此上過佛刹微塵數世界。有世界名妙輪徧覆。佛號調伏一切染著心令歡喜。此上過佛刹微塵數世界。有世界名寶華幢。佛號廣博功德音大名稱。此上過佛刹微塵數世界。有世界名無量莊嚴。佛號平等智光明功德海。此上過佛刹微塵數世界。有世界名無盡光莊嚴幢。狀如蓮華。依一切寶網海住。蓮華光摩尼網徧覆其上。二十佛刹微塵

數世界圍遶。純一清淨。佛號法界淨光明。諸佛子。此無盡光明輪香水海右旋。次有香水海。名金剛寶焰光。世界種名佛光莊嚴藏。以稱說一切如來名音聲為體。此中最下方。有世界名寶焰蓮華。其狀猶如摩尼色眉間毫相。依一切寶色水漩海住。一切莊嚴樓閣雲彌覆其上。佛刹微塵數世界圍遶。純一清淨。佛號無垢寶光明。此上過佛刹微塵數世界。有世界名光焰藏。佛號無礙自在智慧光。此上過佛刹微塵數世界。有世界名寶輪妙莊嚴。佛號一切寶光明。此上過佛刹微塵數世界。有世界名栴檀樹華幢。佛號清淨智光明。此上過佛刹微塵數世界。有世界名佛刹妙莊嚴。佛號廣大歡喜音。此上過佛刹微塵數世界。有世界名妙光莊嚴。佛號法界自在智。此上過佛刹微塵數世界。有世界名無邊相。佛號無礙智。此上過佛刹微塵數世界。有世界名焰雲幢。佛號演說不退輪。此上過佛刹微塵數世界。有世界名象寶莊嚴清淨輪。佛號離垢華光明。此上過佛刹微塵數世界。有世界名廣大出離。佛號無礙智曰眼。此上過佛刹微塵數世界。有世界名妙莊嚴金剛座。佛號法界智大光明。此上過佛刹微塵數世界。有世界名智慧普莊嚴。佛號智炬光明王。此上過佛刹微塵數世界。有世界名蓮華池深妙音。佛號一切智普照。此上過佛刹

微塵數世界。有世界名種種色光明。佛號普光華王雲。此上過佛刹微塵數世界。有世界名妙寶幢。佛號功德光。此上過佛刹微塵數世界。有世界名摩尼華毫相光。佛號普音雲。此上過佛刹微塵數世界。有世界名甚深海。佛號十方衆生主。此上過佛刹微塵數世界。有世界名須彌光。佛號法界普智音。此上過佛刹微塵數世界。有世界名金蓮華。佛號福德藏普光明。此上過佛刹微塵數世界。有世界名寶莊嚴藏。形如卍字。依一切香摩尼莊嚴樹海住。清淨光明雲彌覆其上。二十佛刹微塵數世界圍遶。純一清淨。佛號大變化光明網。諸佛子。此金剛寶焰香水海右旋。以次有香水海。名帝青寶莊嚴。世界種名光照十方。依一切妙莊嚴蓮華香雲住。以無邊佛音聲為體。於此最下方。有世界名十方無盡色藏輪。其狀周迴有無量角。依無邊色一切寶藏海住。因陀羅網而覆其上。佛刹微塵數世界圍遶。純一清淨。佛號蓮華眼光明徧照。此上過佛刹微塵數世界。有世界名淨妙莊嚴藏。佛號無上慧大師子。此上過佛刹微塵數世界。有世界名出現蓮華座。佛號徧照法界光明王。此上過佛刹微塵數世界。有世界名寶幢音。佛號大功德普名稱。此上過佛刹微塵數世界。有世界名金剛寶莊嚴藏。佛號蓮華日光明。此上過佛刹微塵數世界。有

世界名因陀羅華月。佛號法自在智慧幢。此上過佛刹微塵數世界。有世界名妙輪藏。佛號大喜清淨音。此上過佛刹微塵數世界。有世界名妙音藏。佛號大力善商主。此上過佛刹微塵數世界。有世界名清淨月。佛號須彌光智慧力。此上過佛刹微塵數世界。有世界名無邊莊嚴相。佛號方便願淨月光。此上過佛刹微塵數世界。有世界名妙華音。佛號法海大願音。此上過佛刹微塵數世界。有世界名一切寶莊嚴。佛號功德寶光明相。此上過佛刹微塵數世界。有世界名堅固地。佛號美音最勝天。此上過佛刹微塵數世界。有世界名普光善化。佛號大精進寂靜慧。此上過佛刹微塵數世界。有世界名善守護莊嚴行。佛號見者生歡喜。此上過佛刹微塵數世界。有世界名栴檀寶華藏。佛號甚深不可動智慧光徧照。此上過佛刹微塵數世界。有世界名現種種色相海。佛號普放不思議勝義王光明。此上過佛刹微塵數世界。有世界名化現十方大光明。佛號勝功德威光無與等。此上過佛刹微塵數世界。有世界名須彌雲幢。佛號極淨光明眼。此上過佛刹微塵數世界。有世界名蓮華徧照。其狀周圍。依無邊色象妙香摩尼海住。一切乘莊嚴雲而覆其上。二十佛刹微塵數世界圍遶。純一清淨。佛號解脫精進日。諸佛子。此帝青寶莊嚴香水海右旋。

次有香水海。名金剛輪莊嚴底。世界種名妙間錯因陀羅網。普賢智所生音聲為體。此中最下方。有世界名蓮華網。其狀猶如須彌山形。依衆妙華山幢海住。佛境界摩尼王帝網雲而覆其上。佛刹微塵數世界圓遠。純一清淨。佛號法身普覺慧。此上過佛刹微塵數世界。有世界名無盡日光明。佛號最勝大覺慧。此上過佛刹微塵數世界。有世界名普放妙光明。佛號大福雲無盡力。此上過佛刹微塵數世界。有世界名樹華幢。佛號無邊智法界音。此上過佛刹微塵數世界。有世界名真珠蓋。佛號波羅蜜師子頻伸。此上過佛刹微塵數世界。有世界名無邊音。佛號一切智妙覺慧。此上過佛刹微塵數世界。有世界名普見樹峰。佛號普現衆生前。此上過佛刹微塵數世界。有世界名師子帝網光。佛號無垢日金色光焰雲。此上過佛刹微塵數世界。有世界名衆寶間錯。佛號帝幢最勝慧。此上過佛刹微塵數世界。有世界名無垢光明地。佛號一切力清淨月。此上過佛刹微塵數世界。有世界名恆出歎佛功德音。佛號如虛空普覺慧。此上過佛刹微塵數世界。有世界名高焰藏。佛號化現十方大雲幢。此上過佛刹微塵數世界。有世界名光嚴道場。佛號無等智徧照。此上過佛刹微塵數世界。有世界名出生一切寶莊嚴。佛號廣度衆生神通王。此上

過佛刹微塵數世界。有世界名光嚴妙宮殿。佛號一切義成廣大慧。此上過佛刹微塵數世界。有世界名離塵寂靜。佛號不唐現。此上過佛刹微塵數世界。有世界名摩尼華幢。佛號悅意吉祥音。此上過佛刹微塵數世界。有世界名普雲藏。其狀猶如樓閣之形。依種種宮殿香水海住。一切寶燈雲彌覆其上。二十佛刹微塵數世界圍遶。純一清淨。佛號最勝覺神通王。諸佛子。此金剛輪莊嚴底香水海右旋。次有香水海。名蓮華因陀羅網。世界種名普現十方影。依一切香摩尼莊嚴蓮華住。一切佛智光音聲為體。此中最下方。有世界名衆生海寶光明。其狀猶如真珠之藏。依一切摩尼纓珞海漩住。水光明摩尼雲而覆其上。佛刹微塵數世界圍遶。純一清淨。佛號不思議功德徧照月。此上過佛刹微塵數世界。有世界名妙香輪。佛號無量力幢。此上過佛刹微塵數世界。有世界名妙光輪。佛號法界光音覺悟慧。此上過佛刹微塵數世界。有世界名吼聲摩尼幢。佛號蓮華光恆垂妙臂。此上過佛刹微塵數世界。有世界名極堅固輪。佛號不退轉功德海光明。此上過佛刹微塵數世界。有世界名衆行光莊嚴。佛號一切智普勝尊。此上過佛刹微塵數世界。有世界名獅子座徧照。佛號師子光無量力覺慧。此上過佛刹微塵數世界。有世界名寶焰莊嚴。

佛號一切法清淨智。此上過佛刹微塵數世界。有世界名無量燈。佛號無憂相。此上過佛刹微塵數世界。有世界名常聞佛音。佛號自然勝威光。此上過佛刹微塵數世界。有世界名清淨變化。佛號金蓮華光明。此上過佛刹微塵數世界。有世界名普入十方。佛號觀法界頻申慧。此上過佛刹微塵數世界。有世界名熾然焰。佛號光焰樹緊那羅王。此上過佛刹微塵數世界。有世界名香光徧照。佛號香燈善化王。此上過佛刹微塵數世界。有世界名無量華聚輪。佛號普現佛功德。此上過佛刹微塵數世界。有世界名衆妙普清淨。佛號一切法平等神通王。此上過佛刹微塵數世界。有世界名金光海。佛號十方自在大變化。此上過佛刹微塵數世界。有世界名真珠華藏。佛號法界寶光明不可思議慧。此上過佛刹微塵數世界。有世界名帝釋須彌師子座。佛號勝力光。此上過佛刹微塵數世界。有世界名無邊寶普照。其形四方。依華林海住。普雨無邊色摩尼天帝網彌覆其上。二十佛刹微塵數世界圍遶。純一清淨。佛號徧照世間最勝音。

大方廣佛新華嚴經合論卷第二十二終

大方廣佛新華嚴經合論卷第二十三

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

華嚴世界品第五之三

諸佛子。此蓮華因陀羅網香水海右旋。次有香水海。名積集寶香藏。世界種名一切威德莊嚴。以一切佛法輪音聲為體。此中最下方。有世界名種種出生。形如金剛。依種種金剛山幢住。金剛寶光雲而覆其上。佛刹微塵數世界圍遶。純一清淨。佛號蓮華眼。此上過佛刹微塵數世界。有世界名喜見音。佛號生喜樂。此上過佛刹微塵數世界。有世界名寶莊嚴幢。佛號一切智。此上過佛刹微塵數世界。有世界名多羅華普照。佛號無垢寂妙音。此上過佛刹微塵數世界。有世界名變化光。佛號清淨空智慧月。此上過佛刹微塵數世界。有世界名衆妙間錯。佛號開示福德海密雲相。此上過佛刹微塵數世界。有世界名一切莊嚴具妙音聲。佛號歡喜雲。

此上過佛刹微塵數世界。有世界名蓮華池。佛號名稱幢。此上過佛刹微塵數世界。有世界名一切寶莊嚴。佛號曠伸觀察眼。此上過佛刹微塵數世界。有世界名淨妙華。佛號無盡金剛智。此上過佛刹微塵數世界。有世界名蓮華莊嚴城。佛號曰藏眼普光明。此上過佛刹微塵數世界。有世界名無量樹峰。佛號一切法雷音。此上過佛刹微塵數世界。有世界名曰光明。佛號開示無量智。此上過佛刹微塵數世界。有世界名依止蓮華葉。佛號一切福德山。此上過佛刹微塵數世界。有世界名風普持。佛號曰耀根。此上過佛刹微塵數世界。有世界名光明顯現。佛號身光普照。此上過佛刹微塵數世界。有世界名香雷音金剛寶普照。佛號最勝華開敷相。此上過佛刹微塵數世界。有世界名帝網莊嚴。形如欄楯。依一切莊嚴海住。光焰樓閣雲彌覆其上。二十佛刹微塵數世界圍遶。純一清淨。佛號示現無畏雲。諸佛子。此積集寶香藏香水海右旋。次有香水海。名寶莊嚴。世界種名普無垢。以一切微塵中佛刹神變聲為體。此中最下方。有世界名淨妙平坦。形如寶身。依一切寶光輪海住。種種栴檀摩尼真珠雲彌覆其上。佛刹微塵數世界圍遶。純一清淨。佛號難摧伏無等幢。此上過佛刹微塵數世界。有世界名熾然妙莊嚴。佛號蓮華慧神通

王。此上過佛刹微塵數世界。有世界名微妙相輪幢。佛號十方大名稱無盡光。此上過佛刹微塵數世界。有世界名焰藏摩尼妙莊嚴。佛號大智慧見聞皆歡喜。此上過佛刹微塵數世界。有世界名妙華莊嚴。佛號無量力最勝智。此上過佛刹微塵數世界。有世界名出生淨微塵。佛號超勝梵。此上過佛刹微塵數世界。有世界名普光明變化香。佛號香象金剛大力勢。此上過佛刹微塵數世界。有世界名光明旋。佛號義成善名稱。此上過佛刹微塵數世界。有世界名寶纓瑤海。佛號無比光徧照。此上過佛刹微塵數世界。有世界名妙華燈幢。佛號究竟功德無礙慧燈。此上過佛刹微塵數世界。有世界名善巧莊嚴。佛號慧日波羅蜜。此上過佛刹微塵數世界。有世界名栴檀華普光明。佛號無邊慧法界音。此上過佛刹微塵數世界。有世界名帝網幢。佛號燈光迴照。此上過佛刹微塵數世界。有世界名淨華輪。佛號法界日光明。此上過佛刹微塵數世界。有世界名大威耀。佛號無邊功德海法輪音。此上過佛刹微塵數世界。有世界名同安住寶蓮華池。佛號開示入不可思議智。此上過佛刹微塵數世界。有世界名平坦地。佛號功德寶光明王。此上過佛刹微塵數世界。有世界名香摩尼聚。佛號無盡福德海妙莊嚴。此上過佛刹微塵數世界。有世界名

微妙光明。佛號無等力普徧音。此上過佛刹微塵數世界。有世界名十方普堅固莊嚴照耀。其形八隅。依心王摩尼輪海住。一切寶莊嚴帳雲彌覆其上。二十佛刹微塵數世界圍遶。純一清淨。佛號普眼大明燈。諸佛子。此寶莊嚴香水海右旋。次有香水海。名金剛寶聚。世界種名法界行。以一切菩薩地方便法音聲為體。此中最下方。有世界名淨光照耀。形如珠寶。依一切寶色珠纓海住。菩薩珠鬘光明摩尼雲而覆其上。佛刹微塵數世界圍遶。純一清淨。佛號最勝功德光。此上過佛刹微塵數世界。有世界名妙蓋。佛號法自在慧。此上過佛刹微塵數世界。有世界名寶莊嚴師子座。佛號大龍淵。此上過佛刹微塵數世界。有世界名出現金剛座。佛號昇師子座蓮華臺。此上過佛刹微塵數世界。有世界名蓮華勝音。佛號智光普開悟。此上過佛刹微塵數世界。有世界名善慣習。佛號持地妙光王。此上過佛刹微塵數世界。有世界名喜樂音。佛號法燈王。此上過佛刹微塵數世界。有世界名摩尼藏因陀羅網。佛號不空見。此上過佛刹微塵數世界。有世界名衆妙地藏。佛號焰身幢。此上過佛刹微塵數世界。有世界名金光輪。佛號淨治衆生行。此上過佛刹微塵數世界。有世界名須彌山莊嚴。佛號一切功德雲普照。此上過佛刹微塵數

世界。有世界名象樹形。佛號寶華相淨月覺。此上過佛刹微塵數世界。有世界名無怖畏。佛號最勝金火炬。此上過佛刹微塵數世界。有世界名大名稱龍王幢。佛號觀等一切法。此上過佛刹微塵數世界。有世界名示現摩尼色。佛號變化日。此上過佛刹微塵數世界。有世界名光焰燈莊嚴。佛號寶蓋光徧照。此上過佛刹微塵數世界。有世界名香光雲。佛號思惟慧。此上過佛刹微塵數世界。有世界名無怨讎。佛號精進勝慧海。此上過佛刹微塵數世界。有世界名一切莊嚴具光明幢。佛號普現悅意蓮華自在王。此上過佛刹微塵數世界。有世界名毫相莊嚴。形如半月。依須彌山摩尼華海住。一切莊嚴熾盛光摩尼王雲而覆其上。二十佛刹微塵數世界圍遶。純一清淨。佛號清淨眼。諸佛子。此金剛寶聚香水海右旋。次有香水海。名天城寶堞。世界種名燈焰光明。以普示一切平等法輪音為體。此中最下方。有世界名寶月光焰輪。形如一切莊嚴具。依一切寶莊嚴華海住。琉璃色師子座雲。而覆其上。佛刹微塵數世界圍遶。純一清淨。佛號日月自在光。此上過佛刹微塵數世界。有世界名須彌寶光。佛號無盡法寶幢。此上過佛刹微塵數世界。有世界名衆妙光明幢。佛號大華聚。此上過佛刹微塵數世界。有世界名摩尼光明華。佛

號人中最自在。此上過佛刹微塵數世界。有世界名普音。佛號一切智徧照。此上過佛刹微塵數世界。有世界名大樹緊那羅音。佛號無量福德自在龍。此上過佛刹微塵數世界。有世界名無邊淨光明。佛號功德寶華光。此上過佛刹微塵數世界。有世界名最勝音。佛號一切智莊嚴。此上過佛刹微塵數世界。有世界名衆寶間飾。佛號寶焰須彌山。此上過佛刹微塵數世界。有世界名清淨須彌音。佛號出現一切行光明。此上過佛刹微塵數世界。有世界名香水蓋。佛號一切波羅蜜無礙海。此上過佛刹微塵數世界。有世界名師子華網。佛號寶焰幢。此上過佛刹微塵數世界。有世界名金剛妙華燈。佛號一切大願光。此上過佛刹微塵數世界。有世界名一切法光明地。佛號一切法廣大真實義。此上過佛刹微塵數世界。有世界名真珠牀平坦莊嚴。佛號勝慧光明網。此上過佛刹微塵數世界。有世界名琉璃華。佛號寶積幢。此上過佛刹微塵數世界。有世界名無量妙光輪。佛號大威力智海藏。此上過佛刹微塵數世界。有世界名明見十方。佛號淨修一切功德幢。此上過佛刹微塵數世界。有世界名可愛樂梵音。形如佛手。依寶光網海住。菩薩身一切莊嚴雲而覆其上。二十佛刹微塵數世界圍遶。純一清淨。佛號普照法界無礙光。

十此第九卷經。都有十箇二十重世界種。透此中心世界種。總都有十一箇二十重世界種。於中意趣。前已釋畢。

爾時普賢菩薩。復告大眾言。諸佛子。彼離垢焰藏香水海東。次有香水海名變化微妙身。此海中有世界種名善布差別方。次有香水海名金剛眼幢。世界種名莊嚴法界橋。次有香水海名種種蓮華妙莊嚴。世界種名恆出十方變化。次有香水海名無間寶王輪。世界種名寶蓮華莖密雲。次有香水海名妙香焰普莊嚴。世界種名毘盧遮那變化行。次有香水海名寶珠闍浮幢。世界種名諸佛護念境界。次有香水海名一切色熾然光。世界種名最勝光徧照。次有香水海名一切莊嚴具境界。世界種名寶焰燈。如是等不可說佛刹微塵數香水海。其最近輪圍山香水海名玻璃地。世界種名常放光明。以世界海清淨劫音聲為體。此中最下方。有世界名可愛樂淨光幢。佛刹微塵數世界圍遶。純一清淨。佛號最勝三味精進慧。此上過十佛刹微塵數世界。與金剛幢世界齊等。有世界名香莊嚴幢。十佛刹微塵數世界圍遶。純一清淨。佛號無障礙法界燈。此上過三佛刹微塵數世界。與娑婆世界齊等。有世界名放光藏。佛號徧法界無障礙慧明。此上過七佛刹微塵數世界。至此世界種最上

方。有世界名最勝身香。二十佛刹微塵數世界圍遶。純一清淨。佛號覺分華。諸佛子。彼無盡光明輪香水海外。次有香水海名具足妙光。世界種名徧無垢。次有香水海名光耀蓋。世界種名無邊普莊嚴。次有香水海名妙寶莊嚴。世界種名香摩尼軌度形。次有香水海名出佛音聲。世界種名善建立莊嚴。次有香水海名香幢須彌藏。世界種名光明徧滿。次有香水海名栴檀妙光明。世界種名華焰輪。次有香水海名風力持。世界種名寶焰雲幢。次有香水海名帝釋身莊嚴。世界種名真珠藏。次有香水海名平坦嚴淨。世界種名毘琉璃林種種莊嚴。如是等不可說佛刹微塵數香水海。其最近輪圍山香水海名妙樹華。世界種名出生諸方廣大刹。以一切佛摧伏魔音為體。此中最下方。有世界名焰炬幢。佛號世間功德海。此上過十佛刹微塵數世界。與金剛幢世界齊等。有世界名出生寶。佛號師子力寶雲。此上與娑婆世界齊等。有世界名衣服幢。佛號一切智海王。於此世界種最上方。有世界名寶纓珞師子光明。佛號善變化蓮華幢。諸佛子。彼金剛焰光明香水海外。次有香水海名一切莊嚴具瑩飾幢。世界種名清淨行莊嚴。次有香水海名一切寶華光耀海。世界種名功德相莊嚴。次有香水海名蓮華開敷。世界種名菩薩摩尼冠莊嚴。次有

香水海名妙寶衣服。世界種名淨珠輪。次有香水海名可愛華徧照。世界種名百光雲照耀。次有香水海名徧虛空大光明。世界種名寶光普照。次有香水海名妙華莊嚴幢。世界種名金月眼纓絡。次有香水海名真珠香海藏。世界種名佛光明。次有香水海名寶輪光明。世界種名善化現佛境界光明。如是等不可說佛刹微塵數香水海。其最近輪圍山香水海名無邊輪莊嚴底。世界種名無量方差別。以一切國土種種言說音為體。此中最下方。有世界名金剛華蓋。佛號無盡相光明普門音。此上過十佛刹微塵數世界。有世界與金剛幢世界齊等。名出生寶衣幢。佛號福德雲大威勢。此上與娑婆世界齊等。有世界名衆寶具妙莊嚴。佛號勝慧海。於此世界種最上方。有世界名曰光明衣服幢。佛號智曰蓮華雲。諸佛子。彼帝青寶莊嚴香水海外。次有香水海名阿修羅宮殿。世界種名香水光所持。次有香水海名寶師子莊嚴。世界種名徧示十方一切寶。次有香水海名宮殿色光明雲。世界種名寶輪妙莊嚴。次有香水海名出大蓮華。世界種名妙莊嚴徧照法界。次有香水海名燈焰妙眼。世界種名徧觀察十方變化。次有香水海名不思議莊嚴輪。世界種名十方光明普名稱。次有香水海名寶積莊嚴。世界種名燈光照耀。次有香水海名清淨寶光明。世

界種名須彌無能為礙風。次有香水海名寶衣欄楯。世界種名如來身光明。如是等不可說佛刹微塵數香水海。其最近輪圍山香水海名樹莊嚴幢。世界種名安住帝網。以一切菩薩智地音聲為體。此中最下方。有世界名妙金色。佛號香焰勝威光。此上過十佛刹微塵數世界。與金剛幢世界齊等。有世界名摩尼樹華。佛號無礙普現。此上與娑婆世界齊等。有世界名毘琉璃妙莊嚴。佛號法自在堅固慧。於此世界種最上方。有世界名梵音妙莊嚴。佛號蓮華開敷光明王。諸佛子。彼金剛輪莊嚴底香水海外。次有香水海名化現蓮華處。世界種名國土平正。次有香水海名摩尼光。世界種名徧法界無迷惑。次有香水海名衆妙香口摩尼。世界種名普現十方。次有香水海名恆納寶流。世界種名普行佛言音。次有香水海名無邊深妙音。世界種名無邊方差別。次有香水海名堅實積聚。世界種名無量處差別。次有香水海名清淨梵音。世界種名普清淨莊嚴。次有香水海名栴檀欄楯音聲藏。世界種名迴出幢。次有香水海名妙香寶王光莊嚴。世界種名普現光明力。諸佛子。彼蓮華因陀羅網香水海外。次有香水海名銀蓮華妙莊嚴。世界種名普徧行。次有香水海名毘琉璃竹密焰雲。世界種名普出十方音。次有香水海名十方光焰聚。世界種名恆出

變化分布十方。次有香水海名出現真金摩尼幢。世界種名金剛幢相。次有香水海名平等大莊嚴。世界種名法界勇猛旋。次有香水海名寶華叢無盡光。世界種名無邊淨光明。次有香水海名妙金幢。世界種名演說微密處。次有香水海名光影徧照。世界種名普莊嚴。次有香水海名寂音。世界種名現前垂布。如是等不可說佛剎微塵數香水海。其最近輪圍山香水海名密焰雲幢。世界種名一切光莊嚴。以一切如來道場衆會音為體。於此最下方。有世界名淨眼莊嚴。佛號金剛月徧照十方。此上過十佛剎微塵數世界。與金剛幢世界齊等。有世界名蓮華德。佛號大精進善覺慧。此上與娑婆世界齊等。有世界名金剛密莊嚴。佛號娑羅王幢。此上過七佛剎微塵數世界。有世界名淨海莊嚴。佛號威德絕倫無能制伏。諸佛子。彼積集寶香藏香水海外。次有香水海名一切寶光明徧照。世界種名無垢稱莊嚴。次有香水海名衆寶華開敷。世界種名虛空相。次有香水海名吉祥幄徧照。世界種名無礙光普莊嚴。次有香水海名栴檀樹華。世界種名普現十方旋。次有香水海名出生妙色寶。世界種名勝幢周徧行。次有香水海名普生金剛華。世界種名現不思議莊嚴。次有香水海名心王摩尼輪嚴飾。世界種名示現無礙佛光明。次有香水海名積集寶纓

瑠。世界種名淨除疑。次有香水海名真珠輪普莊嚴。世界種名諸佛願所流。如是等不可說佛刹微塵數香水海。其最近輪圍山香水海名閻浮檀寶藏輪。世界種名普音幢。以入一切智門音聲為體。此中最下方。有世界名華莖焰。佛號精進施。此上過十佛刹微塵數世界。與金剛幢世界齊等。有世界名蓮華光明幢。佛號一切功德最勝心王。此上過三佛刹微塵數世界。與娑婆世界齊等。有世界名十力莊嚴。佛號善出現無量功德王。於此世界種最上方。有世界名摩尼香山幢。佛號廣大善眼淨除疑。諸佛子。彼寶莊嚴香水海外。次有香水海名持須彌光明藏。世界種名出生廣大雲。次有香水海名種種莊嚴大威力境界。世界種名無礙淨莊嚴。次有香水海名密布寶蓮華。世界種名最勝燈莊嚴。次有香水海名依止一切寶莊嚴。世界種名曰光明網藏。次有香水海名衆多嚴淨。世界種名寶華依處。次有香水海名極聰慧行。世界種名最勝形莊嚴。次有香水海名持妙摩尼峰。世界種名普淨虛空藏。次有香水海名大光徧照。世界種名帝青炬光明。次有香水海名可愛摩尼珠充滿徧照。世界種名普吼聲。如是等不可說佛刹微塵數香水海。其最近輪圍山香水海名出帝青寶。世界種名周徧無差別。以一切菩薩震吼聲為體。此中最下方。有世界

名妙勝藏。佛號最勝功德慧。此上過十佛刹微塵數世界。與金剛幢世界齊等。有世界名莊嚴相。佛號超勝大光明。此上與娑婆世界齊等。有世界名琉璃輪普莊嚴。佛號須彌燈。於此世界種最上方。有世界名華幢海。佛號無盡變化妙慧雲。諸佛子。彼金剛寶聚香水海外。次有香水海名崇飾寶埤垵。世界種名秀出寶幢。次有香水海名寶幢莊嚴。世界種名現一切光明。次有香水海名妙寶雲。世界種名一切寶莊嚴光明徧照。次有香水海名寶樹華莊嚴。世界種名妙華閻節。次有香水海名妙寶衣莊嚴。世界種名光明海。次有香水海名寶樹峰。世界種名寶焰雲。次有香水海名示現光明。世界種名入金剛無所礙。次有香水海名蓮華普莊嚴。世界種名無邊岸海淵。次有香水海名妙寶莊嚴。世界種名普示現國土藏。如是等不可說佛刹微塵數香水海。其最近輪圍山香水海名不可壞海。世界種名妙輪閻錯蓮華場。以一切佛力所出音為體。此中最下方。有世界名最妙香。佛號變化無量塵數光。此上過十佛刹微塵數世界。與金剛幢世界齊等。有世界名不思議差別莊嚴門。佛號無量智。此上與娑婆世界齊等。有世界名十方光明妙華藏。佛號師子眼光焰雲。於此最上方。有世界名海音聲。佛號水天光焰門。諸佛子。彼天城寶堞香水海外。

次有香水海名焰輪赫奕光。世界種名不可說種種莊嚴。次有香水海名寶塵路。世界種名普入無量旋。次有香水海名具一切莊嚴。世界種名寶光徧照。次有香水海名布衆寶網。世界種名安布深密。次有香水海名妙寶莊嚴幢。世界種名世界海明了音。次有香水海名口宮清淨影。世界種名徧入因陀羅網。次有香水海名一切鼓樂美妙音。世界種名圓滿平正。次有香水海名種種妙莊嚴。世界種名淨密光焰雲。次有香水海名周徧寶焰燈。世界種名隨佛本願種種形。如是等不可說佛刹微塵數香水海。其最近輪圍山香水海名積集纓珞衣。世界種名化現妙衣。以三世一切佛音聲為體。此中最下方。有香水海名因陀羅華藏。世界名發生歡喜。佛刹微塵數世界圍遶。純一清淨。佛號堅悟智。此上過十佛刹微塵數世界。與金剛幢世界齊等。有世界名寶網莊嚴。十佛刹微塵數世界圍遶。純一清淨。佛號無量歡喜光。此上過三佛刹微塵數世界。與娑婆世界齊等。有世界名寶蓮華師子座。十二佛刹微塵數世界圍遶。佛號最清淨不空聞。此上過七佛刹微塵數世界。至此世界種最上方。有世界名寶色龍光明。二十佛刹微塵數世界圍遶。純一清淨。佛號遍法界普照明。

第十一此第十卷中。總舉一百箇世界種。圍遶中心十一箇二十重世界種。布列而住。近輪圍山十箇世界種。上下四重。高下與此中心十一箇世界種相似。中間相去極遠。自餘九十箇世界種。不云重數。大數有一百一十箇世界種。於中表意如前已釋。

諸佛子。如是十不可說佛刹微塵數香水海中。有十不可說佛刹微塵數世界種。皆依現一切菩薩形摩尼王幢莊嚴蓮華住。各各莊嚴際。無有間斷。各各放寶色光明。各各光明雲而覆其上。各各莊嚴具。各各劫差別。各各佛出現。各各演法海。各各衆生徧充滿。各各十方普趣入。各各一切佛神力所加持。此一世界種中。一切世界。依種種莊嚴住。遞相接連。成世界網。於華藏莊嚴世界海。種種差別。周徧建立。爾時普賢菩薩。欲重宣其義。承佛威力。而說頌言。

華藏世界海

法界等無別

莊嚴極清淨

安住於虛空

此世界海中

刹種難思議

一一皆自在

各各無雜亂

華藏世界海

刹種善安布

殊形異莊嚴

種種相不同

諸佛變化音

種種爲其體

隨其業力現

刹種妙嚴飾

須彌山城網	水漩輪圍形	廣大蓮華開	彼彼互圍遶
山幢樓閣形	旋轉金剛形	如是不思議	廣大諸刹種
大海眞珠焰	光網不思議	如是諸刹種	悉在蓮華住
一一諸刹種	光網不可說	光中現衆刹	普徧十方海
一切諸刹種	所有莊嚴具	國土悉入中	普見無有盡
刹種不思議	世界無邊際	種種妙嚴好	皆由大仙力
一切刹種中	世界不思議	或成或有壞	或有已壞滅
譬如林中葉	有生亦有落	如是刹種中	世界有成壞
譬如依樹林	種種果差別	如是依刹種	種種衆生住
譬如種子別	生果各殊異	業力差別故	衆生刹不同
譬如心王寶	隨心見衆色	衆生心淨故	得見清淨刹
譬如大龍王	興雲徧虛空	如是佛願力	出生諸國土
如幻師咒術	能現種種事	衆生業力故	國土不思議
譬如衆續像	畫師之所作	如是一切刹	心畫師所成

衆生身各異

隨心分別起

如是剎種種

莫不皆由業

譬如見導師

種種色差別

隨衆生心行

見諸剎亦然

一切諸剎際

周布蓮華網

種種相不同

莊嚴悉清淨

彼諸蓮華網

剎網所安住

種種莊嚴事

種種衆生居

或有剎土中

險惡不平坦

由衆生煩惱

於彼如是見

雜染及清淨

無量諸剎種

隨衆生心起

菩薩力所持

或有剎土中

雜染及清淨

斯由業力起

菩薩之所化

有剎放光明

離垢寶所成

種種妙嚴飾

諸佛令清淨

一一剎種中

劫燒不思議

所現雖敗惡

其處常堅固

由衆生業力

出生多剎土

依止於風輪

及以水輪住

世界法如是

種種見不同

而實無有生

亦復無滅壞

一一心念中

出生無量剎

以佛威神力

悉見淨無垢

有利泥土成

其體甚堅硬

黑闇無光照

惡業者所居

有利金剛成

雜染大憂怖

苦多而樂少

薄福之所處

或有難思刹	或有諸刹土	汝應觀世間	一一毛孔中	衆生各各業	有利衆寶成	有利光爲體	有利月輪成	有利衆寶成	有利香爲體	或有難思刹
華旋所成就	七寶所合成	其中人與天	億刹不思議	世界無量種	常放無邊光	依止光輪住	香衣悉周布	色相無諸垢	或是金剛華	華旋所成就
化佛皆充滿	種種諸宮殿	淨業果成就	種種相莊嚴	於中取著生	金剛妙蓮華	金色栴檀香	於一蓮華內	譬如天帝網	摩尼光影形	化佛皆充滿
菩薩普光明	斯由淨業得	隨時受快樂	未曾有迫隘	受苦樂不同	莊嚴淨無垢	焰雲普照明	菩薩皆充滿	光明恆照耀	觀察甚清淨	菩薩普光明
	或以赤銅作	衆生苦無救	石山險可畏	罪惡者充滿						
	刹中有地獄	種種醜陋形	常在黑闇中	焰海所燒然						
	或復有畜生	飢渴所煎逼	由其自惡業	常受諸苦惱						
	或見閻羅界	飢渴所煎逼	登上大火山	受諸極重苦						

或有清淨刹

悉是衆華樹

妙枝布道場

蔭以摩尼雲

有刹淨光照

金剛華所成

有是佛化音

無邊列成網

有刹如菩薩

摩尼妙寶冠

或有如座形

從化光明出

或是梅檀栴

或是眉間光

或佛光中音

而成斯妙刹

有見清淨刹

以一光莊嚴

或見多莊嚴

種種皆奇妙

或用十國土

妙物作嚴飾

或以千土中

一切爲莊校

或以億刹物

莊嚴於一土

種種相不同

皆如影像現

不可說土物

莊嚴於一刹

各各放光明

如來願力起

或有諸國土

願力所淨治

一切莊嚴中

普見衆刹海

諸修普賢願

所得清淨土

三世刹莊嚴

一切於中現

佛子汝應觀

刹種威神力

未來諸國土

如夢悉令見

十方諸世界

過去國土海

咸於一刹中

現像猶如化

三世一切佛

及其國土

於一刹種中

一切悉觀見

一切佛神力

塵中現衆土

種種悉明見

如影無眞實

或有衆多刹	其形如大海	或如須彌山	世界不思議
有利善安住	其形如帝網	或如樹林形	諸佛滿其中
或作寶輪形	或有蓮華狀	八隅備衆飾	種種悉清淨
或有如座形	或復有三隅	或如佉勒迦	城廓梵王身
或如天主髻	或有如半月	或如摩尼山	或如日輪形
或有世界形	譬如香海漩	或作光明輪	佛昔所嚴淨
或有輪輞形	或有壇墀形	或如佛毫相	肉髻廣長眼
或有如佛手	或如金剛杵	或如焰山形	菩薩悉周徧
或如師子形	或如海蚌形	無量諸色相	體性各差別
於一刹種中	刹形無有盡	皆由佛願力	護念得安住
有利住一劫	或住於十劫	乃至過百千	國土微塵數
或於一劫中	見刹有成壞	或無量無數	乃至不思議
或有刹有佛	或有刹無佛	或有唯一佛	或有無量佛
國土若無佛	他方世界中	有佛變化來	爲現諸能事

歿天與降神	處胎及出生	降魔成正覺	轉無上法輪
隨衆生心樂	示現種種相	爲轉妙法輪	悉應其根欲
一一佛刹中	一佛出興世	經於億千歲	演說無上法
衆生非法器	不能見諸佛	若有心樂者	一切處皆見
一一刹土中	各有佛興世	一切刹中佛	億數不思議
此中一一佛	現無量神變	悉徧於法界	調伏衆生海
有刹無光明	黑闇多恐懼	苦觸如刀劍	見者自酸毒
或有諸天光	或有宮殿光	或日月光明	刹網難思議
有刹自光明	或樹放淨光	未曾有苦惱	衆生福力故
或有山光明	或有摩尼光	或以燈光明	悉衆生業力
或有佛光明	菩薩滿其中	有是蓮華光	焰色甚嚴好
有刹華光照	有以香水照	塗香燒香照	皆由淨願力
有以雲光照	摩尼蚌光照	佛神力光照	能宣悅意聲
或以寶光照	或金剛焰照	淨音能遠震	所至無衆苦

或有摩尼光	或是嚴具光	或道場光明	照耀衆會中
佛放大光明	化佛滿其中	其光普照觸	法界悉周徧
有刹甚可畏	號叫大苦聲	其聲極酸楚	聞者生厭怖
地獄畜生道	及以閻羅處	是濁惡世界	恆出憂苦聲
或有國土中	常出可樂音	悅意順其教	斯由淨業得
或有國土中	恆聞帝釋音	或聞梵天音	一切世主音
或有諸刹土	雲中出妙聲	寶海摩尼樹	及樂音徧滿
諸佛圓光內	化聲無有盡	及菩薩妙音	周聞十方刹
不可思議國	普轉法輪聲	願海所出聲	修行妙音聲
三世一切佛	出生諸世界	名號皆具足	音聲無有盡
或有刹中間	一切佛力音	地度及無量	如是法皆演
普賢誓願力	億刹演妙音	其音若雷震	住劫亦無盡
佛於清淨國	示現自在音	十方法界中	一切無不聞

十二第十卷經末一段頌。都頌已前諸世界海。安住虛空。或淨或穢。純雜同

居。而不相障。皆由業力所起。經文廣博。不可子細科文。文句亂繁。障其義趣。於中義味大意。前已略述。餘之廣義。經文自具。不同小經。小經即須多引外文。莊飾其義。此大部一乘之典。餘經義與此多不相應。意況與三乘全別。不可例此經典。此已上十卷經。明三度舉果。一前如來始成正覺。及座內衆。舉佛果行果。明佛自證。二眉間衆。是舉佛中道行果。與一切未信者。作成信之因。三華藏世界海。明是所向前座內衆眉間衆。所行之行報得之果。大意以佛報業之果。答前三十七問。見果知因。使後學者。如是倣之。行如是行願。得如是果報。

大方廣佛新華嚴經合論卷第二十三終

大方廣佛新華嚴經合論卷第二十四

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

毘盧遮那品第六

將釋此品。約作三門分別。一釋品來意。二釋品名目。三隨文釋義。一釋品來意者。前之五品。以舉現世毘盧遮那佛果。恐不成信。何以然者。爲古無舊迹。今何所來。以此引古證今。明道不謬故。又明古今諸佛。三世法相似故。成其信者。不狐疑故。二釋品名。毘盧遮那品者。此品依主得名。明引古佛成今信。還以佛號以爲品名。毘云種種。遮那云光明。言以法身悲智。設種種教行之光。破衆生之業暗故。問曰。古佛今佛。爲一爲異。答曰。爲一爲異。何以然者。爲法身。智身。九十七大人之相。大慈。大悲。智慧。解脫。是一。各各衆生。發心成佛。是異。又無量三世諸佛。皆同一念成佛。無前後際。是一。然亦不壞一念

中。見無量衆生。三世劫量。是異。以十玄門。六相義。該通可解。經云。一切諸佛身。唯是一法身。一身一智慧。力無畏亦然。三隨文釋義者。於此一品經中。長科總有十五段經文。於此十五段文中。有四佛出世。總明毘盧遮那一號。各隨世間應緣名異。非是佛名號異。此經下文佛名號品。一一佛。皆具等法界衆生界隨緣名號。世間一切名號。皆是諸佛名。爲如來德徧一切法故。猶如虛空徧含衆法無不淨故。一切衆生名。入佛名號無不淨故。又如有香。名爲象藏。因龍鬪而生。燒之一丸。凝停七日。降金色雨。霑人身者。悉皆金色。一切名言。入佛名號者。悉皆清淨。亦復如是。如是佛名號。徧一切世界名字故。始名毘盧遮那。以種種教行之光。徧照一切。以法眼照之。其長科十五段者。

爾時普賢菩薩。復告大衆言。諸佛子。乃往古世。過世界微塵數劫。復倍是數。有世界海名普門淨光明。此世界海中。有世界名勝音。依摩尼華網海住。須彌山微塵數世界而爲眷屬。其形正圓。其地具有無量莊嚴。三百重衆寶樹輪圍山所共圍遶。一切寶雲而覆其上。清淨無垢。光明照耀。城邑宮殿。如須彌山。衣服飲食。隨念而至。其劫名曰。種種莊嚴。

一爾時已下。一段八行經。明普賢告衆。欲說其法。於此段中。復分爲十。一舉古佛所過之劫數。二舉古世界海之名。三舉世界海中別有世界之號。四舉世界所依住處。五舉世界周圍眷屬之數。六舉世界形狀。七舉世界地上莊嚴。八舉世界寶樹及山輪圍重數。九舉世界城邑宮殿。十舉世界人飲食衣服隨念而至。及舉劫名。此已上但隨文自具。不煩更解。

諸佛子。彼勝音世界中。有香水海名清淨光明。其海中有大蓮華須彌山出現。名華焰普莊嚴幢。十寶欄楯。周匝圍遶。於其山上。有一大林。名摩尼華枝輪。無量華樓閣。無量寶臺觀。周迴布列。無量妙香幢。無量寶山幢。迴極莊嚴。無量寶芬陀利華。處處敷榮。無量香摩尼蓮華網。周匝垂布。樂音和悅。香雲照耀。數各無量。不可紀極。有百萬億那由他城。周匝圍遶。種種衆生。於中止住。

二諸佛子已下。有八行半經。於中大意。義分爲八。一明勝音世界中香水海。及舉其名。二明海中有華山出現。形如須彌。三明山上莊嚴有十。四明山上有一大樹林。及舉林名。五舉山上五種無量衆事莊嚴。六明都舉莊嚴難紀。七明山上諸城之數。八明雜類衆生共居。云芬陀利華者。此云白蓮華也。此上一段。文自

顯著。不煩更解。

諸佛子。此林東有一大城。名焰光明。人王所都。百萬億那由他城。周匝圍遶。清淨妙寶。所共成立。縱廣各有七千由旬。七寶為郭。樓櫓卻敵。悉皆崇麗。七重寶壘。香水盈滿。優鉢羅華。波頭摩華。拘物頭華。芬陀利華。悉是衆寶。處處分布。以為嚴飾。寶多羅樹。七重圍遶。宮殿樓閣。悉寶莊嚴。種種妙網。張施其上。塗香散華。芬瑩其中。有百萬億那由他門。悉寶莊嚴。一一門前。各有四十九寶戶羅幢。次第行列。復有百萬億園林。周匝圍遶。其中皆有種種雜香。摩尼樹香。周流普熏。衆鳥和鳴。聽者歡悅。此大城中所有居人。靡不成就業報神足。乘空往來。行同諸天。心有所欲。應念皆至。其城次南。有一天城。名樹華莊嚴。其次右旋。有大龍城。名曰究竟。次有夜叉城。名金剛勝妙幢。次有乾闥婆城。名曰妙宮。次有阿修羅城。名曰寶輪。次有迦樓羅城。名妙寶莊嚴。次有梵天王城。名種種妙莊嚴。如是等百萬億那由他數。此一一城。各有百萬億那由他樓閣。所共圍遶。一一皆有無量莊嚴。

三諸佛子已下。十九行半經。明林東之城。於此段中。義分爲十。一舉城之

名。二舉人王所居。三舉諸城圍遶。四明城體衆寶所成。五明城廣狹。六明城郭莊嚴悉皆崇麗。七明城上下衆事莊嚴。言櫓者。依音義解云。城上守禦曰櫓。出頭前引曰敵。衆飾高勝曰崇。美而可觀曰麗。城下遶而長坑。深廣者曰壕。狹者爲塹。優鉢羅華者。此云青色華。根似藕。其葉狹長。近下小圓。上漸尖。似佛眼故。其華莖無刺。准歎佛中。目淨脩廣如青蓮。即是青蓮華葉也。波頭摩華。此云赤蓮華。其華莖有刺。拘物頭華。其莖有刺。或曰赤白華也。其華葉頭稍短。未開敷時。狀如郁蹙然也。芬陀利華者。白蓮華也。寶多羅樹者。或云無憂樹。此之未定。檢文未得也。七重圍遶。法事中或一三五七九。契陽數也。尸羅。此云清淨寶幢。已上莊嚴。總爲衆寶。八明城中居人。九明人得業報神通也。所念皆至十明城四遶天龍乾闥婆等。七種雜類諸城所居。及都結城及莊嚴無量。問曰。此中一種是人。非天龍神。何得業報神通。衣服飲食隨念而至。又所居高勝。依報寶嚴。以何業故。報得如是。答曰。爲因廣大故。業報廣大。爲因高勝故。業報所居高勝。問曰。何者是因廣大高勝。答曰。爲於往因。於此毘盧遮那法界智。體用無依住門。性清淨法。而生信心。修信解力。常信自他凡聖一體。同如來智。

無所依住。無我無我所。心境平等。無二相故。無我所故。一切凡聖。本唯法界。無造作性。無生滅性。依真而住。住無所住。與一切諸佛衆生。同一心智。住性眞法界。所有分別。是一切諸佛本不動智。凡聖一眞。共同此智。全信自心是佛種智。及一切智故。不於心外別有信佛之心。亦不於自心之內。見自心有佛相故。信如斯法。自力未充。以此是人。獲諸人中一切勝報。以是信力。還得毘盧遮那佛在國同居。而恆出現神足通力。與天同處。一切諸城所居神天龍八部等。皆是同緣。於此法中而生信解故。以此信因高勝廣大。獲得如斯勝妙依正果報故。諸佛子。此寶華枝輪大林之中。有一道場。名寶華徧照。以衆大寶。分布莊嚴。摩尼華輪。徧滿開敷。然以香燈。具衆寶色。焰雲彌覆。光網普照。諸莊嚴具。常出妙寶。一切樂中。恆奏雅音。摩尼寶王。現菩薩身。種種妙華。周徧十方。其道場前。有一大海。名香摩尼金剛。出大蓮華。名華藥焰輪。其華廣大百億由旬。莖葉鬚臺。皆是妙寶。十不可說百千億那由他蓮華。所共圍遶。常放光明。恆出妙音。周徧十方。

四諸佛子已下。有九行經。明華枝林中道場。并陳嚴飾廣大。此林衆華嚴飾。

常有妓樂之音。

諸佛子。彼勝音世界。最初劫中。有十須彌山微塵數如來出興於世。其第一佛。號一切功德山須彌勝雲。諸佛子。應知彼佛將出現時。一百年前。此摩尼華枝輪大林中。一切莊嚴。周徧清淨。所謂出不思議寶焰雲。發歎佛功德音。演無數佛音聲。舒光布網。彌覆十方。宮殿樓閣。互相照耀。寶華光明。騰聚成雲。復出妙音。說一切衆生前世所行廣大善根。說三世一切諸佛名號。說諸菩薩所修願行究竟之道。說諸如來轉妙法輪種種言辭。現如是等莊嚴之相。顯示如來當出於世。其世界中。一切諸王。見此相故。善根成熟。悉欲見佛。而來道場。

五諸佛子已下。有十二行半經。明初劫中佛出現之數。并陳初佛名號。及舉華枝大林先現之瑞。

爾時一切功德山須彌勝雲佛。於其道場大蓮華中忽然出現。其身周普。等真法界。一切佛刹。皆示出生。一切道場。悉詣其所。無邊妙色。具足清淨。一切世間。無能映奪。具衆寶相。一一分明。一切宮殿。悉現其像。一切衆生。咸得目見。無邊化佛。從其身出。種種色光。充滿法界。如於此清淨光明香水海。華焰莊嚴。

幢須彌頂上。摩尼華枝輪大林中。出現其身而坐於座。其勝音世界。有六十八千億須彌山頂。悉亦於彼現身而坐。

六爾時已下。有九行半經。明初佛蓮華中忽然出現。并陳佛身徧坐一切法界道場。衆生皆見等事。問曰。何故此佛蓮華化現出興。釋迦佛母胎出現。答曰。隨根所現。母胎出現。唯劣解衆生自根見爾。如離世間品云。爲劣解衆生。母胎出爾。應大根衆生。皆見蓮華出現也。

爾時彼佛。即於眉間放大光明。其光名發起一切善根音。十佛剎微塵數光明。而為眷屬。充滿一切十方國土。若有衆生。應可調伏。其光照觸。即自開悟。息諸惑熱。裂諸蓋網。摧諸障山。淨諸垢濁。發大信解。生勝善根。永離一切諸難恐怖。滅除一切身心苦惱。起見佛心。趣一切智。時一切世間主。并其眷屬無量百千。蒙佛光明所開覺故。悉詣佛所。頭面禮足。

七爾時已下。有八行經。明初佛出現。放光集衆。并陳光德。大衆來集。

諸佛子。彼焰光明大城中。有王名喜見善慧。統領百萬億那由他城。夫人嫫女三萬七千人。福吉祥為上首。王子五百人。大威光為上首。大威光太子。有十千夫

人。妙見為上首。爾時大威光太子。見佛光明已。以昔所修善根力故。即時證得十種法門。何謂為十。所謂證得一切諸佛功德輪三昧。證得一切佛法普門陀羅尼。證得廣大方便藏般若波羅蜜。證得調伏一切衆生大莊嚴大慈。證得普雲音大悲。證得生無邊功德最勝心大喜。證得如實覺悟一切法大捨。證得廣大方便平等藏大神通。證得增長信解力大願。證得普入一切智光明辯才門。爾時大威光太子。獲得如是法光明已。承佛威力。普觀大眾而說頌言。

世尊坐道場

清淨大光明

譬如千日出

普照虛空界

無量億千劫

導師時乃現

佛今出世間

一切所瞻奉

汝觀佛光明

化佛難思議

一切宮殿中

寂然而正受

汝觀佛神通

毛孔出焰雲

照耀於世間

光明無有盡

汝應觀佛身

光網極清淨

現形等一切

徧滿於十方

妙音徧世間

聞者皆欣樂

隨諸衆生語

讚歎佛功德

世尊光所照

衆生悉安樂

有苦皆滅除

心生大歡喜

觀諸菩薩衆

十方來萃止

悉放摩尼雲

現前稱讚佛

道場出妙音

其音極深遠

能滅衆生苦

此是佛神力

一切咸恭敬

心生大歡喜

共在世尊前

瞻仰於法王

八諸佛子已下。有十四行經。明光明大城。有人王名喜見善慧。王與眷屬俱集。并陳太子威光。以自善根。見佛光明。得十種法門。具如經說。最下三句。明威光說頌歎佛。於此十行頌中。歎佛之德。及德與衆生益。如文可知。諸佛子。彼大威光太子。說此頌時。以佛神力。其聲普徧勝音世界。時喜見善慧王。聞此頌已。心大歡喜。觀諸眷屬而說頌言。

汝應速召集

一切諸王衆

王子及大臣

城邑宰官等

普告諸城內

疾應擊大鼓

共集所有人

俱行往見佛

一切四衢道

悉應鳴寶鐸

妻子眷屬俱

共往觀如來

一切諸城郭

宜令悉清淨

普建勝妙幢

摩尼以嚴飾

寶帳羅衆網

妓樂如雲布

嚴備在虛空

處處令充滿

道路皆嚴淨

普雨妙衣服

巾馭汝寶乘

與我同觀佛

各各隨自力

普雨莊嚴具

一切如雲布

徧滿虛空中

香焰蓮華蓋

半月寶纓珞

及無數妙衣

汝等皆應雨

須彌香水海

上妙摩尼輪

及清淨栴檀

悉應雨滿空

衆寶華纓珞

莊嚴淨無垢

及以摩尼燈

皆令在空住

一切持向佛

心生大歡喜

妻子眷屬俱

往見世所尊

九諸佛子已下。有兩行半經。明威光說頌。以佛神力。其聲徧聞。父王聞之。歡喜說頌。於此十一行頌中。明其善慧王。敕衆令集。并令辦供具。

爾時喜見善慧王。與三萬七千夫人嫫女俱。福吉祥為上首。五百王子俱。大威光為上首。六萬大臣俱。慧力為上首。如是等七十七百千億那由他衆。前後圍遶。從焰光明大城出。以王力故。一切大衆乘空而往。諸供養具徧滿虛空。至於佛所。頂禮佛足。卻坐一面。復有妙華城善化幢天王。與十億那由他眷屬俱。復有究竟大城淨光龍王。與二十五億眷屬俱。復有金剛勝幢城猛健夜叉王。與七十七億眷屬俱。復有無垢城喜見乾闥婆王。與九十七億眷屬俱。復有妙輪城淨色思惟阿修羅王。與五十八億眷屬俱。復有妙莊嚴城十力行迦樓羅王。與九十九眷屬俱。復有遊戲快樂城金剛德緊那羅王。與十八億眷屬俱。復有金剛幢城寶稱幢摩睺羅

伽王。與二億百千那由他眷屬俱。復有淨妙莊嚴城最勝梵王。與十八億眷屬俱。如是等百萬億那由他大城中。所有諸王。并其眷屬。悉共往詣一切功德須彌勝雲如來所。頂禮佛足。卻坐一面。時彼如來。為欲調伏諸衆生故。於衆會道場海中。說普集一切三世佛自在法修多羅。世界微塵數修多羅。而為眷屬。隨衆生心。悉令獲益。是時大威光菩薩。聞是法已。即獲一切功德須彌勝雲佛。宿世所集法海光明。所謂得一切法聚平等三昧智光明。一切法悉入最初菩提心中住智光明。十方法界普光明藏清淨眼智光明。觀察一切佛法大願海智光明。入無邊功德海清淨行智光明。趣向不退轉大力速疾藏智光明。法界中無量變化力出離輪智光明。決定入無量功德圓滿海智光明。了知一切佛決定解莊嚴成就海智光明。了知法界無邊佛現一切衆生前神通海智光明。了知一切佛力無所畏法智光明。爾時大威光菩薩。得如是無量智光明已。承佛威力。而說頌言。

我聞佛妙法

而得智光明

以是見世尊

往昔所行事

一切所生處

名號身差別

及供養於佛

如是我咸見

往昔諸佛所

一切皆承事

無量劫修行

嚴淨諸剎海

捨施於自身	廣大無涯際	修治最勝行	嚴淨諸剎海
耳鼻頭手足	及以諸宮殿	捨之無有量	嚴淨諸剎海
能於一一剎	億劫不思議	修習菩提行	嚴淨諸剎海
普賢大願力	一切佛海中	修行無量行	嚴淨諸剎海
如因日光照	還見於日輪	我以佛智光	見佛所行道
我觀佛剎海	清淨大光明	寂靜證菩提	法界悉周徧
我當如世尊	廣淨諸剎海	以佛威神力	修習菩提行

十爾時已下。有三十四行半經。明十王興供見佛。并陳所聞修多羅經。威光獲益。修多羅者。此爲長行經也。最下兩句。明威光說偈。此十行頌中。明威光聞法獲益。得宿命智力。見佛所行往因之事。并自立願。如佛所行。

諸佛子。時大威光菩薩。以見一切功德山須彌勝雲佛。承事供養故。於如來所。心得悟了。為一切世間。顯示如來往昔行海。顯示往昔菩薩行方便。顯示一切佛功德海。顯示普入一切法界清淨智。顯示一切道場中成佛自在力。顯示佛力無畏無差別智。顯示普示現如來身。顯示不可思議佛神變。顯示莊嚴無量清淨佛土。

顯示普賢菩薩所有行願。令如須彌山微塵數衆生。發菩提心。佛刹微塵數衆生。成就如來清淨國土。爾時一切功德山須彌勝雲佛。為大威光菩薩而說頌言。

善哉大威光

福藏廣名稱

為利衆生故

發趣菩提道

汝獲智光明

法界悉充滿

福慧咸廣大

當得深智海

一刹中修行

經於刹塵劫

如汝見於我

當獲如是智

非諸劣行者

能知此方便

獲大精進力

乃能淨刹海

一一微塵中

無量劫修行

彼人乃能得

莊嚴諸佛刹

為一一衆生

輪迴經劫海

其心不疲懈

當成世導師

供養一一佛

悉盡未來際

心無暫疲厭

當成無上道

三世一切佛

當共滿汝願

一切佛會中

汝身安住彼

一切諸如來

誓願無有邊

大智通達者

能知此方便

大光供養我

故獲大威力

令塵數衆生

成熟向菩提

諸修普賢行

大名稱菩薩

莊嚴佛刹海

法界普周徧

十一諸佛子已下。有十一行經。明威光菩薩。以見初佛。承事供養故。得十

種顯示如來所行法。令須彌山塵數衆生。發菩提心。功德山須彌勝雲如來。爲威光說頌。歎威光之德。於此十一行頌中。明功德山如來。歎威光所得。如佛所行廣大。如文可知。

諸佛子。汝等應知彼大莊嚴劫中。有恆河沙數小劫。人壽命一小劫。諸佛子。彼一切功德須彌勝雲佛。壽命五十億歲。彼佛滅度後。有佛出世。名波羅蜜善眼莊嚴王。亦於彼摩尼華枝輪大林中。而成正覺。爾時大威光童子。見彼如來。成等正覺。現神通力。即得念佛三昧。名無邊海藏門。即得陀羅尼。名大智力法淵。即得大慈。名普隨衆生調伏度脫。即得大悲。名徧覆一切境界雲。即得大喜。名一切佛功德海威力藏。即得大捨。名法性虛空平等清淨。即得般若波羅蜜。名自性離垢法界清淨身。即得神通。名無礙光普隨現。即得辯才。名善入離垢淵。即得智光。名一切佛法清淨藏。如是等十千法門。皆得通達。爾時大威光童子。承佛威力。為諸眷屬。而說頌言。

不可思議億劫中

導世明師難一遇

此土衆生多善利

而今得見第二佛

佛身普放大光明

色相無邊極清淨

如雲充滿一切土

處處稱揚佛功德

光明所照咸歡喜

衆生有苦悉除滅

各令恭敬起慈心

此是如來自在用

出不思議變化雲

放無量色光明網

十方國土皆充滿

此佛神通之所現

一一毛孔現光雲

普徧虛空發大音

所有幽冥靡不照

地獄衆苦咸令滅

如來妙音徧十方

一切言音咸具演

隨諸衆生宿善力

此是大師神變用

無量無邊大衆海

佛於其中皆出現

普轉無盡妙法輪

調伏一切諸衆生

佛神通力無有邊

一切剎中皆出現

善逝如是智無礙

爲利衆生成正覺

汝等應生歡喜心

踊躍愛樂極尊重

我當與汝同詣彼

若見如來衆苦滅

發心迴向趣菩提

慈念一切諸衆生

悉住普賢廣大願

當如法王得自在

十二諸佛子已下。有十四行半經。明莊嚴劫中。佛及人壽命長短。初佛去世。

第二佛出興。并明威光見第二佛。得十種利。并爲眷屬說頌。此二十行頌中。明威光歎佛慈悲。出世難遇。勸其眷屬。同往佛所。

諸佛子。大威光童子。說此頌時。以佛神力。其誓無礙。一切世界。皆悉得聞。無量衆生。發菩提心。時大威光王子。與其父母并諸眷屬。及無量百千億那由他衆生。前後圍遶。寶蓋如雲。徧覆虛空。共詣波羅蜜善眼莊嚴王如來所。其佛爲

說法界體性清淨莊嚴修多羅。世界海微塵等修多羅。而為眷屬。彼諸大眾。聞此經已。得清淨智。名入一切淨方便。得於地。名離垢光明。得波羅蜜輪。名示現一切世間愛樂莊嚴。得增廣行輪。名普入一切刹土無邊光明清淨見。得趣向行輪。名離垢福德雲光明幢。得隨入證輪。名一切法海廣大光明。得轉深發趣行。名大智莊嚴。得灌頂智慧海。名無功用修極妙見。得顯了大光明。名如來功德海相光影徧照。得出生願力清淨智。名無量願力信解藏。時彼佛為大威光菩薩。而說頌言。

善哉功德智慧海	發心趣向大菩提	汝當得佛不思議	普為衆生作依處
汝已出生大智海	悉能徧了一切法	當以難思妙方便	入佛無盡所行境
已見諸佛功德雲	已入無盡智慧地	諸波羅蜜方便海	大名稱者當滿足
已得方便總持門	及以無盡辯才門	種種行願皆修習	當成無等大智慧
汝已出生諸願海	汝已入於三味海	當具種種大神通	不可思議諸佛法
究竟法界不思議	廣大深心已清淨	普見十方一切佛	離垢莊嚴衆刹海
汝已入我菩提行	昔時本事方便海	如我修行所淨治	如是妙行汝皆悟

我於無量一一刹

種種供養諸佛海

如彼修行所得果

如是莊嚴汝咸見

廣大劫海無有盡

一切刹中修淨行

堅固誓願不可思

當得如來此神力

諸佛供養盡無餘

國土莊嚴悉清淨

一切劫中修妙行

汝當成佛大功德

十三諸佛子已下。有十六行經。明威光說頌。其聲徧聞。威光與眷屬。同往

佛所。得十種利。第二佛為威光說頌。此二十行頌中。明第二如來。歎威光入道

得益。所得之益。是八地法門。如經云。得灌頂智慧海。名無功用修極妙見。

諸佛子。波羅蜜善眼莊嚴王如來。入涅槃已。喜見善慧王。尋亦去世。大威光童

子。受轉輪王位。彼摩尼華枝輪大林中。第三如來。出現於世。名最勝功德海。

時大威光轉輪聖王。見彼如來成佛之相。與其眷屬。及四兵衆。城邑聚落一切人

民。并持七寶。俱往佛所。以一切香摩尼莊嚴大樓閣。奉上於佛。時彼如來。於

其林中。說菩薩普眼光明行修多羅。世界微塵數修多羅。而為眷屬。爾時大威光

菩薩。聞此法已。得三昧。名大福德普光明。得此三昧故。悉能了知一切菩薩。

一切衆生。過現未來。福非福海。時彼佛為大威光菩薩。而說頌言。

善哉福德大威光

汝等今來至我所

愍念一切衆生海

發勝菩提大願心

汝爲一切苦衆生

起大悲心令解脫

當作群迷所依怙

是名菩薩方便行

若有菩薩能堅固

修諸勝行無厭怠

最勝最上無礙解

如是妙智彼當得

福德光者福幢者

福德處者福海者

普賢菩薩所有願

是汝大光能趣入

汝能以此廣大願

入不思議諸佛海

諸佛福海無有邊

汝以妙解皆能見

汝於十方國土中

悉見無量無邊佛

彼佛往昔諸行海

如是一切汝咸見

若有住此方便海

必得入於智地中

此是隨順諸佛學

決定當成一切智

汝於一切剎海中

微塵劫海修諸行

一切如來諸行海

汝皆學已當成佛

如汝所見十方中

一切剎海極嚴淨

汝剎嚴淨亦如是

無邊願者所當得

今此道場衆會海

聞汝願已生欣樂

皆入普賢廣大乘

發心迴向趣菩提

無邊國土一一中

悉入修行經劫海

以諸願力能圓滿

普賢菩薩一切行

十四諸佛子已下。有十二行經。明第二佛去世。善慧王亦去世。大威光受輪

王位。第三如來。於舊道場出興於世。威光見佛。聞法得益。第三如來說頌。歎

威光之德。此二十二行頌。明第三如來。歎威光所得之法。

諸佛子。彼摩尼華枝輪大林中。復有佛出。號名稱普聞蓮華眼幢。是時大威光。

於此命終。生須彌山上。寂靜寶宮天城中。為大天王。名離垢福德幢。共諸天衆。俱詣佛所。雨寶華雲。以為供養。時彼如來。為說廣大方便普門徧照修多羅。世界海微塵數修多羅。而為眷屬。時天王衆。聞此經已。得三昧。名普門歡喜藏。以三昧力。能入一切法實相海。獲是益已。從道場出。還歸本處。

十五諸佛子已下。有八行半經。明第四如來。於舊道場中出現。大威光去世。生須彌山頂。為大天王。還來見佛。獲益而去。此一品經。來文未足。未有結終之處。此品但明引古印今。毘盧遮那出世之法。古今相襲不異。又明所信樂道高法勝。人壽命長遠。福德所居。依正果勝。見佛聞法。所獲利益勝故。

大方廣佛新華嚴經合論卷第二十四終

大方廣佛新華嚴經合論卷第二十五

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

佛名號品第七

第二會六品經。明菩薩信心門。於此一會之中。自有序分正說流通。今從第十二卷初爾時已下。有四行半經。是序分。已下至賢首品。是正說分。賢首品末。有三行半經。是流通分。第七如來名號品。從此已下至賢首品。是第三長科文中。以果成信。信自己心是佛分。於此一段之中。約有六法。以成信心佛果。以令信者。入佛果故。一佛名號品。令信心者。信佛名號。徧一切世間名。知名性離故。二四聖諦品。令信心者。自信一切世間苦諦即聖諦。不別求故。三光明覺品。令信心者。自以自心光明。覺照一切無間無盡。大千世界。總佛境界。自亦同等。以心隨光。一一照之。心境合一。內外見亡。初三千大千世界已。次還以東方爲

首。光至東方。十三千大千世界。照百三千大千世界。如是十方十重。倍倍周迴。十方圓照。身心一性。無礙徧周。同佛境界。一一作意。如是觀察。然後以無作方便定印之。入十住初心。生如來智慧家。爲如來智慧法王之眞子。一如光明所照。如經具明。不可作佛光明。自無其分。須當自以心光如佛光。開覺其心。圓照法界。四問明品。令信心者。所信之法門。五淨行品。令信心者。所信菩薩初發心時。皆發大願爲首。又令信心者。便迴無始妄念。以成智海無生滅性。六賢首品。令信心者。信佛神力。通化無邊。得大自在。及信心之福。信此六法。名爲賢首。以此六法。觀行相應名爲信心。皆以不動智佛等十智如來。是自心之果。以不動智爲體。餘智爲用。至下方明。文殊師利。覺首。目首。十首菩薩等。是修行信心者之身。此品已下。至賢首品已來。六品經。是長科一部經中。第三以果成信門也。爲明初會。是舉佛果勸修。信諸佛所得。此第二會一會。以果成信。信自心是佛。與果佛不異故。至文方明。前之已成佛果。將用勸修。此舉佛名號果勸修。十方世界。無有一名非佛名者。名體性自解脫故。但隨衆生所聞不同故。此明佛名號徧周。即明於一切名。無所著故。釋此品作三門。一釋品來意。二釋

品名目。三隨文釋意。一釋品來意者。明前之初會。但明如來成正覺之身。及智攝生。未明如來名號攝生廣狹。今此第二會。普光明殿。方明佛果名號攝生故。此品須來。又爲舉佛果名。令生信解故。此品須來。前會明身智徧周。此會明名身及智俱徧周故。初會世主雖問。未有其答。此品答前所問。使令生後信者之心。令使信佛名身及智。普徧法界。應機利物。照俗破迷。故成普光明殿。約德名殿。約殿明德故。此品須來。於此佛名號中。約有五緣。以成佛號。一以法界自體根本智緣。以成佛號。二約如來示成正覺。約自德緣。以成佛號。三約如來利生方便緣。約位進修。以成佛號。四明如來以一切衆生隨根所樂緣。以成佛號。五約法界體用平等緣。一切諸法。總名佛號。一以法界自體根本智。以成佛號者。如下不動智佛。無礙智佛。滅闇智佛。如是十智佛號是也。以此法界根本智上。以施十種之名。以成十種信力。至位方明廣意。大意令衆生達自根本無明。本唯如來根本大智。令諸衆生。頓識本故。頓作佛故。二約如來示成正覺。自德成號者。即十方諸佛。示成正覺。共同十號。所謂如來應供正徧知是。又毘盧遮那是總名。是大智光明。照耀種種諸法。及種種衆生故。故毘云種種。盧遮那云徧照。三明

如來利生方便。約位進修緣。以成佛號者。即如下舉十箇根本不動智佛。以成十信。舉十箇月佛。下名悉同號之爲月。以成十住。明創契法身本智。心得清涼。爲明此位菩薩。契理惑亡。得法性智清涼故。約自得益之法。以成佛號。十行位中。以十箇眼佛。下名悉同號之爲眼。爲明十行。以智知根。利生攝益。故佛號爲眼。以善知根性故。皆是約自得益。立名爲佛。十迴向中。以十箇妙佛。上名悉同號之爲妙。爲明十迴向位中菩薩。進修漸熟。妙智現前。故佛號爲妙。十地同妙。已上以明從十信中。自信自心分別之智。與一切諸佛根本不動智佛。本來是一。以成信心。心外見法。不成信心也。從此信已下。以三昧力。契理會源。名爲十住。佛號爲月。皆是約修行之人。所得之法。以成佛號。安立五位。五十箇佛名。五十箇因。五十箇果。爲當位具因果故。成一百重因果。爲根本五位中。本有五因五果。成一百一十重因果。法門不異。法界體不異。十信中所信之法。根本不動智佛。以爲諸位進修。且約如是。廣意至下本位廣明。是名隨位進修以成佛號。四明如來以一切衆生隨根所樂。以成佛號者。即以對現色身。等衆生界。爲佛。爲天。爲神。爲主。爲人。爲仙。徧衆生界。令諸衆生不作惡者總是。不

可以自凡情所測也。總是佛名號徧周。五明法界體用平等。一切諸法。總名佛號者。爲一切諸法。及以名言。自體性離故。一切法自體性離。即法界性。法界性。即佛號故。是故一切法及名言。皆是佛號故。爲如來稱此一切法自性離之法。以成佛故。欲廣引經文證義。爲此教文弘廣。言繁翳本。作業者難解。但依此經上下。自相契會。作業者易解故。如三乘中。亦說根本智後得智。今欲令三乘人迴心。指此金色世界不動智佛。令使直認是自心。能分別智。本無所動。文殊師利。即是自心善簡擇無相妙慧。覺首日首等菩薩。即是自心隨信解中所見之理智。如是三乘之人。未迴心者。定當不信。何以故。爲立三阿僧祇劫後當得佛故。爲直認自身及心總是凡夫。但信佛有不動智等。不自信自心。是根本不動智佛。與佛無異。以是義故。不成此教。法界乘中。以根本智爲信心。此經信心。應當如是。直信自心分別之性。是法界性中根本不動智佛。金色世界。是自心無染之理。文殊師利。是自心善簡擇妙慧。覺首日首等菩薩。是隨信心中理智現前。以信因中契諸佛果法。分毫不謬。方成信心。從此信已。以定慧進修。經歷十住十行十迴向十地十一地。日月歲劫。時分無遷。法界如本。不動智佛如舊。而成一切種智。

海。教化衆生因果不遷。時劫不改。方成信也。若立僧祇定實。身是凡夫。凡聖二途。時劫移改。心外有佛。不成信心。如是已上。有此五種佛名號不同。問曰。名之與號何異。答曰。有二同別。何者爲二。約父母所生。幼稚無德。且作字呼之。爲名。有德。即約德立名。其名可尊。稱之爲號。名即下人不得呼稱。其號即下人得呼稱之。故雖有德無德之異。亦總屬名收。爲名言所攝故。若約此經佛號。總是約法約德立名。不同世俗也。三隨文釋義者。於此段中。義分爲二。一長科三十二品經意。第三禪中說十一地一品未來。二科當品經意。一長科三十二品者。從此如來名號品。第二會世主起問二十八問已下。直至向後如來出現品。是世主所問一終因果。所答總有三十二品經。是答二十八問故。以從普光明智。法界佛果。報居之殿。舉佛果名號。并舉佛果所行教化衆生四聖諦法門。并舉法界根本智體佛號不動智佛。以成信修。直至彼如來出現品。三十二品經。是信進修行之一終因果之極也。明此普光明智殿佛果。至如來出現品。此信進修行因果不二故。又明此始成正覺。果德之上。起信心修行。至後如來出現品中。明法界無時可隔故。以明法界體中。凡夫妄見。見無量劫。始起信進修行者。依真起行。

以爲進修。經歷五位行門。無時可移故。若未起信進修行時。常謂已前諸佛。先已成佛。經無量劫。及其以正信力。便見十方無量劫已成佛者。而自身與彼先成佛者。一時成佛無先後故。以是義故。如來始成正覺時。如今凡夫始發菩提心。起行進修。自行已滿。畢竟不離如來初成正覺初出現時。爲無情量。依本法界。本無時故。是故經言信心畢竟二不別者。爲法界性。無三世別故。以三世時無別。以無時。故無別。以智無別。故無別。爲不異不動智佛體故。妙慧用無別。不異文殊善簡擇妙慧故。行無別。爲從初發心不異十波羅蜜行普賢行而爲修行故。大悲無別。常教化故。大願無別。不捨衆生故。四攝無別。四無量心無別故。三十七道品無別。以此十種無別。故云。發心畢竟二不別。是故發心先心難。爲明入此十種信解者難故。若心外信有他佛得道。我是凡夫者。即世間人情量是。此乃不論信進修行。直是生死長流。常隨見網。何大苦哉。以此如今第二會及初會。明始成正覺如來出現。後三十二品。又著如來出現品。明始終信進修行者。與三世佛一時出現。明法界總一時故。如持寶鏡。普臨衆像。頓照顯現。無前後時故。明於法界根本佛智境界中。頓現衆法。不可將情量度量。作前後解故。一依彌勒

樓閣中境界。初會中始成正覺佛。是舉果勸修。佛出現品中佛。是明諸菩薩進修五位因果行終佛。與信位中不動智佛相對故。問曰。何故諸品。諸菩薩說。唯阿僧祇品。隨好品。是佛自說。答曰。如菩薩加行。如五位煩惱無明。以如來位中不思議菩薩衆。寄成五位菩薩。當位自彰次第法門。即如十慧十林十幢十藏等菩薩是。如佛位之內迷法無明。如來自說。如此阿僧祇品隨好品是。佛位之內無明。至佛位內方決此二迷。是故無明住地。佛位方終。如勝鬘經說。一分教網。三乘相似。唯不許二乘及淨土菩薩。斷得根本無明。爲不了無明是根本智故。以此一乘教。以不動智佛爲信心。以此所有修行證照衆法。不同此經故。此教明當念。初心畢竟心總盡。以法界中無三世故。三乘定滿僧祇。又三賢十聖。進修路別。地上加行。地前四資糧等。佛果定滿僧祇。如前已明以此經十住即見道。加行資糧一時。何以故。以法界大智。用資其行。令行無染。以行資糧法界智體。使慣習令熟。爲明從凡創見如來理智性故。又此五位中修行。位位各有佛果。隨位慣習處。安立名別。三乘教中。前位向後位。但有菩薩果。非佛果故。後至位廣明。此法界法門。說之經無量劫不延。說之一剎那中亦不促。唯迷之者。妄作長短延

促之解。即不稱應真之心。自此如來名號品已去。直至如來出現品。總有三十二品經。是十信十住十行十迴向十地十一地進修因果。以初即後。以後即初。不二之位故。如大王路。其法常爾。非故新體也。如文殊師利頌云。一念普觀無量劫。無去無來亦無住。如是了知三世事。超諸方便成十力。二科當品者。於當品中。長科爲四。

爾時世尊。在摩竭提國。阿蘭若法菩提場中。始成正覺。於普光明殿。坐蓮華藏師子之座。妙悟皆滿。二行永絕。達無相法。住於佛住。得佛平等。到無障礙。不可轉法。所行無礙。立不思議。普見三世。與十佛刹微塵數諸菩薩俱。莫不皆是一生補處。悉從他方而共來集。普善觀察。諸衆生界。法界。世界。涅槃界。諸業果報。心行次第。一切文義。世出世間。有為無為。過現未來。

一從爾時世尊已下。有八行半經。明歎德集衆分。文分爲二。一歎如來德。二歎菩薩大衆德。從初歎如來德中。爾時已下兩行經。是序分。敘前初得菩提處。并普光明殿。意明二處不異。爲不移本處道場。而身偏坐一切處故。爲菩提場體。是法界體故。爲普光明殿。是法界報居所都故。法報二體。性相一真。本末因果。

本無異故。由斯道理故重敘。古人釋云。由相近故。故須重敘者。經意不然。又云。見佛露居。龍造普光明殿。此義亦不然。設有此事。是三乘之說。又云。菩提場在熙連河邊。與普光明殿相去三里。在菩提場東南。明菩提場。是阿蘭若得道之處。普光明殿是報居之宅。此一部之經。前後通法界品。五度重有爾時佛在者。意明居處是法界。如來身。及宮殿莊嚴。總是法界性相。根本智不二故。五度敘意。前會已述。從妙悟已滿下。至普見三世。於中有兩行半經。是正歎佛德。妙悟已滿。明十智徧周自在故。二行永絕者。有爲無爲。二行盡故。達無相法。取捨盡故。住於佛住者。過現未來三世諸佛。共住法界大智大悲故。又如來及十方三世諸佛。住五種徧周。一示成正覺徧周。如初會菩提場是也。二依報正報莊嚴及名號徧周。即第二會普光明殿是也。三定體徧周。即十定品是也。四普賢行教徧周。即離世間品是也。五法界圓滿無礙不思議智用徧周。即法界品是也。以此五種諸佛徧周。故名住佛所住也。是故以此義故。於此一部之經。安立五度爾時佛在摩竭國。唯法界品少異。明重重徧周。不離一處。一菩提體。一法界。一根本智。一時無前後故。經文恐失其意。五度重敘。令後學者。不迷其事故。明

此五徧周。總明一際無前後。於一剎那際無二念。說四十九年中所轉法輪。兜率天猶未下。母胎猶未出。已入涅槃。不離。佛平等者。理事無二故。到無障礙。不可轉法者。明佛常處生死。不爲業遷故。又能轉不遷之法也。所行無礙者。明佛於生死中。皆能同事。眞俗不礙故。立不思議者。歎佛道滿行終。總無功用。任運利生。以智自在。非思想意識可度量故。普見三世者。智眼圓滿故。非三世中。見三世衆生事也。從與十佛剎微塵數諸菩薩俱已下。至過現未來。於中可有四行經。歎菩薩德。與十佛剎塵數諸菩薩俱者。明徒衆圓滿。徧法界海故。俱者。同時而至。無去來故。莫不皆是一生補處者。皆十地菩薩故。爲十地。經等覺位中。普賢位熟。道滿功終。方登佛果。故名一生也。如纓珞本業經說。又從初發心住。亦名一生菩薩。以初見性現根本智。不見有生前後際故。名爲一生。瓔珞經云。三賢菩薩。法流水中。任運至佛。悉從他方而共來集者。言他方共來集。簡非舊衆。皆是不來而到。不去而徧。又明前會舉果勸修。信他佛果。今此第二會。明以他佛果解行。成其自心信證之道。名從他方而共來集。爲從前信佛果中來。皆一生補處者。明於初會信解生。至於此會信滿入位。便成佛故。如龍女善

財等。由是義故。爲他方來皆是一生之衆。此乃即是表入法之言。從他方來也。迷名他方。悟名曰來。普善觀察諸衆生界法界世界涅槃界已下。此三行經。歎所來衆。善觀此三種世界。無二性故。亦知衆生隨煩惱業。亦知菩薩隨位煩惱行業等事故。餘如經說。

時諸菩薩。作是思惟。若世尊見愍我等。願隨所樂。開示佛刹。佛住。佛刹莊嚴。佛法性。佛刹清淨。佛所說法。佛刹體性。佛威德。佛刹成就。佛大菩提。如十方一切世界。諸佛世尊。為成就一切菩薩故。令如來種性不斷故。救護一切衆生故。令諸衆生永離一切煩惱故。了知一切諸行故。演說一切諸法故。淨除一切雜染故。永斷一切疑網故。拔除一切希望故。滅壞一切愛著處故。說諸菩薩。十住。十行。十迴向。十藏。十地。十願。十定。十通。十頂。及說如來地。如來境界。如來神力。如來所行。如來力。如來無畏。如來三昧。如來神通。如來自在。如來無礙。如來眼。如來耳。如來鼻。如來舌。如來身。如來意。如來辯才。如來智慧。如來最勝。願佛世尊。亦為我說。

第二大衆請法分。時諸菩薩作是思惟已下。十四行半經。於中有三十二問。

義分爲二。一初有四問。問四種佛刹。二成就大菩提心。引十方諸佛勸說已下。有二十八問。通問菩薩住地。佛眼耳等。如是等三十二問。直至如來出現品是答。如經具明。問曰。初會中世主所問。與此義多相似。但廣略不同。何故此第二會。還復再問如上之問。答曰。前會是世主問。舉佛果勸修。信佛所得。此會是自信自身自心是佛。及入位修行。故須再問。前位是普賢入定舉果。此會即明文殊生起入信之初。即明凡夫始信。爲彰信心羸故。不入定說。十住已去。始明當位菩薩入定始說。以是義故。前問雖義理少同。應緣差別故異。前會信他佛得。此會自入信修行也。古人說前會是請。此會是問。其義不然。前後總是其請。當請是問故。但爲勸修與自入法事少殊。如前會舉如來修行道滿。及過去諸佛已成道者。行滿之果。此第二會。舉十方諸佛根本之智。凡聖共有之果。即一切處金色世界。一切處不動智佛。十智佛等。是也。明一切諸佛衆生。共有此不動智。金色。是理法性身也。爲信心生滅。故言色也。以十色世界表之。即是此會所問四種佛刹中。一佛住佛刹。即一切諸佛。及以一切衆生。共所住故。爲一切凡聖根本之智。舉令一切衆生信自心是佛所住智故。一切諸佛。從此信生。一切凡夫。亦從此起。

二莊嚴佛法性佛刹者。即如十住十行十迴向十地十一地。隨位各有十箇佛號是也。因此自心根本智。起信進修行。隨位隨行諸波羅蜜莊嚴。以莊嚴法身智身。令成熟故。以法身智身。用嚴萬行。令行無著故。名莊嚴佛法性佛刹。三清淨佛所說法佛刹者。如來示成正覺。轉法輪是。四體性佛威德佛刹者。神通應現。隨根出世者是。明後二佛刹。從前二佛刹。起信修行成熟故得。以此義故。應知十方諸佛。共此一道而得出生故。應如是知。應如是信解。即得信解成就。一如諸佛所信故。得是信者。如賢首品說。勝以手擎三千大千世界。住於空中。經過一劫。明其難信故。亦勝供養十方世界塵數諸佛。經由一劫。功德不如如是信心。如已下二十八問。經自具答。義隱難明者釋之。義顯者如文可知。此三十二問中。有問十通十頂。經中但有十通十忍。不見頂名。剩其十忍。少其十頂。願佛世尊。亦爲我諸菩薩說。此兩句結請。自此已下。如來以神力舉法顯答。

爾時世尊。知諸菩薩心之所念。各隨其類。為現神通。現神通已。東方過十佛刹微塵數世界。有世界名金色。佛號不動智。彼世界中。有菩薩名文殊師利。與十佛刹微塵數諸菩薩俱。來詣佛所。到已作禮。即於東方化作蓮華藏師子之座。結

跏趺坐。南方過十佛刹微塵數世界。有世界名妙色。佛號無礙智。彼有菩薩名曰覺首。與十佛刹微塵數諸菩薩俱。來詣佛所。到已作禮。即於南方化作蓮華藏師子之座。結跏趺坐。西方過十佛刹微塵數世界。有世界名蓮華色。佛號滅闇智。彼有菩薩名曰財首。與十佛刹微塵數諸菩薩俱。來詣佛所。到已作禮。即於西方化作蓮華藏師子之座。結跏趺坐。北方過十佛刹微塵數世界。有世界名蘆蔔華色。佛號威儀智。彼有菩薩名寶首。與十佛刹微塵數諸菩薩俱。來詣佛所。到已作禮。即於北方化作蓮華藏師子之座。結跏趺坐。東北方過十佛刹微塵數世界。有世界名優鉢羅華色。佛號明相智。彼有菩薩名功德首。與十佛刹微塵數諸菩薩俱。來詣佛所。到已作禮。即於東北方化作蓮華藏師子之座。結跏趺坐。東南方過十佛刹微塵數世界。有世界名金色。佛號究竟智。彼有菩薩名目首。與十佛刹微塵數諸菩薩俱。來詣佛所。到已作禮。即於東南方化作蓮華藏師子之座。結跏趺坐。西南方過十佛刹微塵數世界。有世界名寶色。佛號最勝智。彼有菩薩名精進首。與十佛刹微塵數諸菩薩俱。來詣佛所。到已作禮。即於西南方化作蓮華藏師子之座。結跏趺坐。西北方過十佛刹微塵數世界。有世界名金剛色。佛號自在智。彼

有菩薩名法首。與十佛刹微塵數諸菩薩俱。來詣佛所。到已作禮。即於西北方化作蓮華藏師子之座。結跏趺坐。下方過十佛刹微塵數世界。有世界名玻璃色。佛號梵智。彼有菩薩名智首。與十佛刹微塵數諸菩薩俱。來詣佛所。到已作禮。即於下方化作蓮華藏師子之座。結跏趺坐。上方過十佛刹微塵數世界。有世界名平等色。佛號觀察智。彼有菩薩名賢首。與十佛刹微塵數諸菩薩俱。來詣佛所。到已作禮。即於上方化作蓮華藏師子之座。結跏趺坐。

第三爾時世尊知諸菩薩心之所念已下。四十一行經。明如來神通現法分。於此分中。義分爲二。一明隨類現法。二明約初信心。第一隨類現法中有二。一隨五位之中菩薩之類。各現十種佛位。十住十行十迴向十地十一地中。各有隨位佛果名號是。二隨一切國刹一切衆生之類。各現名號不同。如下文殊師利所說佛號者是。第二約信心者。即此當品及通一部總爲信心。於此信心。總信五位中因果。心無滯礙。方可以行修行。如有教說。譬如有人。過五百由旬嶮道。先知通塞。然後行往。喻如十信菩薩。於信心之中。先知五位進修通塞。預以願行防之。以信自心分別之性。本是一切諸佛不動智體。用防邪見外取他境故。以隨位妄識散

動。障真智故。以禪波羅蜜防之。以隨位第八住第八行第八迴向第八地。智增滯寂。障真無作大悲故。以一百四十大願防之。以樂生死。障真智故。以四念處觀等。三十七助菩提分法防之。及十四諦觀。及十二緣生觀防之。以十波羅蜜。利益衆生。恐不弘廣故。以四攝四無量法防之。以求自樂果。教化衆生不周廣故。起十迴向。加以大願。大慈大悲。不捨一切惡道地獄人天。徧生其處。以防自樂。違菩提心。有所得故。以是義故。十信之心。總通五位。悉皆成信。若自信徹。趣求無法不達。若也疑心不除。豈成信也。如此品舉佛果門。至賢首品舉佛神通。及佛所行行業。使初信心者信徹故。始名信心。今此一部之經。頓舉五位因果。諸佛果門。總成信也。從總信已。入位修行。方始不迷理智。如人造食。五味一時頓熟。方始食之。從初食時。五味同食。乃至食竟。其味不離五也。明五位因果。十信總明。時亦不移本末。爲信三世一際故。畢竟佛果不離初信之法。如依樣畫像等喻可知。於此神通示法門中。總有四十一行經。長科爲十一段。第一爾時世尊知諸菩薩已下。一行半經。明如來知衆所念。以神通現法。第二東方過十佛剎塵已下。三十九行半經。總明十方菩薩來集。十方自有分劑。不煩更科。於

此十方菩薩來衆之中。義分爲十。一舉佛刹方面。二舉佛刹遠近。三舉世界名色。四舉佛名號。五舉上首菩薩之名。六明大衆之數。七明大衆來已致敬。八明隨方化座。九明座之名目。十明大衆昇座而坐。一舉佛方面者。在東方。東方者。爲震卦。爲春生。爲初明。爲長男。爲頭。爲首。爲青龍。爲吉慶。爲震動。明法事作業動用之初故。道俗通用用之。故先舉東方爲首故。方者法也。但取方法之義。動用之始。非如世所見。執東西南北可得之方。一切處東方。一切處南方。但取其法故。餘准此。二舉佛刹遠近者。過東方十佛刹微塵數世界之外。此有四義。一明十爲圓數。爲明遠近無盡。二明令信心者。知佛境廣大。令自心弘博。三明佛境徧周。如鏡中像。互參無礙。四明未起信心者。以十佛刹塵。沉淪處迷。十無明未達。自障佛境界。而不現前故。舉塵表迷故。如涅槃經云。釋迦淨土。過西方三十二恆河沙世界之外。總是表法之數。如會釋已述。此云十佛刹微塵數世界之外來者。明隔十無明。十無明中。一一無明。有無量正使業習。主伴相熏。煩惱過於世界塵數。莫知涯際。能障智境。故言十佛刹微塵數世界外也。來者。明從迷入信。故號爲來。言彼世界中有佛號不動智者。爲明不動智佛。是十方凡

聖共有根本之智。明於此智能起信心故。號之爲來。此不動智佛。一切衆生常自有之。若取相隨迷。即塵障無盡。若一念覺迷達相。即淨若虛空。但爲隨迷稱外。悟處言來。而實佛刹本無遠近。內外等障亦無去來。無邊佛刹。不出毛孔微塵之表。令致遠近。意令初信心者。心廣大故。言其從彼世界中來。又明從迷入悟。故言爲來也。有佛號不動智者。明是信者自根本智故。由有此智故。一切衆生而能發菩提心。故以根本智體。能了迷性。超信解故。超彼迷境。稱之曰來。如起信論云。不思議業相者。以依智淨。能作一切勝妙境界。所謂無量功德之相。常無斷絕。隨衆生根。自然相應。種種而見。得利益故。又云。依本覺上。而起不覺故。又云。依於智故。生其苦樂。如起信論廣明。意明一切衆生。迷根本智。而有世間苦樂法故。爲智無性故。隨緣不覺苦樂業生。爲智無性故。爲苦所纏。方能自覺根本無性。衆緣無性。萬法自寂。若不覺苦時。以無性故。總不自知有性無性。如人因地而倒。因地而起。一切衆生。因自心根本智而倒。因自心根本智而起。以是義故。如來於此一乘之經。頓彰本法。爲金色世界。明法身白淨無染。頓彰本智。號不動智佛。頓彰文殊師利。是自心妙擇之慧。餘九箇世界。九

箇智佛。九箇菩薩。是隨自心信解修行位上。進修增勝。法身智身。隨行異名故。從斯自心本不動智佛自覺之上。見道入位。起十住十行十迴向十地十一地。加行進修。法身智身。大願大慈大悲。四攝四無量。十波羅蜜。三十七助道分法。從初發心根本法身本不動智體上。用資萬行。悲願參融。互爲資熟。法身資行。使令無染。行資法身。使令純熟。五位中。各各立十箇佛果。十箇菩薩。明隨位進修中。約自行所得處。佛果菩薩行果立名故。非他佛號。非他菩薩。而立其名。隨智佛果。隨其行果。五位之上。因果各有五十。共爲一百。通本五位。有五箇因果。共爲一百一十城之法門故。此答前菩薩問四種佛刹中。佛住佛刹。莊嚴法性清淨佛刹。從此二佛刹上。得示成正覺佛刹。神通自在佛威德佛刹。是故前會世主所問。是他毘盧遮那佛得自在之因果。此第二會菩薩所問。是自修行者佛刹菩薩行之因果。從之已後。直至如來出現品。是五位勝進菩薩。加行自力一終之位。明此品。是信心進趣之因果。至出現品。是修行位極之因果。已上於自心根本佛智上。而生信進修行故。此不動智。是一切諸佛一切衆生之地。以此智故。而作衆生。以此智故。而成正覺。以此智故。隨迷作衆生時。於六道中。隨天上

人間。及惡道中。皆有隨衆生依正之果報也。隨業麤細不同。以此智故。隨覺悟時。成就三乘。及法界圓滿一乘佛果。依正妙報。若無此智。元是虛空。亦非衆生。亦非諸佛故。問曰。一切衆生本有不動智。何故不自應眞常淨。何故隨染。答曰。一切衆生以此智故而生三界者。爲智無性。不能自知是智非智善惡苦樂等法。爲智體無性。但隨緣現。如空谷響。應物成音。無性之智。但應緣分別。以分別故。癡愛隨起。因癡愛故。即我所病生。有所故。自他執業便起。因執取故。號曰末那。以末那執取故。名之爲識。因識種子。生死相續。以生死故。衆苦無量。以苦無量。方求不苦之道。迷不知苦者。不能發心。知苦求真者。還是本智。會苦緣故。方能知苦。不會苦緣。不能知苦。知苦緣故。方能發心。求無上道。有種性菩薩。以宿世先已知苦。發心信解。種強者。雖受人天樂果。亦能發心求無上道。是故因智隨迷。因智隨悟。是故如人因地而倒。因地而起。正隨迷時。名之爲識。正隨悟時。名之爲智。在纏名識。在覺名智。識之與智。本無自名。但隨迷悟。而立其名故。不可計常計斷名也。此智之與識。但隨迷悟立名。若覺始終。如空中求迹。如影中求人。如身中求我依住所在。終不可得故新長短

處所之相也。如此無明及智。無有始終。若得菩提時。無明不滅。何以故。爲本無故。更無有滅。若隨無明時。不動智亦不滅。爲本無故。亦更無有滅。但爲隨色聲香所取緣。名爲無明。但爲知苦發心緣。名之爲智。但隨緣名之爲有。故體無本末也。如空谷響。思之可見。

大方廣佛新華嚴經合論卷第二十五終

大方廣佛新華嚴經合論卷第二十六

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

佛名號品第七之餘

三舉世界名色者。世界名金色。爲明金體白淨無染。舉之況喻法身無性。體無垢染故。如世間西方金爲白色也。體白色黃。明應眞菩薩。內契白法。外現黃相。黃色者。是應眞之氣。許父云。五色之中。黃色爲最。人面如黃瓜色。內有賢行。經云。應眞菩薩。皆眞金色。又明金色世界者。明信心之位。雖信自身心。是法身智身白淨本來無染。爲信是生滅有漏心故。是色心也。舉東方爲首者。明東方是初明。爲萬物發生震動之首。故取之表法。況喻十信之初首也。在方無方。但舉其法。以況其理。表其體用故。如牛王龍王等。況佛德也。問曰。以東方表法。況喻十信初首者。如金位在西方。何故東方爲金色世界。以表法身爲金色。

顯根本智爲不動智。答曰。此問甚彰道理。如經所說以信心爲胎。至十住之位。名初生佛家。今以東方爲金色世界者。明金。正月胎。二月胎。三月成形。四月生於已。五月養於午。六月冠帶於未。七月相。八月王。明十信如胎故。以東方金胎表之。以次南西北方四維上下。表十信心進修增勝故。以託事況之。令易解故。如此品文殊師利云。世尊昔爲菩薩時。以種種談論方便。及地位等。而得成就。亦令衆生如是知見。而爲說法。後諸學者。以智觀察。皆是說此方隅。以表法故。當知藉網求魚。魚非網也。若無網者。亦不可得魚故。以義思之。至理方成信也。又經云。一切處金色世界。一切處不動智佛。一切處文殊師利者。明法身偏一切法。一切衆生身心故。總不動智佛。總文殊師利故。應如是知。如是信解也。明金色世界。是信心者所信之理。以爲世界之名。亦是因此信故。還當報得。所生無染。所居無著。即如西方蓮華色世界是其義。如金色世界。此是舉十信初因。如南方妙色世界。西方蓮華色世界等。是十信進修之勝用故。此中有十因十果故。十果者。十智佛是。十因者。文殊師利覺首等十菩薩是。修行之因。因中得益。即因中之果。即不動智等十箇智佛是。十箇世界。是所修之法門。四

舉佛名號者。佛號不動智佛者。此明一切諸佛一切衆生根本智體。今先舉之。以成初信。此明答前佛住佛刹。餘九箇智佛。總是從此根本不動智上進修之名。非是他有。十方諸佛。皆同此名號之迹。而起信進修行。經歷五位。得示成正覺佛刹。及佛威德佛刹。威德佛刹者。如來神通是也。餘意如前已述。五舉上首菩薩之名者。名文殊師利。即是十方諸佛無性之中擇法妙慧。一切諸佛。皆從此慧。簡擇正邪。而成正覺。故號文殊。爲十方一切諸佛之師。亦云佛母。明一切諸佛。從此妙慧生故。若無此慧。設修解脫。但得二乘。及生淨土菩薩。非是乘如來乘。而成正覺。是故乘此不動智體。文殊妙慧。法身妙理大智。從信心上。而經歷五位。不離不動智佛。文殊妙慧。而成正覺故。號爲乘如來乘。不思議乘。最勝乘。無上乘。而成正覺故。亦號文殊師利。爲小男。爲童子。明一切諸佛。從此妙慧。善知正法。而初生佛家故。故號爲童子菩薩。如來去世。文殊師利猶在世間。後當化緣已畢。於香山頂上。示入涅槃。此是三乘教說。此經云一切處文殊師利。即明一切處衆生等共有之。今於此經。信心之首。舉其名號。明信心者。信自心妙擇之慧。一同於此。不移古跡。此是一切諸佛及以衆生根本妙慧。凡聖等有。

更無異性。如大王路。法則常然。今所是諸經。但有文殊爲問答之首者。皆明法身妙慧之門。以普賢爲問答之首者。皆明妙智之萬行體用。如是二士。是一切諸佛理智妙用萬行之門。依其法門。立其名號。現身成佛。以利衆生故。一切衆生發心之者。皆悉同修。皆悉自有自利利他之行以爲常範。今於教中。推在東北方清涼山。文殊師利。并一萬菩薩。於中住者。有三義。一令此界一切衆生。忻心有趣。善根不絕。二明菩薩常住世間。三明隨方顯法。示法易解故。前二門可知。第三隨方顯法者。明東北方者。取此閻浮一境。東北方此清涼山是也。經推在震旦國。亦曰支提那國。此云思惟。以其國人。多所思慮。多所計度故。以立其名。即是今漢國也。表法。明東北是艮卦。艮爲小男。爲童蒙。丑寅之間。是初明故。像文殊師利菩薩。常以發起凡夫人正信。及初見道之童蒙。令妙慧明生故。又如登山之頂。至相盡處故。明如初入正信者。創信諸法空故。能信法空。妙慧生故。以丑如初信。以寅如初證見道故。卯辰已爲進修。午爲中道。未申酉戌亥。以爲同事利生。子爲師位。以坎卦。爲君。爲師。處愚立範。制法利生故。是故爲北方。爲君爲師。尊者所居。以明德而治故。六明大衆之數者。有十佛刹微塵數。

爲明身行遍故。一佛剎塵。尙自周徧。何況十佛剎塵。明身行無盡重重之徧故。七明大衆來已致敬者。明師弟法則敬順之儀。八明隨方化座。還在東方。九明座之名目者。名蓮華藏師子之座。於此分中。義分爲三。一蓮華。是無染義。此依法依行之報得也。以法身之行。性無染世間故。能開敷理智之果。轉明淨故。明因果相資。令純熟故。明開敷茵蓐。莊嚴事法。有可觀故。以此法行之華。感招此報蓮華爲座。二藏者。含藏義。爲明以法身理智。處世隨行利生。普含衆法。饒益一切。招多功德。名之爲藏。三名師子者。依主得名也。爲以法性大智無生滅身。處世間利人。生死無畏。又以正智光明。辯才無畏。乃至無五怖畏等。如師子也。十明大衆昇座而坐。其座以法界爲座體。明以從凡契法界體故。以爲信進修行。方成信故。此是一切十方諸佛果座也。明初信心。頓信佛果。以爲自行所行法故。方成信也。於此段中。復分爲二。一明座廣狹。二明菩薩云何安坐。一明座廣狹者。如法界品云。其師子座。包含法界等。如文具明。大意以心性無依無定亂體。以爲座體故。二明菩薩如何安坐者。云結跏趺坐。以會世間衆緣爲一法界。名之爲結。以一法而稱多緣。名之爲跏。又結跏趺坐者。是安靜不動威

儀之相故。此位主檀波羅蜜中十波羅蜜。第二南方已下。可四行經。於此段中。義分爲十。一舉佛刹方面。二舉佛刹遠近。三舉世界名色。四舉佛名號。五舉上首菩薩之名。六明大衆之數。七明大衆來已致敬。八明隨方化座。九明座之名目。十明大衆昇座而坐。一舉佛刹方面者。如經云南方。表法中。南爲正。爲日。爲明。爲虛無。爲離中虛。故即明。爲像十信進修。了諸法虛無漸增明也。是故文殊覺母。啓蒙令信。即逐根於覺城之東。善財入道進修。即南巡諸友。表其南方。爲正爲日爲明。爲虛無之理。是故禮佛。皆云南無。明南方虛無也。但虛無之理。是南方之義。是一切處南方。但創首生信。即是一切處東方義也。是故四諦。東西配苦集。南北配滅道。然法無方所。化蒙生解起信。不爾。即法性難明。如此品下文云。世尊爲菩薩時。以種種談論。種種語言。乃至種種信解等。而得成熟。亦令衆生如是知見。而爲說法。具如經說。又南無者。爲明正順。爲正順虛無之理。故號南無。某甲佛者。即是了虛無之智人。故稱南無某甲佛。二舉佛刹遠近者。云十佛刹微塵數。義如前釋。迷云外。入法云來也。三舉世界名色者。名妙色。爲第二信心。漸增妙故。勝前信心故。爲達法虛無。即法自妙故。四佛號無

礙智者。明以不動智體進修。信心增明。智即無礙。總明自心信位之佛也。非他佛故。佛心衆生心自心。總爲一心一性一法界一智慧。始成信故。五舉上首菩薩名者。名爲覺首。爲明以文殊妙慧。善簡正邪。能自覺故。亦於自所覺法。能覺他故。此位菩薩。所覺何法。於此位中。其覺有三。一覺自身心。本是法界。白淨無染。如前金色世界是。二覺自身心分別之性。本無能所。本來是不動智佛。三覺自心善簡擇正邪妙慧。是文殊師利。於信心之初。覺此三法。名爲覺首。即明是信心之中。善覺之行。名爲覺首菩薩。總須自認是自所行之法門。方成信故。信他而有。自無其分。不名信故。六明大衆之數者。有十佛刹微塵。義如初釋。七明大衆來已致敬。可知。八明隨方化座。如前可知。九明座之名目。名蓮華藏師子之座。爲明入信成就。得於生死之中。能無畏故。依主得名故。餘義如前。十明大衆昇座而坐者。義如前釋。此位主戒波羅蜜爲主。餘九爲伴。第三西方過十佛刹微塵數已下。可四行經。於中十法如前。一舉佛刹方面者。是西方。二舉佛刹遠近。義如初釋。三舉世界名色者。名蓮華色。爲明十信位中。進修漸勝。心如蓮華無染故。言蓮華色者。蓮華有四色。明信心於此四色。無所染故。又明

信心菩薩。以色心觀空無性道理。對治不染。故名蓮華色也。四舉佛名號者。佛號滅暗智。爲明西方。爲金。爲白虎。爲殺害。爲昏暗。爲不祥。爲苦諦。故佛號滅暗智。明信位進修智增勝故。能破自他暗故。五舉菩薩上首名者。名曰財首。爲明信位增勝。有法財利物故。即第三信中。自行利衆生之名也。佛號即是自覺之智。菩薩即是自智之行。總明覺行俱進。餘門如初已釋可知。此主忍波羅蜜中十波羅蜜。第四北方過十佛刹微塵數世界已下。可四行經。十門如上。一舉佛刹方面者。是北方。二舉佛刹遠近。其義如前。三舉世界名色者。名蒼葡華色。此華黃色也。爲明第四信心增勝。開敷感果。得中和之色也。黃色是五色中最上之色。黃者中宮之色。爲福慶之氣。明內心白淨。外現黃相。經云。應眞菩薩。皆眞金色。明此信心。適悅恬和。白淨無染。福應和氣。開敷道果。名爲世界。故世界爲蒼葡華色。四舉佛名號者。佛號威儀智。爲明北方坎。爲師。爲君。像君有德。處黑位而接凡。故爲師也。佛號威儀智者。明第四信心增勝。以爲軌範。接引凡愚。明威儀智。以智庠序。爲師之貌故。五舉上首菩薩名者。名爲寶首。明爲師範。以法寶利生故。故爲名也。餘義如前。此位主精進門中十波羅蜜。第

五東北方已下。可四行經。於中分爲十法如前。一舉其方面者。云東北方。爲艮卦。爲小男。爲童蒙。爲創明。爲清朝。二舉佛刹遠近。義如初釋。三舉世界名色者。名優鉢羅華色。此是青蓮華。像此第五信心清潔。色香無染。開敷感果故。如艮位處清朝也。四舉佛名號者。佛號明相智。像此第五信心增勝。如艮位處清朝。明相現故。以所自信上而標佛號。非他佛也。五舉上首菩薩名者。名爲功德首。前位明寶首。即法寶利生。此位即自利利生之功德也。餘義如前。此位主禪門中十波羅蜜。以艮爲止故。第六東南方已下。可四行經。於中十義如前。一舉佛方面者。是東南方也。是巽卦。巽爲風。爲教。在事爲方。在人爲說。像君子說教利人。易有明著。君子設教。啓蒙順之。如草上加風。是順義也。如觀卦是。易曰。風行地上。可以觀像。君子有德設政教。衆人信順。如草上加風。無不順故。巽爲衆。爲信順故。又四大之中。風力爲最。天地賴之而持。人賴之而生。日月賴之運行。又明風能簡穢擇淨義故。故爲教也。爲教能簡非擇是。教愚蒙故。是故巽卦。位在東南。爻辰持丑。丑爲艮位。艮爲小男。爲童蒙。爲明巽爲風教。化童蒙令發明故。如來之法。辰巳之間。爲齋戒故。辰巳之間。上值角宿。角爲

天門。主爲僧尼道士。是衆善之門。明智慧言說。是衆善門故。故此義無量。難爲具說。且約略而言之也。後有智者。以法審之詳之思之。義唯深細故。二舉佛刹遠近。義如前說。三舉世界名色者。世界名金色。爲明最初第一信心。明始信如胎。故以東方金胎之位。表初信解。今以進修至第六信位。明信心轉轉增勝故。故以金生於已以像之。信心更增明。白淨生故。此東南方金色世界。像四月金生於已。表信心增明。白淨轉勝。善簡擇衆法。能說教故。風化行故。以此表智慧門也。四舉佛名號者。佛號究竟智。明信心增進。善能以教簡擇正邪。至究竟智。又以巽爲風。在事成方。方猶法也。在聖善簡擇。成白淨之理。在言成說。在化成教。在凡成愚。在智成慧。成離之德。爲赤。爲文章。成兌之德。爲金初生。爲白淨。兌爲金。爲口。爲口能說白淨究竟之理故。故佛號爲究竟智佛。五舉上首菩薩名者。名爲目首。明以第六信心增勝。善簡正邪。其道明著。正見不惑。名爲目首。像其巽卦。位在東南。爻辰在丑。其位是風。上值箕宿。明箕爲風。簡擇義也。又箕爲寅位。主初明也。明此第六信心。主般若波羅蜜。以決定智慧。善簡正邪。令自他勝慧明生故。故名目首。目者善見。簡擇分明義也。餘義如上。

此東南方。明吉凶定正邪之際。至午萬事畢。午爲常明法門。善財童子南行詢友。爲法虛無無作常明之道。是不爲之妙用也。是故君臣師弟父子之儀。臣南君北正治。正明無爲無作常然之道。爲南方离。离中虛。爲虛無。爲日。爲明。在身。爲眼目。爲心也。是故周易云。离法心故。然法無住處。法無所得。法非眼耳鼻舌身心。亦不離也。今如來以方隅而顯法。令啓蒙者易解故。若不如是彰表。令生信者啓蒙何託。有言之法。皆是託事以顯像故。唯得意者。法像俱真也。言默皆契。此位主慧波羅蜜爲主。餘九爲伴。第七西南方已下。可四行經。於中十法如前。一舉佛方面者。在西南方。申未兩間。爲坤位。坤爲土。爲信順。爲安靜。爲負載萬有。爲生養。爲圓滿也。二舉佛刹遠近。義如前釋。三舉世界名色者。名寶色。爲明此第七信心。是方便波羅蜜。成就慈悲門故。託此坤位爲其母也。明常以慈悲心育生如母故。以法寶利人。世界名寶。明法寶利生。是自世界。爲明以法寶利生之業。以成自世界。來生感果。生在中故。表業表法。總如寶故。四舉佛名號者。佛號最勝智。明此信位。慈心增勝。處衆治人。令信順故。佛號最勝智。又大悲圓滿。如土像故。荷負衆生。資養萬物。如大地故。名爲最勝智。

五舉上首菩薩名者。名爲精進首。爲明大悲增勝如母。處衆利生。心無疲倦。名精進首也。餘如前。此位主方便門。餘九爲伴。第八西北方已下。可四行經。於中十義如前。一舉佛方面者。在西北方。是乾卦。乾爲金。爲堅剛。爲父。二舉佛利遠近。義如前釋。三舉世界名色者。名金剛色。明此信位。是第八願波羅蜜。大堅固力。故號金剛色故。寄託此乾位。爲金爲堅剛也。又以智增勝故。四舉佛名號者。佛號自在智。明此第八信心。信同八住地。智增自在故。像其乾。爲天爲父。明智自在義故。五舉上首菩薩名者。名法首。明此信位。智增勝故。以法利生。故名法首。餘義如前。此位主願波羅蜜。第九下方已下。可四行經。於中十義如前。一舉佛方面者。在下方。下方最下。是風輪際。其風甚堅密。假設有大力士。以金剛輪。向下擊之。然金剛碎如微塵。而風輪無損。以堅密故。能持世界。明此信位。是第九力波羅蜜。信當九住九地。法力成就。教化衆生。荷負一切。而心堅固。如風無損。二舉佛利遠近。其義如前。三舉世界名色者。名玻瓈色。此寶有青黃赤白。然舉此下方色者。是白如似水精。明風能簡穢。是白淨義故。又取法身妙智。爲最上故。四舉佛名號者。佛號梵智。明智風是淨義。梵

者。此云淨也。明此位進修增勝。以白淨大智。用利自他故。五舉上首菩薩名者。名智首。明第九力波羅蜜。九住九地信心。善慧成就。以智利生。故名爲首。又下方者。是禪定義。安靜義。謙下義。是根本智。上方者。觀照義。如日月處空。而照物故。餘義如前。此位主力波羅蜜。是法師位。第十上方已下。可四行經。於中十義如前。一舉佛方面者。在上方。明有日月衆星。處虛空而照萬有。像其智也。處法空而照諸根。以此表智波羅蜜。二舉刹遠近者。義如前釋。三舉世界名色者。名平等色。爲上方空界。表法空無相平等也。爲信心者。法空之心現前。有念法空之情。故名之爲色。四舉佛名號者。佛號觀察智。爲明上方虛空。有日月星辰。下照萬有。明信心者。智照自他身心。皆無有體性。如虛空故。如光影像。無體質故。是故名爲觀察智佛。五舉菩薩上首名號者。名爲賢首。爲明信此十種世界。及佛名號菩薩名號。總是自心之智。所見妙理。號之爲世界。法空之智。號之爲佛故。智所行行。號爲菩薩。總是隨見隨行。進修立名。有此十法故。得是十法。名爲賢首。如上所有世界遠近。云十佛刹塵者。即明佛刹。重重相入。如光影像。迷之。即心障無邊。故舉刹塵爲遠。悟之。即無盡佛刹。在自身毛孔。

中。如影重重。以迷處。便言遠在他土。以悟之入法處。名之從他方遠刹而來。總明迷悟上作遠近之名。非佛刹法界中有遠近之事。菩薩來衆。其數亦云十佛刹塵。即言信心。能信普賢行。智隨根欲。菩薩行無盡重重。徧諸刹土。教化衆生。以成其數。既信之已決定。身能如是行之故。以是義故。十方菩薩。各舉十佛刹微塵者。是斯義也。明一一菩薩行。無盡重重。滿諸刹土。教化衆生故。應如是知。如是信解。此已上。答前莊嚴佛法性佛刹。佛住佛刹等。

爾時文殊師利菩薩摩訶薩。承佛威力。普觀一切菩薩衆會。而作是言。此諸菩薩。甚為希有。諸佛子。佛國土不可思議。佛住。佛刹莊嚴。佛法性。佛刹清淨。佛說法。佛出現。佛刹成就。佛阿耨多羅三藐三菩提。皆不可思議。何以故。諸佛子。十方世界。一切諸佛。知諸衆生樂欲不同。隨其所應。說法調伏。如是乃至等法界虛空界。諸佛子。如來於此娑婆世界。諸四天下。種種身。種種名。種種色相。種種修短。種種壽量。種種處所。種種諸根。種種生處。種種語業。種種觀察。令諸衆生。各別知見。諸佛子。如來於此四天下中。或名一切義成。或名圓滿月。或名師子吼。或名釋迦牟尼。或名第七仙。或名毘盧遮那。或名瞿曇氏。

或名大沙門。或名最勝。或名導師。如是等其數十千。令諸衆生。各別知見。諸佛子。此四天下東。次有世界。名為善護。如來於彼。或名金剛。或名自在。或名有智慧。或名難勝。或名雲王。或名無諍。或名能為主。或名心歡喜。或名無與等。或名斷言論。如是等其數十千。令諸衆生。各別知見。諸佛子。此四天下南。次有世界。名為難忍。如來於彼。或名帝釋。或名寶稱。或名離垢。或名實語。或名能調伏。或名具足喜。或名大名稱。或名能利益。或名無邊。或名最勝。如是等其數十千。令諸衆生。各別知見。諸佛子。此四天下西。次有世界。名為親慧。如來於彼。或名水天。或名喜見。或名最勝王。或名調伏天。或名真實慧。或名到究竟。或名歡喜。或名法慧。或名所作已辦。或名善住。如是等其數十千。令諸衆生。各別知見。諸佛子。此四天下北。次有世界。名有師子。如來於彼。或名大牟尼。或名苦行。或名世所尊。或名最勝田。或名一切智。或名善意。或名清淨。或名鑿羅跋那。或名最上施。或名苦行得。如是等其數十千。令諸衆生。各別知見。諸佛子。此四天下東北方。次有世界。名妙觀察。如來於彼。或名調伏魔。或名成就。或名息滅。或名賢天。或名離貪。或名勝慧。或名心平等。或

名無能勝。或名智慧音。或名難出現。如是等其數十千。令諸衆生。各別知見。諸佛子。此四天下東南方。次有世界名為喜樂。如來於彼。或名極威嚴。或名光焰聚。或名徧知。或名祕密。或名解脫。或名性安住。或名如法行。或名淨眼王。或名大勇健。或名精進力。如是等其數十千。令諸衆生。各別知見。諸佛子。此四天下西南方。次有世界。名甚堅牢。如來於彼。或名安住。或名智王。或名圓滿。或名不動。或名妙眼。或名頂王。或名自在音。或名一切施。或名持衆仙。或名勝須彌。如是等。其數十千。令諸衆生。各別知見。諸佛子。此四天下西北方。次有世界。名為妙地。如來於彼。或名普徧。或名光焰。或名摩尼髻。或名可憶念。或名無上義。或名常喜樂。或名性清淨。或名圓滿光。或名脩臂。或名住本。如是等其數十千。令諸衆生。各別知見。諸佛子。此四天下次下方。有世界。名為焰慧。如來於彼。或名集善根。或名師子相。或名猛利慧。或名金色焰。或名一切知識。或名究竟音。或名作利益。或名到究竟。或名真實天。或名普徧勝。如是等其數十千。令諸衆生。各別知見。諸佛子。此四天下次上方。有世界。名曰持地。如來於彼。或名有智慧。或名清淨面。或名覺慧。或名上首。或名行

莊嚴。或名發歡喜。或名意成滿。或名如盛火。或名持戒。或名一道。如是等其數十千。令諸衆生。各別知見。諸佛子。此娑婆世界。有百億四天下。如來於中。有百億萬種種名號。令諸衆生。各別知見。諸佛子。此娑婆世界東。次有世界。名為密訓。如來於彼。或名平等。或名殊勝。或名安慰。或名開曉意。或名聞慧。或名真實語。或名得自在。或名最勝身。或名大勇猛。或名無等智。如是等百億萬種種名號。令諸衆生。各別知見。諸佛子。此娑婆世界南。次有世界。名曰豐溢。如來於彼。或名本性。或名勤意。或名無上尊。或名大智炬。或名無所依。或名光明藏。或名智慧藏。或名福德藏。或名天中天。或名大自在。如是等百億萬種種名號。令諸衆生。各別知見。諸佛子。此娑婆世界西。次有世界。名為離垢。如來於彼。或名意成。或名知道。或名安住本。或名能解縛。或名通達義。或名樂分別。或名最勝見。或名調伏行。或名衆苦行。或名具足力。如是等百億萬種種名號。令諸衆生。各別知見。諸佛子。此娑婆世界北。次有世界。名曰豐樂。如來於彼。或名蘆蔔華色。或名曰藏。或名善住。或名現神通。或名性超邁。或名慧日。或名無礙。或名如月現。或名迅疾風。或名清淨身。如是等百億萬種

種名號。令諸衆生。各別知見。諸佛子。此娑婆世界東北方。次有世界。名為攝取。如來於彼。或名永離苦。或名普解脫。或名大伏藏。或名解脫智。或名過去藏。或名寶光明。或名離世間。或名無礙地。或名淨信藏。或名心不動。如是等百億萬種種名號。令諸衆生。各別知見。諸佛子。此娑婆世界東南方。次有世界。名為饒益。如來於彼。或名現光明。或名盡智。或名美音。或名勝根。或名莊嚴蓋。或名精進根。或名到分別彼岸。或名勝定。或名簡言辭。或名智慧海。如是等百億萬種種名號。令諸衆生。各別知見。諸佛子。此娑婆世界西南方。次有世界。名為鮮少。如來於彼。或名牟尼主。或名具衆寶。或名世解脫。或名遍知根。或名勝言辭。或名明了見。或名根自在。或名大仙師。或名開導業。或名金剛師子。如是等百億萬種種名號。令諸衆生。各別知見。諸佛子。此娑婆世界西北方。次有世界。名為歡喜。如來於彼。或名妙華聚。或名栴檀蓋。或名蓮華藏。或名超越諸法。或名法寶。或名復出生。或名淨妙蓋。或名廣大眼。或名有善法。或名專念法。或名網藏。如是等百億萬種種名號。令諸衆生。各別知見。諸佛子。此娑婆世界次下方。有世界。名為關闡。如來於彼。或名發起焰。或名調伏毒。

或名帝釋弓。或名無常所。或名覺悟本。或名斷增長。或名大速疾。或名常樂施。或名分別道。或名摧伏幢。如是等百億萬種種名號。令諸衆生。各別知見。諸佛子。此娑婆世界次上方。有世界。名曰振音。如來於彼。或名勇猛幢。或名無量寶。或名樂大施。或名天光。或名吉興。或名超境界。或名一切主。或名不退輪。或名離衆惡。或名一切智。如是等百億萬種種名號。令諸衆生。各別知見。諸佛子。如娑婆世界。如是東方百千億。無數無量無邊無等。不可數不可稱不可思不可量不可說。盡法界虛空界。諸世界中。如來名號。種種不同。南西北方。四維上下。亦復如是。如世尊昔為菩薩時。以種種談論。種種語言。種種音聲。種種業。種種報。種種處。種種方便。種種根。種種信解。種種地位。而得成熟。亦令衆生如是知見。而為說法。

第四爾時文殊師利已下。至品末已來。明舉法演說分。於此分中。義分爲七。一文殊師利已下。兩行經。明文殊觀衆。二諸佛子已下。可三行經。明歎四種佛刹不可思議。三何以故已下。可兩行半經。明諸佛隨根設法調伏。四諸佛子已下。可三行半經。舉佛身業名色相壽命脩短等。隨根之法。化衆生故。五諸佛子已下。

舉佛名號。先舉此處四天下。次及三千。及周法界。名號不同。初舉十千。次漸增廣。乃至無量。十千者。是初首數之一終。爲明佛號普徧諸名字故。令諸衆生。了知一切名字。平等清淨。無分別好惡故。已下直至品末。六諸佛子已下。可四行經。是都結此土。他方例然。七如是世尊已下。三行半經。舉世尊往因所行。今爲衆說。此已上答前二十八問中。四種佛刹出現。及名號徧周。已下四聖諦品。即明如來說法徧周。十方世界。所說法門。不離四諦義故。又此如來名號品。非但論名號徧周。但是如來身口意業。總皆徧周。文殊師利菩薩。略而都舉。如前文中云。諸佛子。如來於娑婆世界。諸四天下。種種身。種種名。種種色相等。如經廣明。即明此品。總答如來身語意業。一切徧周。從此品文殊師利。舉佛果海。身語等一切徧周。令大衆自信己身。同佛三業。入如來性海。等如來智。發跡進修。經過十住十行十迴向十地十一地。直至如來出現品。是其一終因果。此名號品。是始初入信。名號徧周。即一切名。總是自佛之果。出現品。是己身自修行行滿之果。是故如來。放眉間光。灌文殊頂。使令問佛出現果法。放口中光。灌普賢口。使令說佛果德。始明自行因果徹故。明文殊普賢。理智妙行。此齊體

也。離世間品。法界品。雖在其後。爲文字相排。似有前後。總是前後相通徹法故。總是一圓滿法故。如法界品。是此一部經之大體。爲一切凡聖之本源也。前初會信佛果。即以如來并普賢爲首。即明已成佛果。及已行之果。生信。今以入自己入信修行門。即以文殊師利。及如來名號。并四諦法門。爲所信之因果。即明以妙慧法門及名言。而修學故。問曰。何故如來不自說其教。何用放光令菩薩說。答曰。如來意令當位菩薩。說當位法門。令修學者。知分劑易解故。文殊常與一切諸佛。及一切衆生。作信心之因。成妙慧之本母。普賢菩薩常與一切諸佛衆生。作修行之因。以此二人。成就菩提無作智果大悲之海。令二人自相對問。說如來出現品。明是修行者。因果始終圓滿。前後因果。性果智果行果。相徹一體故。明從此品。至出現品。文殊普賢二行因果。信心者。修行位滿。體用徹故。令後學者易解故。如有兩品經。如來自說。前已述訖。明是佛果二愚。至佛方明。

大方廣佛新華嚴經合論卷第二十六終

大方廣佛新華嚴經合論卷第二十七

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

四聖諦品第八

於此一品之中。義分爲三。一釋品名目。二釋品來意。三隨文釋義。一釋品名目者。諦者。實義也。明如來說四種實義。令諸衆生起信解故。問曰。何故不說多。但云四。答曰。此四種諦義。總攝多故。爲明一切世間。不離苦集。一切出世間。不離滅道。滅盡諸苦。名爲滅諦。滅盡涅槃。名爲道諦。三乘涅槃。皆有可得。此大涅槃。無餘可得。名爲道諦。以二乘趣寂。菩薩多生淨土。又推淨土在餘他方。又云菩薩留惑潤生故。若不故留煩惱。還應必有涅槃可證。或有他方淨土可生。是故三乘涅槃。皆有可得。又閻浮提成正覺佛。木樹草座。是化佛。上方摩醯首羅天。紅蓮華上佛。是實報。皆有忻厭故。是故三乘四諦。厭苦集。

忻滅道。名四諦法輪。此一乘經。言四聖諦者。是其實義。何以故。達苦性眞。無忻厭故。無有他方別佛刹。別淨土故。無有染淨涅槃生死。有忻厭所修道故。所修道者。住如法住。修如法道。不厭不著。不欣不取。一如法界。無去來性。無住處性。身塵毛孔。心之及境。皆稱法性。如是信解。如是修道。以是義故。一乘四聖諦。三乘四諦。各各差別。各有信解。如來依根。方便設教。皆非凡夫能立。如今修道者。但隨自信解力。便處即作。不可例然。如法華經。爲聲聞人。說四諦法。爲緣覺人。說十二因緣。爲諸菩薩。說六波羅蜜。亦是如來隨時之說。如此經十地品。五地菩薩。作十種諦觀。以四聖諦爲體。六地菩薩。作十種十二緣生觀。此是如來隨位進修之法。大要總言此四聖諦。十二緣生法門。但一切諸聖。一切凡夫。起信樂佛法心。道未滿者。皆從初心。觀自他苦故。發菩提心。樂求道法。但依大小勝劣不同。四諦十二緣各別。但一切世間法。四諦義無不該通。此是如來語業。說法徧周故。如瓔珞經。立九乘法門者。意明三乘。參用四諦十二緣。各自得道差別。其九乘者。一聲聞聲聞乘。二聲聞緣覺乘。三聲聞菩薩乘。如是三乘。同觀四諦十二緣法。各自得道不同。如是三乘中。各有三通。

爲九通。此法界不思議乘。於解脫道中。總有十乘。皆得究竟。無三界苦。諸餘道門。皆是人天世間生滅之法。設得少樂。終竟不離苦本。三乘雖得出三界。其道未真。未是佛果乘故。二釋品來意者。爲明前名號品。是說如來身業。隨方名號不同各別。此品說如來隨方語業。隨方說法。不離四聖諦故。此品須來。三隨文釋義者。於此一品經文。於中總有十二段經。

爾時文殊師利菩薩摩訶薩。告諸菩薩言。諸佛子。苦聖諦。此娑婆世界中。或名罪。或名逼迫。或名變異。或名攀緣。或名聚。或名刺。或名依根。或名虛誑。或名癱瘓處。或名愚夫行。諸佛子。苦集聖諦。此娑婆世界中。或名繫縛。或名滅壞。或名愛著義。或名妄覺念。或名趣入。或名決定。或名網。或名戲論。或名隨行。或名顛倒根。諸佛子。苦滅聖諦。此娑婆世界中。或名無諍。或名離塵。或名寂靜。或名無相。或名無沒。或名無自性。或名無障礙。或名滅。或名體真實。或名住自性。諸佛子。苦滅道聖諦。此娑婆世界中。或名一乘。或名趣寂。或名導引。或名究竟無分別。或名平等。或名捨擔。或名無所趣。或名隨聖意。或名仙人行。或名十藏。諸佛子。此娑婆世界。說四聖諦。有如是等四百億十千

名。隨衆生心。悉令調伏。諸佛子。此娑婆世界。所言苦聖諦者。彼密訓世界中。或名營求根。或名不出離。或名繫縛本。或名作所不應作。或名普鬪諍。或名分析悉無力。或名作所依。或名極苦。或名躁動。或名形狀物。諸佛子。所言苦集聖諦者。彼密訓世界中。或名順生死。或名染著。或名燒然。或名流轉。或名敗壞根。或名續諸有。或名惡行。或名愛著。或名病源。或名分數。諸佛子。所言苦滅聖諦者。彼密訓世界中。或名第一義。或名出離。或名可讚歎。或名安隱。或名善入趣。或名調伏。或名一分。或名無罪。或名離貪。或名決定。諸佛子。所言苦滅道聖諦者。彼密訓世界中。或名猛將。或名上行。或名超出。或名有方便。或名平等眼。或名離邊。或名了悟。或名攝取。或名最勝眼。或名觀方。諸佛子。密訓世界。說四聖諦。有如是等四百億十千名。隨衆生心。悉令調伏。諸佛子。此娑婆世界。所言苦聖諦者。彼最勝世界中。或名恐怖。或名分段。或名可厭惡。或名須承事。或名變異。或名招引怨。或名能欺奪。或名難共事。或名妄分別。或名有勢力。諸佛子。所言苦集聖諦者。彼最勝世界中。或名敗壞。或名癡根。或名大怨。或名利刃。或名滅味。或名仇對。或名非己物。或名惡導引。

或名增黑暗。或名壞善利。諸佛子。所言苦滅聖諦者。彼最勝世界中。或名大義。
 或名饒益。或名義中義。或名無量。或名所應見。或名離分別。或名最上調伏。
 或名常平等。或名可同住。或名無為。諸佛子。所言苦滅道聖諦者。彼最勝世界
 中。或名能燒然。或名最上品。或名決定。或名無能破。或名深方便。或名出離。
 或名不下劣。或名通達。或名解脫性。或名能度脫。諸佛子。最勝世界。說四聖
 諦。有如是等四百億十千名。隨衆生心。悉令調伏。諸佛子。此娑婆世界。所言
 苦聖諦者。彼離垢世界中。或名悔恨。或名資待。或名展轉。或名住城。或名一
 味。或名非法。或名居宅。或名妄著處。或名虛妄見。或名無有數。諸佛子。所
 言苦集聖諦者。彼離垢世界中。或名無實物。或名但有語。或名非潔白。或名生
 地。或名執取。或名鄙賤。或名增長。或名重擔。或名能生。或名羸獯。諸佛子。
 所言苦滅聖諦者。彼離垢世界中。或名無等等。或名普除盡。或名離垢。或名最
 勝根。或名稱會。或名無資待。或名滅惑。或名最上。或名畢竟。或名破印。諸
 佛子。所言苦滅道聖諦者。彼離垢世界中。或名堅固物。或名方便分。或名解脫
 本。或名本性實。或名不可毀譽。或名最清淨。或名諸有邊。或名受寄全。或名

作究竟。或名淨分別。諸佛子。離垢世界。說四聖諦。有如是等四百億十千名。隨衆生心。悉令調伏。諸佛子。此娑婆世界。所言苦聖諦者。彼豐溢世界中。或名愛染處。或名險害根。或名有海分。或名積集成。或名差別根。或名增長。或名生滅。或名障礙。或名刀劍本。或名數所成。諸佛子。所言苦集聖諦者。彼豐溢世界中。或名可惡。或名名字。或名無盡。或名分數。或名不可愛。或名能攬噬。或名麤鄙物。或名愛著。或名器。或名動。諸佛子。所言苦滅聖諦者。彼豐溢世界中。或名相續斷。或名開顯。或名無文字。或名無所修。或名無所見。或名無所作。或名寂滅。或名已燒盡。或名捨重擔。或名已除壞。諸佛子。所言苦滅道聖諦者。彼豐溢世界中。或名寂滅行。或名出離行。或名勤修證。或名安隱去。或名無量壽。或名善了知。或名究竟道。或名難修習。或名至彼岸。或名無能勝。諸佛子。豐溢世界。說四聖諦。有如是等四百億十千名。隨衆生心。悉令調伏。諸佛子。此娑婆世界。所言苦聖諦者。彼攝取世界中。或名能劫奪。或名非善友。或名多恐怖。或名種種戲論。或名地獄性。或名非實義。或名貪欲擔。或名深重根。或名隨心轉。或名根本空。諸佛子。所言苦集聖諦者。彼攝取世界

中。或名貪著。或名惡成辦。或名過惡。或名速疾。或名能執取。或名想。或名有果。或名無可說。或名無可取。或名流轉。諸佛子。所言苦滅聖諦者。彼攝取世界中。或名不退轉。或名離言說。或名無相狀。或名可欣樂。或名堅固。或名上妙。或名離癡。或名滅盡。或名遠惡。或名出離。諸佛子。所言苦滅道聖諦者。彼攝取世界中。或名離言。或名無諍。或名教導。或名善迴向。或名大善巧。或名差別方便。或名如虛空。或名寂靜行。或名勝智。或名能了義。諸佛子。攝取世界。說四聖諦。有如是等四百億十千名。隨衆生心。悉令調伏。諸佛子。此娑婆世界。所言苦聖諦者。彼饒益世界中。或名重擔。或名不堅。或名如賊。或名老死。或名愛所成。或名流轉。或名疲勞。或名惡相狀。或名生長。或名利刃。諸佛子。所言苦集聖諦者。彼饒益世界中。或名敗壞。或名渾濁。或名退失。或名無力。或名喪失。或名乖違。或名不和合。或名所作。或名取。或名意欲。諸佛子。所言苦滅聖諦者。彼饒益世界中。或名出獄。或名真實。或名離難。或名覆護。或名離惡。或名隨順。或名根本。或名捨因。或名無為。或名無相續。諸佛子。所言苦滅道聖諦者。彼饒益世界中。或名達無所有。或名一切印。或名三

味藏。或名得光明。或名不退法。或名能盡有。或名廣大路。或名能調伏。或名有安隱。或名不流轉根。諸佛子。饒益世界。說四聖諦。有如是等四百億十千名。隨衆生心。悉令調伏。諸佛子。此娑婆世界。所言苦聖諦者。彼鮮少世界中。或名險樂欲。或名繫縛處。或名邪行。或名隨受。或名無慙恥。或名貪欲根。或名恆河流。或名常破壞。或名炬火性。或名多憂惱。諸佛子。所言苦集聖諦者。彼鮮少世界中。或名廣地。或名能趣。或名遠慧。或名留難。或名恐怖。或名放逸。或名攝取。或名著處。或名宅主。或名連縛。諸佛子。所言苦滅聖諦者。彼鮮少世界中。或名充滿。或名不死。或名無我。或名無自性。或名分別盡。或名安樂住。或名無限量。或名斷流轉。或名絕行處。或名不二。諸佛子。所言苦滅道聖諦者。彼鮮少世界中。或名大光明。或名演說海。或名簡擇義。或名和合法。或名離取著。或名斷相續。或名廣大路。或名平等因。或名淨方便。或名最勝見。諸佛子。鮮少世界。說四聖諦。有如是等四百億十千名。隨衆生心。悉令調伏。諸佛子。此娑婆世界。所言苦聖諦者。彼歡喜世界中。或名流轉。或名出生。或名失利。或名染著。或名重擔。或名差別。或名內險。或名集會。或名惡舍宅。

或名苦惱性。諸佛子。所言苦集聖諦者。彼歡喜世界中。或名地。或名方便。或
 名非時。或名非實法。或名無底。或名攝取。或名離戒。或名煩惱法。或名狹劣
 見。或名垢聚。諸佛子。所言苦滅聖諦者。彼歡喜世界中。或名破依止。或名不
 放逸。或名真實。或名平等。或名善淨。或名無病。或名無曲。或名無相。或名
 自在。或名無生。諸佛子。所言苦滅道聖諦者。彼歡喜世界中。或名入勝界。或
 名斷集。或名超等類。或名廣大性。或名分別盡。或名神力道。或名衆方便。或
 名正念行。或名常寂路。或名攝解脫。諸佛子。歡喜世界。說四聖諦。有如是等
 四百億十千名。隨衆生心。悉令調伏。諸佛子。此娑婆世界。所言苦聖諦者。彼
 關闌世界中。或名敗壞相。或名如坏器。或名我所成。或名諸趣身。或名數流轉。
 或名衆惡門。或名性苦。或名可棄捨。或名無味。或名來去。諸佛子。所言苦集
 聖諦者。彼關闌世界中。或名行。或名憤毒。或名和合。或名受支。或名我心。
 或名雜毒。或名虛稱。或名乖違。或名熱惱。或名驚駭。諸佛子。所言苦滅聖諦
 者。彼關闌世界中。或名無積集。或名不可得。或名妙藥。或名不可壞。或名無
 著。或名無量。或名廣大。或名覺分。或名離染。或名無障礙。諸佛子。所言苦

滅道聖諦者。彼關闡世界中。或名安隱行。或名離欲。或名究竟實。或名入義。或名性究竟。或名淨現。或名攝念。或名趣解脫。或名救濟。或名勝行。諸佛子。關闡世界。說四聖諦。有如是等四百億十千名。隨衆生心。悉令調伏。諸佛子。此娑婆世界。所言苦聖諦者。彼振音世界中。或名匿疵。或名世間。或名所依。或名傲慢。或名染著性。或名駛流。或名不可樂。或名覆藏。或名速滅。或名難調。諸佛子。所言苦集聖諦者。彼振音世界中。或名須制伏。或名心趣。或名能縛。或名隨念起。或名至後邊。或名共和合。或名分別。或名門。或名飄動。或名隱覆。諸佛子。所言苦滅聖諦者。彼振音世界中。或名無依處。或名不可取。或名轉還。或名離諍。或名小。或名大。或名善淨。或名無盡。或名廣博。或名無等價。諸佛子。所言苦滅道聖諦者。彼振音世界中。或名觀察。或名能摧敵。或名了知印。或名能入性。或名難敵對。或名無限義。或名能入智。或名和合道。或名恆不動。或名殊勝義。諸佛子。振音世界。說四聖諦。有如是等四百億十千名。隨衆生心。悉令調伏。

從爾時文殊師利已下。十一段。是通中心并十方。正說四聖諦義各別不同。

諸佛子。如此娑婆世界中。說四聖諦。有四百億十千名。如是東方百千億。無數無量無邊無等。不可數不可稱不可思不可量不可說。盡法界虛空界所有世界。彼一一世界中。說四聖諦。亦各有四百億十千名。隨衆生心。悉令調伏。如東方。南西北方。四維上下。亦復如是。諸佛子。如娑婆世界。有如上所說十方世界。彼一切世界。亦各有如是十方世界。一一世界中。說苦聖諦。有百億萬種名。說集聖諦。滅聖諦。道聖諦。亦各有百億萬種名。皆隨衆生心之所樂。令其調伏。末後一段。是總都說十方世界無盡名目。皆是四聖諦爲體。從此四諦上。分作種種法門。五蘊十二緣。總在其內。八萬四千塵勞解脫。總在其內。如文具說。不煩更釋。已上佛名號品。四聖諦品。是自己信進修行中所信之法。已下光明覺品。現佛境及所行行門徧周。如文具明。如是已上十信門。以根本普光明智爲殿體。如是進修。究竟不離此智也。

光明覺品第九

將釋此品。約作三門分別。一釋品名目。二釋品來意。三隨文釋義。一釋品

名目者。此品名光明覺品。爲明因如來放十信中足輪下光。照燭十方。初云一三千大千。以次十三千大千。以次增廣。至不可說法界虛空界。爲明無盡。令信心者。了心境廣大。無盡無礙。與法界虛空界等。明其自己法身智身願行亦等故。以光所照。覺悟信心。令修行故。以是因緣。名光明覺品。修行者。一一隨光觀照十方已。能觀之心亦盡。即與法身同體。入十住初心。入信心者。一一隨此寶色燈雲光。觀內心及方所。總令心境。無有內外中間。方可入方便三昧。入十住法門。若不作此寶色光明觀。不成一切普賢願海。神通道力。諸佛大用。皆悉不成。二釋品來意者。爲此第二會中。普光明殿。說十信心。明成凡夫自心所契佛果信。其前之如來名號品。舉佛身眼耳鼻舌等及名號徧周。四聖諦品。明如來口業說法行徧周。總明佛果徧也。令此品放如來信位教行之光。覺悟一切。令信心者。自信自心智境界身行徧周。即一切處不動智佛。一切處文殊師利。一切處覺首目首財首等十首菩薩是也。即明信心者。自己身語意業名號徧周。一如佛故。此品須來。明已上不動智佛等十箇智佛。是信心中所信之果。是自己之智。與佛本同。文殊師利。即是自心妙理之慧。餘九是行。十色世界。是所見之法。三隨

文釋義者。

爾時世尊。從兩足輪下。放百億光明。照此三千大千世界。百億閻浮提。百億弗婆提。百億瞿耶尼。百億鬱單越。百億大海。百億輪圍山。百億菩薩受生。百億菩薩出家。百億如來成正覺。百億如來轉法輪。百億如來入涅槃。百億須彌山王。百億四天王衆天。百億三十三天。百億夜摩天。百億兜率天。百億化樂天。百億他化自在天。百億梵衆天。百億光音天。百億徧淨天。百億廣果天。百億色究竟天。其中所有。悉皆明現。如此處見佛世尊。坐蓮華藏師子之座。十佛刹微塵數菩薩所共圍遶。其百億閻浮提中。百億如來。亦如是坐。悉以佛神力故。十方各有一大菩薩。一一各與十佛刹微塵數諸菩薩俱。來詣佛所。其名曰。文殊師利菩薩。覺首菩薩。財首菩薩。寶首菩薩。功德首菩薩。目首菩薩。精進首菩薩。法首菩薩。智首菩薩。賢首菩薩。是諸菩薩所從來國。所謂金色世界。妙色世界。蓮華色世界。蘆蔔華色世界。優鉢羅華色世界。金色世界。寶色世界。金剛色世界。玻瓈色世界。平等色世界。此諸菩薩。各於佛所。淨修梵行。所謂不動智佛。無礙智佛。解脫智佛。威儀智佛。明相智佛。究竟智佛。最勝智佛。自在智佛。

梵智佛。觀察智佛。爾時一切處文殊師利菩薩。各於佛所。同時發聲。說此頌言。

從初爾時世尊已下。有二十四行半經。於中大意。義分爲五。一舉光出處。二舉光所照境界遠近。三舉一切處百億衆會菩薩同集。四舉一切處佛剎根本智佛。五明一切處文殊同聲一時說頌。一舉光出處者。經云。爾時世尊兩足輪下放百億光明。此光是初會中。如來放眉間光。名一切菩薩智光明普照耀十方藏。此光是教化十方菩薩。安立十信及五位十地法門次第。令隨位進修。開敷智眼。成其無量福智之海。是故名之照耀十方藏。又藏者有二義。一衆生善根。堪受此法。名之爲藏。如文殊師利。歎善財童子。善哉功德藏。能來至我所。二大願大悲大智法身。總名爲藏。此光明常照耀十方法界善根衆生。而能成就大菩提心。大願大悲大智。饒益衆生藏者故。此如來兩足輪所放光明。是彼現相品中眉間之光。照十方已。其光還來入佛足下。爲欲以十地果光。用成十信故。是故於此品中。還放彼第一會中所入如來足下之光。以成十信。如今如來兩足輪下放光。是現相品中所入之光故。明足下放光者。是以果成信初始故。如十住位中。於如來足指端放光。即明入聖之始。發跡應眞之初故。是初生諸佛大智家故。十行位中。足

踏上放光。十迴向位中。膝上放光。十地位中。眉間放光。終而復始。還依舊果。初以果成。因修果體。至功終位極。本末不移。至位更明。今此放兩足輪中之光。明以果成信故。乃至修行常修果體。使慣習成熟故。如此從眉間放光。足下輪中放光。足指端放光。足踏上放光。膝上放光。眉間放光。出現品中。又於眉間放光。名如來出現光明。如此六度放光。總明成就十信十住十行十迴向十地十地。因果法門。進修之行相一終故。法界品又眉間放光者。明此一部之經。菩薩五位進修。及如來出現所證本法。總法界爲體故。明法界一品。是過現未來一切諸佛之本末故。是恆法故。是法常道不思議故。是一切衆生本末故。是一切法之本體故。二舉光照遠近者。初照三千大千之境界。次照十百千。乃至十億。及不可說。問曰。何故不一時普照。而有漸次耶。答。是一時中漸次。爲法界中無前後故。漸次者。爲十信中修勝進增勝故。三舉一切處百億衆會菩薩同集者。明自己信行徧周故。四舉一切處佛世界及十智如來者。明信心者自己智德果徧周故。五一切處文殊師利同時說頌者。明信心者自己妙慧擇法徧周。總明自有。非是他法。從初自信如是十色世界十智如來十首菩薩。總是自己果行法性大智萬行

徧周。以成信故。從此修行。經歷五位。不離此也。是故發心畢竟二不別。如是發心先心難。自未得度先度他。是故我禮初發心。初發以爲天人師。超勝聲聞及緣覺。一如涅槃經說。此明從凡入信心者難故。爲凡夫總自認是凡夫。不肯認自心是不動智故。是故入十信難。明十信心成就。任運至十住初發心住故。乃至究竟佛果故。如三乘中。修十信心。經十千劫。此教中爲以根本智法界爲教體。但以才堪見實即得。不論劫量。如覺城二千之衆。善財爲首者。是路上發心。六千比丘之衆。亦皆是智慧猛利。人類精奇。一聞多曉。悟謙恕仁慈。專求大道。以利含生。皆是一生信滿。發心入位人也。若不信自心元是不動智佛者。即永劫飄淪。何能利人濟物。如經所說。若自有縛。能解彼縛。無有是處。是故發心有二種。一修信解發心。但修十信解故。即如前十智如來十首菩薩是。二信滿發心。十住位初。名初發心住故。即十慧菩薩十箇月佛。是其因果也。又就此說頌門中。義分爲二。一明文殊師利說十偈頌。歎如來十種德。令信心者信解增廣。二明信心者。心地增廣。其光漸增。其光漸增者。明信心漸勝。如文可知。一一隨光所照之境。以心觀之。隨方令心無礙。盡十方總然。十方觀徧。唯有能觀心在。復

觀能觀之心。亦無內外。即十方無礙。方入十住初心。一從文殊說頌中。歎如來十種德。令信心者漸漸增廣。

若有見正覺	解脫離諸漏	不著一切世	彼非證道眼
若有知如來	體相無所有	修習得明了	此人疾作佛
能見此世界	其心不搖動	於佛身亦然	當成勝智者
若於佛及法	其心了平等	二念不現前	當踐難思位
若見佛及身	平等而安住	無住無所入	當成難遇者
色受無有數	想行識亦然	若能如是知	當作大牟尼
世及出世見	一切皆超越	而能善知法	當成大光耀
若於一切智	發生迴向心	見心無所生	當獲大名稱
衆生無有生	亦復無有壞	若得如是智	當成無上道
一中解無量	無量中解一	了彼互生起	當成無所畏
一·從初十行頌。	歎如來法身無體性德。		

爾時光明過此世界。徧照東方十佛國土。南西北方。四維上下。亦復如是。彼一

一世界中。皆有百億闍浮提。乃至百億色究竟天。其中所有。悉皆明現。如此處見佛世尊。坐蓮華藏師子之座。十佛刹微塵數菩薩所共圍遶。彼一一世界中。各有百億闍浮提。百億如來。亦如是坐。悉以佛神力故。十方各有一大菩薩。一一各與十佛刹微塵數諸菩薩俱。來詣佛所。其大菩薩。謂文殊師利等。所從來國。謂金色世界等。本所事佛。謂不動智如來等。爾時一切處文殊師利菩薩。各於佛所。同時發聲。說此頌言。

衆生無智慧	愛刺所傷毒	爲彼求菩提	諸佛法如是
普見於諸法	二邊皆捨離	道成永不退	轉此無等輪
不可思議劫	精進修諸行	爲度諸衆生	此是大仙力
導師降衆魔	勇健無能勝	光中演妙義	慈悲故如是
以彼智慧心	破諸煩惱障	一念見一切	此是佛神力
擊於正法鼓	覺悟十方刹	咸令向善提	自在力能爾
不壞無邊境	而遊諸億刹	於有無所著	彼自在如佛
諸佛如虛空	究竟常清淨	憶念生歡喜	彼諸願具足

一一地獄中

經於無量劫

爲度衆生故

而能忍是苦

不惜於身命

常護諸佛法

無我心調柔

能得如來道

二·十行頌。歎如來大慈悲德。爲衆生求菩提心故。

爾時光明過十世界。徧照東方百世界。南西北方。四維上下。亦復如是。彼諸世界中。皆有百億閻浮提。乃至百億色究竟天。其中所有。悉皆明現。彼一一閻浮提中。悉見如來坐蓮華藏師子之座。十佛刹微塵數菩薩所共圍遶。悉以佛神力故。十方各有一大菩薩。一一各與十佛刹微塵數諸菩薩俱。來詣佛所。其大菩薩。謂文殊師利等。所從來國。謂金色世界等。本所事佛。謂不動智如來等。爾時一切處文殊師利菩薩。各於佛所。同時發誓。說此頌言。

佛了法如幻

通達無障礙

心淨離衆著

調伏諸群生

或有見初生

妙色如金山

住是最後身

永作人中月

或見經行時

具無量功德

念慧皆善巧

丈夫師子步

或見紺青目

觀察於十方

有時現戲笑

爲順衆生欲

或見師子吼

殊勝無比身

示現最後生

所說無非實

或有見出家 解脫一切縛 修治諸佛行 常樂觀寂滅

或見坐道場 覺知一切法 到功德彼岸 癡暗煩惱盡

或見勝丈夫 具足大悲心 轉於妙法輪 度無量衆生

或見師子吼 威光最殊特 超一切世間 神通力無等

或見心寂靜 如世燈永滅 種種現神通 十力能如是

三·十行頌。歎如來了法如幻德。應緣現身故。

爾時光明過百世界。徧照東方千世界。南西北方。四維上下。亦復如是。彼一一世界中。皆有百億閻浮提。乃至百億色究竟天。其中所有。悉皆明現。彼一一閻浮提中。悉見如來坐蓮華藏師子之座。十佛刹微塵數菩薩所共圍遶。悉以佛神力故。十方各有一大菩薩。一一各與十佛刹微塵數諸菩薩俱。來詣佛所。其大菩薩。謂文殊師利等。所從來國。謂金色世界等。本所事佛。謂不動智如來等。爾時一切處文殊師利菩薩。各於佛所。同時發誓。說此頌言。

佛於甚深法 通達無與等 衆生不能了 次第爲開示

我性未曾有 我所亦空寂 云何諸如來 而得有其身

解脫明行者 無數無等倫 世間諸因量 求過不可得

佛非世間蘊 界處生死法 數法不能成 故號人師子

其性本空寂 內外俱解脫 離一切妄念 無等法如是

體性常不動 無我無來去 而能悟世間 無邊悉調伏

常樂觀寂滅 一相無有二 其心不增減 現無量神力

不作諸衆生 業報因緣行 而能了無礙 善逝法如是

種種諸衆生 流轉於十方 如來不分別 度脫無邊類

諸佛眞金色 非有徧諸有 隨衆生心樂 爲說寂滅法

四·十行頌。歎如來以甚深法德。爲衆開示故。

爾時光明過千世界。徧照東方十千世界。南西北方。四維上下。亦復如是。彼一世界中。皆有百億閻浮提。乃至百億色究竟天。其中所有。悉皆明現。彼一閻浮提中。悉見如來坐蓮華藏師子之座。十佛刹微塵數菩薩所共圍遶。悉以佛神力故。十方各有一大菩薩。一一各與十佛刹微塵數諸菩薩俱。來詣佛所。其大菩薩。謂文殊師利等。所從來國。謂金色世界等。本所事佛。謂不動智如來等。爾

時一切處文殊師利菩薩。各於佛所。同時發聲。說此頌言。

發起大悲心	救護諸衆生	永出人天衆	如是業應作
意常信樂佛	其心不退轉	親近諸如來	如是業應作
志樂佛功德	其心永不退	住於清涼慧	如是業應作
一切威儀中	常念佛功德	晝夜無暫斷	如是業應作
觀無邊三世	學彼佛功德	常無厭倦心	如是業應作
觀身如實相	一切皆寂滅	離我無我著	如是業應作
等觀衆生心	不起諸分別	入於真實境	如是業應作
悉舉無邊界	普飲一切海	神通大智力	如是業應作
思惟諸國土	色與非色相	一切悉能知	如是業應作
十方國土塵	一塵爲一佛	悉能知其數	如是業應作
五・十行頌。	歎佛救護衆生德。	勸信心者。	有十種業應作故。

爾時光明過十千世界。徧照東方百千世界。南西北方。四維上下。亦復如是。彼一一世界中。皆有百億閻浮提。乃至百億色究竟天。其中所有。悉皆明現。彼一

一闍浮提中。悉見如來坐蓮華藏師子之座。十佛刹微塵數菩薩所共圍遶。悉以佛神力故。十方各有一大菩薩。一一各與十佛刹微塵數諸菩薩俱。來詣佛所。其大菩薩。謂文殊師利等。所從來國。謂金色世界等。本所事佛。謂不動智如來等。爾時一切處文殊師利菩薩。各於佛所。同時發誓。說此頌言。

若以威德色種族 而見人中調御師 是爲病眼顛倒見 彼不能知最勝法
如來色形諸相等 一切世間莫能測 億那由劫共思量 色相威德轉無邊
如來非以相爲體 但是無相寂滅法 身相威儀悉具足 世間隨樂皆得見
佛法微妙難可量 一切言說莫能及 非是和合非不合 體性寂滅無諸相
佛身無生超戲論 非是蘊聚差別法 得自在力決定見 所行無畏離言道

身心悉平等 內外皆解脫 永劫住正念 無著無所繫
意淨光明者 所行無染著 智眼靡不周 廣大利衆生
一身爲無量 無量復爲一 了知諸世間 現形遍一切
此身無所從 亦無所積聚 衆生分別故 見佛種種身
心分別世間 是心無所有 如來知此法 如是見佛身

六·十五行頌。歎如來無相之相德。隨其見者皆得見故。

爾時光明過百千世界。徧照東方百萬世界。南西北方。四維上下。亦復如是。彼一一世界中。皆有百億閻浮提。乃至百億色究竟天。其中所有。悉皆明現。彼一一閻浮提中悉見如來坐蓮華藏師子之座。十佛刹微塵數菩薩所共圍遶。悉以佛神力故。十方各有一大菩薩。一一各與十佛刹微塵數諸菩薩俱。來詣佛所。其大菩薩。謂文殊師利等。所從來國。謂金色世界等。本所事佛。謂不動智如來等。爾時一切處文殊師利菩薩。各於佛所。同時發聲。說此頌言。

如來最自在	超世無所依	具一切功德	度脫於諸有
無染無所著	無想無依止	體性不可量	見者咸稱歎
光明徧清淨	塵累悉蠲滌	不動離二邊	此是如來智
若有見如來	身心離分別	則於一切法	永出諸疑滯
一切世間中	處處轉法輪	無性無所轉	導師方便說
於法無疑惑	永絕諸戲論	不生分別心	是念佛菩提
了知差別法	不著於言說	無有一與多	是名隨佛教

多中無一性

一亦無有多

如是二俱捨

普入佛功德

衆生及國土

一切皆寂滅

無依無分別

能入佛菩提

衆生及國土

一異不可得

如是善觀察

名知佛法義

七·十行頌。歎如來無依自在德。具一切功德。令信心者修學故。

大方廣佛新華嚴經合論卷第二十七終

大方廣佛新華嚴經合論卷第二十八

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

光明覺品第九之餘

爾時光明過百萬世界。徧照東方一億世界。南西北方。四維上下。亦復如是。彼一一世界中。皆有百億閻浮提。乃至百億色究竟天。其中所有。悉皆明現。彼一一閻浮提中。各見如來坐蓮華藏師子之座。十佛剎微塵數菩薩所共圍繞。悉以佛神力故。十方各有一大菩薩。一一各與十佛剎微塵數諸菩薩俱。來詣佛所。其大菩薩。謂文殊師利等。所從來國。謂金色世界等。本所事佛。謂不動智如來等。爾時一切處文殊師利菩薩。各於佛所。同時發聲。說此頌言。

智慧無等法無邊

超諸有海到彼岸

壽量光明悉無比

此功德者方便力

所有佛法皆明了

常觀三世無厭倦

雖緣境界不分別

此難思者方便力

樂觀衆生無生想

普見諸趣無趣想

恆住禪寂不繫心

此無礙慧方便力

善巧通達一切法

正念勤修涅槃道

樂於解脫離不平

此寂滅人方便力

有能勸向佛菩提

趣如法界一切智

善化衆生入於諦

此住佛心方便力

佛所說法皆隨入

廣大智慧無所礙

一切處行悉已臻

此自在修方便力

恆住涅槃如虛空

隨心化現靡不周

此依無相而爲相

到難到者方便力

晝夜日月及年劫

世界始終成壞相

如是憶念悉了知

此時數智方便力

一切衆生有生滅

色與非色想非想

所有名字悉了知

此住難思方便力

過去現在未來世

所有言說皆能了

而知三世悉平等

此無比解方便力

八·二十行頌。歎如來智慧方便德。令信心者樂學修行故。

爾時光明過一億世界。徧照東方十億世界。南西北方。四維上下。亦復如是。彼一一世界中。皆有百億閻浮提。乃至百億色究竟天。其中所有。悉皆明現。彼一一閻浮提中。悉見如來坐蓮華藏師子之座。十佛剎微塵數菩薩所共圍遶。悉以佛神力故。十方各有一大菩薩。一一各與十佛剎微塵數諸菩薩俱。來詣佛所。其大菩薩。謂文殊師利等。所從來國。謂金色世界等。本所事佛。謂不動智如來等。

爾時一切處文殊師利菩薩。各於佛所。同時發誓。說此頌言。

廣大苦行皆修習	日夜精勤無厭怠	已度難度師子吼	普化衆生是其行
衆生流轉愛欲海	無明網覆大憂迫	至仁勇猛悉斷除	誓亦當然是其行
世間放逸著五欲	不實分別受衆苦	奉行佛教常攝心	誓度於斯是其行
衆生著我入生死	求其邊際不可得	普事如來獲妙法	爲彼宣說是其行
衆生無怙病所纏	常淪惡趣起三毒	大火猛焰恆燒熱	淨心度彼是其行
衆生迷惑失正道	常行邪徑入閻宅	爲彼大然正法燈	永作照明是其行
衆生漂溺諸有海	憂難無涯不可處	爲彼興造大法船	皆令得度是其行
衆生無知不見本	迷惑癡狂險難中	佛哀愍彼建法橋	正念令昇是其行
見諸衆生在險道	老病死苦常逼迫	修諸方便無限量	誓當悉度是其行
聞法信解無疑惑	了性空寂不驚怖	隨形六道徧十方	普教群迷是其行

九·二十行頌。歎如來廣大苦行精進德。令信心者修行故。

爾時光明過十億世界。徧照東方百億世界。千億世界。百千億世界。那由他億世界。百那由他億世界。千那由他億世界。百千那由他億世界。如是無數無量無邊

無等。不可數不可稱不可思不可量不可說。盡法界虛空界所有世界。南西北方。四維上下。亦復如是。彼一一世界中。皆有百億闍浮提。乃至百億色究竟天。其中所有。悉皆明現。彼一一闍浮提中。悉見如來坐蓮華藏師子之座。十佛刹微塵數菩薩所共圍遶。悉以佛神力故。十方各有一大菩薩。一一各與十佛刹微塵數諸菩薩俱。來詣佛所。其大菩薩。謂文殊師利等。所從來國。謂金色世界等。本所事佛。謂不動智如來等。爾時一切處文殊師利菩薩。各於佛所。同時發聲。說此頌言。

一念普觀無量劫	無去無來亦無住	如是了知三世事	超諸方便成十力
十方無比善名稱	永離諸難常歡喜	普詣一切國土中	廣爲宣揚如是法
爲利衆生供養佛	如其意獲相似果	於一切法悉順知	徧十方中現神力
從初供佛意柔忍	入深禪定觀法性	普勸衆生發道心	以此速成無上果
十方求法情無異	爲修功德令滿足	有無二相悉滅除	此人於佛爲眞見
普往十方諸國土	廣說妙法興義利	住於實際不動搖	此人功德同於佛
如來所轉妙法輪	一切皆是菩提分	若能聞已悟法性	如是之人常見佛

不見十方空如幻

雖見非見如盲覩

分別取相不見佛

畢竟離著乃能見

衆生隨業種種別

十方內外難盡見

佛身無礙徧十方

不可盡見亦如是

譬如空中無量刹

無來無去徧十方

生成滅壞無所依

佛徧虛空亦如是

十·二十行頌。歎如來實性無三世德。無二相徧周一切。令信心者修學故。已上文殊師利。說此十頌。歎佛十德。令起信心者。發信進修行故。此光明覺品。舉佛果法。令信心者。正自入信。信同諸佛果法。不移法身不動智。菩薩行徧周一體自古及今。更無他法。凡聖一性。同無性味。同大願大慈大悲大智。文殊妙慧。普賢萬行之味。總爲動寂一體用故。如是信修。從初發心。一時並進。以此十信位內。置一百四十大願。成大悲行。法身慧身智身。一時俱進故。法身者。即十色世界是。智身者。即十智佛是。慧身者。即文殊師利是。大悲者。即一百四十大願成之是。如是已上諸法。皆是此光明覺品。悉皆信入。如問明品。即是已入信中間答法則。成其信力修行故。問曰。何故成十信門。皆文殊師利說法。答曰。爲明文殊。是十方諸佛妙慧。善簡擇正邪。正邪既定。方以行修行。即名普賢行也。次第合然故。明文殊師利。是童子菩薩。以因創發。啓蒙入信之首故。

因行成名也。問曰。五位法中。菩薩入定方說。何故信位。不入定說。答。信是凡夫生滅心。信未入證。故無定也。以五位是入體應真無作之理智。非無思而顯。不可以有情求之。故須入定。

菩薩問明品第十

將釋此品。約分三門。一釋品名目。二釋品來意。三隨文釋義。一釋品名目者。爲成十種信根。長十種信力。文殊師利覺首等。互爲主伴。問十種法明故。故爲問明品。二釋品來意者。前品如來足下輪中。放光開覺。所照佛境遠近。令信心者。一一觀之無礙。令心行廣大。稱法界故。又文殊師利菩薩。以十偈頌。歎佛十德。勸令信心者修行故。此問明品。即是明十信心者。正修行之行。及斷疑故。有此品來也。三隨文釋義者。於此品一段文中。有十一段經。明文殊覺首十菩薩等。互爲主伴。問十種法明。各以菩薩之名。即表十信所行之行。文殊還以名下之行。以相諮問。十菩薩等。各以自行之法。以頌答之。令信心者。依而做學。其十問十頌。其文如下。最下一段。都結十方同此。

爾時文殊師利菩薩。問覺首菩薩言。佛子。心性是一。云何見有種種差別。所謂往善趣惡趣。諸根滿缺。受生同異。端正醜陋。苦樂不同。業不知心。心不知業。受不知報。報不知受。心不知受。受不知心。因不知緣。緣不知因。智不知境。境不知智。時覺首菩薩。以頌答曰。

仁今問是義	爲曉悟群蒙	我如其性答	惟仁應諦聽
諸法無作用	亦無有體性	是故彼一切	各各不相知
譬如河中水	湍流競奔逝	各各不相知	諸法亦如是
亦如火聚	猛焰同時發	各各不相知	諸法亦如是
又如長風起	遇物咸鼓扇	各各不相知	諸法亦如是
又如衆地界	展轉因依住	各各不相知	諸法亦如是
眼耳鼻舌身	心意諸情根	以此常流轉	而無能轉者
法性本無生	示現而有生	是中無能現	亦無所現物
眼耳鼻舌身	心意諸情根	一切空無性	妄心分別有
如理而觀察	一切皆無性	法眼不思議	此見非顛倒

若實若不實 若妄若非妄 世間出世間 但有假言說

第一·爾時文殊師利菩薩已下。六行經。是文殊菩薩起二十問善惡因果。或一字一問。或一句一問。總有二十問。向下十一行頌。是覺首菩薩答。初一行頌。是歎能問之人及勸聽。後十行頌。是答所問之法。文殊善問世間善惡因果不相知。業能成就善惡因果。覺首菩薩便以法不相知。以真理答。但爲迷真。自作業爾。知真者。但以全業是真。末後一行頌。明真妄總亡。舉喻及法說故。如文自具。思之可見。文順理顯。不煩更釋。於此十一行頌中。義分爲三。一科頌意。二釋菩薩名。三配隨位因果。一科頌意者。此十一行。一行是一頌。初行歎能問及勸聽。次下十行文各自具明。初一行頌。頌法無作無性。次一行舉喻水流不相知。准意知之。不煩更科。二釋菩薩名者。爲明覺此隨流生死業體。本性恆真。而無流轉。眼耳鼻舌身意。恆如法知。非流轉生死性故。亦無虛妄。亦無真實。但爲無貪瞋癡愛眞智慧故。名之爲眞故。說如斯法利衆生故。名爲自覺覺他大道心衆生者故。爲以此當體無明諸業因果上。自覺覺他。令知法界自性眞理。眞妄兩亡。名爲覺首。以信此法初。名之爲首。此明十信初心。全信自身眼耳鼻舌身意。及

以一切衆生全體。眞妄兩亡。唯佛智海故。故以不動智佛十智如來。爲十信位中自己果故。金色世界妙色世界蓮華色世界等十色世界。是十信之中所信之理。文殊師利覺首財首等十菩薩衆。是十信之行。以行立名。得名知行。一一菩薩。傲行解上而立名故。已下菩薩例然。世界名妙色。即是覺首菩薩所覺之理。無礙智佛。即自覺首當位所修佛果。以此信心。明諸業因果。眞妄兩亡。即智用無礙故。三配隨位因果者。常以自心本不動智佛。爲本信心之因。以進修得此無礙智佛。是隨位佛果。此乃但依問答。及菩薩名號佛名號世界形色。取其意趣。理自分明。勿須疑也。

爾時文殊師利菩薩。問財首菩薩言。佛子。一切衆生非衆生。云何如來。隨其時。隨其命。隨其身。隨其行。隨其解。隨其言論。隨其心樂。隨其方便。隨其思惟。隨其觀察。於如是諸衆生中。為現其身。教化調伏。時財首菩薩。以頌答曰。

此是樂寂滅	多聞者境界	我爲仁宣說	仁今應聽受
分別觀內身	此中誰是我	若能如是解	彼達我有無
此身假安立	住處無方所	諦了是身者	於中無所著

於身善觀察 一切皆明見 知法皆虛妄 不起心分別

壽命因誰起 復因誰退滅 猶如旋火輪 初後不可知

智者能觀察 一切有無常 諸法空無我 永離一切相

衆報隨業生 如夢不真實 念念常滅壞 如前後亦爾

世間所見法 但以心爲主 隨解取衆相 顛倒不如實

世間所言論 一切是分別 未曾有一法 得入於法性

能緣所緣力 種種法出生 速滅不暫停 念念悉如是

第二·爾時文殊師利菩薩已下。五行經。是文殊師利問財首菩薩。言如來十種方便隨時之法。初舉非衆生。即約覺首所答業體純真。後問如來十種隨時之化。何緣而有。財首爲成信心。約實而答。隨時是假。如下十行頌中具明。於此十行頌中。義分爲三。一科其頌意。二釋菩薩名。三配隨位因果。一科頌意者。此十行頌中。一行一頌。初一行頌中。初兩句。歎所問法非小器所堪。是多聞者之境界。次兩句。今如問當說及勸聽。已下九行頌。是財首以實而答。如文具明。二釋菩薩名者。爲將如下頌中。善達真假法財。而惠施衆生故。名爲財首。以十信

心中法財初始益生之行。名之爲首。世界名蓮華色者。明此信中。以法聖財饒益衆生。令其自他性無染著。號曰世界名爲蓮華色。以法施人。破迷成智。名爲滅暗智佛。明當位信中。自具法門。理行智之因果故。財首是當位之行。已下例然。三配隨位因果者。常以自心根本不動智佛。文殊師利。爲信心之因。進修得解脫智佛。財首菩薩。是隨位之行果故。佛是智果。餘者例然倣此。

爾時文殊師利菩薩。問寶首菩薩言。佛子。一切衆生。等有四大。無我無我所。云何而有受苦受樂。端正醜陋。內好外好。少受多受。或受現報。或受後報。然法界中。無美無惡。時寶首菩薩。以頌答曰。

隨其所行業	如是果報生	作者無所有	諸佛之所說
譬如淨明鏡	隨其所對質	現像各不同	業性亦如是
亦如田種子	各各不相知	自然能出生	業性亦如是
又如巧幻師	在彼四衢道	示現衆色相	業性亦如是
如機關木人	能出種種聲	彼無我非我	業性亦如是
亦如衆鳥類	從殼而得出	音聲各不同	業性亦如是

譬如胎藏中

諸根悉成就

體相無來處

業性亦如是

又如在地獄

種種諸苦事

彼悉無所從

業性亦如是

譬如轉輪王

成就勝七寶

來處不可得

業性亦如是

又如諸世界

大火所燒然

此火無來處

業性亦如是

第三·爾時已下。四行半經。是文殊師利問寶首菩薩。先總舉衆生同有四大。無我無我所。云何已下。有十問業因果法。已下有十行頌。是寶首菩薩答前十問故。初明舉體無分別。二明受業之好醜。由行所生。具如經說。大意達體業亡。迷眞業起故。於此十行頌中。義分爲三。一科頌意。二釋菩薩名。三配隨位因果。一科頌意者。初兩句。是歎果報由行生。次兩句。歎業體本眞。本無所有。是諸佛所說。已下九行。一行一頌。舉喻顯法。達法無業。法業無二。由行不同。如文可知。二釋菩薩名者。明此信位。達業即法體。不復有業。名之法寶。以此法寶益生。爲信首故。故名寶首。明此是北方是師位。以威儀軌則以利衆生故。佛號威儀智佛。世界名蘆蔔華者。此華黃色。明是利衆生之福德色也。黃者福慶之氣。內應白淨。外現黃相故。如來爲人天之師。衣緇衣。像北方坎故。內應白淨。

無染之理。外現黃相。即明以利生白淨無染之福相。以爲世界之名。以利衆生德行庠序。佛號威儀智佛。常以法寶利生。達業性眞。名爲寶首菩薩。總是第四信心。自所得法。因果理智之號。問曰。何故北方爲師爲君。答曰。像水利潤萬物。又水流慕下。像爲君爲師者。就愚濟迷。使令發明。又明北方坎爲下位。像爲君爲師者。常以謙下之行。令衆生所歸益之。以道潤之故。君子常謙處下位。而濟物發明故。故以北方坎爲君爲師。夫大方無隅。但取其義表德故。餘位如名號品已釋。一佛號徧十方故。此以隨方表法故。如周易泰卦。乾下坤上。初九拔茅連茹。爲茅潔白柔弱。其根甘甜。像君子有德。如茅柔弱潔白甘和。可以引而接之與仕也。然茅非君子。以物喻之。然此方隅非佛也。以法喻之。令知法也。佛智無依。依物名智。其方無方。以法成方也。非東西南北。如情所見方故。三配隨位因果者。常以自心本不動智佛。爲始信心之因。進修得威儀智佛。爲第四精進波羅蜜中之果也。

爾時文殊師利菩薩。問德首菩薩言。佛子。如來所悟。唯是一法。云何乃說無量諸法。現無量刹。化無量衆。演無量音。示無量身。知無量心。現無量神通。普

能震動無量世界。示現無量殊勝莊嚴。顯示無邊種種境界。而法性中。此差別相。皆不可得。時德首菩薩。以頌答曰。

佛子所問義	甚深難可了	智者能知此	常樂佛功德
譬如地性一	衆生各別住	地無一異念	諸佛法如是
亦如火性一	能燒一切物	火焰無分別	諸佛法如是
亦如大海一	波濤千萬異	水無種種殊	諸佛法如是
亦如風性一	能吹一切物	風無一異念	諸佛法如是
亦如大雲雷	普雨一切地	雨滴無差別	諸佛法如是
亦如地界一	能生種種芽	非地有殊異	諸佛法如是
如日無雲曠	普照於十方	光明無異性	諸佛法如是
亦如空中月	世間靡不見	非月往其處	諸佛法如是
譬如大梵王	應現滿三千	其身無別異	諸佛法如是

第四·爾時已下。六行經。是文殊問德首菩薩。如來所悟是一法。云何已下有十問。如文具明。已下有十行頌。是德首菩薩答。於此說頌中。義分爲三。一

科頌之意。二釋菩薩名。三配隨位因果。一科頌意者。此十行頌中。初一行。歎所問之義甚深。唯智所知。次下九行頌。一行一頌。如文具明。大意明不異一法界。修行無量法門。無量法門。祇是一法界性。不可滯一不作多。不可滯多不是一。如十玄義思之。以無依住智照之可見。二釋菩薩名者。名德首者。爲明此位。不離一法界性。以消癡愛。及一切煩惱。而常修習一切諸功德。以名爲德首。世界名青蓮華者。明此第五信心。是禪波羅蜜故。心淨無染。無貪愛癡故。此是東北方。佛號明相智。明此位進修之果。得法心淨故。如良位。寅丑兩間。明相現故。故佛號明相智。用此方隅。以表禪定法故。以東北方是良。良爲山。山表安靜不動義。是禪定義故。三配隨位因果者。常以自心根本不動智佛。爲所信之因。進修得明相智佛爲果也。

爾時文殊師利菩薩。問曰首菩薩言。佛子。如來福田。等一無異。云何而見衆生布施果報不同。所謂種種色。種種形。種種家。種種根。種種財。種種主。種種眷屬。種種官位。種種功德。種種智慧。而佛於彼。其心平等。無異思惟。時自首菩薩。以頌答曰。

譬如大地一 隨種各生芽 於彼無怨親 佛福田亦然

又如水一味 因器有差別 佛福田亦然 衆生心故異

亦如巧幻師 能令衆歡喜 佛福田如是 令衆生敬悅

如有才智王 能令大衆喜 佛福田如是 令衆悉安樂

譬如淨明鏡 隨色而現像 佛福田如是 隨心獲衆報

如阿揭陀藥 能療一切毒 佛福田如是 滅諸煩惱患

亦如日出時 照耀於世間 佛福田如是 滅除諸黑闇

亦如淨滿月 普照於大地 佛福田亦然 一切處平等

譬如毘藍風 普震於大地 佛福田如是 動三有衆生

譬如大火起 能燒一切物 佛福田如是 燒一切有爲

第五·爾時已下。五行半經。是文殊問目首菩薩。如來福田等一無異。所謂

已下有十問。具如經說。已下有十行頌。是目首所答。三門如前。一科頌意者。

此十行頌。一行一頌。其頌意答前所問。佛福田是一。云何布施果報不同。其義

有二不同。一明佛自福田不同。二明衆生所施福田不同。一明佛自福田不同者。

明如來身。目髮紺青。身金色。丹脣素齒。一身之上。色各不同。華藏世界莊嚴萬異者。總明法性理智中具有。以法性理智中。本具無量功德故。有隨行報得莊嚴者。如如來身有九十七種大人之相者。是法身智體自具故。如來有無量隨好功德莊嚴。是隨行報得故。如外邊依正報中。金剛地。是法性身報得。是正報。寶樹莊嚴世界。是法性隨行報得。是依報。宮殿樓閣。是法性大智隨大慈悲含育衆生業上報得。師子座。是法性隨智轉法輪報得。蓮華藏世界。是法性隨行教化衆生無染性報得。香水海。是法性隨大悲心謙下饒益行報得。香河右漩。是隨順法性進修教化衆生報得。總不離法性大智。隨行報殊。一一行中。皆有無量行門。互爲主伴。以此莊嚴依報正報。一一境界中。有無量同異。此是觀因知果。以此准知。總是一性中隨用不同故。二衆生布施福田果報不同者。此乃由心輕重。有智無智。謙下高心。所求有異。總是一心中隨用不同。二釋菩薩名者。名爲目首。明此位是東南方。辰巳之間。像此信心進修智日漸高。善知福田因果等報。名爲目首。是故如來常取辰巳。以爲齋戒之則。如前名號品已釋。准彼知之。三配因果者。還以自心本不動智佛爲因。此位究竟智佛。爲進修之果。

爾時文殊師利菩薩。問勤首菩薩言。佛子。佛教是一。衆生得見。云何不即悉斷一切諸煩惱縛。而得出離。然其色蘊。受蘊。想蘊。行蘊。識蘊。欲界。色界。無色界。無明貪愛。無有差別。是則佛教。於諸衆生。或有利益。或無利益。時勤首菩薩。以頌答曰。

佛子善諦聽	我今如實答	或有速解脫	或有難出離
若欲求除滅	無量諸過惡	當於佛法中	勇猛常精進
譬如微少火	樵濕速令滅	於佛法中	懈怠者亦然
如鑽燧求火	未出而數息	火勢隨止滅	懈怠者亦然
如人持日珠	不以物承影	火終不可得	懈怠者亦然
譬如赫日照	孩稚閉其目	怪言何不覩	懈怠者亦然
如人無手足	欲以芒草箭	徧射破大地	懈怠者亦然
如以一毛端	而取大海水	欲令盡乾竭	懈怠者亦然
又如劫火起	欲以少水滅	於佛法中	懈怠者亦然
如有見虛空	端居不搖動	而言普騰躡	懈怠者亦然

第六·爾時文殊師利已下。五行半經。是文殊問勤首。佛教是一。云何得見者。有斷煩惱。不斷煩惱。不同等。然其已下十問。已下有十行頌。是勤首菩薩所答。於中三門如前。一科頌意者。此十行頌。初一行勸聽。次一行頌。勸聞法勤修。已下八行。責其懈怠。如文具明。二釋菩薩名者。名爲勤首。爲明前目首。善示福田因果。佛號究竟智。此位當須勤而行之。故名勤首。佛號最勝智。爲明勤修勝進。即得最勝智爲果故。三配隨位因果者。還以本不動智佛爲因。最勝智佛爲進修之果。

爾時文殊師利菩薩。問法首菩薩言。佛子。如佛所說。若有衆生。受持正法。悉能除斷一切煩惱。何故復有受持正法而不斷者。隨貪瞋癡。隨慢隨覆。隨忿隨恨。隨嫉隨慳。隨誑隨詔。勢力所轉。無有離心。能受持法。何故復於心行之內。起諸煩惱。時法首菩薩。以頌答曰。

佛子善諦聽	所問如實義	非但以多聞	能入如來法
如人水所漂	懼溺而渴死	於法不修行	多聞亦如是
如人設美饌	自餓而不食	於法不修行	多聞亦如是

如人善方藥 自疾不能救 於法不修行 多聞亦如是

如人數他寶 自無半錢分 於法不修行 多聞亦如是

如有生王宮 而受餒與寒 於法不修行 多聞亦如是

如聾奏音樂 悅彼不自聞 於法不修行 多聞亦如是

如盲續衆像 示彼不自見 於法不修行 多聞亦如是

譬如海船師 而於海中死 於法不修行 多聞亦如是

如在四衢道 廣說衆好事 內自無實德 不行亦如是

第七·爾時已下。六行經。是文殊問法首。如佛所說。若有衆生。受持正法。

悉能除斷一切煩惱。何故有受持正法而不斷者。於中有十一問。如文具明。於中

有十行頌。是法首所答。三門義如前。一科頌意者。此十行頌中。初一句勸聽。

次一句歎能問。次兩句。責多聞者不修行。已下九行頌。一行一頌。責多聞而心

不精專。不能斷煩惱。如文具明。二釋菩薩名者。名爲法首。爲明此是西北方。

戌亥兩間。明愚迷長夜中。能以正法自利利他。專求無懈。名爲法首。世界名金

剛者。以堅精無怠。是自世界。託西北方乾卦。乾爲堅剛。佛號自在智者。以自

精勤觀照。達理業亡。名爲自在智佛。三配隨位因果者。還以自心本不動智佛爲因。進修得自在智佛爲果。

爾時文殊師利菩薩。問智首菩薩言。佛子。於佛法中。智爲上首。如來何故。或爲衆生讚歎布施。或讚持戒。或讚堪忍。或讚精進。或讚禪定。或讚智慧。或復讚歎慈悲喜捨。而終無有唯以一法而得出離。成阿耨多羅三藐三菩提者。時智首菩薩。以頌答曰。

佛子甚希有	能知衆生心	如仁所問義	諦聽我今說
過去未來世	現在諸導師	無有說一法	而得於道者
佛知衆生心	性分各不同	隨其所應度	如是而說法
慳者爲讚施	毀禁者讚戒	多瞋爲讚忍	好懈讚精進
亂意讚禪定	愚癡讚智慧	不仁讚慈愍	怒害讚大悲
憂感爲讚喜	曲心讚歎捨	如是次第修	漸具諸佛法
如先立基堵	而後造宮室	施戒亦復然	菩薩衆行本
譬如建城郭	爲護諸人衆	忍進亦如是	防護諸菩薩

譬如大力王

率土咸戴仰

定慧亦如是

菩薩所依賴

亦如轉輪王

能與一切樂

四等亦如是

與諸菩薩樂

第八·爾時已下。有五行經。是文殊問智首。如來唯以一法而得出離。又於佛法中以智爲首。何故讚歎布施等。總有十問。大意明十波羅蜜。四無量心。畢竟無體。何須用爲。已下有十行頌。是智首菩薩答。如文具明。於中三門如前。一科頌意者。此十行頌中。初一行頌。歎能問及勸聽。已下九行。一行一頌。如文具明。智首答意。明諸助道法。隨根遣病。若不修學。無性菩提不成。如頌中分明舉喻況說可知。但須依法。有病即治之。如除堆阜。道自無礙。自病已除。還與人服故藥。藥之與方。終無捨離。二釋菩薩名者。名爲智首。以明智能知根。權施法藥。四攝。四無量。十波羅蜜。三十七助菩提分。隨病生起增多之處。而令服之。顯發菩提無作之性。漸令依本。名爲智首。此是下方世界。明以布施戒忍進定等十波羅蜜門。如地能生發一切白淨之法故。世界名玻瓈。此是白色。如水精寶色。佛號梵智者。明心如大地。荷負萬有。常安淨故。梵者淨也。三配隨位因果者。還以自心本不動智佛爲因。進修得心智寂靜爲果。表地體安靜故。

爾時文殊師利菩薩。問賢首菩薩言。佛子。諸佛世尊。唯以一道而得出離。云何今見一切佛土。所有衆事。種種不同。所謂世界。衆生界。說法調伏。壽量光明。神通衆會。教儀法住。各有差別。無有不具一切佛法。而成阿耨多羅三藐三菩提者。時賢首菩薩。以頌答曰。

文殊法常爾	法王唯一法	一切無礙人	一道出生死
一切諸佛身	唯是一法身	一心一智慧	力無畏亦然
如本趣菩提	所有迴向心	得如是剎土	衆會及說法
一切諸佛刹	莊嚴悉圓滿	隨衆生行異	如是見不同
佛刹與佛身	衆會及言說	如是諸佛法	衆生莫能見
其心已清淨	諸願皆具足	如是明達人	於此乃能覩
隨衆生心樂	及以業果力	如是見差別	此佛威神故
佛刹無分別	無憎無有愛	但隨衆生心	如是見有殊
以是於世界	所見各差別	非一切如來	大仙之過咎
一切諸世界	所應受化者	常見人中雄	諸佛法如是

第九·爾時已下。是文殊問賢首。一切諸佛。一道而得出離。云何今見種種不同。所謂已下有十問。下有十行頌。是賢首答。於中三門如前。一科頌意者。此十行頌中。初兩行。歎法王唯一法一身一智。已下八行頌。於中大意有四。一歎差別佛土。因本迴向心所成。爲明迴向心。就根益物。身土教儀。悉皆就根。二明諸佛自報之境。非是行因方見。三明衆差別之事。皆由衆生之心行異故。隨自心見別。非佛之異。四明佛神力。能就根現法。二釋菩薩名者。名爲賢首。爲明得此十種信心。信佛果德。與自心體一。善諳疑滯通塞。入其賢位。故名賢首。此是上方位也。意明此信位。心智及境。悉如虛空。無所不含。皆無妨礙。是賢仁之德。故名賢首。又世界名平等色。爲明既是上方。明身心與空合。故世界名平等色。佛號觀察智。明以其自心空智慧門。善能觀察諸法皆空。無所染著。是故名觀察智佛。三配隨位因果者。還以自心根本性空無分別不動智佛爲因。以進修至此法空觀察智佛爲果。明不動智是體。觀察智佛是用。至此明體用圓滿。因果一性。以是義故。還說如來一身一心一智慧法門。明契果會因。始末無二。總以一爲根本故。問曰。何故頌初云。文殊法常爾。答曰。爲文殊是諸佛之慧。不

動智是體。文殊是用。以將此一切諸佛一切衆生根智之體用門。與一切信心者作因果體用故。使依本故。迄至究竟果滿。與因不異。無二性故。方名初發心畢竟心二種不別。明此十信心。難發難信難入。聞之者。皆云我是凡夫。何猶可得是佛。故說少分信者。即贊神通道力。是故當知。且須如是正信。方始以正信正見。法力加行。如法進修。分分無明薄。解脫智慧明。依自得法淺深。漸當神通德用。隨自己得。信猶未得。何索神通。說言漸漸者。不移一時一法性一智慧。無依住無所得中。漸漸故。以十玄六相義圓之。法性理中。無有漸頓。但爲無始無明。慣習習熟。卒令契理。純熟難故。而有漸漸。其漸漸者。畢竟無始終延促長短等量故。名爲漸漸。

大方廣佛新華嚴經合論卷第二十八終

大方廣佛新華嚴經合論卷第二十九

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

菩薩問明品第十之餘

爾時諸菩薩。謂文殊師利菩薩言。佛子。我等所解。各自說已。唯願仁者。以妙辯才。演暢如來所有境界。何等是佛境界。何等是佛境界因。何等是佛境界度。何等是佛境界入。何等是佛境界智。何等是佛境界法。何等是佛境界說。何等是佛境界知。何等是佛境界證。何等是佛境界現。何等是佛境界廣。時文殊師利菩薩。以頌答曰。

如來深境界	其量等虛空	一切衆生入	而實無所入
如來深境界	所有勝妙因	億劫常宣說	亦復不能盡
隨其心智慧	誘進咸令益	如是度衆生	諸佛之境界

世間諸國土 一切皆隨入 智身無有色 非彼所能見

諸佛智自在 三世無所礙 如是慧境界 平等如虛空

法界衆生界 究竟無差別 一切悉了知 此是如來境

一切世界中 所有諸音聲 佛智皆隨了 亦無有分別

非識所能識 亦非心境界 其性本清淨 開示諸群生

非業非煩惱 無物無住處 無照無所行 平等行世間

一切衆生心 普在三世中 如來於一念 一切悉明達

第十·爾時已下。明諸菩薩共問文殊師利。十一種佛境界。已下十行頌。是文殊師利答。於中三門如前。一科頌意。此十行頌。一行一頌。其頌文答前所問。頌文自具。不煩更釋。二釋菩薩名者。名文殊師利。此云妙德。以妙慧善揀正邪自在。故云妙德。此是東方卯位也。明卯主東方震卦。震爲雷動。啓蟄發生之始。明此妙慧。是震動發生信心之始。是故亦云妙生菩薩。爲明一切諸佛。從此慧生十信解故。乃至滿足菩提一切願行海故。世界名金色者。明因舉果體白淨無染法故。又明金胎二月。表十信爲聖胎故。一切處金色世界。一切處文殊師利。明無

性淨慧徧故。佛號不動智。爲無明本空。無體可動。名不動智故。但有應境知法。應器知根。如響應聲。無有處所形體可得。名之爲智。無可取捨故。名爲不動。三配當位因果者。妙慧爲因。不動智爲果。亦互爲因果。若以妙慧善揀擇法顯智故。即以妙慧爲因。不動智爲果。若以慧由智起。即不動智爲因。妙慧文殊以爲果故。或智之與慧。總因總果。明體用一真。無二法故。亦智之與慧。總非因果。爲體無本末依住所得故。是性法界自在知見。非如世間因果比對可得故。此文殊師利。不動智佛。初起信心。亦從此起。乃至信終。亦不離之故。迄至自行圓滿。示成正覺。亦不離之故。此明以佛智慧。示悟衆生。欲令衆生。入佛知見。佛知見者。文殊師利妙慧不動智佛是。此是凡聖等共有之。佛示凡夫。使令悟入。爾時此娑婆世界中。一切衆生。所有法差別。業差別。世間差別。身差別。根差別。受生差別。持戒果差別。犯戒果差別。國土果差別。以佛神力。悉皆明現。如是東方百千億那由他。無數無量無邊無等。不可數不可稱不可思不可量不可說。盡法界虛空界一切世界中。所有衆生法差別。乃至國土果差別。悉以佛神力故。分明顯現。南西北方。四維上下。亦復如是。

第十一·爾時已下。有八行經。是都舉娑婆九種差別。并都舉十方一切差別。悉皆以佛神力無不明現。如文可知。已上但隨文殊師利所問。隨位菩薩答。依所說頌。取其意趣。理自分明。及以世界佛號菩薩名號。即知進修因果。總是前莊嚴法性清淨佛刹。四種佛刹中。金色世界及不動智佛。是佛住佛刹。餘九世界及九箇智佛。是莊嚴法性佛刹。及十地已來總是。如來出現品。是示成正覺佛刹。清淨佛刹。四諦品是。此之一品。大意有六。一菩薩以名表行。二以世界之色表所得之理。三以佛名號表所得之智。四以方隅表所得之法。五成其十信所行之行。六明十信進修同異。如上已述可知。

淨行品第十一

將釋此品。約作四門分別。一釋品名目。二釋品來意。三釋品宗趣。四隨文釋義。一釋品名目者。何故名爲淨行品。以無始諸見無明貪瞋癡愛。今已發菩提心。信樂正法。頓翻諸見。成其大願。長大悲門。若但以三空無相對治。不生大慈大悲。不能成就普賢行故。欲行長路。非足不行。欲行大悲入普賢門充法界行

者。於一切見聞覺知而無過失。便成萬行莊嚴。皆勤修習此一百四十大願門。便於生死海中。見聞覺知一切諸行。悉皆清淨。入普賢行故。故名淨行。若無此願。設斷煩惱。即二乘行故。設是菩薩。即生淨土。以此一百四十大願門。頓能淨其一切塵勞行門。便成普賢法界行故。故名淨行。以此大願。莊嚴一切世間諸行。總爲法界一切道場。故名淨行。以此諸見。成大善根。故名淨行。二釋品來意者。爲明前問明品。是成其十信中解脫。此品成其十信之行故。此品須來。乃至果行圓滿已來。不離此大願故。二釋品宗趣者。以智首是下方玻瓈色世界。佛號梵智。明是一切諸佛法本自體白淨無染之智。以爲能問之人。文殊師利菩薩。即是一切諸佛善擇妙慧。以爲說法之主。以一切諸佛根本智慧之門。善自爲問答之老伴。說一百四十大願之門。以成十信十住十行十迴向十地十一地。等普賢法界無盡行海。以本淨智。問其妙慧。說其一百四十淨願之門。用淨信等六位中染淨無明。七地法執現行。十地已來法執習氣。佛地二愚。一時總淨。於此信心之中。不令偏執。以願防之。使令寂用無礙故。以此諸佛本淨智妙慧門。說一百四十大願。以防染淨二障。以爲宗趣故。以六位上。通信并十住十行十迴向十地十一地。隨

位修道上煩惱。六位中。一位上有二十故。六位共有一百二十。根本十無明。皆因身見邊見。二見有二十。共隨位進修染淨煩惱。總有一百四十。爲防此障。起一百四十願。令此進修者。從初信心。理事圓融。使信心者。達其願體無虧。自心根本淨智妙擇之慧。動寂俱真。不偏修故。是故華藏世界。有如須彌山微塵數風輪。所持其上一切莊嚴。因大願風輪。能持萬行。以行招果故。因以願力堅持。報得風輪持刹故。又云。如是華藏莊嚴。皆從普賢願力起。爲無願故。行乃不成。即莊嚴不現。不感無盡依果報故。由是義故。信心之上。法性悲智妙慧萬行。總依佛有。而爲進修。不得別有。若離佛別有自法者。不成信心。不成十種勝解。不成修行。設苦行精勤。是邪精進。勤苦累劫。生人天中。一念貪瞋。一時焚盡。是故此品下文云。住去來今諸佛之道。隨衆生住。恆不捨離。如諸法相。悉能通達。斷一切惡。具足衆善。當如普賢。色像第一。一切行願。皆得具足。已上明宗趣竟。意明迴凡所執心境差別業。皆成願海。具普賢門。四隨文釋義者。於此之中。義分爲二。一科其一品經意。二隨文解釋。一科其一品經意者。於此一品文。義分爲十四段。

爾時智首菩薩。問文殊師利菩薩言。佛子。菩薩云何得無過失身語意業。云何得不害身語意業。云何得不可毀身語意業。云何得不可壞身語意業。云何得不退轉身語意業。云何得不可動身語意業。云何得殊勝身語意業。云何得清淨身語意業。云何得無染身語意業。云何得智為先導身語意業。

一·從爾時智首菩薩已下。從云何得無過失身語意業。總有十問。於十問中。總有一百一十問。問世間三業等。如下可知。

云何得生處具足。種族具足。家具足。色具足。相具足。念具足。慧具足。行具足。無畏具足。覺悟具足。

二·從云何生處具足。問十具足中。初種族具足中。有二義。一世間。即是生族姓家為種族。二出世間。即是生在佛家。具佛種性。色相念慧等。並是佛家。非世間故。

云何得勝慧。第一慧。最上慧。最勝慧。無量慧。無數慧。不思議慧。無與等慧。不可量慧。不可說慧。

三·云何已下。問十種慧。並是出世勝慧。如文可知。

云何得因力。欲力。方便力。緣力。所緣力。根力。觀察力。奢摩他力。毘鉢舍那力。思惟力。

四·云何已下。問十種力。初因力者。所謂生生之中。任運能發大菩提力。欲力者。志樂大菩提心。無退失故。方便力者。以大願善自覺悟。不費功力故。亦能覺他。省功不迂迴故。緣力所緣力者。能緣所緣不忘失。常興大願故。根力者。大願善根不失故。觀察力者。能觀力。奢摩他力。毘鉢舍那力。觀共止雙行。二皆自在。或先觀後止。或先止後觀。或即止即觀。或即觀即止。悉皆自在。思惟力者。不失正理智。常現前故。

云何得蘊善巧。界善巧。處善巧。緣起善巧。欲界善巧。色界善巧。無色界善巧。過去善巧。未來善巧。現在善巧。

五·云何已下十問。問十善巧。初蘊善巧者。明同世間五蘊而生。不著五蘊之過。界善巧者。同十八界及三界法生。而不染三界法。處善巧者。三界六道爲處。禪定解脫爲非處。處非處皆不離其中。而無所染。緣起善巧者。不壞世間十二緣生。處纏不污。欲界色界無色界善巧者。三界同事。而無所著。過去未來現

在善巧者。於過去劫。在現在未來劫中。現在劫。在過去劫中。三世中互參。皆自在故。

云何善修習念覺分。擇法覺分。精進覺分。喜覺分。猗覺分。定覺分。捨覺分。空。無相。無願。

六·云何已下十問。問七覺三空。如文可知。

云何得圓滿檀波羅蜜。尸波羅蜜。羸提波羅蜜。毘梨耶波羅蜜。禪那波羅蜜。般若波羅蜜。及以圓滿慈悲喜捨。

七·云何已下十問。問六度四無量心。如文可知。

云何得處非處智力。過未現在業報智力。根勝劣智力。種種界智力。種種解智力。一切至處道智力。禪解脫三昧染淨智力。宿住念智力。無障礙天眼智力。斷諸習智力。

八·云何已下。問佛十力。如文可知。

云何常得天王。龍王。夜叉王。乾闥婆王。阿修羅王。迦樓羅王。緊那羅王。摩睺羅伽王。人王。梵王。之所守護。恭敬供養。

九·云何已下十問。問十王守護。此明願行所及。而招致敬。

云何得與一切衆生。為依。為救。為歸。為趣。為炬。為明。為照。為導。為勝導。為普導。

十·云何已下十問。問云何堪為衆生所依師導。如文可知。

云何於一切衆生中。為第一。為大。為勝。為最勝。為妙。為極妙。為上。為無上。為無等。為無等等。

十一·云何已下十問。問云何於衆生中最勝最妙。如文可知。

爾時文殊師利菩薩。告智首菩薩言。善哉佛子。汝今為欲多所饒益。多所安隱。哀愍世間。利樂天人。問如是義。佛子。若諸菩薩。善用其心。則獲一切勝妙功德。於諸佛法。心無所礙。住去來今諸佛之道。隨衆生住。恆不捨離。如諸法相。悉能通達。斷一切惡。具足衆善。當如普賢。色像第一。一切行願。皆得具足。於一切法。無不自在。而為衆生第二導師。佛子。云何用心。能獲一切勝妙功德。

十二·爾時已下。至勝妙功德已來。有八行半經。明文殊領上一百一十問。及歎智首善問。

佛子。菩薩在家。當願衆生。知家性空。免其逼迫。孝事父母。當願衆生。善事
 於佛。護養一切。妻子集會。當願衆生。怨親平等。永離貪著。若得五欲。當願
 衆生。拔除欲箭。究竟安隱。妓樂聚會。當願衆生。以法自娛。了妓非實。若在
 宮室。當願衆生。入於聖地。永除穢欲。著纓絡時。當願衆生。捨諸偽飾。到真
 實處。上昇樓閣。當願衆生。昇正法樓。徹見一切。若有所施。當願衆生。一切
 能捨。心無愛著。衆會聚集。當願衆生。捨衆聚法。成一切智。若在厄難。當願
 衆生。隨意自在。所行無礙。捨居家時。當願衆生。出家無礙。心得解脫。入僧
 伽藍。當願衆生。演說種種。無乖諍法。詣大小師。當願衆生。巧事師長。習行
 善法。求請出家。當願衆生。得不退法。心無障礙。脫去俗服。當願衆生。勤修
 善根。捨諸罪軛。剃除鬚髮。當願衆生。永離煩惱。究竟寂滅。著袈裟衣。當願
 衆生。心無所染。具大仙道。正出家時。當願衆生。同佛出家。救護一切。自歸
 於佛。當願衆生。紹隆佛種。發無上意。自歸於法。當願衆生。深入經藏。智慧
 如海。自歸於僧。當願衆生。統理大衆。一切無礙。受學戒時。當願衆生。善學
 於戒。不作衆惡。受闍梨教。當願衆生。具足威儀。所行真實。受和尚教。當願

衆生。入無生智。到無依處。受具足戒。當願衆生。具諸方便。得最勝法。若入堂宇。當願衆生。昇無上堂。安住不動。若敷床座。當願衆生。開敷善法。見真實相。正身端坐。當願衆生。坐菩提座。心無所著。結跏趺坐。當願衆生。善根堅固。得不動地。修行於定。當願衆生。以定伏心。究竟無餘。若修於觀。當願衆生。見如實理。永無乖諍。捨跏趺坐。當願衆生。觀諸行法。悉歸散滅。下足住時。當願衆生。心得解脫。安住不動。若舉於足。當願衆生。出生死海。具衆善法。著下裙時。當願衆生。服諸善根。具足慙媿。整衣束帶。當願衆生。檢束善根。不令散失。若著上衣。當願衆生。獲勝善根。至法彼岸。著僧伽梨。當願衆生。入第一位。得不動法。手執楊枝。當願衆生。皆得妙法。究竟清淨。嚼楊枝時。當願衆生。其心調淨。噬諸煩惱。大小便時。當願衆生。棄貪瞋癡。蠲除罪法。事訖就水。當願衆生。出世法中。速疾而往。洗滌形穢。當願衆生。清淨調柔。畢竟無垢。以水盥掌。當願衆生。得清淨手。受持佛法。以水洗面。當願衆生。得淨法門。永無垢染。手執錫杖。當願衆生。設大施會。示如實道。執持應器。當願衆生。成就法器。受天人供。發趾向道。當願衆生。趣佛所行。入無

依處。若在於道。當願衆生。能行佛道。向無餘法。涉路而去。當願衆生。履淨
 法界。心無障礙。見昇高路。當願衆生。永出三界。心無怯弱。見趣下路。當願
 衆生。其心謙下。長佛善根。見斜曲路。當願衆生。捨不正道。永除惡見。若見
 直路。當願衆生。其心正直。無詔無誑。見路多塵。當願衆生。遠離塵塗。獲清
 淨法。見路無塵。當願衆生。常行大悲。其心潤澤。若見險道。當願衆生。住正
 法界。離諸罪難。若見衆會。當願衆生。說甚深法。一切和合。若見大柱。當願
 衆生。離我諍心。無有忿恨。若見叢林。當願衆生。諸天及人。所應敬禮。若見
 高山。當願衆生。善根超出。無能至頂。見棘刺樹。當願衆生。疾得翦除。三毒
 之刺。見樹葉茂。當願衆生。以定解脫。而為陰暎。若見華開。當願衆生。神通
 等法。如華開敷。若見樹華。當願衆生。衆相如華。具三十二。若見果實。當願
 衆生。獲最勝法。證菩提道。若見大河。當願衆生。得預法流。入佛智海。若見
 陂澤。當願衆生。疾悟諸佛。一味之法。若見池沼。當願衆生。語業滿足。巧能
 演說。若見汲井。當願衆生。具足辯才。演一切法。若見涌泉。當願衆生。方便
 增長。善根無盡。若見橋道。當願衆生。廣度一切。猶如橋梁。若見流水。當願

衆生。得善意欲。洗除惑垢。見修園圃。當願衆生。五欲圃中。耘除愛草。見無
憂林。當願衆生。永離貪愛。不生憂怖。若見園苑。當願衆生。勤修諸行。趣佛
菩提。見嚴飾人。當願衆生。三十二相。以為嚴好。見無嚴飾。當願衆生。捨諸
飾好。具頭陀行。見樂著人。當願衆生。以法自娛。歡愛不捨。見無樂著。當願
衆生。有為事中。心無所樂。見歡樂人。當願衆生。常得安樂。樂供養佛。見苦
惱人。當願衆生。獲根本智。滅除衆苦。見無病人。當願衆生。入真實慧。永無
病惱。見疾病人。當願衆生。知身空寂。離乖諍法。見端正人。當願衆生。於佛
菩薩。常生淨信。見醜陋人。當願衆生。於不善事。不生樂著。見報恩人。當願
衆生。於佛菩薩。能知恩德。見背恩人。當願衆生。於有惡人。不如其報。若見
沙門。當願衆生。調柔寂靜。畢竟第一。見婆羅門。當願衆生。永持梵行。離一
切惡。見苦行人。當願衆生。依於苦行。至究竟處。見操行人。當願衆生。堅持
志行。不捨佛道。見著甲冑。當願衆生。常服善鎧。趣無師法。見無鎧仗。當願
衆生。永離一切。不善之業。見論議人。當願衆生。於諸異論。悉能摧伏。見正
命人。當願衆生。得清淨命。不矯威儀。若見於王。當願衆生。得為法王。恆轉

正法。若見王子。當願衆生。從法化生。而為佛子。若見長者。當願衆生。善能
 明斷。不行惡法。若見大臣。當願衆生。恆守正念。習行衆善。若見城郭。當願
 衆生。得堅固身。心無所屈。若見王都。當願衆生。功德共聚。心恆喜樂。見處
 林藪。當願衆生。應為天人。之所歎仰。入里乞食。當願衆生。入深法界。心無
 障礙。到人門戶。當願衆生。入於一切。佛法之門。入其家已。當願衆生。得入
 佛乘。三世平等。見不捨人。當願衆生。常不捨離。勝功德法。見能捨人。當願
 衆生。永得捨離。三惡道苦。若見空鉢。當願衆生。其心清淨。空無煩惱。若見
 滿鉢。當願衆生。具足成滿。一切善法。若得恭敬。當願衆生。恭敬修行。一切
 佛法。不得恭敬。當願衆生。不行一切。不善之法。見慙恥人。當願衆生。具慙
 恥行。藏護諸根。見無慙恥。當願衆生。捨離無慙。住大慈道。若得美食。當願
 衆生。滿足其願。心無羨欲。得不美食。當願衆生。莫不獲得。諸三昧味。得柔
 軟食。當願衆生。大悲所熏。心意柔軟。得麤澀食。當願衆生。心無染著。絕世
 貪愛。若飯食時。當願衆生。禪悅為食。法喜充滿。若受味時。當願衆生。得佛
 上味。甘露滿足。飯食已訖。當願衆生。所作皆辦。具諸佛法。若說法時。當願

衆生。得無盡辯。廣宣法要。從舍出時。當願衆生。深入佛智。永出三界。若入水時。當願衆生。入一切智。知三世等。洗浴身體。當願衆生。身心無垢。內外光潔。盛暑炎毒。當願衆生。捨離衆惱。一切皆盡。暑退涼初。當願衆生。證無上法。究竟清涼。諷誦經時。當願衆生。順佛所說。總持不忘。若得見佛。當願衆生。得無礙眼。見一切佛。諦觀佛時。當願衆生。皆如普賢。端正嚴好。見佛塔時。當願衆生。尊重如塔。受天人供。敬心觀塔。當願衆生。諸天及人。所共瞻仰。頂禮於塔。當願衆生。一切天人。無能見頂。右遶於塔。當願衆生。所行無逆。成一切智。遶塔三匝。當願衆生。勤求佛道。心無懈怠。讚佛功德。當願衆生。衆德悉具。稱歎無盡。讚佛相好。當願衆生。成就佛身。證無相法。若洗足時。當願衆生。具神足力。所行無礙。以時寢息。當願衆生。身得安隱。心無動亂。睡眠始寤。當願衆生。一切智覺。周顧十方。

十三·佛子菩薩在家已下。有一百四十大願。答前所問。令十信心菩薩。常用其心。淨其身口意行。如文具明。

佛子。若諸菩薩如是用心。則獲一切勝妙功德。一切世間諸天魔梵。沙門。婆羅

門。乾闥婆。阿修羅等。及以一切聲聞緣覺。所不能動。

十四。最下佛子若諸菩薩。有三行經。明依教而行。獲其勝益。已上以世間有此一百四十種事法。頓翻爲一百四十種大願。用成十信內修行之心。雖是有爲之心。能成十住已後五位之內理智大悲之海。已後入位萬行之海。皆由此一百四十大願勝上緣力之所能成故。若初發心菩薩。無此之願。所修解脫。皆成聲聞獨覺之行。設是菩薩。但生淨土。無成佛緣。爲此教中發心菩薩。畢竟達此有爲。成其理智如也。

賢首品第十二之一

將釋此品。約作五門分別。一釋品名目。二釋品來意。三明品之宗趣。四明信心退住。五隨文解義。一釋品名目者。何故名爲賢首。爲依行立菩薩之名。依菩薩所說之法及行。立品之名。爲賢首者。以明信解如來因果。普賢五位行門。心行調柔。順和正直。深心正念。樂集善根。常念利生。名之爲賢。創從凡夫。頓彰法界。諸佛因果理智。一時明現。名之爲首。此依法主解行立名。此賢首者。

乃是於佛果海文殊普賢行之賢首。爲信佛因果理智之首。圓滿法界解行無始終之首故。爲賢首品。以佛文殊普賢之果行。成信者之初首故。二釋品來意者。爲第二會已來五品經。但明十信菩薩所修行法門。及一百四十願等法。此品明十信中所忻修佛果。所行行願。功德廣大故。故有此品來也。三明宗趣者。明已生十信心已。得福獲益爲宗。四明信心退住者。有二義。一三乘。二一乘。一三乘者。如起信論。有三種發心。一信成就發心。經一萬劫。善根相續。方至不退。二者解行發心。以佛菩薩教令發心。或自有大悲。或以正法欲滅。護正法發心。論云。如是信心成就。得入正定聚。畢竟不退。名住如來種中正因。已前二種。是不退發心。三證發心者。若有衆生。善根微少。久遠已來。煩惱深厚。雖值於佛。亦得供養。然起人天種子。或二乘種子。設求大乘者。根則不定。或進或退。大意自己善根微少。依他發心者。或以二乘或教令發心者。爲解行不實。皆有得有證。有捨有取。總住退位。又如起信論云。若人修行一切善法。自然歸順眞如法故。略說方便有四種。一者行根本方便。謂觀一切法自性無生。離於妄見。不住生死。觀一切法因緣和合。業果不失。起於大悲。修福德攝化衆生。不住涅槃。以順法

性無生故。二者能止方便。謂慚愧悔過。能止一切惡法。不令增長。隨順法性離諸過故。三者發起善根增長方便。謂勤供養禮拜三寶。讚歎隨喜。勸請諸佛。以愛敬心消厚心故。信得增長。乃能志求無上之道。又因佛法僧力所護故。能消業障。善根不退。以隨順法性離癡障故。四者大願平等方便。所謂願盡於未來。化度一切衆生。使無有餘。皆令究竟無餘涅槃。以順法性廣大。徧一切衆生。平等無二。不念彼此。究竟寂滅故。菩薩發如是心故。則得少分見於法身。以見法身故。隨其願力。能現八相成道。利益衆生。然是菩薩。未名法身。以其過去無量世來有漏之業。未能決斷。隨其所生。與微苦相應。廣如彼論說。計其少分得見法身。即是信滿入十住位菩薩。已上是三乘發十信滿心。入十住初心。初發心住上。以願力故成佛。二一乘發心者。如此經十信發心。初發心時。以初會中。如來始成正覺之果。普賢菩薩法界微塵毛孔重重無盡隨根本智行果。而起信心。信他諸佛所得之果。以第二會中。普光明殿如來報滿之果及行果。而自信入修行。金色等十色世界。即明自覺之理。不動智佛等十智如來。即明是自心所信自心佛智。文殊師利。即明自心智上分別妙慧。與古今三世諸佛。同一體用。分毫不差。

方名爲信發心。從此信心。以佛名號品。即明所信十方示成正覺佛果之號徧周。四聖諦品。即明三世諸佛所說法門。遍衆生界。隨界名別。光明覺品。即明如來智慧光明境界。遍照法界。無有盡極。令發信心者。以觀觀之。令心廣博如佛境界。菩薩問明品。明十信心菩薩十種所行之法。是自己所修之行。淨行品一百四十大願。即是十信心位所發大願。成大悲門。具普賢行。此賢首品。明十信心所忻佛果功德無有盡極。明初發十信心。誦持此品。功德勝過供養十佛刹微塵數佛。經於一劫。何況隨其解行。而以修治。如此經十住初心。纔發心時。法爾身徧十方。示成正覺。在十住位發心功德品中。至位方明。文繁不引其事。所因大意。明此經發十信心。但以法界不思議乘一切智乘。而發其心。不依佛。不依佛法。不依菩薩法。不依聲聞法獨覺法。不依世間法。不依出世間法。而發其心。但無所依發菩提心。但以一切智發菩提心。不如三乘依倚物故。發菩提心。不依三祇劫後有佛果故。發菩提心。不依現在三世有佛果故。發菩提心。以是義故。入此信者。皆無有退故。設習氣未淳熟者。暫時念退。信及住位。一往不退。爲正信自己身心。總是法界佛。無自他性故。以十方諸佛無依住智幻住莊嚴門。等法界

虛空界。法性恆徧十方。如影對現色身。同自身故。本不二故。體無差別故。十方諸佛。智身如影。所言如響。如是信解。當得成佛。我今信者。亦如是知。如是信解。云何有退。全身全心一切境界。總是法界一眞法身體用理智。住在何所。退至何處。若也身心有所依住。放卻依處。即有退失。自了身心。本無依住。本無所得。一切語言分別。如空中響。應無作緣。任物成聲。本無依住。了如斯法。而生信解。即無退轉。有所依法而發心者。放卻所得所依著處。即有退轉。是故起信論云。證發心者。多住退位。爲有所得可證故。是故乘此不思議乘。一切智無依住乘。發菩提心。一往不退。若有退者。只爲信心不成故。於佛教法。及如來所乘。有所得故。有取捨故。未成信故。不入信流。又此經云。設有菩薩。經無量百千那由他劫。行六波羅蜜。具六神通。由未聞此大方廣佛華嚴經。猶名假名菩薩。不眞菩薩。設復聞時。不信不入。具如經說。如此品頌云。一切世界諸群生。少有欲求聲聞乘。求獨覺者轉復少。趣大乘者甚難遇。趣大乘者猶爲易。能信此法倍更難。又如下頌云。有以手擎十佛刹。盡於一劫空中住。彼之所作未爲難。能信此法倍更難。遇此難信而能信。眞信決定不退故。又如此經普賢菩薩

云。但聞如來名號。及所說法門。聞而不信。亦能成金剛智種。作如人食少金剛喻。若以遠因總不退。若以現成佛因。即是未信之人。五隨文解義者。於此一品經。義分爲二。一長科當品。二隨文解義。一長科當品經意。於此一品中。長科爲十四段。

爾時文殊師利菩薩。說無濁亂清淨行大功德已。欲顯示菩提心功德故。以偈問賢首菩薩曰。

我今已爲諸菩薩

說佛往修清淨行

仁亦當於此會中

演暢修行勝功德

一·爾時文殊師利已下。兩行經。兩行頌。是文殊師利請說發菩提心功德分。爾時賢首菩薩。以偈答曰。

二·爾時賢首菩薩以偈答曰已下。有七百一十六行頌。是賢首菩薩答。末後三行半經。明說頌感諸佛許可分。

善哉仁者應諦聽

彼諸功德不可量

我今隨力說少分

猶如大海一滴水

若有菩薩初發心

誓求當證佛菩提

彼之功德無邊際

不可稱量無與等

何況無量無邊劫

具修地度諸功德

十方一切諸如來

悉共稱揚不能盡

如是無邊大功德 我今於中說少分 譬如鳥足所履空 亦如大地一微塵

三·從初善哉仁者應諦聽已下。八行頌。明發心功德廣大難量。隨力少說分。爲明菩提心不可以邊際量故。功德還當如是。

菩薩發意求菩提 非是無因無有緣 於佛法僧生淨信 以是而生廣大心

不求五欲及王位 富饒自樂大名稱 但爲永滅衆生苦 利益世間而發心

常欲利樂諸衆生 莊嚴國土供養佛 受持正法修諸智 證菩提故而發心

四·菩薩發意求菩提已下。六行頌。明初發心所因分。

深心信解常清淨 恭敬尊重一切佛 於法及僧亦如是 志誠供養而發心

深信於佛及佛法 亦信佛子所行道 及信無上大菩提 菩薩以是初發心

信爲道元功德母 長養一切諸善法 斷除疑網出愛流 開示涅槃無上道

信無垢濁心清淨 滅除憍慢恭敬本 亦爲法藏第一財 爲清淨手受衆行

信能惠施心無悋 信能歡喜入佛法 信能增長智功德 信能必到如來地

信令諸根淨明利 信力堅固無能壞 信能永滅煩惱本 信能專向佛功德

信於境界無所著 遠離諸難得無難 信能超出衆魔路 示現無上解脫道

信爲功德不壞種 信能生長菩提樹 信能增益最勝智 信能示現一切佛
是故依行次第說 信樂最勝甚難得 譬如一切世間中 而有隨意妙寶珠
五·深心信解常清淨已下。十八行頌。明信三寶增益分。

大方廣佛新華嚴經合論卷第二十九終

大方廣佛新華嚴經合論卷第三十

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

賢首品第十二之二

若常信奉於諸佛	則能持戒修學處	若常持戒修學處	則能具足諸功德
戒能開發菩提本	學是勤修功德地	於戒及學常順行	一切如來所稱美
若常信奉於諸佛	則能興集大供養	若能興集大供養	彼人信佛不思議
若常信奉於尊法	則聞佛法無厭足	若聞佛法無厭足	彼人信法不思議
若常信奉清淨僧	則得信心不退轉	若得信心不退轉	彼人信力無能動
若得信力無能動	則得諸根淨明利	若得諸根淨明利	則能遠離惡知識
若能遠離惡知識	則得親近善知識	若得親近善知識	則能修習廣大善
若能修習廣大善	彼人成就大因力	若人成就大因力	則得殊勝決定解

若得殊勝決定解	則爲諸佛所護念	若爲諸佛所護念	則能發起菩提心
若得發起菩提心	則能勤修佛功德	若能勤修佛功德	則得生在如來家
若得生在如來家	則善修行巧方便	若善修行巧方便	則得信樂心清淨
若得信樂心清淨	則得增上最勝心	若得增上最勝心	則常修習波羅蜜
若常修習波羅蜜	則能具足摩訶衍	若能具足摩訶衍	則能如法供養佛
若能如法供養佛	則能念佛心不動	若能念佛心不動	則常覩見無量佛
若常覩見無量佛	則見如來體常住	若見如來體常住	則能知法永不滅
若能知法永不滅	則得辯才無障礙	若能辯才無障礙	則能開演無邊法
若能開演無邊法	則能慈愍度衆生	若能慈愍度衆生	則得堅固大悲心
若能堅固大悲心	則能愛樂甚深法	若能愛樂甚深法	則能捨離有爲過
若能捨離有爲過	則離憍慢及放逸	若離憍慢及放逸	則能兼利一切衆
若能兼利一切衆	則處生死無疲厭	若處生死無疲厭	則能勇健無能勝
若能勇健無能勝	則能發起大神通	若能發起大神通	則知一切衆生行
若知一切衆生行	則能成就諸群生	若能成就諸群生	則得善攝衆生智

若得善攝衆生智

則能成就四攝法

若能成就四攝法

則與衆生無限制

若與衆生無限制

則具最勝智方便

若具最勝智方便

則住勇猛無上道

若住勇猛無上道

則能摧殄諸魔力

若能摧殄諸魔力

則能超出四魔境

若能超出四魔境

則得至於不退地

若得至於不退地

則得無生深法忍

若得無生深法忍

則爲諸佛所授記

若爲諸佛所授記

則一切佛現其前

若一切佛現其前

則了神通深密用

若了神通深密用

則爲諸佛所憶念

若爲諸佛所憶念

則以佛德自莊嚴

若以佛德自莊嚴

則獲妙福端嚴身

若獲妙福端嚴身

則身晃耀如金山

若身晃耀如金山

則相莊嚴三十二

若相莊嚴三十二

則具隨好爲嚴飾

若具隨好爲嚴飾

則身光明無限量

若身光明無限量

則不思議光莊嚴

若不思議光莊嚴

其光則出諸蓮華

其光若出諸蓮華

則無量佛坐華上

示現十方靡不徧

悉能調伏諸衆生

若能如是調衆生

則現無量神通力

若現無量神通力

則住不可思議土

演說不可思議法

令不思議衆歡喜

若說不可思議法

令不思議衆歡喜

則以智慧辯才力

隨衆生心而化誘

若以智慧辯才力

隨衆生心而化誘

則以智慧爲先導	身語意業恆無失	若以智慧爲先導	身語意業恆無失
則其願力得自在	普隨諸趣而現身	若其願力得自在	普隨諸趣而現身
則能爲衆說法時	音聲隨類難思議	若能爲衆說法時	音聲隨類難思議
則於一切衆生心	一念悉知無有餘	若於一切衆生心	一念悉知無有餘
則知煩惱無所起	永不沒溺於生死	若知煩惱無所起	永不沒溺於生死
則獲功德法性身	以法威力現世間	若獲功德法性身	以法威力現世間
則獲十地十自在	修行諸度勝解脫	若得十地十自在	修行諸度勝解脫
則獲灌頂大神通	住於最勝諸三昧	若獲灌頂大神通	住於最勝諸三昧
則於十方諸佛所	應受灌頂而昇位	若於十方諸佛所	應受灌頂而昇位
則蒙十方一切佛	手以甘露灌其頂	若蒙十方一切佛	手以甘露灌其頂
則身充徧如虛空	安住不動滿十方	若身充徧如虛空	安住不動滿十方
則彼所行無與等	諸天世人莫能知		

六·若常信奉於諸佛已下。九十五行頌。明增進修行獲果分。

菩薩勤修大悲行 願度一切無不果 見聞聽受若供養 靡不皆令獲安樂

彼諸大士威神力

法眼常全無缺減

十善妙行等諸道

無上勝寶皆令現

譬如大海金剛聚

以彼威力生衆寶

無減無增亦無盡

菩薩功德聚亦然

或有剎土無有佛

於彼示現成正覺

或有國土不知法

於彼爲說妙法藏

無有分別無功用

於一念頃徧十方

如月光影靡不周

無量方便化群生

於彼十方世界中

念念示現成佛道

轉正法輪入寂滅

乃至舍利廣分布

或現聲聞獨覺道

或現成佛普莊嚴

如是開闡三乘教

廣度衆生無量劫

或現童男童女形

天龍及以阿修羅

乃至摩睺羅伽等

隨其所樂悉令見

衆生形相各不同

行業音聲亦無量

如是一切皆能現

海印三昧威神力

嚴淨不可思議刹

供養一切諸如來

放大光明無有邊

度脫衆生亦無限

智慧自在不思議

說法言辭無有礙

施戒忍進及禪定

智慧方便神通等

如是一切皆自在

以佛華嚴三昧力

一微塵中入三昧

成就一切微塵定

而彼微塵亦不增

於一普現難思刹

彼一塵內衆多刹

或有有佛或無佛

或有雜染或清淨

或有廣大或狹小

或復有成或有壞

或有正住或傍住

或如曠野熱時焰

或如天上因陀網

如一塵中所示現

一切微塵悉亦然

此大名稱諸聖人	三昧解脫神通力	若欲供養一切佛	入於三昧起神變
能以一手徧三千	普供一切諸如來	十方所有勝妙華	塗香料香無價寶
如是皆從手中出	供養道樹諸最勝	無價寶衣雜妙香	寶幢幡蓋皆嚴好
眞金爲華寶爲帳	莫不皆從掌中雨	十方所有諸妙物	應可奉獻無上尊
掌中悉雨無不備	菩提樹前持供佛	十方一切諸妓樂	鐘鼓琴瑟非一類
悉奏和雅妙音聲	靡不從於掌中出	十方所有諸讚頌	稱歎如來實功德
如是種種妙言辭	皆從掌內而開演	菩薩右手放淨光	光中香水從空雨
普灑十方諸佛土	供養一切照世燈	又放光明妙莊嚴	出生無量寶蓮華
其華色相皆殊妙	以此供養於諸佛	又放光明華莊嚴	種種妙華集爲帳
普散十方諸國土	供養一切大德尊	又放光明香莊嚴	種種妙香集爲帳
普散十方諸國土	供養一切大德尊	又放光明秣香嚴	種種秣香聚爲帳
普散十方諸國土	供養一切大德尊	又放光明衣莊嚴	種種名衣集爲帳
普散十方諸國土	供養一切大德尊	又放光明寶莊嚴	種種妙寶集爲帳
普散十方諸國土	供養一切大德尊	又放光明蓮莊嚴	種種蓮華集爲帳

普散十方諸國土

供養一切大德尊

又放光明纓莊嚴

種種妙纓集爲帳

普散十方諸國土

供養一切大德尊

又放光明幢莊嚴

其幢絢煥備衆色

種種無量皆殊好

以此莊嚴諸佛土

種種雜寶莊嚴蓋

衆妙繪旛共垂飾

摩尼寶鐸演佛音

執持供養諸如來

手出供具難思議

如是供養一導師

一切佛所皆如是

大士三昧神通力

菩薩住在三昧中

種種自在攝衆生

悉以所行功德法

無量方便而開誘

或以供養如來門

或以難思布施門

或以頭陀持戒門

或以不動堪忍門

或以苦行精進門

或以寂靜禪定門

或以決了智慧門

或以所行方便門

或以梵住神通門

或以四攝利益門

或以福智莊嚴門

或以因緣解脫門

或以根力正道門

或以聲聞解脫門

或以獨覺清淨門

或以大乘自在門

或以無常衆苦門

或以無我壽者門

或以不淨離欲門

或以滅盡三昧門

隨諸衆生病不同

悉以法藥而對治

隨諸衆生心所樂

悉以方便而滿足

隨諸衆生行差別

悉以善巧而成就

如是三昧神通相

一切天人莫能測

有妙三昧名隨樂

菩薩住此普觀察

隨宜示現度衆生

悉使歡心從法化

劫中饑饉災難時

悉與世間諸樂具

隨其所欲皆令滿	普爲衆生作饒益	或以飲食上好味	寶衣嚴具衆妙物
乃至王位皆能捨	令好施者悉從化	或以相好莊嚴身	上妙衣服寶纓絡
華鬘爲飾香塗體	威儀具足度衆生	一切世間所好尙	色相顏容及衣服
隨應普現愜其心	俾樂色者皆從道	迦陵頻伽美妙音	俱枳羅等妙音聲
種種梵音皆具足	隨其心樂爲說法	八萬四千諸法門	諸佛以此度衆生
彼亦如其差別法	隨世所宜而化度	衆生苦樂利衰等	一切世間所作法
悉能應現同其事	以此普度諸衆生	一切世間衆苦患	深廣無涯如大海
與彼同事悉能忍	令其利益得安樂	若有不識出離法	不求解脫離諍憤
菩薩爲現捨國財	常樂出家心寂靜	家是貪愛繫縛所	欲使衆生悉免離
故示出家得解脫	於諸欲樂無所愛	菩薩示行十種行	亦行一切大人法
諸仙行等悉無餘	爲欲利益衆生故	若有衆生壽無量	煩惱微細樂具足
菩薩於中得自在	示受老病死衆患	或有貪欲瞋恚癡	煩惱猛火常熾然
菩薩爲現老病死	令彼衆生悉調伏	如來十力無所畏	及以十八不共法
所有無量諸功德	悉以示現度衆生	記心教誡及神足	悉是如來自在用

彼諸大士皆示現

能使衆生盡調伏

菩薩種種方便門

隨順世法度衆生

譬如蓮華不著水

如是在世令深信

雅思淵才文中王

歌舞談說衆所欣

一切世間衆技術

譬如幻師無不現

或爲長者邑中主

或爲賈客商人導

或爲國王及大臣

或作良醫善衆論

或於曠野作大樹

或爲良藥衆寶藏

或作寶衣隨所求

或以正道示衆生

若見世界始成立

衆生未有資身具

是時菩薩爲工匠

爲之示現種種業

不作逼惱衆生物

但說利益世間事

咒術藥草等衆論

如是所有皆能說

一切仙人殊勝行

人天等類同信仰

如是難行苦行法

菩薩隨應悉能作

或作外道出家人

或在山林自勤苦

或露形體無衣服

而於彼衆作師長

或現邪命種種行

習行非法以爲勝

或現梵志諸威儀

於彼衆中爲上首

或受五熱隨日轉

或持牛狗及鹿戒

或著壞衣奉事火

爲化是等作導師

或有示謁諸天廟

或復示入恆河水

食根果等悉示行

於彼常思已勝法

或現蹲踞或翹足

或臥草棘及灰上

或復臥杵求出離

而於彼衆作師首

如是等類諸外道

觀其意解與同事

所示苦行世靡堪

令彼見已皆調伏

衆生迷惑稟邪教

住於惡見受衆苦

爲其方便說妙法	悉令得解真實諦	或邊咒語說四諦	或善密語說四諦
或人直語說四諦	或天密語說四諦	分別文字說四諦	決定義理說四諦
善破於他說四諦	非外所動說四諦	或八部語說四諦	或一切語說四諦
隨彼所解語言音	爲說四諦令解脫	所有一切諸佛法	皆如是說無不盡
知語境界不思議	是名說法三昧力		

七·菩薩勤修大悲行已下。一百五十一行頌。明菩薩得果行悲教化衆生。及興供自在分。

有勝三昧名安樂	能普救度諸群生	放大光明不思議	令其見者悉調伏
所放光明名善現	若有衆生遇此光	必令獲益不唐捐	因是得成無上智
彼先示現於諸佛	示法示僧示正道	亦示佛塔及形像	是故得成此光明
又放光明名照耀	映蔽一切諸天光	所有暗障靡不除	普爲衆生作饒益
此光覺悟一切衆	令執燈明供養佛	以燈供養諸佛故	得成世中無上燈
然諸油燈及酥燈	亦然種種諸明炬	衆香妙藥上寶燭	以是供佛獲此光
又放光明名濟度	此光能覺一切衆	令其普發大誓心	度脫欲海諸群生

若能普發大誓心

度脫欲海諸群生

則能越度四瀑流

示道無憂解脫城

於諸行路大水處

造立橋梁及船筏

毀皆有爲讚寂靜

是故得成此光明

又放光明名滅愛

此光能覺一切衆

令其捨離於五欲

專思解脫妙法味

若能捨離於五欲

專思解脫妙法味

則能以佛甘露雨

普滅世間諸渴愛

惠施池井及泉流

專求無上菩提道

毀皆五欲讚禪定

是故得成此光明

又放光明名歡喜

此光能覺一切衆

令其愛慕佛菩提

發心願證無師道

造立如來大悲像

衆相莊嚴坐華座

恆歎最勝諸功德

是故得成此光明

又放光明名愛樂

此光能覺一切衆

令其心樂於諸佛

及以樂法樂衆僧

若常心樂於諸佛

及以樂法樂衆僧

則在如來衆會中

速成無上深法忍

開悟衆生無有量

普使念佛法僧寶

及示發心功德行

是故得成此光明

又放光明名福聚

此光能覺一切衆

令行種種無量施

以此願求無上道

設大施會無遮限

有來求者皆滿足

不令其心有所乏

是故得成此光明

又放光明名具智

此光能覺一切衆

令於一法一念中

悉解無量諸法門

爲諸衆生分別法

及以決了真實義

善說法義無虧減

是故得成此光明

又放光明名慧燈	此光能覺一切衆	令知衆生性空寂	一切諸法無所有
演說諸法空無主	如幻如焰水中月	乃至猶如夢影像	是故得成此光明
又放光名法自在	此光能覺一切衆	令得無盡陀羅尼	悉持一切諸佛法
恭敬供養持法者	給侍守護諸賢聖	以種種法施衆生	是故得成此光明
又放光明名能捨	此光覺悟慳衆生	令知財寶悉非常	恆樂惠施心無著
慳心難調而能調	解財如夢如浮雲	增長惠施清淨心	是故得成此光明
又放光明名除熱	此光能覺毀禁者	普使受持清淨戒	發心願證無師道
勸引衆生受持戒	十善業道悉清淨	又令發向善提心	是故得成此光明
又放光明名忍嚴	此光覺悟瞋恚者	令彼除瞋離我慢	常樂忍辱柔和法
衆生暴惡難可忍	爲菩提故心不動	常樂稱揚忍功德	是故得成此光明
又放光明名勇猛	此光覺悟癡墮者	令彼常於三寶中	恭敬供養無疲厭
若彼常於三寶中	恭敬供養無疲厭	則能超出四魔境	速成無上佛菩提
勸化衆生令進策	常勤供養於三寶	法欲滅時專守護	是故得成此光明
又放光明名寂靜	此光能覺亂意者	令其遠離貪恚癡	心不動搖而正定

捨離一切惡知識 無義談說雜染行

讚歎禪定阿蘭若 是故得成此光明

又放光明名慧嚴 此光覺悟愚迷者

令其證諦解緣起 諸根智慧悉通達

若能證諦解緣起 諸根智慧悉通達

則得日燈三昧法 智慧光明成佛果

國財及己皆能捨 爲菩提故求正法

聞已專勤爲衆說 是故得成此光明

又放光明名佛慧 此光覺悟諸合識

令見無量無邊佛 各各坐寶蓮華上

讚佛威德及解脫 說佛自在無有量

顯示佛力及神通 是故得成此光明

又放光明名無畏 此光照觸恐怖者

非人所持諸毒害 一切皆令疾除滅

能於衆生施無畏 遇有惱害皆勸止

拯濟厄難孤窮者 以是得成此光明

又放光明名安隱 此光能照疾病者

令除一切諸苦痛 悉得正定三昧樂

施以良藥救衆患 妙寶延命香塗體

酥油乳蜜充飲食 以是得成此光明

又放光明名見佛 此光覺悟將歿者

令隨憶念見如來 命終得生其淨國

見有臨終勸念佛 又示尊像令瞻敬

俾於佛所深歸仰 是故得成此光明

又放光明名樂法 此光能覺一切衆

令於正法常欣樂 聽聞演說及書寫

法欲盡時能演說 令求法者意充滿

於法愛樂勤修行 是故得成此光明

又放光明名妙音	此光開悟諸菩薩	能令三界所有聲	聞者皆是如來音
以大音聲稱讚佛	及施鈴鐸諸音樂	普使世間聞佛音	是故得成此光明
又放光名施甘露	此光開悟一切衆	令捨一切放逸行	具足修習諸功德
說有爲法非安隱	無量苦惱悉充滿	恆樂稱揚寂滅樂	是故得成此光明
又放光明名最勝	此光開悟一切衆	令於佛所普聽聞	戒定智慧增上法
常樂稱揚一切佛	勝戒勝定殊勝慧	如是爲求無上道	是故得成此光明
又放光明名寶嚴	此光能覺一切衆	令得寶藏無窮盡	以此供養諸如來
以諸種種上妙寶	奉施於佛及佛塔	亦以惠施諸貧乏	是故得成此光明
又放光明名香嚴	此光能覺一切衆	令其聞者悅可意	決定當成佛功德
人天妙香以塗地	供養一切最勝王	亦以造塔及佛像	是故得成此光明
又放光名雜莊嚴	寶幢旛蓋無央數	焚香散華奏衆樂	城邑內外皆充滿
本以微妙妓樂音	衆香妙華幢蓋等	種種莊嚴供養佛	是故得成此光明
又放光明名嚴潔	令地平坦猶如掌	莊嚴佛塔及其處	是故得成此光明
又放光明名大雲	能起香雲雨香水	以水灑塔及庭院	是故得成此光明

又放光明名嚴具

令裸形者得上服

嚴身妙物而爲施

是故得成此光明

又放光明名上味

能令飢者獲美食

種種珍饌而爲施

是故得成此光明

又放光明名大財

令貧乏者獲寶藏

以無盡物施三寶

是故得成此光明

又放光名眼清淨

能令盲者見衆色

以燈施佛及佛塔

是故得成此光明

又放光名耳清淨

能令聾者悉善聽

鼓樂娛佛及佛塔

是故得成此光明

又放光名鼻清淨

昔未聞香皆得聞

以香施佛及佛塔

是故得成此光明

又放光名舌清淨

能以美音稱讚佛

永除麤惡不善語

是故得成此光明

又放光名身清淨

諸根缺者令具足

以身禮佛及佛塔

是故得成此光明

又放光名意清淨

令失心者得正念

修行三昧悉自在

是故得成此光明

又放光名色清淨

令見難思諸佛色

以衆妙色莊嚴塔

是故得成此光明

又放光名聲清淨

令知聲性本空寂

觀聲緣起如谷響

是故得成此光明

又放光名香清淨

令諸臭穢悉香潔

香水洗塔菩提樹

是故得成此光明

又放光名味清淨

能除一切味中毒

恆供佛僧及父母

是故得成此光明

又放光名觸清淨

能令惡觸皆柔軟

戈鋌劍戟從空雨

皆令變作妙華鬘

以昔曾於道路中

塗香散華布衣服

迎送如來令蹈上

是故今獲光如是

又放光名法清淨

能令一切諸毛孔

悉演妙法不思議

衆生聽者咸欣悟

因緣所生無有生

諸佛法身非是身

法性常住如虛空

以說其義光如是

八·從有勝三昧名安樂已下。有一百六十行頌。明放光明因果分。

如是等比光明門

如恆河沙無限數

悉從大仙毛孔出

一一作業各差別

如一毛孔所放光

無量無數如恆沙

一切毛孔悉亦然

此是大仙三昧力

如其本行所得光

隨彼宿緣同行者

今放光明故如是

此是大仙智自在

往昔同修於福業

及有愛樂能隨喜

見其所作亦復然

彼於此光咸得見

若有自修衆福業

供養諸佛無央數

於佛功德常願求

是此光明所開覺

譬如生盲不見日

非爲無日出世間

諸有目者悉明見

各隨所務修其業

大士光明亦如是

有智慧者皆悉見

凡夫邪信劣解人

於此光明莫能覩

摩尼宮殿及輦乘

妙寶靈香以塗瑩

有福德者自然備

非無德者所能處

大士光明亦如是

有深智者咸照觸

邪信劣解凡愚人

無有能見此光明

若有聞此光差別

能生清淨深信解

永斷一切諸疑網

速成無上功德幢

九·如是等比光明門已下。二十行頌。明光出處及光差別分。

有勝三昧能出現

眷屬莊嚴皆自在

一切十方諸國土

佛子衆會無倫匹

有妙蓮華光莊嚴

量等三千大千界

其身端坐悉充滿

是此三昧神通力

復有十刹微塵數

妙好蓮華所圍遶

諸佛子衆於中坐

住此三昧威神力

宿世成就善因緣

具足修行佛功德

此等衆生遶菩薩

悉共合掌觀無厭

譬如明月在星中

菩薩處衆亦復然

大士所行法如是

入此三昧威神力

如於一方所示現

諸佛子衆共圍遶

一切方中悉如是

住此三昧威神力

有勝三昧名方網

菩薩住此廣開示

一切方中普現身

或現入定或從出

或於東方入正定

而於西方從定出

或於西方入正定

而於東方從定出

或於餘方入正定

而於餘方從定出

如是入出徧十方

是名菩薩三昧力

盡於東方諸國土

所有如來無數量

悉現其前普親近

住於三昧寂不動

而於西方諸世界

一切諸佛如來所

皆現從於三昧起

廣修無量諸供養

盡於西方諸國土

所有如來無數量

悉現其前普親近

住於三昧寂不動

而於東方諸世界

一切諸佛如來所

皆現從於三昧起

廣修無量諸供養

如是十方諸世界	菩薩悉入無有餘	或現三昧寂不動	或現恭敬供養佛
於眼根中入正定	於色塵中從定出	示現色性不思議	一切人天莫能知
於色塵中入正定	於眼起定心不亂	說眼無生無有起	性空寂滅無所作
於耳根中入正定	於聲塵中從定出	分別一切語言音	諸天世人莫能知
於聲塵中入正定	於耳起定心不亂	說耳無生無有起	性空寂滅無所作
於鼻根中入正定	於香塵中從定出	普得一切上妙香	諸天世人莫能知
於香塵中入正定	於鼻起定心不亂	說鼻無生無有起	性空寂滅無所作
於舌根中入正定	於味塵中從定出	普得一切諸上味	諸天世人莫能知
於味塵中入正定	於舌起定心不亂	說舌無生無有起	性空寂滅無所作
於身根中入正定	於觸塵中從定出	善能分別一切觸	諸天世人莫能知
於觸塵中入正定	於身起定心不亂	說身無生無有起	性空寂滅無所作
於意根中入正定	於法塵中從定出	分別一切諸法相	諸天世人莫能知
於法塵中入正定	從意起定心不亂	說意無生無有起	性空寂滅無所作
童子身中入正定	壯年身中從定出	壯年身中入正定	老年身中從定出

老年身中入正定

善女身中從定出

善女身中入正定

善男身中從定出

善男身中入正定

比丘尼身從定出

比丘尼身入正定

比丘身中從定出

比丘身中入正定

學無學身從定出

學無學身入正定

辟支佛身從定出

辟支佛身入正定

現如來身從定出

於如來身入正定

諸天身中從定出

諸天身中入正定

大龍身中從定出

大龍身中入正定

夜叉身中從定出

夜叉身中入正定

鬼神身中從定出

鬼神身中入正定

一毛孔中從定出

一毛孔中入正定

一切毛孔從定出

一切毛孔入正定

一毛端頭從定出

一毛端頭入正定

一微塵中從定出

一微塵中入正定

一切塵中從定出

一切塵中入正定

金剛地中從定出

金剛地中入正定

摩尼樹上從定出

摩尼樹上入正定

佛光明中從定出

佛光明中入正定

於河海中從定出

於河海中入正定

於火大中從定出

於火大中入正定

於風起定心不亂

於風大中入正定

於地大中從定出

於地大中入正定

於天宮殿從定出

於天宮殿入正定

於空起定心不亂

是名無量功德者

三昧自在難思議

十方一切諸如來

於無量劫說不盡

十·從有勝三昧能出現已下。八十一行頌。明三昧自在分。如此同異無礙自在大方網三昧門。入出隱現同時自在者。隨衆生業異。所見差別。諸佛得道自在故。隨衆生業自在故。然如來心無作性故。智隨影應。無去來性。而可取捨。如響應聲喻。如水潛流隨諸卉木各滋生喻。如春陽生草木喻。如水養魚龍喻。如地所生草木喻。如火成食喻。如風發生所益衆生長短壽生喻。以喻思之。以智照之。執計情亡。任眞之智本合如是。爲執計故。設得一分出世道果。亦不能爲大自在故。

大方廣佛新華嚴經合論卷第三十終

大方廣佛新華嚴經合論卷第三十一

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

賢者品第十二之三

一切如來咸共說	衆生業報難思議	諸龍變化佛自在	菩薩神力亦難思
欲以譬喻而顯示	終無有喻能喻此	然諸智慧聰達人	因於譬故解其義
聲聞心住八解脫	所有變現皆自在	能以一身現多身	復以多身爲一身
於虛空中入火定	行住坐臥悉在空	身上出水身下火	身上出火身下水
如是皆於一念中	種種自在無邊量	彼不具足大慈悲	不爲衆生求佛道
尙能現此難思事	況大饒益自在力	譬如日月遊虛空	影像普徧於十方
泉池陂澤器中水	衆寶河海靡不現	菩薩色像亦復然	十方普現不思議
此皆三昧自在法	唯有如來能證了	如淨水中四兵像	各各別異無交雜

劍戟弧矢類甚多	鎧胄車輿非一種	隨其所有相差別	莫不皆於水中現
而水本自無分別	菩薩三昧亦如是	海中有神名善音	其音普順海衆生
所有語言皆辯了	令彼一切悉歡悅	彼神具有貪恚癡	猶能善解一切音
況復總持自在力	而不能令衆歡喜	有一婦人名辯才	父母求天而得生
若有離惡樂真實	入彼身中生妙辯	彼有貪欲瞋恚癡	猶能隨行與辯才
何況菩薩具智慧	而不能與衆生益	譬如幻師知幻法	能現種種無量事
須臾示作日月歲	城邑豐饒大安樂	幻師具有貪恚癡	猶能幻力悅世間
況復禪定解脫力	而不能令衆歡喜	天阿修羅鬪戰時	脩羅敗衄而退走
兵仗車輦及徒旅	一時竄匿莫得見	彼有貪欲瞋恚癡	尙能變化不思議
況住神通無畏法	云何不能現自在	釋提桓因有象王	彼知天主欲行時
自化作頭三十二	一一六牙皆具足	一一牙上七池水	清淨香潔湛然滿
一一清淨池水中	各七蓮華妙嚴飾	彼諸嚴飾蓮華上	各各有七天玉女
悉善技藝奏衆樂	而與帝釋相娛樂	彼象或復捨本形	自化其身同諸天
威儀進止悉齊等	有此變現神通力	彼有貪欲瞋恚癡	尙能現此諸神通

何況具足方便智

而於諸定不自在

如阿修羅變化身

蹈金剛際海中立

海水至深僅其半

首共須彌正齊等

彼有貪欲瞋恚癡

尚能現此大神通

況伏魔怨照世燈

而無自在威神力

天阿修羅共戰時

帝釋神力難思議

隨阿修羅軍衆數

現身等彼而與敵

諸阿修羅發是念

釋提桓因來向我

必取我身五種縛

由是彼衆悉憂悴

帝釋現身有千眼

手持金剛出火焰

被甲持杖極威嚴

脩羅望見咸退伏

彼以微小福德力

猶能摧破大怨敵

何況救度一切者

具足功德不自在

切利天中有天鼓

從天業報而生得

知諸天衆放逸時

空中自然出此音

一切五欲悉無常

如水聚沫性虛僞

諸有如夢如陽焰

亦如浮雲水中月

放逸爲怨爲苦惱

非甘露道生死徑

若有作諸放逸行

入於死滅大魚口

世間所有衆苦本

一切聖人皆厭患

五欲功德滅壞性

汝應愛樂真實法

三十三天聞此音

悉共來昇善法堂

帝釋爲說微妙法

咸令順寂除貪愛

彼音無形不可見

猶能利益諸天衆

況隨心樂現色身

而不濟度諸群生

天阿修羅共鬪時

諸天福德殊勝力

天鼓出音告其衆

汝等宜應勿憂怖

諸天聞此所告音

悉除憂畏增益力

時阿修羅心震懼	所將兵衆咸退走	甘露妙定如天鼓	恆出降魔寂靜音
大悲哀愍救一切	普使衆生滅煩惱	帝釋普應諸天女	九十有二那由他
令彼各各心自謂	天王獨與我娛樂	如天女中身普應	善法堂內亦如是
能於一念現神通	悉至其前爲說法	帝釋具有貪恚癡	能令眷屬悉歡喜
況大方便神通力	而不能令一切悅	他化自在六天王	於欲界中得自在
以業惑苦爲罣網	繫縛一切諸凡夫	彼有貪欲瞋恚癡	猶於衆生得自在
況具十種自在力	而不能令衆同行	三千世界大梵王	一切梵天所住處
悉能現身於彼坐	演暢微妙梵音聲	彼住世間梵道中	禪定神通尙如意
況出世間無有上	於禪解脫不自在	摩醯首羅智自在	大海龍王降雨時
悉能分別數其滴	於一念中皆辯了	無量億劫勤修學	得是無上菩提智
云何不於一念中	普知一切衆生心	衆生業報不思議	以大風力起世間
巨海諸山天宮殿	衆寶光明萬物種	亦能興雲降大雨	亦能散滅諸雲氣
亦能成熟一切穀	亦能安樂諸群生	風不能學波羅蜜	亦不學佛諸功德
猶成不可思議事	何況具足諸願者	男子女人種種聲	一切鳥獸諸音聲

大海川流雷震聲

皆能稱悅衆生意

況復知聲性如響

逮得無礙妙辯才

普應衆生而說法

而不能令世間喜

海有希奇殊特法

能爲一切平等印

衆生寶物及川流

普悉包容無所拒

無盡禪定解脫者

爲平等印亦如是

福德智慧諸妙行

一切普修無厭足

大海龍王遊戲時

普於諸處得自在

興雲充徧四天下

其雲種種莊嚴色

第六他化自在天

於彼雲色如真金

化樂天上赤珠色

兜率陀天霜雪色

夜摩天上琉璃色

三十三天碼瑙色

四王天上玻璃色

大海水上金剛色

緊那羅中妙香色

諸龍住處蓮華色

夜叉住處白鵝色

阿修羅中山石色

鬱單越處金焰色

閻浮提中青寶色

餘二天下雜莊嚴

隨衆所樂而應之

又復他化自在天

雲中電耀如日光

化樂天上如月光

兜率天上閻浮金

夜摩天上珂雪色

三十三天金焰色

四王天上衆寶色

大海之中赤珠色

緊那羅界琉璃色

龍王住處寶藏色

夜叉所住玻璃色

阿修羅中碼瑙色

鬱單越境火珠色

閻浮提中帝青色

餘二天下雜莊嚴

如雲色相電亦然

他化雷震如梵音

化樂天中天鼓音

兜率天上歌唱音

夜摩天上天女音

於彼三十三天上

如緊那羅種種音

護世四王諸天所	如乾闥婆所出音	海中兩山相擊聲	緊那羅中簫笛聲
諸龍城中頻伽聲	夜叉住處龍女聲	阿修羅中天鼓聲	於人道中海潮聲
他化自在雨妙香	種種雜華爲莊嚴	化樂天雨多羅華	曼陀羅華及澤香
兜率天上雨摩尼	具足種種寶莊嚴	髻中寶珠如月光	上妙衣服眞金色
夜摩中雨幢幡蓋	華鬘塗香妙嚴具	赤眞珠色上妙衣	及以種種衆妓樂
三十三天如意珠	堅黑沈水栴檀香	鬱金雞羅多摩等	妙華香水相雜雨
護世城中雨美膳	色香味具增長力	亦雨難思衆妙寶	悉是龍王之所作
又復於彼大海中	雲雨不斷如車軸	復雨無盡大寶藏	亦雨種種莊嚴寶
緊那羅界雨纓絡	衆色蓮華衣及寶	婆利師迦末利香	種種樂音皆具足
諸龍城中雨赤珠	夜叉城內光摩尼	阿修羅中兩兵仗	摧伏一切諸怨敵
鬱單越中雨纓絡	亦雨無量上妙華	弗婆瞿耶二天下	悉雨種種莊嚴具
閻浮提雨清淨水	微細悅澤常應時	長養衆華及果藥	成熟一切諸苗稼
如是無量妙莊嚴	種種雲電及雷雨	龍王自在悉能作	而身不動無分別
彼於世界海中住	尙能現此難思力	況入法海具功德	而不能爲大神變

彼諸菩薩解脫門

一切譬喻無能顯

我今以此諸譬論

略說於其自在力

十一·從如來咸共說已下。有一百五十八行頌。明舉一喻況說分。

第一智慧廣大慧

眞實智慧無邊慧

勝慧及以殊勝慧

如是法門今已說

此法希有甚奇特

若人聞已能忍可

能信能受能讚說

如是所作甚爲難

世間一切諸凡夫

信是法者甚難得

若有勤修清淨福

以昔因力乃能信

一切世界諸群生

少有欲求聲聞乘

求獨覺者轉復少

趣大乘者甚難遇

趣大乘者猶爲易

能信此法倍更難

況復持誦爲人說

如法修行眞實解

有以三千大千界

頂戴一劫身不動

彼之所作未爲難

信是法者乃爲難

有以手擎十佛刹

盡於一劫空中住

彼之所作未爲難

能信此法乃爲難

十二·從第一智慧廣大慧已下。有十四行頌。明信佛智慧自欲同知難信分。

十刹塵數衆生所

悉施樂具經一劫

彼之福德未爲勝

信此法者爲最勝

十刹塵數如來所

悉皆承事盡一劫

若於此品能誦持

其福最勝過於彼

十三·從十刹塵數衆生所已下。有四行頌。明信樂受持得福分。

時賢首菩薩說此偈已。十方世界六反震動。魔宮隱蔽。惡道休息。十方諸佛普現

其前。各以右手而摩其頂。同聲讚言。善哉善哉。快說此法。我等一切悉皆隨喜。

十四。時賢首菩薩已下。三行半經。明賢首菩薩所說法門。威感十方諸佛摩頂許可分。二隨文釋義者。文自具明。不煩更釋。幽隱難知者。方可解之。已前總明以果成信竟。入真實證。如下昇帝釋天宮說十住法門是。此一會。昇須彌山品。是序分。餘五品經。是正說分。至明法品末後動地雨華。是流通分。

昇須彌山頂品第十三

此十住位中。有六品經。一昇須彌頂品。二頂上偈讚品。三十住品。四梵行品。五發心功德品。六明法品。如是六品。共成十住法門。將釋此品。義分爲三一釋品來意。二以處表法。三隨文釋義。一釋品來意者。明前於普光明殿人間地上。成十信之心已終。此妙峰之頂。明從十信入十住。入位之昇進故。此品須來。二以處表法者。明此山於七重金輪圍山。七重大海之內。出水高八萬四千由旬。縱廣亦爾。四寶所成。東面黃金。西白銀。南吠瑠璃。北瑪瑙。上有四埵。埵有八輔天衆。四八三十二。中心名妙高頂。天帝釋在其上。居寶宮殿。通爲帝釋天。

三十三天。總以帝釋爲主。帝釋有四名。一名天帝釋。二名憍尸迦。三名釋提桓。四名因陀羅。大意名能主。爲能爲諸天作主故。此妙峰山。四寶合成。諸天寶宮殿在上莊嚴。故爲妙峰山。此山之外。七重金山。及七重大海。廣量。金翅鳥兩翼相去三百三十六萬里。迅疾能飛。一鼓翼萬萬九千里。七日七夜方至其頂。其山在大海之中。形如腰鼓。峯然高聳。非以手足攀攬之所能登。爲表此十住法門。創生如來智慧之家。爲眞佛子。不可以有生滅尋思觀察。及多聞心想攀攬所得故。以將妙峰山用況表之。令後人傲學。山者高勝義故。像此十住。住佛所住法身妙智慧海故。是出世高勝義故。妙峰山者。不動義。諸天所居。妙樂義。莊嚴義。像此位菩薩。以方便三昧。寂然不動。無思無心。不收不攝任性而定。稱平等理。與法身合。忽然妙慧從此定生。無始無明。總無所得。住佛妙慧。都無所依。得法妙樂。智慧莊嚴。出過情見。諸佛所說解脫微妙經典無不解了。爲生在如來智慧家故。三界無明。一時頓盡。唯有習氣煩惱。漸漸以法治之。如下十住品云。佛子。菩薩住處廣大。與法界虛空等。佛子。菩薩住三世諸佛家故。又如初發心功德品云。應知此人。即與三世諸佛同等。即與三世諸佛如來境界平等。即與三

世諸佛如來功德平等。得如來一身無量身。究竟平等眞實智慧。纔發心時。即爲十方一切諸佛所共稱歎。乃至震動一切世界。及一切世界中示現成佛等。如文廣明。不可同於三乘方便教說。地前三賢菩薩。得折伏現行無明。初地見道。爲此經法教門。依一切諸佛根本不動智而發心故。以乘如來一切智乘而發心故。於此十住位中。能與如來同智慧故。不同三乘。但將三空觀。且折伏現行。於此經中發心之者。從佛不動智而發菩提心。設有餘習。還以無依住智治之。還是根本智。不伏不斷。爲本寂用自在故。無體可斷故。無可伏故。設修三昧。任性淨故。亦無收攝。亦不伏捺故。任自淨故。設行分別。任性智慧。隨事用爲。亦無取捨故。如是任法調治習氣。使稱理智。令慣習增明。如佛願行。而隨事世間。成長大悲。出不沒故。以心境一眞。無出沒故。是故經中以阿修羅王等表之。處大海而不出不沒等喻。問曰。何故不昇四天王宮。而超至帝釋宮。答曰。爲四天王在妙峰山半傍住。非是可表昇法頂處。至相盡。現智慧莊嚴。住不退故。善財童子於妙峰山。得憶念諸佛智慧光明門。同此位故。准例可知。以超情塵之跡。以山表之。非要登山也。已入如來智慧。於衆中堪爲主導故。非要爲帝釋也。第三隨文釋義

中。義分爲三。一總科一品。二明如來身行徧周等印。如下經云。十方一切諸世界中。悉亦如是。明十方一切妙峰山。總見如來昇妙峰山頂。三隨文釋義。

爾時如來威神力故。十方一切世界一一四天下闔浮提中。悉見如來坐於樹下。各有菩薩承佛神力。而演說法。靡不自謂愜對於佛。爾時世尊。不離一切菩提樹下。而上昇須彌。向帝釋殿。時天帝釋。在妙勝殿前。遙見佛來。即以神力莊嚴此殿。置普光明藏師子之座。其座悉以妙寶所成。十千層級迴極莊嚴。十千金網彌覆其上。十千種帳。十千種蓋。周迴間列。十千繒綺以為垂帶。十千珠纓周徧交絡。十千衣服敷布座上。十千天子。十千梵王。前後圍遶。十千光明而為照耀。爾時帝釋。奉為如來敷置座已。曲躬合掌。恭敬向佛。而作是言。善來世尊。善來善逝。善來如來應正等覺。唯願哀愍。處此宮殿。爾時世尊。即受其請。入妙勝殿。十方一切諸世界中。悉亦如是。爾時帝釋。以佛神力。諸宮殿中所有樂音。自然止息。即自憶念過去佛所。種諸善根。而說頌言。

迦葉如來具大悲

諸吉祥中最無上

彼佛曾來入此殿

是故此處最吉祥

拘那牟尼見無礙

諸吉祥中最無上

彼佛曾來入此殿

是故此處最吉祥

迦羅鳩馱如金山	諸吉祥中最無上	彼佛曾來入此殿	是故此處最吉祥
毘舍浮佛無三垢	諸吉祥中最無上	彼佛曾來入此殿	是故此處最吉祥
尸棄如來離分別	諸吉祥中最無上	彼佛曾來入此殿	是故此處最吉祥
毘婆尸佛如滿月	諸吉祥中最無上	彼佛曾來入此殿	是故此處最吉祥
弗沙明達第一義	諸吉祥中最無上	彼佛曾來入此殿	是故此處最吉祥
提舍如來辯無礙	諸吉祥中最無上	彼佛曾來入此殿	是故此處最吉祥
波頭摩佛淨無垢	諸吉祥中最無上	彼佛曾來入此殿	是故此處最吉祥
然燈如來大光明	諸吉祥中最無上	彼佛曾來入此殿	是故此處最吉祥

如此世界中忉利天王。以如來神力故。偈讚十佛所有功德。十方世界諸釋天王。悉亦如是讚佛功德。爾時世尊。入妙勝殿。結跏趺坐。此殿忽然廣博寬容。如其天衆諸所住處。十方世界。悉亦如是。

一長科一品者。於此品中。長科爲十段。第一從爾時已下三行經。明佛神力普現十方。二爾時已下一行半經。明佛不離菩提樹下。而上昇須彌向帝釋殿。三時天帝釋已下可七行經。明帝釋遙見佛來嚴殿敷座。四曲躬合掌已下可兩行經。

明帝釋請佛入殿。五爾時世尊已下三句經。是如來十方一時受請入殿。六十方一切世界已下三句經。是結十方普會同此。七爾時帝釋已下可一行半經。明佛神力樂音自息。八即自憶念已下四句。明帝釋自念過去善根。說頌歎佛來此。九如此世界中已下兩行半經。都結此處以偈歎佛。十方同然。十爾時已下可兩行經。明如來處座而坐。殿廣博寬容。并結十方同此。三隨文釋義者。云不離菩提樹者。明菩提體。無去來遠近處所。可離可到故。又如來智身無表裏。體徧周故。又法界非大小。毫剎相容故。又心境無二相。無中邊方所故。又諸法無自性。一多恆圓滿故。帝釋遙見佛來者。有二義。一事。二表法。一事者。爲如來於無去來性。示去來之相。故言遙見。二表法者。明帝釋示同未悟。不見如來智身徧周。與心一體。故言遙見佛來。故又信解爲遙見。自心入位爲佛來。帝釋即以神力莊嚴此殿者。亦有二義。一事。二表法。其事可知。二表法者。自加行也。安置普光明師子之座者。亦有二義。一約位置座。二約帝釋自德根堪。一約位置座者。約此十住位中法位也。爲十住中。得一切諸佛智慧光明之藏。於一切法自在無畏。故置此座故。如十行位中。於夜摩宮中化作寶蓮華師子之座。此約行位。在一切生

死具大悲行萬行。以理智體得無染故。以是義故。以蓮華爲座體。在此十住位中。以得一切諸佛智慧光明普照萬法故。安置普光明藏師子之座。此十住中。安置其座十千層級。十行中。化作百萬層級師子之座。爲十住位中初始入位。明須彌之上猶連地居。明心有所得。從信創會見法之報。以此義故。師子座須有安置。又方便三昧。是安置故。十行位中。約十住位中理智妙慧功成。即十行位中。以妙用而化其座。又約行從空而立。還約位在夜摩空居之天。云座十千層級又百萬層級。及帝釋天宮夜摩天。總明隨位昇進行相。若也正入法智慧流。不出毫塵。徧諸剎海。其座乃至十迴向十地。高下嚴飾。各各隨位不同。准例知之。其座上莊嚴皆十千者。明萬行報得故。如十千金網者。約能以教行之網灑衆生之果報故。十千種帳者。明養育義。以於一切處爲佛爲天爲大力士之神。擁護養育衆生行之果報所得故。十千種蓋者。是大悲義。以大悲心覆養一切衆生之果報所得故。十千繒綺者。以一行中行無盡差別行。一言音中具差別教。皆明白可觀之果也。十千珠纓者。明萬行普周。莊嚴智境。化利衆生無休息之果所得故。如一一塵中。皆有無盡普賢身者是也。十千衣服。是於一切生死海。柔和善忍。覆養含生之果

故。十千天子者。明能行萬行之人。十千梵王者。明於行中智慧自在故。十千光明照耀者。明智慧照耀。能破自他迷闇長夜。令大明故。已上皆是舉此位之果德。用成莊嚴。令發心入位菩薩。識果行因。無疑惑故。從曲躬已下。明帝釋於如來致敬。請佛入宮。明行謙行也。如來受請。明從信入住。如文可知。二約帝釋自德。最下明帝釋得宿念力。於過去佛所種善根。說頌歎佛者。明以三昧力。自見身心體性。同古今佛智慧善根故。已下十佛。是當位之功用合古也。於說頌中。有二十行頌。兩行一頌。初兩行頌。歎迦葉佛。具云迦葉波。此云飲光。此是其姓。亦以身光殊特。能飲諸天子及日月等光。皆悉不現故。次兩行。歎拘那牟尼佛。正云迦那牟尼。言拘那者。此云金也。牟尼者佛也。以金色爲號。次兩行。歎迦羅鳩馱。具云迦羅鳩村馱佛。此云所應斷已斷。次兩行。歎毘舍浮佛。此云徧一切自在。次兩行。歎尸棄佛。正云式棄那。此云持髻。或曰有髮。次兩行。歎毘婆尸佛。此云淨觀。或曰勝觀。或曰種種觀。次兩行。歎弗沙佛。正云勃沙。此云增盛。次兩行。歎提舍佛。正云底沙。此云說法度人。次兩行。歎波頭摩華佛。正云鉢特忙。此赤蓮華也。次兩行。歎然燈如來。前之三佛。是此今賢劫中

佛。後之七佛。是前劫中佛。以明創入十住之門。古今法則相會。明古佛今佛法不異故。入此位者。會同不別故。言吉祥者。歎此山頂是福善之處故。明昇進者。以三昧力身心不動如山王。總會古今諸佛同智慧故。第九如此世界中忉利天已下。有四行經。於中義分爲四。一舉此世界歎佛功德。二總舉十方同然。三爾時已下。明如來入殿昇座而坐。四明其殿忽然廣博。普容諸天住處。此明約如來無自他之德合然。令大衆得見。以明令大衆入位同此。已上釋昇須彌品竟。大約此明以三昧力正入定時。身心蕩然。稱法界性無表裏。光明朗徹。是忽然廣博義。亦是普光明藏師子之座義。智慧現前。是佛來義。一一如是會理修行。不可但逐名言也。

須彌頂上偈讚品第十四

將釋此品。約作四門分別。一釋品名目。二釋品來意。三都會此十住六品之經意。四隨文釋義。一釋品名目者。以法慧等十箇菩薩。各以自己當位隨位進修之法。還自以偈讚讚之。令信終菩薩傲之悟入故。此品名爲偈讚品。明古今諸佛

同會此智殿悲宮。俱會古今之佛。自身是未來之佛。與古佛道合故。二釋品來意者。明前已創昇須彌。帝釋以偈歎佛。此品明十住位當位菩薩。將當位法門以偈讚之。令信心者得入位故。故有此品須來。初歎過去佛。次歎今現在佛。未來佛者。即入此位者是也。是故經中不云未來。十佛是過去佛。盧舍那是現在佛。修行始入位者是未來佛。三都會十住之內須彌之上說六品經意者。一昇須彌品。明信終昇進。二須彌頂上偈讚品。明偈讚當位之法。勸修昇進之理。三說十住品。明當位所行之行。四說梵行品。明總十住之中所持無相之性戒。五發心功德品。明於十住之中發心所得功德之量。六明法品。即明當位之法昇進向十行之因。此六品。明當位之修行因果。及向十行之因。四隨文釋義中。復分爲二。一長科一品經意。二隨文釋義。一長科一品經意者。義分爲十一段。

爾時佛神力故。十方各有一大菩薩。一一各與佛剎微塵數菩薩俱。從百佛剎微塵數國土外諸世界中。而來集會。其名曰。法慧菩薩。一切慧菩薩。勝慧菩薩。功德慧菩薩。精進慧菩薩。善慧菩薩。智慧菩薩。真實慧菩薩。無上慧菩薩。堅固慧菩薩。所從來土。所謂因陀羅華世界。波頭摩華世界。寶華世界。優鉢羅華世

界。金剛華世界。妙香華世界。悅意華世界。阿盧那華世界。那羅陀華世界。虛空華世界。各於佛所淨修梵行。所謂殊特月佛。無盡月佛。不動月佛。風月佛。水月佛。解脫月佛。無上月佛。星宿月佛。清淨月佛。明了月佛。是諸菩薩。至佛所已。頂禮佛足。隨所來方。各化作毘盧遮那藏師子之座。於其座上結跏趺坐。如此世界中。須彌頂上。菩薩來集。一切世界。悉亦如是。彼諸菩薩。所有名字世界佛號。悉等無別。爾時世尊。從兩足指放百千億妙色光明。普照十方一切世界。須彌頂上帝釋宮中佛及大眾。靡不皆現。爾時法慧菩薩。承佛威神。普觀十方而說頌言。

一。從爾時佛神力故已下。有十九行半經。明佛以神力令衆來集分。於此分中十九行半經。復分爲七段。一從爾時佛神力故五行半經。明菩薩來集。二所從來土已下三行半經。明菩薩世界之名。三各於佛所淨修梵行已下三行經。明本所事佛。四是諸菩薩至佛所已下兩行經。明菩薩來已化座而坐。五如此世界中已下兩行經。明都結十方世界菩薩同然。六爾時世尊已下兩行半經。明佛足指端放光。普照一切處帝釋宮殿。十信足輪下放光。此十住中足指端放光。明位勝進。十行

足跡。十迴向膝上。十地眉間毫中放光。此光表法位昇進故。還是第一會中現相品。所放眉間之光。以果成信入位之光。足指光者。明照入此住位者身心智慧宮殿。表入聖之初故。足指端放光也。七爾時已下一行經。明法慧菩薩說頌歎佛。餘義隨文可知。約科文之意。即悉其意。如初菩薩來集。共世界名。并本所事佛。總都會配當位法。及法門因果。始可得見其意況。從法慧菩薩。是此位中所修之行人。約所得如來智慧立名。世界名因陀羅華世界。是所修之法。殊特月佛。是初發心住位中約法所修之果。云因陀羅者。此云能主也。華者。是開敷感果義。爲此十住中初發心菩薩。即能十方一切世界中示現成佛。故世界名能主。以能示現主導一切衆生故。以其行華。能開敷自他智慧果故。經云。一一各與佛刹微塵數同名法慧菩薩俱者。明智慧解行了悟徧知是境界故。以達自心一切總爾故。一迷一切迷。一悟一切悟。此明唯應度者。自迷解故。智慧徧故。云從百佛刹微塵數國土外諸世界中來者。明迷云國土之外。迷解云來。但以迷無明暗障廣多。以比之世界塵數。悟之解行廣多故。亦比之如世界之塵。智慧與無明相似。但只隔迷悟故。是故此經下文云。有二千大千世界量等經卷。內小衆生身中。是其義也。

佛號殊特月者。殊者勝也。特者奇也。月者清涼也。明入此位菩薩。生住如來智慧家時。無始無明。煩惱炎熱。惡道熾然。一時頓滅。唯有如來智慧朗然清涼如月故。明此位菩薩。創始入真。以能破煩惱惑熱處。立自己佛果之名。以次十行十迴向隨位昇進。菩薩名佛世界名。各各隨位差別。十行中佛果名號。下名悉同名之爲眼。爲知根利衆生處立名。十迴向中佛果名號。上名悉同名之爲妙。爲於生死中。利衆生之妙用自在故。至位方明。又云。十方諸來法慧等十菩薩衆。各於佛所淨修梵行者。明各於自心法身智慧能淨煩惱清涼如月處。立名爲各於佛所淨修梵行。梵者淨也。以明此位菩薩。妙慧現前。諸行體自淨故。爲法性智慧。任法運爲。體無生滅故。明以體無生滅處。以標自心佛果故。是故有發心之士。應當如是。以方便無作無思任性之定。而自顯發自心無性佛智慧門。即能於煩惱無所染污。便即名之殊特月佛。隨所來方。各化作毘盧遮那藏師子之座者此法慧菩薩。是東方之位。明入位之首。破暗之初。如日初出東方。能破暗故。以世間之名。名爲殊特。以智慧明。能破自他無始長夜之迷暗故。是故佛果。名之殊特月佛。以初發心已爲天人師。以是世界名能主華。其化所作之座。名毘盧遮那藏

師子之座者。是佛果座也。明毘盧者光也。遮那者徧也。明徧坐無始一切無明煩惱。以化作一切大智慧光明藏。徧照一切心境。化成法界自在解脫之門。師子者。得無畏也。已上總依主釋。結跏趺坐者。會妄想而爲眞智慧故。故爲結跏趺坐。此十住位中十箇菩薩。同於善財童子。於妙峰山頂上。初入信之後。入十住之初。德雲比丘下。至慈行童女。法門相似。文殊師利菩薩。以明初發信心。以此經中。圓會教行使令後學者。令易解故。但說其教。不著行行之人。難解了故。以是義故。初會舉佛果神天。示入法而勸修。以明一一皆同佛知見。第二會勸生信解。以不動智佛以成信門。次說入位進修之教則。十住十行十迴向十地十一地法門。法界品中。舉善財童子。是能行五位行者。以教行具彰。令易解故。若不如是。雖見教法。在行猶迷。是故於此一部之經。因果理智教行仁士。一一具彰也。令修道者做學不謬故。此十住入眞見道之初心。與後十行十迴向十地十一地。爲正覺之果故。如人百歲。以初生爲長故。人生十子。初生爲長。

大方廣佛新華嚴經合論卷第三十一終

大方廣佛新華嚴經合論卷第三十二

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

須彌頂上偈讚品第十四之餘

第二一切慧菩薩。世界名波頭摩華。佛號無盡月。於此義中。義分爲五。一釋菩薩名。二釋世界名。三釋隨位進修佛果之號。四釋其座體。五定其所來方面。第一釋菩薩名者。所以名一切慧。以隨位進修中。達一切法無體無性。非迷執故。此當第二治地住。修戒波羅蜜中十波羅蜜。以一切法無體性非染淨。以爲戒體故。如此十住位梵行品。是其戒體。二釋世界名者。所以世界名波頭摩華。此云赤蓮華也。爲表戒相無染處世。赫奕開敷莊嚴萬行。感果可觀義也。三釋隨位進修佛果之號者。佛號無盡月。爲菩薩名一切慧。佛果還號無盡月。明因果相似故。即明一切慧。是修行得一切佛智慧之人。世界。是所修行之法。佛果。是治地住中

所得之果。明能清涼一切煩惱故。四座體。如前已釋。五定其所來方面者。是南方之衆也。爲表南方是離位。是虛無義。是文章義。是赤色赫奕義。如日正南照萬像而圓明義。是故菩薩名一切慧。世界名赤蓮華。佛號無盡月。此是善財童子見海雲比丘。見佛說普眼經。以義思之。自當明矣。第三勝慧菩薩。義分爲四。一明菩薩名。二明所居國土。三明隨位佛果之號。四明從所來方。一明菩薩名者。所以名勝慧。爲明隨位進修更明淨故。不移一法勝前位故。二明世界名者。所以名寶華世界。此明忍波羅蜜。已得一切諸佛之智慧。以道體而能行忍行。華者行也。明以忍行莊嚴智慧法身。三明佛果之號。所以佛號不動月者。以得理成行。達心境而無可動故。明能堪忍也。月者清涼義。四明從所來方者。是西方之衆。以西方。爲秋。爲殺。爲苦諦。以慈悲位在中。如十迴向中。善財見觀音在金剛山之西。爲明金爲殺位。以表衆苦之處。以修其慈忍。以是義故。菩薩名勝慧。世界名寶華。佛號不動月。總明得法成忍之力用勝故。此是寶華義。此是修行住對治法也。此是善財見善住比丘。得無礙法門。以能忍故。第四菩薩名功德慧。於此義中。分之爲四。一明菩薩名。二明世界名。三明佛果之號。四明從所來方。

一明菩薩名者。云何名功德慧。此位修精進波羅蜜。勤行利物廣益衆生故。招多功德。以立其名。二明世界名者。所以名優鉢羅華。此云青蓮華。諸色蓮華。此華最勝。爲明諸行之中。精進最勝。故以此華爲所居法體故。一切萬行。以此爲功。三明佛果之號。所以名爲風月佛。爲明精進波羅蜜。離慢無懈。一念成佛。速疾如風。又明精勤觀照定慧如風。能消染淨無明塵垢。香臭悉吹。如風能清涼故。四明所從來方者。是北方之衆。北方者。是坎位。是黑。是愚。是世間嶮盜之義。又爲師爲君之位。以是義故。以精進波羅蜜。勤修利益之行。破迷離暗速令成佛。是故菩薩號功德慧。世界名青蓮華。佛果號之爲風月佛也。以風能淨諸垢故。此已上是生貴住中對治法門故。此當善財第四善知識彌伽長者。說輪字法門。了俗諦法。而令愚黑者。得出世樂故。第五菩薩名精進慧者。於此義中。四義如前。一所以名精進慧。明此位是具足方便住。精勤修習方便定門。以彰深智慧故。以立其名。又一行之中。具無量行故。於定位起精進之名。精進之上。起功德之名。以明諸行參用。一行具無量行故。二世界名金剛華者。以法性爲禪體。起妙慧揀擇正邪不壞。是金剛義故。華者行也。以明定慧能揀擇之妙用故。三佛

果名水月者。爲定體能淨。能清涼。能現萬像。如水故。四明所從來方者。是東北方之衆。東北者。是良位也。爲山。爲石。爲門闕。爲童蒙。爲初明。爲高顯。爲寂靜。爲止。以明定體。徧與諸位諸行修進啓蒙。發明清涼惑熱進修始終之本末故。爲良爲歲始年終之本末。故爲初明爲止。故菩薩名精進慧。世界名金剛華。佛號爲水月。此是善財第五善知識解脫長者。主禪門。於其身中。現十佛刹塵佛國土總在身中。十方各十佛刹微塵之數佛國土總在身中。明禪體周徧故。第六善慧菩薩。四義如前。一明菩薩名者。明此正心住。修般若波羅蜜智慧門故。菩薩名善慧。二妙香華世界者。以明妙用智慧之香華。開敷自他佛果。明智慧說教。是香華義故。三佛號解脫月者。明妙慧分明。心境解脫故。四明所從來方者。此是東南方之衆。東南方是巽位。巽爲風教。爲言說。以像此位。以智慧善說妙法。教化衆生。令解脫故。是故菩薩名善慧。世界名妙香華。佛果號解脫月。此當善財第六海幢比丘位。身心寂然。離出入息。身出化身徧法界故。明寂用自在。得寂滅神通。第七菩薩名智慧。四義如前。一明菩薩名智慧者。明此不退住。是第七成大慈悲門。以智慧成滿。方能隨俗。善入生死。以此爲名。二世界名悅意華

者。以有智慧。在於生死。隨順六道。同事利生。知根悅俗。皆令得入法悅無憂故。名悅意華。三佛號無上月者。明諸行之中。慈悲爲首。爲濟利衆生爲最勝故。故號之名無上月。四所從來方者。西南方也。是坤位。爲信順。爲母。爲地。爲衆。明方便波羅蜜。以大悲爲母。入於一切衆生生死之地。同一切衆生之行而教化之。令信順入正法故。是故菩薩名智慧。世界名悅意華。佛號爲無上月。此當善財第七善知識休捨優婆夷。此云滿願。以大慈悲行。滿衆生願故。像此方西南爲母義。表悲位故。第八眞實智慧菩薩。四義如前。一明菩薩名者。以此第八童眞住中。行願波羅蜜。以眞實智慧。不謬誤衆生故。二明世界名者。世界名阿盧那華。此云紅蓮華。此華赤白分明。是其紅色。爲此位是第八住智增位。明以大智隨願行悲。令智悲圓滿。如紅蓮華赤白分明。白表智。赤表悲故。世界名紅蓮華。表隨眞智處生死而無染。如蓮華處水。赤白開敷而可觀故。三明佛號星宿月者。爲此位眞智朗明。知根器而了差別故。佛號爲星宿月。表了衆生差別根性分明也。四所來方者。是西北方。爲乾。爲父。爲堅剛。爲天。爲團圓白淨。能現衆色。咸處其中。以是義故。菩薩名眞實慧。世界名紅蓮華。佛號星宿月。總明大智圓

明。能現衆生根器差別。如天現像。品物分明。此當善財第八善知識。仙人毘目瞿沙。此云出聲可畏。明眞智圓明。出語衆邪可畏。仙人者。爲表此位智增無染故。又表得智同邪。化邪見故。第九無上慧菩薩。四義如前。一明菩薩名者。以此位是力波羅蜜。法王子住。善說法故。名無上慧。二明世界名者。所以世界名那羅陀華者。那羅者。此云人也。陀云爲持。爲此華香潔殊妙。人持帶佩。表此位菩薩。以善說妙法殊妙。聞之者。得戒定慧解脫知見五分法身之香。人皆持誦帶佩故。世界名那羅陀華。三明何故佛號清淨月。此位菩薩。善說法故。爲大法師。能淨自他煩惱故。佛號清淨月。四從所來方者。是下方之衆。明下方。是金剛。是水。是風輪。能持世間故。表此位菩薩。善說妙法。能持世間軌度法則。令人做學。是故菩薩名無上慧。世界名那羅陀華。佛號清淨月。此位同善財見勝熱婆羅門。昇刀山。入火聚。隨諸人天所來見者。皆得道而去。此明菩薩智滿同邪。攝諸異道。令人正見故。第十堅固慧菩薩。四義如前。一明所以菩薩名堅固慧者。以此位是灌頂住。行智波羅蜜。能堅固利益一切衆生。以爲其名。二世界名虛空華者。以智慧日。照明世間及出世間。總無依住。以此爲名。三明所以佛

號明了月者。以此位大智圓明。普照世間無不明了。以此爲名。四所來方者。是上方之衆。上方者。爲虛空。爲日月星辰。表大智無依。不依空有。明鑒萬像。如日月星辰。是故菩薩名堅固慧。世界名虛空華。佛號明了月。此位是善財童子見師子幢王女。名慈行童女。師子幢王女者。明智悲圓滿。以此十住一終已生在佛家。會融十法悲智一終圓滿也。以從初住創生佛家。修智行悲。即王女慈行。十地修悲已滿。於十一地初。以悲行智。即佛母摩耶。幻生諸佛。佛是大智。母是大悲。廣意至文方明。如下十段頌文。隨文可知。一依如前科文釋過。已上菩薩名世界名十箇佛果。總是此十住之中隨位進修因果之號。約隨方而表法。約入法而成名。如上所配之可知。

佛放淨光明	普見世導師	須彌山王頂	妙勝殿中住
一切釋天王	請佛入宮殿	悉以十妙頌	稱讚諸如來
彼諸大會中	所有菩薩衆	皆從十方至	化座而安坐
彼會諸菩薩	皆同我等名	所從諸世界	名字亦如是
本國諸世尊	名號悉亦同	各於其佛所	淨修無上行

佛子汝應觀

如來自在力

一切閻浮提

皆言佛在中

我等今見佛

住於須彌頂

十方悉亦然

如來自在力

一一世界中

發心求佛道

依於如是願

修習菩提行

佛以種種身

遊行徧世間

法界無所礙

無能測量者

慧光恆普照

世間悉除滅

一切無等倫

云何可測知

二·從法慧菩薩承威說頌已下。十行頌。是明法慧菩薩歎佛放光集衆分。

爾時一切慧菩薩。承佛威力。普觀十方而說頌言。

假使百千劫

常見於如來

不依真實義

而觀救世者

是人取諸相

增長癡惑網

繫縛生死獄

盲冥不見佛

觀察於諸法

自性無所有

如其生滅相

但是假名說

一切法無生

一切法無滅

若能如是解

諸佛常現前

法性本空寂

無取亦無見

性空即是佛

不可得思量

若知一切法

體性皆如是

斯人則不爲

煩惱所染著

凡夫見諸法

但隨於相轉

不了法無相

以是不見佛

牟尼離三世 諸相悉具足 住於無所住 普徧而不動

我觀一切法 皆悉得明了 今見於如來 決定無有疑

法慧先已說 如來真實性 我從彼了知 菩提難思議

三·爾時已下。明一切慧承威說十行頌。明歎無相法爲真實。

爾時勝慧菩薩。承佛威力。普觀十方而說頌言。

如來大智慧 希有無等倫 一切諸世間 思惟莫能及

凡夫妄觀察 取相不如理 佛離一切相 非彼所能見

迷惑無知者 妄取五蘊相 不了彼真性 是人不見佛

了知一切法 自性無所有 如是解法性 則見盧舍那

因前五蘊故 後蘊相續起 於此性了知 見佛難思議

譬如闍中寶 無燈不可見 佛法無人說 雖慧莫能了

亦如目有翳 不見淨妙色 如是不淨心 不見諸佛法

又如明淨日 瞽者莫能見 無有智慧心 終不見諸佛

若能除眼翳 捨離於色想 不見於諸法 則得見如來

一切慧先說

諸佛菩提法

我從於彼聞

得見盧舍那

四·爾時已下。明勝慧菩薩說十行頌。歎凡夫迷五蘊之眞性。由人說之方了。

爾時功德慧菩薩。承佛威力。普觀十方而說頌言。

諸法無眞實

妄取眞實相

是故諸凡夫

輪迴生死獄

言詞所說法

小智妄分別

是故生障礙

不了於自心

不能了自心

云何知正道

彼由顛倒慧

增長一切惡

不見諸法空

恆受生死苦

斯人未能有

清淨法眼故

我昔受衆苦

由我不見佛

故當淨法眼

觀其所應見

若得見於佛

其心無所取

此人則能見

如佛所知法

若見佛眞法

則名大智者

斯人有淨眼

能觀察世間

無見即是見

能見一切法

於法若有見

此則無所見

一切諸法性

無生亦無滅

奇哉大導師

自覺能覺他

勝慧先已說

如來所悟法

我等從彼聞

能知佛眞性

五·爾時功德慧說十行頌。明妄取諸法眞實之相。

爾時精進慧菩薩。承佛威力。觀察十方而說頌言。

若住於分別	則壞清淨眼	愚癡邪見增	永不見諸佛
若能了邪法	如實不顛倒	知妄本自真	見佛則清淨
有見則爲垢	此則未爲見	遠離於諸見	如是乃見佛
世間言語法	衆生妄分別	知世皆無生	乃是見世間
若見見世間	見則世間相	如實等無異	此名真見者
若見等無異	於物不分別	是見離諸惑	無漏得自在
諸佛所開示	一切分別法	是悉不可得	彼性清淨故
法性本清淨	如空無有相	一切無能說	智者如是觀
遠離於法想	不樂一切法	此亦無所修	能見大牟尼
如德慧所說	此名見佛者	所有一切行	體性皆寂滅

六·爾時精進慧說十行頌。歎諸法自體無見。妄見迷眞。

爾時善慧菩薩。承佛威力。普觀十方而說頌言。

希有大勇健 無量諸如來 離垢心解脫 自度能度彼

我見世間燈 如實不顛倒 如於無量劫 積智者所見

一切凡夫行 莫不速歸盡 其性如虛空 故說無有盡

智者說無盡 此亦無所說 自性無盡故 得有難思盡

所說無盡中 無衆生可得 知衆生性爾 則見大名稱

無見說爲見 無生說衆生 若見若衆生 了知無體性

能見及所見 見者悉除遣 不壞於眞法 此人了知佛

若人了知佛 及佛所說法 則能照世間 如佛盧舍那

正覺善開示 一法清淨道 精進慧大士 演說無量法

若有若無有 彼想皆除滅 如是能見佛 安住於實際

七·爾時善慧菩薩說十行頌。歎無衆生可盡。法非有無二見。

爾時智慧菩薩。承佛威力。普觀十方而說頌言。

我聞最勝教 即生智慧光 普照十方界 悉見一切佛

此中無少物 但有假名字 若計有我人 則爲入險道

諸取著凡夫 計身爲實有 如來非所取 彼終不得見

此人無慧眼	不能得見佛	於無量劫中	流轉生死海
有諍說生死	無諍即涅槃	生死及涅槃	二俱不可得
若逐假名字	取著此二法	此人不如實	不知聖妙道
若生如是想	此佛此最勝	顛倒非實義	不能見正覺
能知此實體	寂滅真如相	則見正覺尊	超出語言道
言語說諸法	不能顯實相	平等乃能見	如法佛亦然
正覺過去世	未來及現在	永斷分別根	是故說名佛

八·爾時智慧菩薩說十行頌。歎言說不能及真。
爾時真實慧菩薩。承佛威力。普觀十方而說頌言。

寧受地獄苦	得聞諸佛名	不受無量樂	而不聞佛名
所以於往昔	無數劫受苦	流轉生死中	不聞佛名故
於法不顛倒	如實而現證	離諸和合相	是名無上覺
現在非和合	去來亦復然	一切法無相	是則佛真體
若能如是觀	諸法甚深義	則見一切佛	法身真實相

於實見真實 非實見不實 如是究竟解 是故名爲佛

佛法不可覺 了此名覺法 諸佛如是修 一法不可得

知以一故衆 知以衆故一 諸法無所依 但從和合起

無能作所作 唯從業想生 云何知如是 異此無有故

一切法無住 定處不可得 諸佛住於此 究竟不動搖

九·爾時真實慧菩薩說十行頌。歎諸法無合散性。

爾時無上慧菩薩。承佛威力。普觀十方而說頌言。

無上摩訶薩 遠離衆生想 無有能過者 故號爲無上

諸佛所得處 無作無分別 麤者無所有 微細亦復然

諸佛所行境 於中無有數 正覺遠離數 此是佛眞法

如來光普照 滅除衆闇冥 是光非有照 亦復非無照

於法無所著 無念亦無染 無住無處所 不壞於法性

此中無有二 亦復無有一 大智善見者 如理巧安住

無中無有二 無二亦復無 三界一切空 是則諸佛見

凡夫無覺解 佛令住正法 諸法無所住 悟此見自身
非身而說身 非起而現起 無身亦無見 是佛無上身
如是實慧說 諸佛妙法性 若聞此法者 當得清淨眼
十·爾時無上慧說十行頌。歎佛所得法。體無分別。不屬名數。
爾時堅固慧菩薩。承佛威力。普觀十方而說頌言。

偉哉大光明	勇健無上士	爲利群迷故	而興於世間
佛以大悲心	普觀諸衆生	見在三有中	輪迴受衆苦
唯除正等覺	具德尊導師	一切諸天人	無能救護者
若佛菩薩等	不出於世間	無有一衆生	而能得安樂
如來等正覺	及諸賢聖衆	出現於世間	能與衆生樂
若見如來者	爲得大善利	聞佛名生信	則是世間塔
我等見世尊	爲得大利益	聞如是妙法	悉當成佛道
諸菩薩過去	以佛威神力	得清淨慧眼	了諸佛境界
今見盧舍那	重增清淨信	佛智無邊際	演說不可盡

勝慧等菩薩 及我堅固慧 無數億劫中 說亦不能盡

十一·爾時堅固慧說十行頌。歎佛大悲出興利益。已上十菩薩。各說十行頌。和會入位法。令身心諸計。皆無所依。離於偏執。住佛所住。

十住品第十五

將釋此品。約作五門分別。一釋品名目。二釋品來意。三明品之宗趣。四都會斷惑次第。五隨文釋義。一釋品名目。此品說十種住門。名爲十住品。二明品來意者。爲前品是偈讚勸修之門。此品明正舉修行十住之行。是故此品須來。十住者。生諸佛大智慧中住。入此位。永不退還故。名之爲住。三明品宗趣者。明此品說十種住二十種進修因果爲正宗。又住佛所住以爲正宗。明此十住位中。各有兩種因果。各各當住之中。初舉十法。是忻趣增上之緣。後舉十法。是當位之內修學之果。如文具明。四會當十住位中斷惑次第者。如初發心住。治地住。修行住。此三種住中。明總修出世間心。破諸世間煩惱纏縛。其世間煩惱。如善財所說頌。根本煩惱有十。隨煩惱總有六。其十種根本煩惱者。一欲。二色。三無

色。此是三界根本所縛處。四嬌慢。五諸趣。六愛。七愚癡。八貪。九恚。十心魔王。是爲十。又隨煩惱總有六者。一諂。二誑。三疑惑。四慳。五嫉。六嬌盈。善財頌曰。三有爲城郭。嬌慢爲垣牆。諸趣爲門戶。愛水爲池壑。愚癡爲闇覆。貪恚火熾然。魔王作君主。童蒙依止住。貪愛爲徽纆。諂誑爲轡勒。疑惑蔽其眼。趣入諸邪見。慳嫉嬌盈故。入於三惡道。此約內心所起。不約身見邊見見取戒取邪見。內心成智。諸見自是解脫。以此一乘教體。但約悟無明而成大智。用諸見而作自在。以此不論五見。如十信位文殊師利問法首菩薩有十一種煩惱。云何爲十一。一貪。二瞋。三愚癡。四慢。五覆。六忿。七恨。八嫉。九慳。十誑。十一諂。如般若經中五蘊十二緣等。如上煩惱。以十住中初發心住治地住修行住。此三住一時頓成根本智慧。即如善財於妙峰山上見德雲比丘。得諸佛智慧光明門。即除已上世間諸煩惱障。以成佛智慧光明故。如善財妙峰山上。信眼明淨。智光照耀。普觀境界。離一切障。此是初發心住。第二海門國見海雲比丘。除心境迷真。作十二緣生觀。令無障故。即見海中有佛出現。說普眼經。明見自他十二緣生。成大智海。是佛義故。心境總是經故。明前得佛智慧。觀十二緣生成大

智海。心境普周自在徧故。此是治地住。以十二緣生治令成如來智地故。第三海岸國見善住比丘。除心境不明淨障。得菩薩無礙解脫門。能見一切衆生根器業行。死此生彼。悉皆明見。此是修行住。於此三種住中。明得出纏心自在故。總以十信心。自信一切三界分別無明。是根本不動智佛。於初發心住中。以自在決定解力。信眼清淨。智光照耀。普觀境界。離一切障。契會悟入十住初心。以隨位進修中。安立五十箇佛果次第。法門方便。皆不動智以爲根本。已上初發心住治地住修行住。明得十住中出纏心勝。是故善財初二三善知識。皆是比丘。明離纏解脫。表此三住位中行相故。第四生貴住。明對治世間法則。及生死煩闌不自在障。令自在故。即如善財於市肆之上。見彌伽長者。說輪字經。即表生死市鄙。鬧處常寂。於一一字。猶如車輪。一多圓滿。互體相成。又如帝釋寶網。互爲緣起。映徹重重。一字之中。有無盡字句。爲世間名句文身。引諸未學以成教軌。即俗士彌伽以成其行。爲令得出世心後。須明世間靜亂緣起生死之性。萬法無生無滅。及世間名字義理。一切衆生語言。互相成就。如古者伏羲之類是也。第五具足方便住。對治眞俗身邊二見。令大智境界得自在。破不自在障故。如善財見解脫長

者。即入三昧。名普攝一切佛刹無邊陀羅尼。十方各現十佛刹微塵數佛國土海。清淨莊嚴。總在身中。即明一切衆生身。總含無邊佛刹。體相無礙。爲明真俗色相。皆如光影。互相容故。無中邊故。欲令六十二見。無邊諸見。性解脫故。第六正心住。對治智慧寂用不自在障。即如善財見海幢比丘。於經行地側。結跏趺坐。離出入息。無別思覺。於其身上。各隨身分。皆出化身。如雲廣覆。周徧十方。隨應所見。此明寂用無礙故。此已上總明世間出世間和會。皆解脫故。如是已後。四波羅蜜。入俗行悲。令自在故。第七不退住。對治大慈大悲同行攝生。不圓滿自在障。令圓滿故。即如善財於普莊嚴園。見休捨優婆夷。謂善財言。我有八萬四千那由他同行眷屬。常居此園。明大悲位中。行方便波羅蜜。同於八萬四千不可說一切衆生煩惱。總共同事。教化利益。經云。其餘衆生住此園者。亦皆普得不退轉位。明能行悲智行者。悉同此也。第八童眞住。對治處纏同事。世間餘習。智不清淨障。令清淨故。即如善財見毘目瞿沙仙人。表大智清潔無所染故。休捨優婆夷與仙人住處。同名俱是海潮處者。明此悲智一體無染而不汚。若隨悲修智。猶有習氣染境之心。即此第七第八兩位和會一終是也。若也隨智行慈。

無有染習。即師子幢王女。慈行童女是。可以思之。得見其意。第九法王子住。對治說法不自在障。令自在故。即如善財見勝熱婆羅門。以登刀山入於火聚行苦行時。隨天龍神人及非人來者。無不獲益而已。十灌頂住。對治悲智不自在清淨障。令得清淨。即如善財見師子幢王女慈行童女。王者。智自在故。女者。表隨悲同事。無染習故。明智滿從悲。處世間故。即同事而無習氣故。已上十種對治。皆一念心上。初發心時。一行之中。一時之內。無前後際。對治此十種障法。成一法一心一智慧。一行之中。十十無盡法門。皆以自心不動智佛爲體。以法事之中。合具此十種無盡法門。同別一多自在故。以此十種對治。一時令慣習自在故。不同三乘權教。約劣解衆生。存世間三世之性。說佛果在三僧祇之外。以自心根本無明分別之種。便成不動智佛。以法界體用。以爲信進悟入之門。從信及入位進修。乃至經十住十行十迴向十地十一地。總不離本不動智佛。不離一時一念一法一行上。而有無邊無量不可說不可說法界虛空界微塵數法門。何以故。爲從法界及根本不動智上。爲信進悟入故。法合如然故。如龍女剎那成佛。善財一生以取佛果。法界無性無生爲一生。非延促生故。爲法界體。無情量延促長短去來今

故。諸有信者。應如是知。如今成佛。與過去未來一切諸佛一時成佛。以法界智體無別時故。如一滴之水。入大海中。便同大海。無新舊水故。故去情方見。非識心知。如三乘中。十住菩薩。猶受三界分段生死。分學生空觀。對治闡提不信障。十行菩薩。分作法空觀。修自利利他行。對治聲聞自利障。十迴向菩薩。作法空觀。成起大悲願力。垂形六道。教化衆生。對治獨覺自度障。此明三乘中。三十心菩薩。對治地前三種障。但除正使。未除習氣。十地菩薩。斷其餘習。如初地菩薩。見自身真如佛性故。名見道位。從二地至七地。是修道位。猶有功用。而修其行。從八地至十地。名究竟位。不假功用。任運至佛果故。又如三乘中。十二住地。一種性住。十解行是。二解行住。十迴向是也。三歡喜住。初地是。四增上戒住。二地是。五增上慧住。三地是。六道品相應增上慧住。四地是。七諦相應增上慧住。五地是。八緣起相應增上慧住。六地是。九有行有開發無相住。七地是。十無行無開發無相住。八地是。十一無礙住。九地是。十二最上菩提住。十地是。又如三乘中。地前三賢菩薩得伏忍。十地與佛地得寂滅忍。又望勝鬘經。羅漢。辟支佛。淨土菩薩。總是伏忍。以空觀伏現行十使不起。爲不識無明住地。

煩惱故。猶不識。云何名斷煩惱。但伏現行不起。得三種意生身。受三界外變易生死。如是菩薩。爲行六波羅蜜。得六神通。福德神通。並勝人天。唯非修佛果法界門故。是門外三車草庵。仍聲聞辟支佛。三乘菩薩。不同其德。出三界行六神通。名則相似。行六波羅蜜。功德果報不同故。如是三乘六通菩薩等。於大方廣佛華嚴經。不聞不信。如此經云。設有菩薩。經無量那由他劫。修六波羅蜜得六神通。猶不聞此華嚴經典。猶名假名菩薩。不真菩薩。設復聞時。不信不入。如法華亦然。如三乘中。三種意生身者。初。一二三地。名三摩跋提樂法意生身。二。四五六地。名覺法自性意生身。三。七八九十地。名種類俱生無行作意生身。欲廣引云云。自有三乘教自明。約會對治如是。如此一乘教。都無如上三乘之趣。以爲根本無明住地煩惱。便爲一切諸佛不動智。一切衆生皆自有之。只爲智體無性無依。不能自了。會緣方了。云何爲會緣。會緣有三種。一會苦緣。遇苦方能發心。二會樂緣。久處人天。內心明慧。達世樂果。生死無常。方始求真。三見佛及一乘菩薩。而能發心。求佛種智。以會三緣。近正善知友。而能自覺無明。本是佛智。三乘同然。爲意樂淺深各別。以因本智上而生信心。約本智而爲悟入。

以不離本智故。於初發心住。即五位齊周。雖列十住十行十迴向十地十一地。行位法門。進修軌度。如王寶印。一印無差。以一心大智之印。印無始三世。總在一時。無邊諸法。智印咸徧。以智等諸佛故。以智等衆生心故。以智等諸法故。以智無中邊表裏三世長短近遠故。爲智過虛空量故。如世虛空。無所了知。如無分別智虛空一念。而能分別過虛空等法門。是故經言。一切虛空猶可量。諸佛說法不可量。以是義故。以自心根本無明體用。而見不動智。與一切諸佛。及以一切衆生。同一體性。同一境界。同一智海。以是發心之初。住佛種智家。故纔發心時。即於十方現身成佛。如初發心功德品自明。以是義故。於此十住位中。入初發心住者。住一切諸佛智慧大悲海境界中住。即五位通修。以初住及十地。不離一佛智慧境界故。但明生熟慣習勝劣。安立住地之名。爲智體之中。非三世情攝故。一如龍女。一剎那之際。已具三生。普賢行滿。佛果亦就。如文殊師利菩薩頌云。一念普觀無量劫。無去無來亦無住。如是了知三世事。超諸方便成十力。明知三乘三祇出世成佛。是權方便教。此教約實法。不說以願力成佛等事。設以願力成行。還以約實成佛。不說以願力暫成故。是故當知。從十住中初入位菩薩。

即五位通修。爲十住行相。通有十行十迴向十地等法門故。如十住中。七八兩住還修悲智。九住中是法師位。十住中悲智圓滿。如是五位行相相似故。如善財十住中善知識。一一智慧境界皆悉無極。但爲約法身大智大悲之上。法具無盡。須當安立五位行門。總是一心一智一時。智等徧滿。所行之道。是故起信進修行者。於大智境界。莫作三世近遠延促之見。違智境界故。失本大智之境。逐情識故。隨相轉故。此會第四斷惑次第竟。如此五位斷惑次第。如空無時。如圓鏡頓照。如摩尼寶。能同衆色。如一滴之水。入大海中。等同無二。以大智慧之圓鏡。普印諸作。莫不皆成無作用之大用故。無三世之一時故。

大方廣佛新華嚴經合論卷第三十二終

大方廣佛新華嚴經合論卷第三十三

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

十住品第十五之餘

第五隨文釋義者。長科爲六段。

爾時法慧菩薩。承佛威力。入菩薩無量方便三昧。以三昧力。十方各千佛剎微塵數世界之外。有千佛剎微塵數諸佛。皆同一號。名曰法慧。普現其前。告法慧菩薩言。善哉善哉。善男子。汝能入是菩薩無量方便三昧。善男子。十方各千佛剎微塵數諸佛。悉以神力共加於汝。又是毘盧遮那如來往昔願力威神之力。及汝所修善根力故。入此三昧。令汝說法。為增長佛智故。深入法界故。善了衆生界故。所入無礙故。所行無障故。得無等方便故。入一切智性故。覺一切法故。知一切根故。能持說一切法故。所謂發起諸菩薩十種住。善男子。汝當承佛威神之力。

而演此法。是時諸佛。即與法慧菩薩無礙智。無著智。無斷智。無礙智。無異智。無失智。無量智。無勝智。無懈智。無奪智。何以故。此三昧力。法如是故。是時諸佛。各伸右手。摩法慧菩薩頂。法慧菩薩。即從定起。告諸菩薩言。佛子。菩薩住處廣大。與法界虛空等。佛子。菩薩住二世諸佛家。彼菩薩住。我今當說。

第一從爾時法慧菩薩已下。至菩薩住我今當說。此一段。有十九行半經。明法慧菩薩入定。諸佛加持分。於中大意有十。一釋菩薩名。二明入三昧之意。三明三昧之力。四明十方佛來現其前。與法慧同號。五明十方佛與力共加。六明毘盧遮那如來往昔願力使然。七明法慧菩薩自善根力能入三昧。八明入定因緣。九明十方諸佛與十智。十明法慧出定演說十種住門。一釋菩薩名者。如十信位中菩薩。下名悉同。名之爲首。爲明信心。以信爲首。此十住位中。已生諸佛智慧家故。下名悉同。名之爲慧。爲明入聖法流中。得佛智慧。同佛知見。善簡正邪。契會正法。名之法慧。若也自己不能同諸佛智慧知見者。自邪未明。焉能簡邪見也。是故此位。能同一切諸佛知見故。得一切同名法慧佛而現其前。以爲印信。定其詮表也。以與十方諸佛智慧同故。二明入三昧之意者。如十信位中。且以生

滅心。信自心所有無始無明能分別心。便即信爲自心根本不動智佛。未有方便三昧。合其體用故。是故十信位中。十箇世界。皆名爲色。爲十信未入法性之流以生滅心而信解故。故十箇世界名之爲色。如此十住位中。以方便三昧無沈掉心。能現自體無生滅智慧故。是故一切修道者。初以聞解信入。次以無思契同。依本無作用之本智慧故。故須入三昧。以淨攀緣染習力故。無作真智。方明現故。以是義故。須入三昧。三者云正。昧者云定。總言正定。正定者。無沈掉也。無思所緣境也。亦無攝持伏滅心也。無忻無厭。任性無思。任理不作。智自明矣。是名方便。是名無量。以淨無量妄想故。不可以情量思度所知故。故名無量方便三昧。三者正也。昧之云定。明情識昧。正智自明。如色界無色界三昧。皆以息想慮而得之。聲聞緣覺三昧。修厭患觀而對治。樂觀空而滅悲智。以寂滅爲樂。權教菩薩。樂觀空而行六度。離苦本而生淨國。設有住此界者。言留惑而化衆生。皆非法爾合然。無出沒故。以此義故。此方便三昧者。爲一切衆生。迷法界體用。五欲情生。以不造作心。現本智故。便將根本定體。淨所妄情。名爲方便。非是別於眞外。別有假安立之定。名爲方便。譬如以水清寶。能清濁水。爲珠淨緣。

現本淨水。非是珠能作得淨水。方便三昧。亦復如是。爲以萬法無作本自淨緣。現得本自無作智慧力故。故名方便。但天人外道三乘。所有因果。皆有所作。以此所生。皆有處所。皆有果報。廣狹淨穢。差別等事。於此佛華嚴一乘法門。以無住無作任性法門。所有其生。任無依智。無依止心。智幻生身。稱眞法界。於一切衆生前。對現色身。然其體相無來去。然亦不作神通變化之事。雖然普現三世一切業果。在剎那之中。然亦不住三世遠近。及剎那之見。於此經所作三昧智慧。一切願行。總是任理智之運爲。非有作有修忻厭之法也。三明三昧之力者。其力有五。一定體淨欲徧周力。二定能顯智慧同佛力。三定能同佛身相名號現前。四定能契佛所知見。得諸佛共所加持力。五定能生在如來家爲眞佛子。住佛智慧力。一定體而能淨欲徧周力者。爲以此無作定體。而能淨諸欲安心身。同於虛空無表裏。徧周虛空法界故。二定能顯智慧同佛力者。爲無作用定。能現無作用自然慧故。爲一切衆生。皆具足如來自自然智慧。爲迷境情起。緣五欲心障故。以修無作定爲方便。佛智自然智便現故。三定能同佛身相名號現前力者。爲以無作定。顯得自法身智身。無作白淨無垢。與一切諸佛法身智慧合故。是故十方各

千佛刹微塵數諸佛。同名法慧。而現其前。以智慧契會。同佛知見故。是故皆佛號與自己同名。名爲法慧。云十方各千佛刹微塵爲數量者。爲明隨位進修。智慧徧周。昇降之數。十行之中。云萬佛刹微塵。十迴向位中。云百萬佛刹微塵。以彰智慧昇進。爲對迷時。即不可說刹塵煩惱。爲對悟時。即不可說刹塵佛國。及佛智慧也。四定能契佛所知見。得諸佛加持力者。諸佛加持有七。一同名號加持。令不疑故。二言讚加持。令人位者心安隱故。三毘盧遮那師弟加持。彰本願故。四神力加持。與本師會同本神力智慧故。五自善根力加持。以自修方便定。顯本智慧故。六得十方同號佛。皆與十種智力加持。以說法同諸如來。辯無礙故。七得十方同號諸佛手摩其頂加持。明至佛知見之頂。許可不謬故。有是七種加持也。五定能生在如來家。爲眞佛子。住佛智慧力者。爲以無作定體。顯本智慧。同諸如來解脫智慧故。

諸佛子。菩薩住有十種。過去未來現在諸佛。已說當說今說。何者爲十。所謂初發心住。治地住。修行住。生責任。具足方便住。正心住。不退住。童真住。法王子住。灌頂住。是名菩薩十住。去來現在諸佛所說。

第二從出定後。明正說十種住名目分。如文可見。

佛子。云何為菩薩發心住。此菩薩見佛世尊。形貌端嚴。色相圓滿。人所樂見。難可值遇。有大威力。或見神足。或聞記別。或聽教誡。或見衆生受諸劇苦。或聞如來廣大佛法。發菩提心。求一切智。

第三有十法。明正說發心之因分。即是見佛身色端嚴。或聞教誡等是。

此菩薩緣十種難得法而發於心。何者為十。所謂是處非處智。善惡業報智。諸根勝劣智。種種解差別智。種種界差別智。一切至處道智。諸禪解脫三昧智。宿命無礙智。天眼無礙智。三世漏盡智。是為十。佛子。此菩薩應勸學十法。何者為十。所謂勤供養佛。樂住生死。主導世間令除惡業。以勝妙法常行教誨。歎無上法。學佛功德。生諸佛前恆蒙攝受。方便演說寂靜三昧。讚歎遠離生死輪迴。為苦衆生作歸依處。何以故。欲令菩薩。於佛法中。心轉增廣。有所聞法。即自開解。不由他教故。佛子。云何為菩薩治地住。此菩薩於諸衆生發十種心。何者為十。所謂利益心。大悲心。安樂心。安住心。憐愍心。攝受心。守護心。回已心。師心。導師心。是為十。佛子。此菩薩應勸學十法。何者為十。所謂誦習多

聞。虛閑寂靜。近善知識。發言和悅。語必知時。心無怯怖。了達於義。如法修行。遠離愚迷。安住不動。何以故。欲令菩薩。於諸衆生。增長大悲。有所聞法。即自開解。不由他教故。佛子。云何為菩薩修行住。此菩薩以十種行觀一切法。何等為十。所謂觀一切法無常。一切法苦。一切法空。一切法無我。一切法無作。一切法無味。一切法不如名。一切法無處所。一切法離分別。一切法無堅實。是為十。佛子。此菩薩應勸學十法。何者為十。所謂觀察衆生界。法界。世界。觀察地界。水界。火界。風界。觀察欲界。色界。無色界。何以故。欲令菩薩智慧明了。有所聞法。即自開解。不由他教故。佛子。云何為菩薩生貴住。此菩薩從聖教中生。成就十法。何者為十。所謂永不退轉。於諸佛所深生淨信。善觀察法。了知衆生。國土。世界。業行。果報。生死。涅槃。是為十。佛子。此菩薩應勸學十法。何者為十。所謂了知過去。未來。現在。一切佛法。修集過去。未來。現在。一切佛法。圓滿過去。未來。現在。一切佛法。了知一切諸佛平等。何以故。欲令增進。於三世中。心得平等。有所聞法。即自開解。不由他教故。佛子。云何為菩薩具足方便住。此菩薩所修善根。皆為救護一切衆生。饒益一切衆生。

安樂一切衆生。哀愍一切衆生。度脫一切衆生。令一切衆生離諸災難。令一切衆生出生死苦。令一切衆生發生淨信。令一切衆生悉得調伏。令一切衆生。咸證涅槃。佛子。此菩薩應勸學十法。何者為十。所謂知衆生無邊。知衆生無量。知衆生無數。知衆生不思議。知衆生無量色。知衆生不可量。知衆生空。知衆生無所作。知衆生無所有。知衆生無自性。何以故。欲令其心。轉復增勝。無所染著。有所聞法。即自開解。不由他教故。佛子。云何為菩薩正心住。此菩薩聞十種法。心定不動。何者為十。所謂聞讚佛毀佛。於佛法中心定不動。聞讚法毀法。於佛法中心定不動。聞讚菩薩毀菩薩。於佛法中心定不動。聞讚菩薩毀菩薩所行法。於佛法中心定不動。聞說衆生有量無量。於佛法中心定不動。聞說衆生有垢無垢。於佛法中心定不動。聞說衆生易度難度。於佛法中心定不動。聞說法界有量無量。於佛法中心定不動。聞說法界有成有壞。於佛法中心定不動。聞說法界若有若無。於佛法中心定不動。是為十。佛子。此菩薩應勸學十法。何者為十。所謂一切法無相。一切法無體。一切法不可修。一切法無所有。一切法無真實。一切法空。一切法無性。一切法如幻。一切法如夢。一切法無分別。何以故。欲令其心轉復

增進。得不退轉無生法忍。有所聞法。即自開解。不由他教故。佛子。云何為菩薩不退住。此菩薩聞十種法。堅固不退。何者為十。所謂聞有佛無佛。於佛法中心不退轉。聞有法無法。於佛法中心不退轉。聞有菩薩無菩薩。於佛法中心不退轉。聞有菩薩行無菩薩行。於佛法中心不退轉。聞有菩薩修行出離修行不出離。於佛法中心不退轉。聞過去有佛過去無佛。於佛法中心不退轉。聞未來有佛未來無佛。於佛法中心不退轉。聞現在有佛現在無佛。於佛法中心不退轉。聞佛智有盡佛智無盡。於佛法中心不退轉。聞三世一相三世非一相。於佛法中心不退轉。是為十。佛子。此菩薩應勸學十種廣大法。何者為十。所謂說一即多。說多即一。文隨於義。義隨於文。非有即有。有即非有。無相即相。相即無相。無性即性。性即無性。何以故。欲令增進。於一切法。善能出離。有所聞法。即自開解。不由他教故。佛子。云何為菩薩童真住。此菩薩住十種業。何者為十。所謂身行無失。語行無失。意行無失。隨意受生。知衆生種種欲。知衆生種種解。知衆生種種界。知衆生種種業。知世界成壞。神足自在所行無礙。是為十。佛子。此菩薩應勸學十種法。何者為十。所謂知一切佛刹。動一切佛刹。持一切佛刹。觀一切

佛刹。詣一切佛刹。遊行無數世界。領受無數佛法。現變化自在身。出廣大徧滿音。一剎那中承事供養無數諸佛。何以故。欲令增進。於一切法。能得善巧。有所聞法。即自開解。不由他教故。佛子。云何為菩薩王子住。此菩薩善知十種法。何者為十。所謂善知諸衆生受生。善知諸煩惱現起。善知習氣相續。善知所行方便。善知無量法。善解諸威儀。善知世界差別。善知前際後際事。善知演說世諦。善知演說第一義諦。是為十。佛子。此菩薩應勸學十種法。何者為十。所謂法王處善巧。法王處軌度。法王處宮殿。法王處趣入。法王處觀察。法王灌頂。法王力持。法王無畏。法王宴寢。法王讚歎。何以故。欲令增進。心無障礙。有所聞法。即自開解。不由他教故。佛子。云何為菩薩灌頂住。此菩薩得成就十種智。何者為十。所謂震動無數世界。照耀無數世界。住持無數世界。往詣無數世界。嚴淨無數世界。開示無數衆生。觀察無數衆生。知無數衆生根。令無數衆生趣入。令無數衆生調伏。是為十。佛子。此菩薩身及身業。神通變現。過去智。未來智。現在智。成就佛土。心境界。智境界。皆不可知。乃至法王子菩薩。亦不能知。佛子。此菩薩應勸學諸佛十種智。何者為十。所謂二世智。佛法智。法界無礙智。

法界無邊智。充滿一切世界智。普照一切世界智。住持一切世界智。知一切衆生智。知一切法智。知無邊諸佛智。何以故。欲令增長一切種智。有所聞法。即自開解。不由他教故。

第四有十法。明初發心住所緣如來十種勝智。并取此位十法。至下十住之終。總有二百箇法門。共成十住之位。一一住內。皆有二十箇法門。十法以成當位之門。十法以爲昇進之行。經文自具。不煩更釋。約知分劑。以行行之。

爾時佛神力故。十方各一萬佛刹微塵數世界。六種震動。所謂動。徧動。等徧動。起。徧起。等徧起。踊。徧踊。等徧踊。震。徧震。等徧震。吼。徧吼。等徧吼。擊。徧擊。等徧擊。雨天妙華。天末香。天華鬘。天雜香。天寶衣。天寶雲。天莊嚴具。天諸音樂不鼓自鳴。放天光明。及妙音聲。如此四天下須彌山頂帝釋殿上。說十住法。現諸神變。十方所有一切世界。悉亦如是。又以佛神力故。十方各過一萬佛刹微塵數世界。有十佛刹微塵數菩薩。來詣於此。充滿十方。作如是言。善哉善哉。佛子。善說此法。我等諸人。同名法慧。所從來國。同名法雲。彼土如來。皆名妙法。我等佛所。亦說十住。衆會眷屬。文句義理。悉亦如是。

無有增減。佛子。我等承佛神力。來入此會。為汝作證。如於此會。十方所有一切世界。悉亦如是。爾時法慧菩薩。承佛威力。觀察十方。暨於法界。而說頌曰。

第五·明說教威感大地震動。從此段中。科為六段。一明大地六種十八相動。二明天雨十種供養。三明總結十方同說。四明十方威感遠近。五明十方同號菩薩咸來作證。六明十方佛果名妙法。此明從妙慧而說此法。

見最勝智微妙身

相好端嚴皆具足

如是尊重甚難遇

菩薩勇猛初發心

見無等比大神通

聞說記心及教誠

諸趣衆生無量苦

菩薩以此初發心

聞諸如來普勝尊

一切功德皆成就

譬如虛空不分別

菩薩以此初發心

三世因果名為處

我等自性為非處

欲悉了知真實義

菩薩以此初發心

過去未來現在世

所有一切善惡業

欲悉了知無不盡

菩薩以此初發心

諸禪解脫及三昧

雜染清淨無量種

欲悉了知入住出

菩薩以此初發心

隨諸衆生根利鈍

如是種種精進力

欲悉了達分別知

菩薩以此初發心

一切衆生種種解

心所好樂各差別

如是無量欲悉知

菩薩以此初發心

衆生諸界各差別

一切世間無有量

欲悉了知其體性

菩薩以此初發心

一切有爲諸行道	一一皆有所至處	悉欲了其真實性	菩薩以此初發心
一切世界諸衆生	隨業漂流無暫息	欲得天眼皆明見	菩薩以此初發心
過去世中曾所有	如是體性如是相	欲悉了其宿住	菩薩以此初發心
一切衆生諸結惑	相續現起及習氣	欲悉了知究竟盡	菩薩以此初發心
隨諸衆生所安立	種種談論語言道	如其世諦悉欲知	菩薩以此初發心
一切諸法離言說	性空寂滅無所作	欲悉明達此真義	菩薩以此初發心
欲悉震動十方國	傾覆一切諸大海	具足諸佛大神通	菩薩以此初發心
欲一毛孔放光明	普照十方無量土	一一光中覺一切	菩薩以此初發心
欲以難思諸佛刹	悉置掌中而不動	了知一切如幻化	菩薩以此初發心
欲以無量刹衆生	置一毛端不迫隘	悉知無人無有我	菩薩以此初發心
欲以一毛滴海水	一切大海悉令竭	而悉分別知其數	菩薩以此初發心
不可思議諸國土	盡抹爲塵無遺者	欲悉分別知其數	菩薩以此初發心
過去未來無量劫	一切世間成壞相	欲悉了達窮其際	菩薩以此初發心
三世所有諸如來	一切獨覺及聲聞	欲知其法盡無餘	菩薩以此初發心

無量無邊諸世界

欲以一毛悉稱舉

如其體相悉了知

菩薩以此初發心

無量無數輪圍山

欲令悉入毛孔中

如其大小皆得知

菩薩以此初發心

欲以寂靜一妙音

普應十方隨類演

如是皆令淨明了

菩薩以此初發心

一切衆生語言法

一言演說無不盡

悉欲了知其自性

菩薩以此初發心

世間言音靡不作

悉令其解證寂滅

欲得如是妙舌根

菩薩以此初發心

欲使十方諸世界

有成壞相皆得見

而悉知從分別生

菩薩以此初發心

一切十方諸世界

無量如來悉充滿

欲悉了知彼佛法

菩薩以此初發心

種種變化無量身

一切世界微塵等

欲悉了達從心起

菩薩以此初發心

過去未來現在世

無量無數諸如來

欲於一念悉了知

菩薩以此初發心

欲具演說一句法

阿僧祇劫無有盡

而令文義各不同

菩薩以此初發心

十方一切諸衆生

隨其流轉生滅相

欲於一念皆明達

菩薩以此初發心

欲以身語及意業

普詣十方無所礙

了知三世皆空寂

菩薩以此初發心

菩薩如是發心已

應令往詣十方國

恭敬供養諸如來

以此使其無退轉

菩薩勇猛求佛道

住於生死不疲厭

爲彼稱歎使順行

如是令其無退轉

十方世界無量刹	悉在其中作尊主	爲諸菩薩如是說	以此令其不退轉
最勝最上最第一	甚深微妙清淨法	勸諸菩薩說與人	如是教令離煩惱
一切世間無與等	不可傾動摧伏處	爲彼菩薩常稱讚	如是教令不退轉
佛是世間大力主	具足一切諸功德	令諸菩薩住是中	以此教爲勝丈夫
無量無邊諸佛所	悉得往詣而親近	常爲諸佛所攝受	如是教令不退轉
所有寂靜諸三昧	悉皆演暢無有餘	爲彼菩薩如是說	以此令其不退轉
摧滅諸有生死輪	轉於清淨妙法輪	一切世間無所著	爲諸菩薩如是說
一切衆生墮惡道	無量重苦所纏迫	與作救護歸依處	爲諸菩薩如是說
此是菩薩發心住	一向志求無上道	如我所說教誨法	一切諸佛亦如是
第二治地住菩薩	應當發起如是心	十方一切諸衆生	願使悉順如來教
利益大悲安樂心	安住憐愍攝受心	守護衆生同己心	師心及以導師心
已住如是勝妙心	次令誦習求多聞	常樂寂靜正思惟	親近一切善知識
發言和悅離麤獷	言必知時無所畏	了達於義如法行	遠離愚迷心不動
此是初學菩提行	能行此行眞佛子	我今說彼所應行	如是佛子應勤學

第三菩薩修行住

當依佛教勤觀察

諸法無常苦及空

無有我人無動作

一切諸法不可樂

無如名字無處所

無所分別無真實

如是觀者名菩薩

次令觀察衆生界

及以勸觀於法界

世界差別盡無餘

於彼咸應勸觀察

十方世界及虛空

所有地水與火風

欲界色界無色界

悉勸觀察咸令盡

觀察彼界各差別

及其體性咸究竟

得如是教勤修行

此則名爲眞佛子

第四生貴住菩薩

從諸聖教而出生

了達諸有無所有

超過彼法生法界

信佛堅固不可壞

觀法寂滅心安住

隨諸衆生悉了知

體性虛妄無眞實

世間刹土業及報

生死涅槃悉如是

佛子於法如是觀

從佛親生名佛子

過去未來現在世

其中所有諸佛法

了知積集及圓滿

如是修學令究竟

三世一切諸如來

能隨觀察悉平等

種種差別不可得

如是觀者達三世

如我稱揚讚歎者

此是四住諸功德

若能依法勤修行

速成無上佛菩提

從此第五諸菩薩

說名具足方便住

深入無量巧方便

發生究竟功德業

菩薩所修衆福德

皆爲救護諸群生

專心利益與安樂

一向哀愍令度脫

爲一切世除衆難

引出諸有令歡喜

一一調伏無所遺

皆令具德向涅槃

一切衆生無有邊

無量無數不思議

及以不可稱量等

聽受如來如是法

此第五住眞佛子

成就方便度衆生

一切功德大智尊

以如是法而開示

第六正心圓滿住

於法自性無迷惑

正念思惟離分別

一切天人莫能動

聞讚毀佛與佛法

菩薩及以所行行

衆生有量若無量

有垢無垢難易度

法界大小及成壞

若有若無心不動

過去未來今現在

諦念思惟恆決定

一切諸法皆無相

無體無性空無實

如幻如夢離分別

常樂聽聞如是義

第七不退轉菩薩

於佛及法菩薩行

若有若無出不出

雖聞是說無退動

過去未來現在世

一切諸佛有以無

佛智有盡或無盡

三世一相種種相

一即是多多即一

文隨於義義隨文

如是一切展轉成

此不退人應爲說

若法有相及無相

若法有性及無性

種種差別互相屬

此人聞已得究竟

第八菩薩童眞住

身語意行皆具足

一切清淨無諸失

隨意受生得自在

知諸衆生心所樂

種種意解各差別

及其所有一切法

十方國土成壞相

逮得速疾妙神通

一切處中隨念往

於諸佛所聽聞法

讚歎修行無懈倦

了知一切諸佛國

震動加持亦觀察

超過佛土不可量

遊行世界無邊數

阿僧祇法悉諮問

所欲受身皆自在

言音善巧靡不充

諸佛無數咸承事

第九菩薩王子住

能見衆生受生別

煩惱現習靡不知

所行方便皆善了

諸法各異威儀別

世界不同前後際

如其世俗第一義

悉善了知無有餘

法王善巧安立處

隨其處所所有法

法王宮殿若趣入

及以於中所觀見

法王所有灌頂法

神力加持無怯畏

宴寢宮室及歎譽

以此教詔法王子

如是爲說靡不盡

而令其心無所著

於此了知修正念

一切諸佛現其前

第十灌頂眞佛子

成滿最上第一法

十方無數諸世界

悉能震動光普照

住持往詣亦無餘

清淨莊嚴皆具足

開示衆生無有數

觀察知根悉能盡

發心調伏亦無邊

咸令趣向大菩提

一切法界咸觀察

十方國土皆往詣

其中身及身所作

神通變現難可測

三世佛土諸境界

乃至王子無能了

一切見者三世智

於諸佛法明了智

法界無礙無邊智

充滿一切世界智

照耀世界住持智

了知衆生諸法智

及知正覺無邊智

如來爲說咸令盡

如是十住諸菩薩

能從如來法化生

隨其所有功德行

一切天人莫能測

過去未來現在世

發心求佛無有邊

十方國土皆充滿

莫不當成一切智

一切國土無邊際	世界衆生法亦然	惑業心樂各差別	依彼而發菩提意
始求佛道一念心	世間衆生及二乘	斯等尙亦不能知	何況所餘功德行
十方所有諸世界	能以一毛悉稱舉	彼人能知此佛子	趣向如來智慧行
十方所有諸大海	悉以毛端滴令盡	彼人能知此佛子	一念所修功德行
一切世界抹爲塵	悉能分別知其數	如是之人乃能見	此諸菩薩所行道
去來現在十方佛	一切獨覺及聲聞	悉以種種妙辯才	開示初發菩提心
發心功德不可量	充滿一切衆生界	衆智共說無能盡	何況所餘諸妙行

第六·明法慧承威說頌歎法分。於此段中。總有二百行頌。以歎十住位中二百箇法門。文自具足。不煩釋也。如灌頂住者。如將淨水從頂而灌。徧身而下。如此位菩薩。以法界智無中邊體。等虛空界。以對現一切衆生宜應現身。一時等雨法雨。無不灌注故。故名灌頂住。亦爲登此位時。十方諸佛。手灌其頂。亦名灌頂住。

大方廣佛新華嚴經合論卷第三十三終

大方廣佛新華嚴經合論卷第三十四

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

梵行品第十六

將釋此品。約作三門分別。一釋品名目。二釋品來意。三隨文釋義。第一釋品名目者。何故云梵行品。梵者。此云淨也。云以其淨行利衆生故。常居世間。行一切行法。化利衆生。無行可得。則無行不淨。是故名爲梵行也。又約能問之主。名曰正念。無念之念。名爲正念。隨行無念。名爲正念。行念總無。以斯益物。名第一義天。以天有慈。名爲天子。又約能說之人。名爲法慧。隨行無念。名之爲法。以法簡情。名之爲慧。起情乖理。名無法慧。達理情亡。名爲法慧。今約能問之主。所說法人。及所說法。總名淨行品。品者均分理教義。第二釋品來意者。前品明住佛無所住之門。故還行無行之行。是故此品須來。無住之住。

名爲佛住。無行之行。利益無衆生之衆生。名爲淨行。是故此品須來。第三隨文釋義者。科此一品經。約作七門分別。

爾時正念天子。白法慧菩薩言。佛子。一切世界諸菩薩衆。依如來教。染衣出家。云何而得梵行清淨。從菩薩位。逮於無上菩提之道。

第一爾時已下三行經。是正念天子所請分。

法慧菩薩言。佛子。菩薩摩訶薩修梵行時。應以十法而爲所緣。作意觀察。所謂身。身業。語。語業。意。意業。佛。法。僧。戒。

第二法慧菩薩已下。至佛法僧戒。可兩行半經。正舉十法以爲所觀之緣分。應如是觀。爲身是梵行耶。乃至戒是梵行耶。若身是梵行者。當知梵行則爲非善。則爲非法。則爲渾濁。則爲臭惡。則爲不淨。則爲可厭。則爲違逆。則爲雜染。則爲死屍。則爲蟲聚。若身業是梵行者。梵行則是行住坐臥。左右顧視。屈伸俯仰。若語是梵行者。梵行則是音聲風息。唇舌喉吻。吐納抑縱。高低清濁。若語業是梵行者。梵行則是起居問訊。略說廣說。喻說直說。讚說毀說。安立說。隨俗說。顯了說。若意是梵行者。梵行則應是覺是觀。是分別。是種種分別。是憶

念。是種種憶念。是思惟。是種種思惟。是幻術。是眠夢。若意業是梵行者。當知梵行則是思想寒熱飢渴苦樂憂喜。若佛是梵行者。為色是佛耶。受是佛耶。想是佛耶。行是佛耶。識是佛耶。為相是佛耶。好是佛耶。神通是佛耶。業行是佛耶。果報是佛耶。若法是梵行者。為寂滅是法耶。涅槃是法耶。不生是法耶。不起是法耶。不可說是法耶。無分別是法耶。無所行是法耶。不合集是法耶。不隨順是法耶。無所得是法耶。若僧是梵行者。為預流向是僧耶。預流果是僧耶。一來向是僧耶。一來果是僧耶。不還向是僧耶。不還果是僧耶。阿羅漢向是僧耶。阿羅漢果是僧耶。三明是僧耶。六通是僧耶。若戒是梵行者。為壇場是戒耶。問清淨是戒耶。教威儀是戒耶。三說羯磨是戒耶。和尚是戒耶。阿闍梨是戒耶。剃髮是戒耶。著袈裟衣是戒耶。乞食是戒耶。正命是戒耶。如是觀已。

第三應如是觀已下。至如是觀已。有二十六行半經。是正行觀法分。

於身無所取。於修無所著。於法無所住。過去已滅。未來未至。現在空寂。無作業者。無受報者。此世不移動。彼世不改變。此中何法名為梵行。梵行從何處來。誰之所有。體為是誰。由誰而作。為是有。為是無。為是色。為非色。為是受。

為非受。為是想。為非想。為是行。為非行。為是識。為非識。如是觀察。梵行法不可得故。三世法皆空寂故。意無取著故。心無障礙故。所行無二故。方便自在故。受無相法故。觀無相法故。知佛法平等故。具一切佛法故。如是名為清淨梵行。

第四從於身無所取已下。至名為清淨梵行。於中可有十行經。通觀三世。及身受想行識。佛法悉平等。具足一切佛法分。

復應修習十種法。何者為十。所謂處非處智。過現未來業報智。諸禪解脫三昧智。諸根勝劣智。種種解智。種種界智。一切至處道智。天眼無礙智。宿命無礙智。永斷習氣智。

第五復應修習十種法已下。至永斷習氣智。於中可三行半經。正舉如來十種智力。令修習分。

於如來十力。一一觀察。一一力中。有無量義。悉應諮問。聞已。應起大慈悲心。觀察衆生。而不捨離。思惟諸法。無有休息。行無上業。不求果報。

第六於如來十力已下。至不求果報。於中可三行經。勸修十力。有迷諮問。

并起大悲分。

了知境界。如幻如夢如影如響。亦如變化。若諸菩薩。能與如是觀行相應。於諸法中。不生二解。一切佛法。疾得現前。初發心時。即得阿耨多羅三藐三菩提。知一切法。即心自性。成就慧身。不由他悟。

第七了知境界已下。可四行半經。明了法如幻。觀終獲益成佛分。如是依如上觀行。令身口意業。佛法僧戒。色受想行識。身邊二見。三世遠近總無。又無能觀所觀心。不沈不掉。不生不滅。任理無思。如來十種智力。因斯而現。夫佛智非深。只爲迷心逐相。情虧也智隱。一體也智現非遙。智現執障都亡。十方廓然自在。處塵不爲小。周空不爲大。窮其跡也。十方無纖毫之蹤。興其用。則不出剎那之際。身行徧周。等虛空而無盡。若存其有。即一切剎海現色像重重。若置其無。萬境不可窺其體。以不思不惟而知衆法。將不造不作而辦大功。非生死變其志。非苦樂移其性。若非神之稱理者。不可以情想知。不可以滅心得。以此如來設淨行之教。觀法盡也。始正法當興。諸見亡也。佛智方起。是知見亡智應。名初發心時便成正覺。具足慧身不由他悟。是故後學之士。應法修行。不可以逐

境沈淪。迷流永劫。更欲解其上義。慮將言豐障理。以亂後學之心。但如上所說之經。多少自然恰中。如一百四十願名淨行者。是十信位中。以願成世間知見萬法。以爲淨行。此十住位中。以行體無爲無性。名爲淨行。以此淨行。用成智用自在。此淨行品。成十住中初發心之佛果。亦爲已後十行十迴向十地等作佛果故。從此無性之行。行清淨故。一切諸行皆清淨故。諸行淨。則智慧淨。智慧淨。則其心淨。其心淨。則諸法淨。諸法淨。名法界淨。法界淨。即衆生淨。衆生淨。則佛國土淨。行此法平等者。名爲淨行也。

初發心功德品第十七

夫以初發心之士。功德難量。舉等虛空。無以比其類。磨盡剎塵。無以酬其匹。虛空但明無相之大。一切剎塵但明形礙之廣。焉能對其菩提心福智之境。其智也。於剎那之際。滿十方現身如雲。狀因陀羅網。妙像相入。光影重重。各各以一言音。普周法界。說等衆生教門。如雨灑衆生心。得清涼樂。爾其福也。妙相莊嚴。與華藏而同其體。爲初發心之際。與十方諸佛。等住無盡劫海。在剎那

之中。延促相似。如一小流。入大海中。與大海等。以水體不別故。如初發心菩薩。纔入諸佛大智慧流中。等佛功德故。爲初入與究竟。時無延促。又智慧一故。爲誓度衆生。悉令成佛。志願等故。又如十方世界。盡抹爲塵。一一塵中。有無量佛刹。無量衆生。如菩提心大智慧身。於一剎那際。等一切剎塵。供養諸佛。教化衆生。一時等徧。但以智慧力故。法如是故。智徧周故。亦不作神通變化之想。初發心菩薩。志樂廣大。與佛界衆生界。等無限量故。故今此品所歎初發菩提心。以十種功德廣大難量。無比不可喻。於此佛果根本不動大智。不思議法界乘。而發心者。如輪王太子。初生之時。具足王相。如師子王之子。威勢與父相似。體不異故。如初發菩提心菩薩。初生如來智慧種性家時。智慧所知。不異佛故。三世時劫。無延促見。不異佛故。志樂廣大。教化衆生。不異佛故。從初發心。乘如來一切智乘。不出剎那際成等正覺教化衆生。不異佛故。設於三乘順世情教。說三祇劫而成佛者。畢竟迴心入此一切智境界乘。方得成佛。如法華經。即是所迴三乘。入一切智境界之教。如龍女一剎那際。一生成佛者是也。一切衆生。總須悟如此法。方得成佛。不可取如來三乘中。順世方便之言。以法如是故。

如此品下文云。初發心菩薩。纔發心時。即爲十方一切諸佛所共稱歎。即能說法。教化調伏一切世界所有衆生。乃至示現成佛等。廣如此品下文所說。此品之內。長行總有四十段經意也。頌有二百四十二行。以歎初發心菩薩之功德。其文如下。將釋此品。約作三門分別。一釋品名目。二釋品來意。三隨文釋義。第一釋品名目者。此品名初發心功德品者。創始發心。見無古今。名之爲初。無心智應。名之爲發。身邊見盡。名之爲心。不爲而成大果。名之爲功。但化利一切。不忻來報。自獲無邊妙相莊嚴故。名之爲德。又福智徧周。名之爲功。事無不達。名之爲德。品者均分教義。第二釋品來意者。前品既有淨行之功。此品所明淨行之中無邊功德。是故此品須來。第三隨文釋義者。復分二門。第一長科經意。第二隨文解說。第一長科經意者。從初爾時已下。至品末已來。長科爲四十段。爾時天帝釋。白法慧菩薩言。佛子。菩薩初發菩提之心。所得功德。其量幾何。一、爾時已下。至其量幾何。有一行半經。是天帝請說發心功德分。法慧菩薩言。此義甚深。難說。難知。難分別。難信解。難證。難行。難通達。難思惟。難度量。難趣入。雖然。我當承佛威神之力。而為汝說。

二·法慧菩薩言已下。至而爲汝說。可三行半經。明初發心功德甚深。十種難知。許說分。

佛子。假使有人。以一切樂具。供養東方阿僧祇世界所有衆生。經於一劫。然後教令淨持五戒。南西北方。四維上下。亦復如是。佛子。於汝意云何。此人功德。寧爲多不。天帝言。佛子。此人功德。唯佛能知。其餘一切。無能量者。

三·佛子已下。至無能量者。可五行經。明一人所供十方各一阿僧祇世界衆生。并令淨持五戒。且舉功德廣大難量分。

法慧菩薩言。佛子。此人功德。比菩薩初發心功德。百分不及一。千分不及一。百千分不及一。如是億分。百億分。千億分。百千億分。那由他億分。百那由他億分。千那由他億分。百千那由他億分。數分。歌羅分。算分。喻分。優波尼沙陀分。亦不及一。

四·法慧菩薩已下。至亦不及一。有五行半經。明將前所有廣多供養功德。不可比對初發心功德。無比近喻分。正明將人所供養。不可校量。如歌羅分者。是將多比少。不如喻如折人身上毛作百分。將前人所作功德。不如初發心菩薩百

分毛中一分毛許功德。又云。優波尼沙陀分者。謂少許相近。類之無限善根。不可將有限比對。餘如文自明。

佛子。且置此喻。假使有人。以一切樂具。供養十方十阿僧祇世界所有衆生。經於百劫。然後教令修十善道。如是供養經於千劫。教住四禪。經於百千劫。教住四無量心。經於億劫。教住四無色定。經於百億劫。教住須陀洹果。經於千億劫。教住斯陀含果。經於百千億劫。教住阿那含果。經於那由他億劫。教住阿羅漢果。經於百千那由他億劫。教住辟支佛道。佛子。於意云何。是人功德。寧為多不。天帝言。佛子。此人功德。唯佛能知。

五·佛子已下。至唯佛能知。有十行經。明且舉如上功德廣大分。云教住十善道者。身三。口四。意三。是欲界生天善。上者出世善。云四禪。色界業也。初禪滅憂。二禪滅苦。三禪滅喜。四禪唯寂靜。云教住四無量心。此是有為中慈悲喜捨。云教住四無色定。此是無色界定。已上是三界中善業。云教住須陀洹果。謂初斷見惑。捨異生性。初獲聖性。入聖行流故。故名入流。云教住斯陀含果。此云一來。謂此聖者。雖斷欲界六品惑。然為有餘三品未斷。令此聖者一度來欲

界生故。名一來果。云教住阿那含果。此云不還。謂斷欲界九品惑盡。從此生色界。更不來欲界受生。故名不來。此十使中。見道疑未能明了。不入羅漢果。如十使煩惱。一身見。二邊見。三見取。四戒取。五邪見。已前五爲利使。已後五鈍使。見諦斷。六貪。七瞋。八癡。九慢。十疑。此五鈍使。能迷隨行之事。此之十使。前五利使。須陀洹見諦之後。伏之不起。後五鈍使。薄貪瞋癡。斯陀含斷欲界六種惑。非無色界貪。於瞋癡慢三種。微而且薄。現行不生。非種無故。爲上二界報且無瞋。爲修定伏而現行不起。爲須斯二果。有厭患而不令增長。常求出世之心。以此不成三界沈淪種子。阿那含厭令永息。唯有見道疑。以見道不分明。不能頓超三界業果。阿羅漢爲見道無疑。三界業果。一時盡故。望前三果。設斷九種煩惱。唯有疑在。不得名爲斷煩惱。爲見諦無明未明。總名厭伏。不得名斷。又羅漢辟支佛。但忻出世。淨土菩薩及空觀菩薩。爲但忻出世行六波羅蜜。總是折伏現行無明。不得名爲永斷煩惱。爲且以空觀折伏無明。不了無明從本已來是不動智佛。爲不了根本。以空折伏。使令不起。乃至十地。但得意生身等。不名如來一切種智生。以作十真如等觀。斷十種麤重。不了無明本是如來根本智

故。大用恆寂故。一乘佛果教中。依佛果發心。初發心時。達根本無明。是根本無分別智。成差別智大用法門。初心之上。圓滿一切諸佛共所乘門。名乘一切智乘。若智悲願行。毫釐不似佛。信心亦不成。何況住佛所住。生在如來一切種智家生。爲佛眞子。具諸佛事。以智不異。願行平等大悲不異。無限境界不異。過去未來劫差別與一念不異。應如是定慧照之可見。此是名依佛菩薩正善知識。依根本智發心。如下文纔發心菩薩。能十方示身成佛者。爲初發心時。乘如來不思議一切智乘。得佛種智。生如來法界之家。乘佛一分之智慧大慈悲勢分。即能如是示身成佛。如下頌云。菩薩於佛十力中。雖未證得亦無疑。菩薩於一毛孔中。普現十方無量刹。如是總明初發心菩薩之德。爲得如來一分智力。勢分如是。如輪王太子權統王政。亦得自在一分。與父王相似。

法慧菩薩言。佛子。此人功德。比菩薩初發心功德。百分不及一。千分不及一。百千分不及一。乃至優波尼沙陀分亦不及一。

六·法慧菩薩言已下。至亦不及一。可兩行半經。明前功德不可比對初發心功德喻分。

何以故。佛子。一切諸佛初發心時。不但為以一切樂具。供養十方十阿僧祇世界所有衆生。經於百劫乃至百千那由他億劫故。發菩提心。不但為教爾所衆生。令修五戒十善業道。教住四禪四無量心四無色定。教得須陀洹果斯陀含果。阿那含果阿羅漢果辟支佛道故。發菩提心。為令如來種性不斷故。為充徧一切世界故。為度脫一切世界衆生故。為悉知一切世界成壞故。為悉知一切世界中衆生垢淨故。為悉知一切世界自性清淨故。為悉知一切衆生心樂煩惱習氣故。為悉知一切衆生死此生彼故。為悉知一切衆生諸根方便故。為悉知一切衆生心行故。為悉知一切衆生三世智故。為悉知一切佛境界平等故。發於無上菩提之心。

七·何以故已下。至無上菩提之心。有十四行半經。明初發心菩薩。為起無限心。教化一切衆生。不斷佛種性分。

佛子。復置此喻。假使有人。於一念頃。能過東方阿僧祇世界。念念如是。盡阿僧祇劫。此諸世界。無有能得知其邊際。有第二人。於一念頃。能過前人阿僧祇劫所過世界。如是亦盡阿僧祇劫。次第展轉乃至第十。南西北方。四維上下。亦復如是。佛子。此十方中。凡有百人。一一如是過諸世界。是諸世界可知邊際。

八·佛子復置此喻已下。至可知邊際。有七行經。明且舉速行邊際廣大可知喻分。

菩薩初發阿耨多羅三藐三菩提心所有善根。無有能得知其際者。何以故。佛子。菩薩不齊限。但為往爾所世界得了知故。發菩提心。為了知十方世界故。發菩提心。所謂欲了知妙世界即是麤世界。麤世界即是妙世界。仰世界即是覆世界。覆世界即是仰世界。小世界即是大世界。大世界即是小世界。廣世界即是狹世界。狹世界即是廣世界。一世界即是不可說世界。不可說世界即是一世界。不可說世界入一世界。一世界入不可說世界。穢世界即是淨世界。淨世界即是穢世界。欲知一毛端中一切世界差別性。一切世界中一毛端一體性。欲知一世界中出生一切世界。欲知一切世界無體性。欲以一念心盡知一切廣大世界而無障礙故。發阿耨多羅三藐三菩提心。

九·菩薩初發心已下。至三藐三菩提心。可十五行經。明初發心菩薩所知世界。境界無限難知分。

佛子。復置此喻。假使有人。於一念頃。能知東方阿僧祇世界成壞劫數。念念如

是。盡阿僧祇劫。此諸劫數。無有能得知其邊際。有第一人。於一念頃。能知前人阿僧祇劫所知劫數。如是廣說乃至第十。南西北方。四維上下。亦復如是。佛子。此十方阿僧祇世界成壞劫數可知邊際。

十。佛子復置此喻已下。至可知邊際。可六行半經。明且舉速知劫數成壞廣多可知分。

菩薩初發阿耨多羅三藐三菩提心功德善根。無有能得知其際者。何以故。菩薩不齊限。但為知爾所世界成壞劫數故。發阿耨多羅三藐三菩提心。為悉知一切世界成壞劫盡無餘故。發阿耨多羅三藐三菩提心。所謂知長劫與短劫平等。短劫與長劫平等。一劫與無數劫平等。無數劫與一劫平等。有佛劫與無佛劫平等。無佛劫與有佛劫平等。一佛劫中有不可說佛。不可說佛劫中有一佛。有量劫與無量劫平等。無量劫與有量劫平等。有盡劫與無盡劫平等。無盡劫與有盡劫平等。不可說劫與一念平等。一念與不可說劫平等。一切劫入非劫。非劫入一切劫。欲於一念中盡知前際後際及現在一切世界成壞劫故。發阿耨多羅三藐三菩提心。是名初發心大誓莊嚴。了知一切劫神通智。

十一·菩薩初發心已下。至了知一切劫神通智。可十六行經。明初發心菩薩了劫成壞難知分。

佛子。復置此喻。假使有人。於一念頃。能知東方阿僧祇世界所有衆生種種差別解。念念如是。盡阿僧祇劫。有第二人。於一念頃。能知前人阿僧祇劫所知衆生諸解差別。如是亦盡阿僧祇劫。次第展轉乃至第十。南西北方。四維上下。亦復如是。佛子。此十方衆生種種差別解可知邊際。

十二·復置此喻已下。至可知邊際。可六行經。明且舉所解廣大猶可能知分。菩薩初發阿耨多羅三藐三菩提心功德善根。無有能得知其際者。何以故。佛子。菩薩不齊限。但為知爾所衆生解故。發阿耨多羅三藐三菩提心。為盡知一切世界所有衆生種種差別解故。發阿耨多羅三藐三菩提心。所謂欲知一切差別解無邊故。一衆生解無數衆生解平等故。欲得不可說差別解方便智光明故。欲悉知衆生海各各差別解盡無餘故。欲悉知過現未來善不善種種無量解故。欲悉知相似解不相似解故。欲悉知一切解即是一解。一解即是一切解故。欲得如來解力故。欲悉知有上解無上解。有餘解無餘解。等解不等解差別故。欲悉知有依解無依解。共

解不共解。有邊解無邊解。差別解無差別解。善解不善解。世間解出世間解差別故。欲於一切妙解大解無量解正位解中。得如來解脫無障礙智故。欲以無量方便。悉知十方一切衆生界。一一衆生淨解染解廣解略解細解麤解。盡無餘故。欲悉知深密解。方便解。分別解。自然解。隨因所起解。隨緣所起解。一切解網悉無餘故。發阿耨多羅三藐三菩提心。

十三·菩薩初發心已下。至三藐三菩提心。可二十行半經。明初發心菩薩知解廣大難知分。

佛子。復置此喻。假使有人。於一念頃。能知東方無數世界一切衆生諸根差別。念念如是。經阿僧祇劫。有第二人。於一念頃。能知前人阿僧祇劫念念所知諸根差別。如是廣說乃至第十。南西北方。四維上下。亦復如是。佛子。此十方世界所有衆生諸根差別可知邊際。

十四·佛子復置此喻已下。至可知邊際。可六行經。明且舉知衆生根廣多猶能可知分。

菩薩初發阿耨多羅三藐三菩提心功德善根。無有能得知其際者。何以故。菩薩不

齊限。但為知爾所世界衆生根故。發阿耨多羅三藐三菩提心。為盡知一切世界中一切衆生根種種差別。廣說乃至欲盡知一切諸根網故。發阿耨多羅三藐三菩提心。

十五·菩薩初發心已下。至三藐三菩提心。可五行半經。明初發心菩薩善知衆生根性廣大難量分。

佛子。復置此喻。假使有人。於一念頃。能知東方無數世界所有衆生種種欲樂。念念如是。盡阿僧祇劫。次第廣說乃至第十。南西北方。四維上下。亦復如是。此十方衆生所有欲樂可知邊際。

十六·佛子復置此喻已下。至可知邊際。可四行經。明且舉所欲樂廣大猶可知分。

菩薩初發阿耨多羅三藐三菩提心功德善根。無有能得知其際者。何以故。佛子。菩薩不齊限。但為知爾所衆生欲樂故。發阿耨多羅三藐三菩提心。為盡知一切世界所有衆生種種欲樂。廣說乃至欲盡知一切欲樂網故。發阿耨多羅三藐三菩提心。

十七·菩薩初發心已下。至三藐三菩提心。可六行經。明初心菩薩所知一切衆生欲樂廣大難知分。

佛子。復置此喻。假使有人。於一念頃。能知東方無數世界所有衆生種種方便。如是廣說乃至第十。南西北方。四維上下。亦復如是。此十方衆生種種方便可知邊際。

十八。佛子復置此喻已下。至可知邊際。可四行經。明且舉所知衆生方便廣大猶可知分。

菩薩初發阿耨多羅三藐三菩提心功德善根。無有能得知其際者。何以故。佛子。菩薩不齊限。但為知爾所世界衆生種種方便故。發阿耨多羅三藐三菩提心。為盡知一切世界所有衆生種種方便。廣說乃至欲盡知一切方便網故。發阿耨多羅三藐三菩提心。

十九。菩薩初發心已下。至三菩提心。可六行經。明初心菩薩善知一切衆生種種方便廣大難知分。

佛子。復置此喻。假使有人。於一念頃。能知東方無數世界所有衆生種種差別心。廣說乃至此十方世界所有衆生種種差別心可知邊際。

二十。佛子復置此喻已下。至可知邊際。可三行經。且舉所有一切衆生心廣

大猶可知分。

菩薩初發阿耨多羅三藐三菩提心功德善根。無有能得知其際者。何以故。佛子。菩薩不齊限。但為知爾所衆生心故。發阿耨多羅三藐三菩提心。為悉知盡法界虛空界無邊衆生種種心。乃至欲盡知一切心網故。發阿耨多羅三藐三菩提心。

二十一·菩薩初發心已下。至三菩提心。可五行半經。明初發心菩薩知一切衆生差別心廣大難知分。

佛子。復置此喻。假使有人。於一念頃。能知東方無數世界所有衆生。種種差別業。廣說乃至此十方衆生種種差別業可知邊際。菩薩初發阿耨多羅三藐三菩提心善根邊際。不可得知。

二十二·佛子復置此喻已下。至不可得知。有四行經。明且舉所有衆生業廣大猶可知分。

何以故。佛子。菩薩不齊限。但為知爾所衆生業故。發阿耨多羅三藐三菩提心。欲悉知三世一切衆生業。乃至欲悉知一切業網故。發阿耨多羅三藐三菩提心。

二十三·何以故已下。至三菩提心。可三行半經。明初心菩薩知衆生差別業

廣大難知分。

佛子。復置此喻。假使有人。於一念頃。能知東方無數世界所有衆生種種煩惱。念念如是。盡阿僧祇劫。此諸煩惱種種差別。無有能得知其邊際。有第一人。於一念頃。能知前人阿僧祇劫所知衆生煩惱差別。如是復盡阿僧祇劫。次第廣說乃至第十。南西北方。四維上下。亦復如是。佛子。此十方衆生煩惱差別可知邊際。

二十四。佛子復置此喻已下。至可知邊際。有七行經。且舉如衆生煩惱廣大猶可能知分。

菩薩初發阿耨多羅三藐三菩提心善根邊際。不可得知。何以故。佛子。菩薩不齊限。但為知爾所世界衆生煩惱故。發阿耨多羅三藐三菩提心。為盡知一切世界所有衆生煩惱差別故。發阿耨多羅三藐三菩提心。所謂欲盡知輕煩惱。重煩惱。眠煩惱。起煩惱。一一衆生無量煩惱。種種差別。種種覺觀。淨治一切諸雜染故。欲盡知依無明煩惱。愛相應煩惱。斷一切諸有趣煩惱結故。欲盡知貪分煩惱。瞋分煩惱。癡分煩惱。等分煩惱。斷一切煩惱根本故。欲悉知我煩惱。我所煩惱。我慢煩惱。覺悟一切煩惱。盡無餘故。欲悉知從顛倒分別生根本煩惱隨煩惱。因

身見生六十二見。調伏一切煩惱故。欲悉知蓋煩惱。障煩惱。發大悲救護心。斷一切煩惱網。令一切智性清淨故。發阿耨多羅三藐三菩提心。

二十五·菩薩初發心已下。至三藐三菩提心。有十六行經。明初心菩薩所知一切衆生煩惱廣大難知分。

佛子。復置此喻。假使有人。於一念頃。以諸種種上味飲食。香華衣服。幢幡傘蓋。及僧伽藍上妙宮殿。寶帳網幔。種種莊嚴師子之座。及衆妙寶。供養東方無數諸佛。及無數世界所有衆生。恭敬尊重。禮拜讚歎。曲躬瞻仰。相續不絕。經無數劫。又勸彼衆生。悉令如是供養於佛。至佛滅後。各為起塔。其塔高廣。無數世界衆寶所成。種種莊嚴。一一塔中。各有無數如來形像。光明徧照無數世界。經無數劫。南西北方。四維上下。亦復如是。

二十六·佛子復置此喻已下。至亦復如是。可九行半經。且明供養廣大難知猶可知分。

佛子。於汝意云何。此人功德。寧為多不。天帝言。是人功德。唯佛乃知。餘無能測。佛子。此人功德。比菩薩初發心功德。百分不及一。千分不及一。百千分

不及一。乃至優波尼沙陀分亦不及一。

二十七·佛子於汝意云何已下。至亦不及一。可四行半經。明初發心供養廣大難知分。

佛子。復置此喻。假使復有第二人。於一念中。能作前人。及無數世界所有衆生無數劫中供養之事。念念如是。以無量種供養之具。供養無量諸佛如來。及無量世界所有衆生。經無量劫。其第三人。乃至第十人。皆亦如是。於一念中。能作前人所有供養。念念如是。以無邊。無等。不可數。不可稱。不可思。不可量。不可說。不可說不可說供養之具。供養無邊乃至不可說不可說諸佛。及爾許世界所有衆生。經無邊乃至不可說不可說劫。至佛滅後。各為起塔。其塔高廣。乃至住劫。亦復如是。

二十八·佛子復置是喻。至亦復如是。有十行半經。明且舉供養及起塔廣多猶可知分。

佛子。此前功德。比菩薩初發心功德。百分不及一。千分不及一。百千分不及一。乃至優波尼沙陀分亦不及一。何以故。佛子。菩薩摩訶薩不齊限。但為供養爾所

佛故。發阿耨多羅三藐三菩提心。為供養盡法界虛空界不可說不可說十方無量去來現在所有諸佛故。發阿耨多羅三藐三菩提心。發是心已。

二十九·佛子此前功德已下。至發是心已。有七行經。明初心菩薩供養功德廣大難知分。次直就法說分。

能知前際一切諸佛。始成正覺及般涅槃。能信後際一切諸佛所有善根。能知現在一切諸佛所有智慧。彼諸佛所有功德。此菩薩能信能受。能修能得。能知能證能成就。能與諸佛平等一性。

三十·能知前際一切諸佛已下。至能與諸佛平等一性。可四行經。是初發心已。能知三世諸佛。成佛及涅槃。智慧平等分。攝佛功德分。

何以故。此菩薩為不斷一切如來種性故發心。為充徧一切世界故發心。為度脫一切世界衆生故發心。為悉知一切世界成壞故發心。為悉知一切衆生垢淨故發心。為悉知一切世界三有清淨故發心。為悉知一切衆生心樂煩惱習氣故發心。為悉知一切衆生死此生彼故發心。為悉知一切衆生諸根方便故發心。為悉知一切衆生心行故發心。為悉知一切衆生三世智故發心。

三十一。何以故已下。至三世智故發心。可九行經。明菩薩初發心志意所求甚深深廣分。

以發心故。常為三世一切諸佛之所憶念。當得三世一切諸佛無上菩提。即為三世一切諸佛與其妙法。即與三世一切諸佛體性平等。已修三世一切諸佛助道之法。成就三世一切諸佛力無所畏。莊嚴三世一切諸佛不共佛法。悉得法界一切諸佛說法智慧。

三十二。以發心故已下。至說法智慧。有六行經。明菩薩發心已。得三世一切諸佛憶念與法。及自力昇進分。得果佛因佛分。

何以故。以是發心當得佛故。應知此人即與三世諸佛同等。即與三世諸佛如來境界平等。即與三世諸佛如來功德平等。得如來一身無量身。究竟平等。真實智慧。纔發心時。即為十方一切諸佛所共稱歎。即能說法教化調伏一切世界所有衆生。即能震動一切世界。即能光照一切世界。即能息滅一切世界諸惡道苦。即能嚴淨一切國土。即能於一切世界中示現成佛。即能令一切衆生皆得歡喜。即能入一切法界性。即能持一切佛種性。即能得一切佛智慧光明。

三十三。何以故已下。至智慧光明。有十行半經。明纔初發心菩薩。成佛利生。同三世諸佛分。化用分。無著分。

此初發心菩薩。不於三世少有所得。所謂若諸佛。若諸佛法。若菩薩。若菩薩法。若獨覺。若獨覺法。若聲聞。若聲聞法。若世間。若世間法。若出世間。若出世間法。若衆生。若衆生法。唯求一切智。於諸法界。心無所著。

三十四。此初發心菩薩已下。至心無所著。有四行半經。明初發心菩薩。志樂所知。世間出世間無限分。瑞分。

大方廣佛新華嚴經合論卷第三十四終

大方廣佛新華嚴經合論卷第三十五

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

初發心功德品第十七之餘

爾時佛神力故。十方各一萬佛刹微塵數世界。六種震動。所謂動。徧動。等徧動。起。徧起。等徧起。踊。徧踊。等徧踊。震。徧震。等徧震。吼。徧吼。等徧吼。擊。徧擊。等徧擊。

三十五。爾時佛神力已下。至等徧擊。有三行半經。明大地震動分。

雨衆天華。天香。天末香。天華鬘。天衣。天寶。天莊嚴具。作天妓樂。放天光明。及天音聲。

三十六。天雨衆華已下。至及天音聲。有兩行經。明諸天興供分。證成分。如動地興供。明法威力。亦明大衆法悅。心悅地動。明心境體無二故。境由心現。

故。

是時十方各過十佛刹微塵數世界外。有萬佛刹微塵數佛。同名法慧。各現其身。在法慧菩薩前。作如是言。善哉善哉。法慧。汝於今者能說此法。我等十方各萬佛刹微塵數佛。亦說是法。一切諸佛。悉如是說。

三十七。是時十方已下。至悉如是說。有四行半經。明十方同號佛來現其前。歎譽許可法同分。如十方各有萬佛刹微塵數佛同名法慧來現其前者。爲明與十方諸佛智慧合故。萬佛刹塵者。明昇進修行。啓迷悟法之量。十信十。十住百。十行千。總是明昇進見諦。解迷悟法之名。

汝說此法時。有萬佛刹微塵數菩薩。發菩提心。我等今者悉授其記。於當來世過千不可說無邊劫。同一劫中而得作佛。出興於世。皆號清淨心如來。所住世界。各各差別。我等悉當護持此法。令未來世一切菩薩未曾聞者。皆悉得聞。

三十八。汝說此法時已下。至皆悉得聞。有五行經。明說此法時。十方各有萬佛刹塵菩薩發心授記分。如萬佛刹微塵數菩薩發心。授過千不可說劫成佛之記。皆同號之爲清淨心者。亦明達如是千不可說劫量法門。總清淨故。故佛號清

淨心。非是實有如情所見長遠之劫也。總明當位隨迷悟法之名。不是存其劫量之說。如妄情所見也。自此已下。直至品末。如文自具。如文稱歎。

如此娑婆世界四天下須彌頂上說如是法。令諸衆生聞已受化。如是十方百千億那由他。無數無量無邊無等。不可數不可稱不可思不可量不可說。盡法界虛空界諸世界中。亦說此法教化衆生。其說法者。同名法慧。悉以佛神力故。世尊本願力故。為欲顯示佛法故。為以智光普照故。為欲開闡實義故。為令證得法性故。為令衆會悉歡喜故。為欲開示佛法因故。為得一切佛平等故。為了法界無有二故。說如是法。

三十九。如此娑婆世界已下。至說如是法。有九行半經。明十方所說法人及法門一時同說分。

爾時法慧菩薩。普觀盡虛空界十方國土一切衆會。欲悉成就諸衆生故。欲悉淨治諸業果報故。欲悉開顯清淨法界故。欲悉拔除雜染根本故。欲悉增長廣大信解故。欲悉令知無量衆生根故。欲悉令知三世法平等故。欲悉令觀察涅槃界故。欲增長自清淨善根故。承佛威力。即說頌言。

四十·爾時法慧已下。至說頌。有六行半經。明法慧菩薩。觀欲所緣之法。說頌稱歎分。已下頌文。有二百四十二行。四行一頌。其頌有六十段頌。都計有二百四十行。末後兩行頌。總結頌意。歎勸發心。初一百六十八行。是總都歎佛果已來五位及信等諸法。明初發心者。志樂智德。總含一切諸佛智德體用。始成一念初發心菩薩位也。方明初發心境與心不二。若志樂毫釐不似如來所修法身悲智願行者。不名初發心菩薩故。

爲利世間發大心

其心普徧於十方

衆生國土三世法

佛及菩薩最勝海

究竟虛空等法界

所有一切諸世間

如諸佛法皆往詣

如是發心無退轉

慈念衆生無暫捨

離諸惱害普饒益

光明照世爲所歸

十力護念難思議

十方國土悉趣入

一切色形皆示現

如佛福智廣無邊

隨順修因無所著

有剎仰住或傍覆

巖妙廣大無量種

菩薩一發最上心

悉能往詣皆無礙

菩薩勝行不可說

皆勤修習無所住

見一切佛常欣樂

普入於其深法海

哀愍五趣諸群生

令除垢穢普清淨

紹隆佛種不斷絕

摧滅魔宮無有餘

已住如來平等性

善修微妙方便道

於佛境界起信心

得佛灌頂心無著

兩足尊所念報恩

心如金剛不可沮

於佛所行能照了

自然修習菩提行

諸趣差別想無量

業果及心亦非一

乃至根性種種殊

一發大心悉明見

其心廣大等法界

無依無變如虛空

趣向佛智無所取

諦了實際離分別

知衆生心無生想

了達諸法無法想

雖普分別無分別

億那由刹皆往詣

無量諸佛妙法藏

隨順觀察悉能入

衆生根行靡不知

到如是處如世尊

清淨大願恆相應

樂供如來不退轉

人天見者無厭足

常爲諸佛所護念

其心清淨無所依

雖觀深法而不取

如是思惟無量劫

於三世中無所著

其心堅固難制沮

趣佛菩提無障礙

志求妙道除蒙惑

周行法界不告勞

知語言法皆寂滅

但入眞如絕異解

諸佛境界悉順觀

達於三世心無礙

菩薩始發廣大心

即能徧往十方刹

法門無量不可說

智光普照皆明了

大悲廣度最無比

慈心普徧等虛空

而於衆生不分別

如是清淨遊於世

十方衆生悉慰安

一切所作皆眞實

恆以淨心不異語

常爲諸佛共加護

過去所有皆憶念

未來一切悉分別

十方世界普入中

爲度衆生令出離

菩薩具足妙智光

善了因緣無有疑

一切迷惑皆除斷

如是而遊於法界

魔王宮殿悉摧破	眾生翳膜咸除滅	離諸分別心不動	善了如來之境界
三世疑網悉已除	於如來所起淨信	以信得成不動智	智清淨故解真實
爲令衆生得出離	盡於後際普饒益	長時勤苦心無厭	乃至地獄亦安受
福智無量皆具足	衆生根欲悉了知	及諸業行無不見	如其所樂爲說法
了知一切空無我	慈念衆生恆不捨	以一大悲微妙音	普入世間而演說
放大光明種種色	普照衆生除黑闇	光中菩薩坐蓮華	爲衆闡揚清淨法
於一毛端現衆刹	諸大菩薩皆充滿	衆會智慧各不同	悉能明了衆生心
十方世界不可說	一念周行無不盡	利益衆生供養佛	於諸佛所問深義
於諸如來作父想	爲利衆生修覺行	智慧善巧通法藏	入深智處無所著
隨順思惟說法界	經無量劫不可盡	智雖善入無處所	無有疲厭無所著
三世諸佛家中生	證得如來妙法身	普爲群生現衆色	譬如幻師無不作
或現始修殊勝行	或現初生及出家	或現樹下成菩提	或爲衆生示涅槃
菩薩所住希有法	唯佛境界非二乘	身語意想皆已除	種種隨宜悉能現
菩薩所得諸佛法	衆生思惟發狂亂	智入實際心無礙	普現如來自在力

此於世間無與等

何況復增殊勝行

雖未具足一切智

已獲如來自在力

已住究竟一乘道

深入微妙最上法

善知衆生時非時

爲利益故現神通

分身徧滿一切刹

放淨光明除世闇

譬如龍王起大雲

普雨妙雨悉充洽

觀察衆生如幻夢

以業力故常流轉

大悲哀愍咸救拔

爲說無爲淨法性

佛力無量此亦然

譬如虛空無有邊

爲令衆生得解脫

億劫勤修而不倦

種種思惟妙功德

善修無上第一業

於諸勝行恆不捨

專念生成一切智

一身示現無量身

一切世界悉周徧

其心清淨無分別

一念難思力如是

於諸世間不分別

於一切法無妄想

雖觀諸法而不取

恆救衆生無所度

一切世間唯是想

於中種種各差別

知想境界險且深

爲現神通而救脫

譬如幻師自在力

菩薩神變亦如是

身徧法界及虛空

隨衆生心靡不見

能所分別二俱離

雜染清淨無所取

若縛若解智悉忘

但願普與衆生樂

一切世間唯想力

以智而入心無畏

思惟諸法亦復然

三世推求不可得

能入過去畢前際

能入未來畢後際

能入現在一切處

常勤觀察無所有

隨順涅槃寂滅法

住於無諍無所依

心如實際無與等

專向善提永不退

修諸勝行無退怯	安住菩提不動搖	佛及菩薩與世間	盡於法界皆明了
欲得最勝第一道	爲一切智解脫王	應當速發菩提心	永盡諸漏利群生
趣向菩提心清淨	功德廣大不可說	爲利衆生故稱述	汝等諸賢應善聽
無量世界盡爲塵	一一塵中無量刹	其中諸佛皆無量	悉能明見無所取
善知衆生無生想	善知言語無語想	於諸世界心無礙	悉善了知無所著
其心廣大如虛空	於三世事悉明達	一切疑惑皆除滅	正觀佛法無所取
十方無量諸國土	一念往詣心無著	了達世間衆苦法	悉住無生真實際
無量難思諸佛所	悉往彼會而覲謁	常爲上首問如來	菩薩所修諸願行
心常憶念十方佛	而無所依無所取	恆勸衆生種善根	莊嚴國土令清淨
一切趣生三有處	以無礙眼咸觀察	所有習性諸根解	無量無邊悉明見
衆生心樂悉了知	如是隨宜爲說法	於諸染淨皆通達	令彼修治入於道
無量無數諸三昧	菩薩一念皆能入	於中想智及所緣	悉善了知得自在
菩薩獲此廣大智	疾向菩提無所礙	爲欲利益諸群生	處處宣揚大人法
善知世間長短劫	一月半月及晝夜	國土各別性平等	常勤觀察不放逸

普詣十方諸世界

而於方處無所取

嚴淨國土悉無餘

亦不曾生淨分別

衆生是處若非處

及以諸業感報別

隨順思惟入佛力

於此一切悉了知

一切世間種種性

種種所行住三有

利根及與中下根

如是一切咸觀察

淨與不淨種種解

勝劣及中悉明見

一切衆生至處行

三有相續皆能說

禪定解脫諸三昧

染淨因起各不同

及以先世苦樂殊

淨修佛力咸能見

衆生業感續諸趣

斷此諸趣得寂滅

種種漏法永不生

并其習種悉了知

如來煩惱皆除盡

大智光明照於世

菩薩於佛十力中

雖未證得亦無疑

菩薩於一毛孔中

普現十方無量刹

或有雜染或清淨

種種業作皆能了

一微塵中無量刹

無量諸佛及佛子

諸刹各別無雜亂

如一切一切悉明見

於一毛孔見十方

盡虛空界諸世間

無有一處空無佛

如是佛刹悉清淨

於毛孔中見佛刹

復見一切諸衆生

三世六趣各不同

晝夜月時有縛解

如是大智諸菩薩

專心趣向法王位

於佛所住順思惟

而獲無邊大歡喜

菩薩分身無量億

供養一切諸如來

神通變現勝無比

佛所行處皆能住

無量佛所皆鑽仰

所有法藏悉耽味

見佛聞法勤修行

如飲甘露心歡喜

已獲如來勝三昧

善入諸法智增長

信心不動如須彌

普作群生功德藏

慈心廣大徧衆生

悉願疾成一切智

而恆無著無依處

離諸煩惱得自在

哀愍衆生廣大智

普攝一切同於己

知空無相無真實

而行其心不懈退

菩薩發心功德量

億劫稱揚不可盡

以出一切諸如來

獨覺聲聞安樂故

十方國土諸衆生

皆悉施安無量劫

勸持五戒及十善

四禪四等諸定處

復於多劫施安樂

令斷諸惑成羅漢

彼諸福聚雖無量

不與發心功德比

以此初頌有一百六十八行。且總歎信等六位因果。及如來智德總歎。令初發心者法之相似。

又教億衆成緣覺

獲無諍行微妙道

以彼而校菩提心

算數譬喻無能及

一念能過塵數刹

如是經於無量劫

此諸刹數尚可量

發心功德不可知

過去未來及現在

所有劫數無邊量

此諸劫數猶可知

發心功德無能測

以菩提心徧十方

所有分別靡不知

一念三世悉明達

利益無量衆生故

十方世界諸衆生

欲解方便意所行

及以虛空際可測

發心功德難知量

菩薩志願等十方

慈心普洽諸群生

悉使修成佛功德

是故其力無邊際

衆生欲解心所樂

諸根方便行各別

於一念中悉了知

一切智智心同等

一切衆生諸惑業

三有相續無暫斷

此諸邊際尙可知

發心功德難思議

發心能離業煩惱

供養一切諸如來

業惑既離相續斷

普於三世得解脫

一念供養無邊佛

亦供無數諸衆生

悉以香華及妙鬘

寶幢旛蓋上衣服

美食珍座經行處

種種宮殿悉嚴好

毘盧遮那妙寶珠

如意摩尼發光曜

念念如是持供養

經無量劫不可說

其人福聚雖復多

不及發心功德大

所說種種衆譬喻

無有能及菩提心

以諸三世人中尊

皆從發心而得生

發心無礙無齊限

欲求其量不可得

一切智智誓必成

所有衆生皆永度

發心廣大等虛空

生諸功德同法界

所行普徧如無異

永離衆著佛平等

一切法門無不入

一切國土悉能往

一切智境咸通達

一切功德皆成就

一切能捨恆相續

淨諸戒品無所著

具足無上大功德

常勤精進不退轉

入深禪定恆思惟

廣大智慧共相應

此是菩薩最勝地

出生一切普賢道

三世一切諸如來

靡不護念初發心

悉以三昧陀羅尼

神通變化共莊嚴

十方衆生無有量

世界虛空亦如是

發心無量過於彼

是故能生一切佛

諸佛色相莊嚴身	亦爲四辯無畏本	十八不共亦復然	莫不皆從發心得
一切獨覺聲聞乘	及以平等妙法身	智慧無著所應供	悉以發心而得有
一切人天自在樂	色界諸禪三昧樂	及無色界諸三昧	悉以發心作其本
以因發起廣大心	及以諸趣種種樂	進定根力等衆樂	靡不皆由初發心
住佛無礙實義智	則能修行六種度	勸諸衆生行正行	於三界中受安樂
智慧光明如淨日	所有妙業咸開闡	能令無量諸衆生	悉斷惑業向涅槃
普發無邊功德願	衆行具足猶滿月	功德常盈譬巨海	無垢無礙同虛空
無量大願難思議	悉與一切衆生樂	盡未來際依願行	常勤修習度衆生
了法自性如虛空	願令衆生悉清淨	空無相願無依處	以願力故皆明顯
十方世界諸如來	一切寂滅悉平等	法門無數不可說	爲衆生說無所著
如衆生數爾許劫	悉共讚歎初發心	此心無量德所嚴	能到彼岸同於佛
欲知一切諸佛法	說其功德不可盡	以住如來廣大家	三界諸法無能喻
衆生心行可數知	宜應速發菩提心	此心功德中最勝	必得如來無礙智
	國土微塵亦復然	虛空邊際乍可量	發心功德無能測

出生三世一切佛

成就世間一切樂

增長一切勝功德

永斷一切諸疑惑

開示一切妙境界

盡除一切諸障礙

成就一切清淨刹

出生一切如來智

欲見十方一切佛

欲施無盡功德藏

欲滅衆生諸苦惱

宜應速發菩提心

然後七十四行頌。始重頌前四十段中校量發心功德廣大之量。如文具明。隨文稱歎。四行一頌。准例知之。如是校量初發心功德。設使以等虛空無限境。以一切樂具。總供養無限衆生。皆令得人天勝樂。又教令得四沙門果。及辟支佛。及三乘出世菩提。如是虛空境界。及所度衆生雖等。然未令所化衆生得成佛。亦不可比於此教中初發心。乘如來大智。等佛所行。普化衆生皆成佛故。發菩提心。以是義故。雖然所舉境界廣狹雖等。所化衆生成佛不成佛不等。故不可爲比故。是故此品下文云。初發心菩薩。不於三世少有所得。所謂若諸佛。若諸佛法。若菩薩。若菩薩法。若獨覺。若獨覺法。若聲聞。若聲聞法。乃至廣說如經。但爲唯求一切智。於諸法界心無所著。發菩提心。略說菩提。其法有四。一聲聞菩提。二緣覺菩提。三權教菩薩菩提。四一乘菩薩佛果菩提。前三並是出世菩提。佛果菩提。是法身大智大悲。眞俗萬行。法界圓滿菩提。無出入故。三乘菩提。雖觀

四諦十二緣。而亦未知四諦十二緣之實體。非獨二乘不知。三種意生身菩薩。位登十地。猶未能悉知。唯一乘菩薩。以智方知。至十地品具明。但且略而總言。三乘中。觀苦集滅道。及十二緣生。及行六波羅蜜菩薩。厭苦忻真。但求出世。大悲菩薩。方云留惑潤生。一乘菩薩。以智觀四諦十二緣生。無明即智。苦諦即聖諦。於生死涅槃。無解縛性。是故此經。名苦聖諦。集聖諦。如是十聖諦。十二因緣。總是法界自性無縛無解自在之緣。不名無明。不名苦諦。如是總觀萬法。如是名爲一乘。法界緣起。智悲自在。任性緣生。一切眼耳鼻舌身。莫不皆是法界緣起自在法門。一切諸佛知見神通道力。以此而有。但以禪定觀照諸波羅蜜而顯發之。是故學者。應如是修。如是悟入。已下頌文。四行一頌。如文自具。不煩更釋。有智之士。隨文稱歎。令衆發心。

明法品第十八

將釋此品。約作三門分別。一釋品名目。二釋品來意。三隨文釋義。第一釋品名目者。此品爲明前之昇須彌頂品。偈讚品。十住品。梵行品。初發心功德品。

五品法門。已發菩提之心。得廣大功德。此精進慧所問之法有二義。一令前五品之法。其心更明。二令後所行之法。轉勝明白。故云明法品。明昇進前後法故。是精進慧菩薩啓請法慧菩薩言。所有大願悉使滿足。獲諸菩薩廣大之藏。此明前所得法。使令更明。後之昇進。使令明白。是修十行之向。長養本位十住之法。第二釋品來意。及名目。如前。第三隨文釋義。分之爲二。一長科經意。二隨文解釋。第一長科經意者。約科爲三段。第一初爾時已下。長行有三十三行半經。通偈頌有五十五行半。明精進慧菩薩請法分。第二爾時法慧菩薩已下。有六行經。明法慧菩薩許說分。第三佛子菩薩摩訶薩已下。直至品末。通偈頌。總明正說法分。從初第一請法分中。義分爲二。一科此一段經之文意。第二隨文解義。第一科此一段經文意者。約科爲三段。

爾時精進慧菩薩。白法慧菩薩言。佛子。菩薩摩訶薩。初發求一切智心。成就如。是無量功德。具大莊嚴。昇一切智乘。入菩薩正位。捨諸世間法。得佛出世法。去來現在諸佛攝受。決定至於無上菩提究竟之處。彼諸菩薩於佛教中。云何修習。令諸如來皆生歡喜。入諸菩薩所住之處。一切大行皆得清淨。所有大願悉使滿足。

獲諸菩薩廣大之藏。隨所應化常為說法。而恆不捨波羅蜜行。所念衆生。咸令得度。紹三寶種。使不斷絕。善根方便。皆悉不虛。佛子。彼諸菩薩以何方便。能令此法當得圓滿。願垂哀愍。為我宣說。此諸大會靡不樂聞。

第一爾時已下。至靡不樂聞。有十二行經。明精進慧菩薩初起請法門分。第二隨文解釋者。從初爾時者。爾猶此。云說此法時也。精進慧菩薩者。約位加行成名。此通十箇慧之通稱。為令欲成此位之昇進。必藉精進之功。慧者照燭義。精進者無思義。以無思之慧。照燭有作之功。有作本自無功。萬法本來自淨。萬法自淨。名之為精。無功智應。知根利生。名之為進。此約成位進修之稱也。菩薩者如常說也。白法慧菩薩者。白者明也。明著名言。申其所明也。云昇一切智乘者。明入此位也。以此位菩薩。乘一切智乘。生如來家。入佛種智。為佛之子。恆蒙諸佛之所攝受故。明智相應堪與益故。故云攝受。云獲諸菩薩廣大之藏者。如十迴向中。智藏悲藏等十藏是也。云以何方便已下。正說中十法門是。復次如諸菩薩摩訶薩常勤修習。滅除一切無明黑暗。降伏魔怨。制諸外道。永滌一切煩惱心垢。悉能成就一切善根。永出一切惡趣諸難。淨治一切大智境界。成

就一切菩薩諸地。諸波羅蜜。總持三昧。六通三明。四無所畏清淨功德。莊嚴一切諸佛國土。及諸相好。身語心行。成就滿足。善知一切諸佛如來力無所畏。不共佛法。一切智智所行境界。為欲成熟一切衆生。隨其心樂而取佛土。隨根隨時如應說法。種種無量廣大佛事。及餘無量諸功德法。諸行諸道及諸境界。皆悉圓滿。疾與如來功德平等。於諸如來應正等覺。百千阿僧祇劫修菩薩行時。所集法藏。悉能守護開示演說。諸魔外道無能沮壞。攝持正法無有窮盡。於一切世界演說法時。天王。龍王。夜叉王。乾闥婆王。阿修羅王。迦樓羅王。緊那羅王。摩睺羅伽王。人王。梵王。如來法王。皆悉守護。一切世間恭敬供養。同灌其頂。常為諸佛之所護念。一切菩薩亦皆愛敬。得善根力。增長白法。開演如來甚深法藏。攝持正法以自莊嚴。一切菩薩所行次第。願皆演說。

第二復次如諸已下。至菩薩所行次第願皆演說。有二十一行經。明精進慧菩薩。並舉當位應所修行之行及獲益。重勸說守護法分。云六通者。身通。天耳通。天眼通。宿命通。他心通。漏盡通。身通者。於一剎那際。身隨智用。周徧十方。對現色身。隨根普應。天耳通者。耳根常聞十方一切諸聲。天眼通者。眼根常見

十方一切麤細等色。宿命通者。智隨三世一切衆生。死此生彼。所作業行因果。悉能知之。他心通者。一念能知三世一切衆生心念所欲。漏盡通者。隨智徧知一切諸法。而無情欲順癡愛心。此經又有十種通。如十通品說。三明者。一宿命。二天眼。三漏盡。是名三明。四無畏者。一一切智無畏。二漏盡無畏。三說障道無畏。四說盡苦道無畏。相好者。此經十身相海也。力無所畏者。十力也。一是處非處力。二業力。三定力。四根力。五欲力。六性力。七一切至處道力。八宿命力。九天眼力。十漏盡力。是爲十。三世業果名爲處。了達非有名非處。善知衆生業因果。心定不動如山王。衆生根品上中下。欲樂種種各差別。種種世間諸性分。一切道法各不同。宿命徧知三世業。天眼十方無礙了。隨諸分別滿十方。心無雜染常無垢。如是十種得自在。是名如來無畏力。十八不共者。一佛身無過失。二口無過失。三念無過失。四想無過失。五心無不定常在三昧。六無不知已捨。七者欲無減。八者精進無失。九念無減。十慧無減。十一解脫無減。十二解脫知見無減。十三身業隨智慧行。十四口業隨智慧行。十五意業隨智慧行。十六智慧知過去無礙事。十七智慧知未來無礙事。十八智慧知現在無礙事。所言無過

失者。妙善相應。所言無滅者。所作善法常無忘失。云一切智智者。云種種智無盡智。此明差別智無盡故。如守護分中有二義。一明初發心菩薩。守護一切諸佛法藏。而能爲人演說。二得天王夜叉王如來法王等守護。

爾時精進慧菩薩。欲重宣其義。而說頌言

第三爾時已下。可一行經。明精進慧以偈說。重請法分。

大名稱者善能演

菩薩所成功德法

深入無邊廣大行

具足清淨無師智

若有菩薩初發心

成就福德智慧乘

入離生位超世間

普獲正等菩提法

彼復云何佛教中

堅固勤修轉增勝

令諸如來悉歡喜

佛所住地速當入

所行清淨願皆滿

及得廣大智慧藏

常能說法度衆生

而心無依無所著

菩薩一切波羅蜜

悉善修行無缺減

所念衆生咸救度

常持佛種使不絕

所作堅固不唐捐

一切功成得出離

如諸勝者所修行

彼清淨道願宣說

永破一切無明暗

降伏衆魔及外道

所有垢穢悉滌除

得近如來大智慧

永離惡趣諸險難

淨治大智殊勝境

獲妙道力鄰上尊

一切功德皆成就

證得如來最勝智

住於無量諸國土

隨衆生心而說法

及作廣大諸佛事

云何而得諸妙道

開演如來正法藏

常能受持諸佛法

無能超勝無與等

云何無畏如師子

所行清淨如滿月

云何修習佛功德

猶如蓮華不著水

如以偈重請分中。有二十二行頌。初二行頌。歎能說法主。已下二十行。兩行一頌。初兩行。歎初發心菩薩。智慧福德。超世獲益。次兩行頌。勸說昇進之行。次兩行頌。明大智度衆生無著。次兩行頌。明衆行無缺。利生令佛種不絕。次兩行頌。明堅固功成出離法勝。重勸請說。次兩行頌。明破闇降魔之道。亦願請說。次兩行頌。明如來所得之法。亦勸請說。次兩行頌。明云何演說如來法。末後兩行頌。明云何令初發心。無畏如師子。無著如蓮華。

爾時法慧菩薩。告精進慧菩薩言。善哉佛子。汝今為欲多所饒益。多所安樂。多所惠利。哀愍世間諸天及人。問於如是菩薩所修清淨之行。佛子。汝住實法。發大精進。增長不退。已得解脫。能作是問。同於如來。諦聽諦聽。善思念之。我今承佛威神之力。為汝於中。說其少分。

第二爾時法慧菩薩已下。有六行經。明法慧菩薩許說分。於此分中。所歎能問之人。如文可知。第三正說分中。復分爲二。第一長科經意。第二隨文釋義。

第一長科經意者。從佛子菩薩已發一切智心已下。至品末。長科爲二十段。

佛子。菩薩摩訶薩已發一切智心。應離癡暗。精勤守護。無令放逸。佛子。菩薩摩訶薩住十種法。名不放逸。何者爲十。一者護持衆戒。二者遠離愚癡。淨菩提心。三者心樂質直。離諸詭誑。四者勤修善根無有退轉。五者恆善思惟自所發心。六者不樂親近在家出家一切凡夫。七者修諸善業。而不願求世間果報。八者永離二乘。行菩薩道。九者樂修衆善令不斷絕。十者恆善觀察自相續力。佛子。若諸菩薩行此十法。是則名爲住不放逸。

第一從初佛子已下。至住不放逸。有十行經。明住十種不放逸法分。

佛子。菩薩摩訶薩住不放逸。得十種清淨。何者爲十。一者如說而行。二者念智成就。三者住於深定不沈不舉。四者樂求佛法無有懈怠。五者隨所聞法如理觀察。具足出生巧妙智慧。六者入深禪定得佛神通。七者其心平等無有高下。八者於諸衆生上中下類。心無障礙。猶如大地。等作利益。九者若見衆生乃至一發菩提之心。尊重承事猶如和尚。十者於授戒和尚及阿闍梨。一切菩薩諸善知識法師之所。常生尊重承事供養。佛子。是名菩薩住不放逸十種清淨。

第二佛子已下。至十種清淨。有十行半經。明住不放逸得十清淨法分。第二隨文解釋者。從正說分中菩薩摩訶薩二十段文中。但隨經文義隱言幽。方可解之。經文自顯處。如文自具。不煩更釋。如文中深入禪定不沈不舉者。不沈。離聲聞滅盡定。亦離上二界息慮禪。如色界初禪。滅下欲界愁憂不生。得一分輕安寂靜。無欲界愛。有寂靜愛。水災便至。楞伽經云。津潤妄想。能生內外水界。以愛爲津潤。故水大至。如色界第二禪。能滅欲界憂苦不生。得一分輕安寂靜。爲有覺有觀。能緣靜境猶在。火災便至。如第三禪。無覺無觀。有禪悅樂。心有喜動。風災便至。如第四禪。身心寂滅。離出入息。喜動亦無。三災不至。唯妙色身如白銀。清淨光潔。衣如金色。四禪身長二十里。衣長四十里。已下三禪。倍倍減半。如初會中已釋。如是四禪。皆是息心令靜。以爲勢分。乃至空處。識處。無所有處。非想非非想定。皆是破除昇進。令念不生。住寂定故。如是破色界靜色。令成無色界空識。又破見空之識亦空。名識處定。又破識空之見亦無。名無所有定。又破無所有心。此無想無想之想亦無。名非想非非想定。如是上界修禪。皆是作意存情。伏心不起。不是任性無爲。無沈無掉。稱眞理智。寂用自在。不作

而爲之定也。如欲界定攀緣五欲名掉。色無色界定名沈。又聲聞緣覺定名沈。空觀菩薩行六波羅蜜生於淨土名掉。舉如是三乘之定。皆有沈掉。爲垢淨未亡。見道不眞。有忻厭故。二乘之定。雖無三界現行之惑。皆是厭患對治。伏滅無爲。無能起惑。我生不起。悲智亦亡。住滅定者。頭上擊鼓。亦不聞知。化火燒父母分段身者。入變易生死。如是三乘斷惑不分別法。意勢相似。或有聲聞。以十二緣生法得道。如是三乘觀行。緣覺聲聞淨土菩薩所得道者。皆是出世。三乘互用。通爲九乘。大體以約勝鬘經。得伏三界煩惱不起。得意生身。無分段生死。得變易生死。非是應眞。任智自在。無出入體。任智應衆生。利樂不息。廣如勝鬘之意。以是義故。色界無色界及三乘禪。有沈有掉。如大乘中。留惑潤生菩薩。道前安立三十二心菩薩。習種性。性種性。道種性。方入聖種性。四攝。四無量心。三十七助道品觀。十波羅蜜。名目相似。若以攝化境界。及見佛數量。意生身。智生身。成佛因果。總皆不同。以是義故。如是留惑潤生菩薩所修定。亦沈亦掉。爲但得三種意生身。未得如來智生身故。乃至七八九十地。得種類俱生無行作意生身菩薩。但得三界煩惱中。空觀折伏現行不起。於意生中自在故。非是生如來

一切種智家故。非是於如來一切種智中起慣習故。所云成佛。定滿三祇。所見佛境。初地菩薩。但云供養及攝化百佛世界。但得百法明門。如此華嚴經者。初發心菩薩。初發如來一切種智之心。名爲菩提心。如初發心住。創生一切諸佛一切種智大智慧家生。初發心時。便成正覺。爲會諸佛一切種智。與自智一故。成佛不出剎那之際。以智境界非延促故。攝化境界。徧百佛剎微塵。又多百佛。明智境德用。無盡無限重重故。此猶約隨位進修之言。計體一即一切無限也。如十地中。初地菩薩。供養多百佛。多百千佛。雖數不離百數。然多百即無限。與單百即無比。是故四念。四攝。四無量心。十波羅蜜。一一法悉皆無限。是故此十住菩薩所修定業。不屬世間出世間沈掉之定也。已釋住於深定不沈不舉竟。如云深入禪定得佛神通者。如上色界無色界天及三乘神通。色無色界神通。息心想淨報得神通。二乘神通。依定前所念。淨土菩薩神通。得清淨意樂通。如三種意生身是。如此經中。入深禪定得佛神通者。以心稱理。元無出入。體無靜亂。體無造作性。任理自真。不生不伏。理真智應。性自徧周。三世十方。一時普應。對現色身。隨以智應而化群品。而無來往。亦不變化。名佛神通。智無依止無形色。

體無來去性。性自徧周。非三世攝。而能普應三世之法。名曰神通。是故經云。智入三世而無來往。爲三世是衆生情所妄安。非實有故。爲智體無形色。不造作而應群品。名之爲神。圓滿十方。無法不知。無根不識。名之爲通。

大方廣佛新華嚴經論卷第三十五終

大方廣佛新華嚴經合論卷第三十六

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

明法品第十八之餘

佛子。菩薩摩訶薩住不放逸。發大精進。起於正念。生勝欲樂。所行不息。於一切法心無依處。於甚深法能勤修習。入無諍門。增廣大心。佛法無邊。能順了知。令諸如來皆悉歡喜。佛子。菩薩摩訶薩復有十法。能令一切諸佛歡喜。何等為十。一者精進不退。二者不惜身命。三者於諸利養無所希求。四者知一切法皆如虛空。五者善能觀察普入法界。六者知諸法印心無倚著。七者常發大願。八者成就清淨忍智光明。九者觀自善法心無增減。十者依無作門修諸淨行。佛子。是為菩薩住十種法。能令一切如來歡喜。

第三佛子已下。至能令一切如來歡喜。有十一行半經。明行十種法諸佛歡喜

分。經云。依無作門修諸淨行者。以此無作門。修法界虛空界行海徧周清淨故。智無所爲。名之爲修。知根同事。名之爲行。行無不利。非作非生。名爲無作門也。常處十方一切三界。受生利俗。而無染淨。名之爲淨行故。

佛子。復有十法。能令一切諸佛歡喜。何者爲十。所謂安住不放逸。安住無生忍。安住大慈。安住大悲。安住滿足諸波羅蜜。安住諸行。安住大願。安住巧方便。安住勇猛力。安住智慧。觀一切法皆無所住。猶如虛空。佛子。若諸菩薩住此十法。能令一切諸佛歡喜。

第四佛子已下。至諸佛歡喜。有六行經。明安住十法分。已上佛歡喜分。

佛子。有十種法。令諸菩薩速入諸地。何等爲十。一者善巧圓滿福智一行。二者能大莊嚴波羅蜜道。二者智慧明達不隨他語。四者承事善友恆不捨離。五者常行精進無有懈怠。六者善能安住如來神力。七者修諸善根不生疲倦。八者深心利智。以大乘法而自莊嚴。九者於地地法門心無所住。十者與三世佛善根方便同一體性。佛子。此十種法。令諸菩薩速入諸地。

第五佛子已下。至令諸菩薩速入諸地。有八行經。明行此十法速入諸地分。

經云。有十種法令諸菩薩速入諸地者。明雖於初發心住位。而徧知諸住諸行諸迴向諸地法門。爲一即一切故。一切即一故。即因即果故。即如善財童子見彌勒菩薩已。彌勒還令卻見文殊師利。明因果不異不離故。此亦如是。從初發心位。佛果地位。一念齊進。而亦不出一念中。修成正覺佛因果。及菩薩行。悉圓滿故。如善財一生。龍女不出一剎那際三生成佛。總相似故。云一生成佛者。明今生是父母分段身。是信心及見道修行。生捨分段身入變易生。名爲一生。亦不出剎那際。無古今性。無分段性。無變易性。萬相如幻故。如化故。非生滅故。無三世故。以此初住徧修諸位諸地故。貫通諸法。總一時一法。多少延促自在無礙。不出一剎那際故。法如是故。去情以智觀之可見。經云。與三世諸佛同一體性者。爲法身智慧同也。三世廣大劫一念同。三世諸佛普賢共行大智大悲圓滿同故。復次佛子。諸菩薩初住地時。應善觀察。隨其所有一切法門。隨其所有甚深智慧。隨所修因。隨所得果。隨其境界。隨其力用。隨其示現。隨其分別。隨其所得。悉善觀察。知一切法。皆是自心。而無所著。如是知己。入菩薩地能善安住。佛子。彼諸菩薩作是思惟。我等宜應速入諸地。何以故。我等若於地地中住。成就

如是廣大功德。具功德已。漸入佛地。住佛地已。能作無邊廣大佛事。是故宜應常勤修習。無有休息。無有疲厭。以大功德。而自莊嚴。入菩薩地。

第六復次佛子已下。至而自莊嚴入菩薩地。有十行經。明入地勝進皆。

佛子。有十種法。令諸菩薩所行清淨。何等為十。一者悉捨資財滿衆生意。二者持戒清淨無所毀犯。三者柔和忍辱無有窮盡。四者勤修諸行永不退轉。五者以正念力心無迷亂。六者分別了知無量諸法。七者修一切行而無所著。八者其心不動猶如山王。九者廣度衆生猶如橋梁。十者知一切衆生與諸如來。同一體性。佛子。是為十法。令諸菩薩所行清淨。

第七佛子有十種法已下。至所行清淨。有八行經。明淨行分。經云。知一切衆生與諸如來同一體性者。三乘菩薩。知一切衆生。同有如來佛性理性。此經知一切衆生。同有如來一切種智之性。如經下文。有經卷如三千大千世界。內在小衆生身中。有人成佛。破此微塵。出此經卷。言微塵許大衆生。皆有佛一切種智故。菩薩成佛化之。總得如來一切種智故。達理之智。名一切智。差別智。名一切種智。

菩薩既得行清淨已。復獲十種增勝法。何等為十。一者他方諸佛皆悉護念。二者善根增勝超諸等列。三者善能領受佛加持力。四者常得善人為所依怙。五者安住精進恆不放逸。六者知一切法平等無異。七者心恆安住無上大悲。八者如實觀法出生妙慧。九者能善修行巧妙方便。十者能知如來方便之力。佛子。是為菩薩十增勝法。

第八菩薩既得行清淨已下。至十增勝法。有八行經。明昇進轉增分。

佛子。菩薩有十種清淨願。何等為十。一願成熟衆生無有疲倦。二願具行衆善淨諸世界。三願承事如來常生尊重。四願護持正法不惜軀命。五願以智觀察入諸佛土。六願與諸菩薩同一體性。七願入如來門了一切法。八願見者生信無不獲益。九願神力住世盡未來劫。十願具普賢行。淨治一切種智之門。佛子。是為菩薩十種清淨願。

第九佛子已下。至是為菩薩十種清淨願。有七行半經。明大願成行利生分。佛子。菩薩住十種法。令諸大願皆得圓滿。何等為十。一者心無疲厭。二者具大莊嚴。三者念諸菩薩殊勝願力。四者聞諸佛土悉願往生。五者深心長久盡未來劫。

六者願悉成就一切衆生。七者住一切劫不以為勞。八者受一切苦不生厭離。九者於一切樂心無貪著。十者常勤守護無上法門。

第十佛子已下。至守護無上法門。有七行經。明行十法令大願圓滿分。經云。聞諸佛土悉願往生者。不出塵中。智徧現應。供養十方一切諸佛。而無來去。佛子。菩薩滿足如是願時。即得十種無盡藏。何等為十。所謂普見諸佛無盡藏。總持不忘無盡藏。決了諸法無盡藏。大悲救護無盡藏。種種三昧無盡藏。滿衆生心廣大福德無盡藏。演一切法甚深智慧無盡藏。報得神通無盡藏。住無量劫無盡藏。入無邊世界無盡藏。佛子。是為菩薩十無盡藏。菩薩得是十種藏已。福德具足。智慧清淨。於諸衆生隨其所應而為說法。佛子。菩薩云何於諸衆生隨其所應而為說法。

第十一佛子菩薩滿足如是願已下。至如應說法。有九行經。明十種無盡藏分。所謂知其所作。知其因緣。知其心行。知其欲樂。貪欲多者。為說不淨。瞋恚多者。為說大慈。愚癡多者。教勤觀察。二毒等者。為說成就勝智法門。樂生死者。為說三苦。若著處所。說處空寂。心懈怠者。說大精進。懷我慢者。說法平等。

多詔誑者。為說菩薩其心質直。樂寂靜者。廣為說法令其成就。菩薩如是隨其所應而為說法。為說法時。文相連屬。義無舛謬。觀法先後。以智分別。是非審定。不違法印。次第建立無邊行門。令諸衆生斷一切疑。善知諸根。入如來教。證真實際。知法平等。斷諸法愛。除一切執。常念諸佛。心無暫捨。了知音聲體性平等。於諸言說。心無所著。巧說譬喻。無相違反。悉令得悟一切諸佛。隨應普現平等智身。菩薩如是為諸衆生而演說法。則自修習增長義利。不捨諸度。具足莊嚴波羅蜜道。

第十二所謂知其所作已下。至具足莊嚴波羅蜜道。有十六行經。明菩薩知根利益分。

是時菩薩為令衆生心滿足故。內外悉捨而無所著。是則能淨檀波羅蜜。具持衆戒而無所著。永離我慢。是則能淨尸波羅蜜。悉能忍受一切諸惡。於諸衆生其心平等。無有動搖。譬如大地能持一切。是則能淨忍波羅蜜。普發衆業常修靡懈。諸有所作恆不退轉。勇猛勢力無能制伏。於諸功德不取不捨。而能滿足一切智門。是則能淨精進波羅蜜。於五欲境無所貪著。諸次第定悉能成就。常正思惟不住不

出。而能銷滅一切煩惱。出生無量諸三昧門。成就無邊大神通力。逆順次第入諸三昧。於一三昧門。入無邊三昧門。悉知一切三昧境界。與一切三昧三摩鉢底智印不相違背。能速入於一切智地。是則能淨禪波羅蜜。於諸佛所聞法受持。近善知識承事不倦。常樂聞法心無厭足。隨所聽受如理思惟。入真三昧離諸僻見。善觀諸法得實相印。了知如來無功用道。乘普門慧。入於一切智智之門。永得休息。是則能淨般若波羅蜜。示現一切世間作業。教化衆生而不厭倦。隨其心樂而為現身。一切所行皆無染著。或現凡夫或現聖人所行之行。或現生死。或現涅槃。善能觀察一切所作。示現一切諸莊嚴事而不貪著。徧入諸趣。度脫衆生。是則能淨方便波羅蜜。盡成就一切衆生。盡莊嚴一切世界。盡供養一切諸佛。盡通達無障礙法。盡修行徧法界行。身恆住盡未來劫。智盡知一切心念。盡覺悟流轉還滅。盡示現一切國土。盡證得如來智慧。是則能淨願波羅蜜。具深心力。無有雜染故。具深信力。無能摧伏故。具大悲力。不生疲厭故。具大慈力。所行平等故。具總持力。能以方便持一切義故。具辯才力。令一切衆生歡喜滿足故。具波羅蜜力。莊嚴大乘故。具大願力。永不斷絕故。具神通力。出生無量故。具加持力。令信

解領受故。是則能淨力波羅蜜。知貪欲行者。知瞋恚行者。知愚癡行者。知等分行者。知修學地行者。一念中知無邊衆生行。知無邊衆生心。知一切法真實。知一切如來力。普覺悟法界門。是則能淨智波羅蜜。佛子。菩薩如是清淨諸波羅蜜時。圓滿諸波羅蜜時。不捨諸波羅蜜時。住大莊嚴菩薩乘中。隨其所念一切衆生。皆為說法。令增淨業而得度脫。墮惡道者。教使發心。在難中者。令勤精進。多貪衆生。示無貪法。多瞋衆生。令行平等。著見衆生。為說緣起。欲界衆生。教離欲恚惡不善法。色界衆生。為其宣說毘鉢舍那。無色界衆生。為其宣說微妙智慧。二乘之人。教寂靜行。樂大乘者。為說十力廣大莊嚴。如其往昔初發心時。見無量衆生墮諸惡道。大師子吼作如是言。我當以種種法門。隨其所應而度脫之。菩薩具足如是智慧。廣能度脫一切衆生。佛子。菩薩具足如是智慧。令三寶種永不斷絕。

第十三是時已下。至令三寶種永不斷絕。有五十二行半經。明行十波羅蜜利益衆生諸對治分。經云。諸次第定者。色界四禪。菩薩次第能入。於無色界四禪。菩薩悉能順入。或超間入出。如涅槃經闍維分說。從初禪入。三禪出。空處入。

無所有出。非想處入。識處出。如是超間。如是次第。如此經方網三昧。一方入定十方起。十方入定一方起等。具如十信位中說。三摩鉢底智印者。明寂用同起。印諸萬法。無不明了。如大海水而現萬像。淨智普印一切萬法。皆能了知。而無能所。亦無作者。經云。入眞三昧者。無三界及二乘染淨沈掉是也。離諸僻見者。有無二見是。內見外見。身見邊見。戒取見取等總是。乃至六十二見是。六十二見者。於一切法上。計有四見。一常。二無常。三亦常亦無常。四非常非無常。於五陰上。各有四見。四五十。三世五陰上。合爲六十。本二見。共爲六十二見。一切僻見。不離此也。經云。善觀諸法得實相印者。以無作無依無相大智印。印諸萬法。起唯法起。無有無明三世計著。名實相印。普門慧者。徧知衆生諸根及法智。一切智智。種種差別智也。色界衆生爲住定故。教令起觀。修無相觀者。教微妙智慧。爲相不當情。智慧利故。

所以者何。菩薩摩訶薩教諸衆生發菩提心。是故能令佛種不斷。常爲衆生開闡法藏。是故能令法種不斷。善持教法無所乖違。是故能令僧種不斷。復次悉能稱讚一切大願。是故能令佛種不斷。分別演說因緣之門。是故能令法種不斷。常勤修

習六和敬法。是故能令僧種不斷。復次於衆生田中下佛種子。是故能令佛種不斷。護持正法不惜身命。是故能令法種不斷。統理大眾無有疲倦。是故能令僧種不斷。復次於去來今佛所說之法所制之戒。皆悉奉持心不捨離。是故能令佛法僧種永不斷絕。菩薩如是紹隆三寶。一切所行無有過失。隨有所作。皆以迴向一切智門。是故三業皆無瑕玷。無瑕玷故。所作衆善。所行諸行。教化衆生隨應說法。乃至一念無有錯謬。皆與方便智慧相應。悉以向於一切智智無空過者。菩薩如是修習善法。念念具足十種莊嚴。

第十四所以者何已下。至念念具足十種莊嚴。可有十八行經。明令三寶種永不斷絕分。六和敬法者。一身。二口。三意。四戒。五施。六見。名爲六和敬法。於衆生田中下佛種子者。示一切衆生菩提理智故。及微少善根爲勝緣故。何者爲十。所謂身莊嚴。隨諸衆生所應調伏而為示現故。語莊嚴。斷一切疑皆令歡喜故。心莊嚴。於一念中入諸三昧故。佛刹莊嚴。一切清淨離諸煩惱故。光明莊嚴。放無邊光普照衆生故。衆會莊嚴。普攝衆會皆令歡喜故。神通莊嚴。隨衆生心自在示現故。正教莊嚴。能攝一切聰慧人故。涅槃地莊嚴。於一處成道周徧

十方悉無餘故。巧說莊嚴。隨處隨時隨其根器為說法故。菩薩成就如是莊嚴。於念念中身語意業皆無空過。悉以迴向一切智門。若有衆生見此菩薩。當知亦復無空過者。以必當成阿耨多羅三藐三菩提故。若聞名。若供養。若同住。若憶念。若隨出家。若聞說法。若隨喜善根。若遙生欽敬。乃至稱揚。讚歎名字。皆當得阿耨多羅三藐三菩提。佛子。譬如有藥。名為善見。衆生見者。衆毒悉除。菩薩如是成就此法。衆生若見。諸煩惱毒皆得除滅。善法增長。佛子。菩薩摩訶薩住此法中。勤加修習。以智慧明。滅諸癡闇。以慈悲力。摧伏魔軍。以大智慧及福德力。制諸外道。以金剛定。滅除一切心垢煩惱。以精進力。集諸善根。以淨佛土諸善根力。遠離一切惡道諸難。以無所著力。淨智境界。以方便智慧力。出生一切菩薩諸地諸波羅蜜。及諸三昧六通三明四無所畏悉令清淨。以一切善法力。成滿一切諸佛淨土無邊相好。身語及心具足莊嚴。以智自在觀察力。知一切如來力無所畏不共佛法。悉皆平等。以廣大智慧力。了知一切智智境界。以往昔誓願力。隨所應化現佛國土。轉大法輪。度脫無量無邊衆生。

第十五何者爲十已下。至度脫無量無邊衆生。有三十行經。明以十種莊嚴令

見者發心無空過分。六通前已釋訖。如十通品說十通。如經具明。佛子。菩薩摩訶薩勤修此法。次第成就諸菩薩行。乃至得與諸佛平等。於無邊世界中為大法師。護持正法。一切諸佛之所護念。守護受持廣大法藏。獲無礙辯。深入法門。於無邊世界大眾之中。隨類不同。普現其身。色相具足。最勝無比。以無礙辯。巧說深法。其音圓滿。善巧分布故。能令聞者入於無盡智慧之門。知諸衆生心行煩惱而為說法。所出言音具足清淨故。一音演暢。能令一切皆生歡喜。其身端正有大威力故。處於衆會無能過者。善知衆心故。能普現身。善巧說法故。音聲無礙。得心自在故。巧說大法無能沮壞。得無所畏故。心無怯弱。於法自在故。無能過者。於智自在故。無能勝者。般若波羅蜜自在故。所說法相不相違背。辯才自在故。隨樂說法相續不斷。陀羅尼自在故。決定開示諸法實相。辯才自在故。隨所演說能開種種譬喻之門。大悲自在故。勤誨衆生心無懈怠。大慈自在故。放光明網悅可衆心。菩薩如是處於高廣師子之座。演說大法。唯除如來。及勝願智諸大菩薩。其餘衆生。無能勝者。無見頂者。無映奪者。欲以難問令其退屈。無有是處。佛子。菩薩摩訶薩得如是自在力已。

第十六佛子已下。至如是在力已。有二十三行經。明菩薩初發心。得與佛平等法。堪爲大法師分。

假使有不可說世界量廣大道場。滿中衆生。一一衆生威德色相。皆如三千大千世界主。菩薩於此纔現其身。悉能映蔽如是大衆。以大慈悲安其怯弱。以深智慧察其欲樂。以無畏辯爲其說法。能令一切皆生歡喜。何以故。佛子。菩薩摩訶薩。成就無量智慧輪故。成就無量巧分別故。成就廣大正念力故。成就無盡善巧慧故。成就決了諸法實相陀羅尼故。成就無邊際菩提心故。成就無錯謬妙辯才故。成就得一切佛加持深信解故。成就普入三世諸佛衆會道場智慧力故。成就知三世諸佛同一體性清淨心故。成就三世一切如來智。一切菩薩大願智。能作大法師。開闡諸佛正法藏。及護持故。

第十七假使有不可說世界廣大道場已下。至及護持法故。有十三行半經。明處衆無畏。說法自在。身無映蔽分。

爾時法慧菩薩。欲重宣其義。承佛神力。而說頌言

第十八爾時已下。可一行經。明法慧以頌歎法分。

心住菩提集衆福	常不放逸植堅慧	正念其意恆不忘	十方諸佛皆歡喜
念欲堅固自勤勵	於世無依無退怯	以無諍行入深法	十方諸佛皆歡喜
佛歡喜已堅精進	修行福智助道法	入於諸地淨衆行	滿足如來所說願
如是而修獲妙法	既得法已施群生	隨其心樂及根性	悉順其宜爲開演
菩薩爲他演說法	不捨自己諸度行	波羅蜜道既已成	常於有海濟群生
晝夜勤修無懈倦	令三寶種不斷絕	所行一切白淨法	悉以迴向如來地
菩薩所修衆善行	普爲成就諸群生	令其破闇滅煩惱	降伏魔軍成正覺
如是修行得佛智	深入如來正法藏	爲大法師演妙法	譬如甘露悉霑灑
慈悲哀愍徧一切	衆生心行靡不知	如其所樂爲開闡	無量無邊諸佛法
進止安徐如象王	勇猛無畏猶師子	不動如山智如海	亦如大雨除衆熱

第十九如此以頌歎法中。有二十行頌。兩行一頌如文。其義自具。隨文稱歎。

時法慧菩薩說此頌已。如來歡喜。大衆奉行

第二十最下一行經。明大衆聞法歡喜奉行分。第四會。夜摩天說十行法門。此之一會。昇夜摩天。是序分。從偈讚品已下。是正說分。動地興供。是流通分。

昇夜摩天宮品第十九

將釋此品。約作三門分別。一釋品名目。二釋品來意。三隨文解釋。一釋品名目者。何故名夜摩天宮。明以處表法。此天名爲時分天。爲此天無日月晦明。以蓮華開爲晝。合爲夜。故名時分天故。爲表十行法門。知時而應物化。不可不知時故。故以時分天。以表知根而對行。不可一向爲也。知是人天種。二乘三乘一乘種。知可以何善根而接引之。故以時分天。以表所行之行。須以知時故。須彌山以表十住之法門。明以從信昇進。離凡夫地故。又表十住之位。初登法頂。至相盡處故。又表須彌處大海中。高八萬四千由旬。非手足所攀緣而昇上故。明初十住之位。非以有心思求觀行攀緣所及。以無思不爲。蕩然智應。萬法無依。方可昇也。此十行位。處夜摩之中。明依空而住。不與人連。十行亦然。依法空而行。知時而益俗也。故處此天而表之也。於兜率天說十迴向。爲明其處居欲界天之處中。又明此天樂知足也。以表十迴向。以迴正智處俗利生。處大悲門。饒益一切。於諸境界無所貪求。故處此天以爲所表。昇他化天說十地法門者。超

過化樂。明至欲界際。表十地自在。超昇化樂。至欲界之頂。化心魔王。至欲盡際故。昇第三禪說佛華法門。明普賢行滿。表以行法悅。悅無盡衆生故。又彰第四禪是佛位故。此約進修昇降。表法且如是安立。然其理智。一一徧周。無去來也。以此皆云不離菩提道場普光明殿。而昇忉利夜摩兜率等。如第三禪。超初禪二禪者。明位位倍勝故。此一會未有來文。是瓔珞本業經。如來領聲聞菩薩衆。向菩提樹下。說往昔於此菩提樹下。初成正覺時。說法界經。一一排次。至第三禪故。是故於此夜摩天以表十行。第二釋品來意者。前明十住昇進以昇須彌之頂。此明十行之昇進以至夜摩。以次此品須來。第三隨文釋義者。於中大意。義分爲二。一長科經意。二隨文解釋。

爾時如來威神力故。十方一切世界。一一四天下南閻浮提。及須彌頂上。皆見如來處於衆會。彼諸菩薩。悉以佛神力故。而演說法。莫不自謂恆對於佛。爾時世尊。不離一切菩提樹下。及須彌山頂。而向於彼夜摩天宮寶莊嚴殿。時夜摩天王。遙見佛來。即以神力。於其殿內。化作寶蓮華藏師子之座。百萬層級以為莊嚴。百萬金網以為交絡。百萬華帳。百萬鬘帳。百萬香帳。百萬寶帳。彌覆其上。華

蓋鬘蓋香蓋寶蓋。各亦百萬。周迴布列。百萬光明而為照耀。百萬夜摩天王恭敬頂禮。百萬梵王踊躍歡喜。百萬菩薩稱揚讚歎。百萬天樂。各奏百萬種法音。相續不斷。百萬種華雲。百萬種鬘雲。百萬種莊嚴具雲。百萬種衣雲。周而彌覆。百萬種摩尼雲。光明照耀。從百萬種善根所生。百萬諸佛之所護持。百萬種福德之所增長。百萬種深心。百萬種誓願之所嚴淨。百萬種行之所生起。百萬種法之所建立。百萬種神通之所變現。恆出百萬種言音。顯示諸法。時彼天王敷置座已。向佛世尊曲躬合掌。恭敬尊重而白佛言。善來世尊。善來善逝。善來如來應正等覺。唯願哀愍。處此宮殿。時佛受請。即昇寶殿。一切十方。悉亦如是。爾時天王。即自憶念過去佛所種善根。承佛神力。而說頌言。

名稱如來聞十方	諸吉祥中最無上	彼曾入此摩尼殿	是故此處最吉祥
寶王如來世間燈	諸吉祥中最無上	彼曾入此清淨殿	是故此處最吉祥
喜目如來見無礙	諸吉祥中最無上	彼曾入此莊嚴殿	是故此處最吉祥
然燈如來照世間	諸吉祥中最無上	彼曾入此殊勝殿	是故此處最吉祥
饒益如來利世間	諸吉祥中最無上	彼曾入此無垢殿	是故此處最吉祥

善覺如來無有師 諸吉祥中最無上 彼曾入此寶香殿 是故此處最吉祥
勝天如來世中燈 諸吉祥中最無上 彼曾入此妙香殿 是故此處最吉祥
無去如來論中雄 諸吉祥中最無上 彼曾入此普眼殿 是故此處最吉祥
無勝如來具衆德 諸吉祥中最無上 彼曾入此善嚴殿 是故此處最吉祥
苦行如來利世間 諸吉祥中最無上 彼曾入此普嚴殿 是故此處最吉祥
如此世界中夜摩天王。承佛神力。憶念往昔諸佛功德。稱揚讚歎。十方世界夜摩
天王。悉亦如是歎佛功德。爾時世尊入摩尼莊嚴殿。於寶蓮華藏師子座上結跏趺
坐。此殿忽然廣博寬容。如其天衆諸所住處。十方世界。悉亦如是。

第一長科經意者。此一品四十九行經中。約作十段長科。一。爾時如來威神
力故已下。至恆對於佛。有三行半經。明十方同見如來不離其處分。二。爾時已
下。至寶莊嚴殿。可有兩行經。明不離十方一切菩提場普光明殿。而昇夜摩天分。
三。時夜摩天王已下。至時彼天王敷置座已。有十四行半經。明時分天王遙見佛
來。化座莊嚴及恭敬分。四。向佛世尊已下。至處此宮殿。可兩行半經。明時分
天王請佛入殿昇座分。五。時佛受請已下。至悉亦如是。可有一行經。明如來受

請。都結十方同然分。六。爾時天王已下。有一行半經。明天王憶昔往因。說頌歎佛分。七。說頌之中。有二十行頌。歎十如來曾來入此天宮分。八。如此世界已下。至歎佛功德。有兩行半經。明十方同此一時歎佛分。九。爾時世尊已下。至諸所住處。可兩行半經。明如來受請入殿廣博寬容分。十。十方世界悉亦如是。此總結十方同此分。第二隨文解義者。初爾時已下。至恆對於佛。明十方一切處恆徧滿。無增減故。言不離菩提樹須彌頂而昇夜摩天者。明智徧一切處而示其身。非去來故。云遙見佛來者。明從十住向十行位故。即以神力化座者。明行位依空智而所成。無能所之建立故。以座表行。號曰蓮華。明無作行成。無所染著故。藏者含容義。明無行之行。含藏衆善故。師子者。明無畏也。以無爲之理智。處生死而無畏故。此依主爲座名。百萬層級者。明十住十千。十行百萬。明隨位昇進階級故。百萬金網以爲交絡者。明此位中以行網教網化衆生故。此爲報得依果故。十住十千。十行百萬。明昇進也。華鬘香寶及四種帳。明以四攝法方便行。含攝衆生故。又四種蓋。明以四無量心慈悲喜捨。覆蔭衆生故。百萬光明而爲照耀者。明以智眼觀根而攝化故。天王者。行自在也。恭敬頂禮者。行行無慢也。

梵王踊躍者。淨行利生。見求乞者。歡喜無厭也。百萬菩薩稱揚者。明以行濟物。衆聖歡喜稱歎也。天樂奏音者。明善能說法所招果也。四種雲。以行慈覆俗。前云蓋。後云四種雲。明約器大小覆育故。摩尼雲亦然。隨根大小。照燭與益故。百萬善根所生。明已上莊嚴。皆約行中善根所生故。爲行能利物積善。即得諸佛覆護。衆福所嚴。已下如文可解。云善來善逝者。善滅衆惡苦災。逝者度衆生之離縛。時佛受請昇座者。明昇進正入十行位故。已上望佛自德。十方恆自徧周。今作昇降者。總約衆生進修昇降故。二十行頌中。歎十佛昔曾入此殿。明今所入十行理智。與古無殊。此十如來。還是約行昇進所成之號。前十住位昇須彌頂。十如來名號。亦是隨位會古之號。明所入之法。不異古今諸佛故。如十住位中須彌頂上帝釋宮中遙見佛來。即於殿中安置普光明藏師子之座。爲明初入如來智慧中生。即以方便三昧之門。名安置普光明藏。即明智慧照耀法界藏故。今此十行位時分天王遙見佛來。化作寶蓮華師子之座者。明以行華。設其教網。灑諸衆生。令人如來智之境界藏故。蓮華表行無著義故。化座者。明行體以依十住智慧虛無法身安立也。所作如化也。以茲所表。末後五行經。都結十方同時歎佛。如來入

殿。其殿包容如天所住者。明入位昇進。自智寬容。方知佛境故。

大方廣佛新華嚴經論卷第三十六終

大方廣佛新華嚴經合論卷第三十七

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

夜摩天宮偈讚品第二十

將釋此品。約作三門分別。一釋品名目。二釋品來意。三隨文釋義。第一釋品名目者。明昇夜摩天宮。以說十行之法。此品以功德林等十菩薩衆。各各以當位之行。以偈都讚當位之法故。名偈讚品。第二釋品來意者。明欲說十行之法。先須偈都讚十行之中因果法門故。此品須來。若不先舉所行之因果。十行有何依成。第三隨文釋義者。於此一品之中。約作二門分別。一長科經意。二隨文解釋。第一長科經意者。約作五段長科。

爾時佛神力故。十方各有一大菩薩。一一各與佛刹微塵數菩薩俱。從十萬佛刹微塵數國土外諸世界中。而來集會。其名曰。功德林菩薩。慧林菩薩。勝林菩薩。

無畏林菩薩。慚愧林菩薩。精進林菩薩。力林菩薩。行林菩薩。覺林菩薩。智林菩薩。此諸菩薩所從來國。所謂親慧世界。幢慧世界。寶慧世界。勝慧世界。燈慧世界。金剛慧世界。安樂慧世界。曰慧世界。淨慧世界。梵慧世界。此諸菩薩。各於佛所淨修梵行。所謂。常住眼佛。無勝眼佛。無住眼佛。不動眼佛。天眼佛。解脫眼佛。審諦眼佛。明相眼佛。最上眼佛。紺青眼佛。是諸菩薩。至佛所已。頂禮佛足。隨所來方。各化作摩尼藏師子之座。於其座上結跏趺坐。

第一爾時佛神力故已下。至結跏趺坐。有十三行半經。明隨位菩薩功德林等十菩薩。並陳自行佛因果來集分。第二隨文釋義者。於此分中。義分爲三。一釋菩薩名。及配隨位進修之因果。二釋刹土遠近之意。三釋菩薩各各同號徧周。第一釋菩薩名。及配隨位進修之因果者。約有十種因果。第一功德林菩薩者。如十住位中初生佛智慧家故。菩薩名法慧及財慧等。此位明從慧行行。福智二報廣多故。以林爲名也。又林者。廣多義。覆蔭義。莊嚴義。身幹枝條華葉果實相資義。明行位菩薩。以無性智慧。莊嚴萬行枝條。大悲爲葉。覆蔭攝化一切衆生。皆令自他菩提華果悉開發故。如川澤有林衆鳥歸。若人有行多人依。是故十行菩薩目

之名林。此當歡喜行。主檀波羅蜜門。如善財十行之初。善知識名爲善見。在林
中經行。亦如此也。國名三眼者。如此位佛果號爲眼也。國名親慧世界者。明此
十行親從佛慧所生爲因。亦常與一切衆生以爲親近。佛果號爲常住眼佛。爲親從
佛智慧生故。所有知根利俗。直令得其常住之智眼故。明自得如來智慧之眼。所
有利生。亦令他得智眼故。明以如來智慧觀根利生之智。即是當位佛果也。功德
林。是表所行行之人。親慧世界。是當位所修行智慧之因。常住眼佛。是當位知
根見解之果也。與根本智相應。名常住眼佛。第二慧林菩薩者。明智慧如林廣多
義故。此是饒益行。以智慧饒益一切衆生。令不迷故。行戒波羅蜜。此位以智慧
爲戒體故。如善財童子十行中善知識釋天童子。行戒波羅蜜。以算法相法印法。
即安置村營城邑吉凶之地。是智慧故。十住之中。以法身爲戒體。此十行之中。
以智慧爲戒體故。幢慧世界。是所修行因。以慧爲戒體。於生死中不傾動故。無
勝眼佛。是所行之果。以慧眼知根。餘無勝故。第三勝林菩薩者。此是無違逆行。
主忍波羅蜜。諸行之中。忍行最在初。無忍不成行也。故號勝林菩薩。如善財童
子於此位中。善知識是優婆夷。名爲具足。爲忍波羅蜜。總攝衆行。慈悲喜捨。

總在其中。明優婆夷者。表慈悲行也。素服被髮。是戒忍之相。處其一室。室開四門。表慈育衆生四攝法也。十千侍女。萬行具也。以一小器濟惠無窮者。表離慢自高。四攝無限故。明一一波羅蜜。互含用故。勝林菩薩。是行行之人。寶慧世界。是所修行之法。明以忍爲衆行之寶。可貴重故。無住眼佛。即是忍中之佛果也。明雖行忍行。而不念所行也。第四無畏林菩薩者。明常行精進。即於生死利人天之無畏也。主無屈撓行。爲以智慧知時知法知根利物。不撓其事。不滯其功故。如善財善知識明智居士。是此位中善知識也。爲以明智利衆生。即行無屈撓故。住大興城。是精進義故。於市肆衢道者。明饒益廣多無限利益故。須臾繫念作意方便故。仰視虛空。隨所須物。惠利衆生。皆從空下者。明智如空。應智念故。空爲智本。智不異空故。是故觀空物隨智現也。是故空者衆法之本。以此觀之。明一切功德。總從空智而有。無畏林菩薩者。是此位行行之人。勝慧世界。是修行之法。不動眼佛。是此位中之佛果故。明精進之位。不隨物變。故佛號不動眼故。於境不動。名爲精進。第五慚愧林菩薩。是無癡亂行。主禪波羅蜜。爲具慚愧而行禪。爲禪定發慧。即行無癡亂故。如善財知識寶髻長者。是此位中善

知識也。在於市中。明行中禪體。鬧而恆寂。執善財手。將詣所居之宅。明引接也。明於生死市中引接。將詣所居智果故。明觀果知因。其宅寶嚴十層八門。院有八門。閣有十層。八門。明八正道。十層之閣。約十波羅蜜之報。一如十度之行。從下向上排之。自具法則。至文方明。此約禪體總收萬行。慚愧林菩薩。是此位所修行之人。燈慧世界。是所行之法。爲定能起慧明照物。故世界名燈也。天眼佛者。是此位佛果也。爲定能淨諸根故。號天眼佛。第六精進林菩薩。此是善現行。主般若波羅蜜門。爲以般若善現衆行。以益含生故。號精進林。如善財此位中善知識。號普眼長者。明初救身命。次施飲食。後與說法一一隨根。明智慧成就故。精進林。是修行之人。金剛慧世界。是修行之法。明智慧破煩惱。名金剛故。解脫眼佛。是此位之佛果。第七力林菩薩。是無著行。主方便波羅蜜。明以方便處俗利生。同其行流。處世無著。成大悲行。是爲力林也。以真入俗。處纏不污。是故名爲力林。如善財此位善知識。號無厭足王。爲行大悲。自化現身作諸不善。還自化其身追捉治罰。或斷命根苦當治之。令實衆生懼而斷惡。救護衆生愛而不捨。名無厭足。力林菩薩。是能行行之人。安樂慧世界。是所修之

法。審諦眼佛。是此位果也。爲此位是成大慈悲門。故名安樂世界。約安樂衆生得名。佛號審諦眼者。審知衆生應何法化故。方始調伏。第八行林菩薩。是難得行。主願波羅蜜。難得能得。名爲行林。此智位難可昇故。名難得能得。如善財童子此位善知識。王名大光。是第八智隨大願。滿衆生意。行大饒益。普施衆生世間樂具。一切智寶。悉皆施之。行林菩薩。是能行行之人。日慧世界。是所修之法。此位智體增明。世界名日慧。明相眼佛。是此位之果。爲此位智體增明。佛果號明相眼佛。第九覺林菩薩。是善法行。主力波羅蜜。如善財此位善知識。號不動優婆夷。是第九法師位。何故爲女身。爲明處法師位時。貞潔慈悲柔軟。以女表之。此女發心。已經閻浮提微塵劫。自發心來。心無一念五欲之想。明貞潔慈悲柔軟。是法師之德也。是故此菩薩號曰覺林。主力波羅蜜。覺林菩薩。是行行之人。淨慧世界。是修行之法。最上眼佛。是所修行之果。爲智慧淨故。佛號最上眼。第十智林菩薩。是眞實慧行故。主智波羅蜜。在此名位相似可知。如善財此位知識。號出家外道。名爲徧行。明得智自在。能同邪見。攝諸邪見。云三千之境。九十六種外道。我皆爲之。智林菩薩。是能修行之人。梵慧世界。是

所修之法。紺青眼佛。是此位之果。紺青是十行之智一終之滿。明淨照燭之極故。第二釋刹土遠近之意。經云。十方一一各與佛刹微塵數菩薩俱。從十方十萬佛刹微塵數國土之外諸世界中而來集會者。十住云百佛刹微塵。此位云十萬者。明進昇智慧之增廣。迷心及諸境。爲塵之量。迷執所居。名之爲國。心隨境轉。名之爲諸國土之外。執亡智契。名之爲來。明智徧周。境無不達。故號菩薩。一一菩薩例然。總明達迷智徧。第三釋各各同號菩薩徧周者。明心迷諸境。塵表無明廣多故。心悟智通。遐周刹海。一切種智無不同其見故。即各各名號徧周。明迷時無境不惑。悟已無境不智。是諸菩薩已下。頂禮佛足。明致敬昇座。化座摩尼藏。表十行處生死而化衆生。行常無垢故。摩尼座者。離垢寶也。藏者。含藏義。師子者。無畏也。此明凡行有染。聖行無垢也。師子依主立名故。總明修行者智德所行之法。

如此世界中。夜摩天上。菩薩來集。一切世界。悉亦如是。其諸菩薩世界如來所有名號。悉等無別。

第二如此世界已下。至悉等無別。可兩行經。都舉十方世界菩薩來集此分。

爾時世尊。從兩足上放百千億妙色光明。普照十方一切世界。夜摩宮中佛及大眾。靡不皆現。

第三爾時世尊已下。至靡不皆現。可兩行經。明放光所在分。爾時世尊從兩足踏上放百千億光明者。十信足下輪中放光。十住足指端放光。此十行之中足踏上。明次第隨位昇進表法光。從十千百千億千億妙色光明。總明隨位昇進也。凡足下。足指端。足踏上。總不離所行之行也。

爾時功德林菩薩。承佛威力。普觀十方而說頌言。

第四爾時功德林菩薩一行經。明觀法說頌分。自此長行已下。有十段頌文。是十林菩薩。各各自頌當位所修行之法。以此十法。共成一行。如是一一行中。皆具十行。各各隨自行位中名目下義。即是所讚之法。如文具明。

佛放大光明 普照於十方 悉見天人尊 通達無障礙

佛坐夜摩宮 普徧十方界 此事甚奇特 世間所希有

須夜摩天王 偈讚十如來 如此會所見 一切處咸爾

彼諸菩薩眾 皆同我等名 十方一切處 演說無上法

所從諸世界	名號亦無別	各於其佛所	淨修於梵行
彼諸如來等	名號悉亦同	國土皆豐樂	神力悉自在
十方一切處	皆謂佛在此	或見在人間	或見住天宮
如來普安住	一切諸國土	我等今見佛	處此天宮殿
昔發菩提願	普及十方界	是故佛威力	充徧難思議
遠離世所貪	具足無邊德	故獲神通力	衆生靡不見
遊行十方界	如空無所礙	一身無量身	其相不可得
佛功德無邊	云何可測知	無住亦無去	普入於法界

爾時慧林菩薩。承佛威力。普觀十方而說頌言。

世間大導師	離垢無上尊	不可思議劫	難可得值遇
佛放大光明	世間靡不見	爲衆廣開演	饒益諸群生
如來出世間	爲世除癡冥	如是世間燈	希有難可見
已修施戒忍	精進及禪定	般若波羅蜜	以此照世間
如來無與等	求比不可得	不了法眞實	無有能得見

佛身及神通

自在難思議

無去亦無來

說法度衆生

若有得見聞

清淨天人師

永出諸惡趣

捨離一切苦

無量無數劫

修習菩提行

不能知此義

不可得成佛

不可思議劫

供養無量佛

若能知此義

功德超於彼

無量剎珍寶

滿中施於佛

不能知此義

終不成菩提

爾時勝林菩薩。承佛威力。普觀十方而說頌言。

譬如孟夏月

空淨無雲暎

赫日揚光輝

十方靡不充

其光無限量

無有能測知

有目斯尙然

何況盲冥者

諸佛亦如是

功德無邊際

不可思議劫

莫能分別知

諸法無來處

亦無能作者

無有所從生

不可得分別

一切法無來

是故無有生

以生無有故

滅亦不可得

一切法無生

亦復無有滅

若能如是解

斯人見如來

諸法無生故

自性無所有

如是分別知

此人達深義

以法無性故

無有能了知

如是解於法

究竟無所解

所說有生者 以現諸國土 能知國土性 其心不迷惑

世間國土性 觀察悉如實 若能於此知 善說一切義

爾時無畏林菩薩。承佛威力。普觀十方而說頌言。

如來廣大身 究竟於法界 不離於此座 而徧一切處

若聞如是法 恭敬信樂者 永離三惡道 一切諸苦難

設往諸世界 無量不可數 專心欲聽聞 如來自在力

如是諸佛法 是無上菩提 假使欲暫聞 無有能得者

若有於過去 信如是佛法 已成兩足尊 而作世間燈

若有當得聞 如來自在力 聞已能生信 彼亦當成佛

若有於現在 能信此佛法 亦當成正覺 說法無所畏

無量無數劫 此法甚難值 若有得聞者 當知本願力

若有能受持 如是諸佛法 持已廣宣說 此人當成佛

況復勤精進 堅固心不捨 當知如是人 決定成菩提

爾時慚愧林菩薩。承佛威力。普觀十方。而說頌言。

若人得聞是	希有自在法	能生歡喜心	疾除疑惑網
一切知見人	自說如是言	如來無不知	是故難思議
無有從無智	而生於智慧	世間常暗冥	是故無能生
如色及非色	此二不爲一	智無智亦然	其體各殊異
如相與無相	生死及涅槃	分別各不同	智無智如是
世界始成立	無有敗壞相	智無智亦然	二相非一時
如菩薩初心	不與後心俱	智無智亦然	二心不同時
譬如諸識身	各各無和合	智無智如是	究竟無和合
如阿伽陀藥	能滅一切毒	有智亦如是	能滅於無智
如來無有上	亦無與等者	一切無能比	是故難值遇

爾時精進林菩薩。承佛威力。普觀十方而說頌言。

諸法無差別	無有能知者	唯佛與佛知	智慧究竟故
如金與金色	其性無差別	法非法亦然	體性無有異
衆生非衆生	二俱無眞實	如是諸法性	實義俱非有

譬如未來世 無有過去相 諸法亦如是 無有一切相
 譬如生滅相 種種皆非實 諸法亦復然 自性無所有
 涅槃不可取 說時有二種 諸法亦復然 分別有殊異
 如依所數物 而有於能數 彼性無所有 如是了知法
 譬如算數法 增一至無量 數法無體性 智慧故差別
 譬如諸世間 劫燒有終盡 虛空無損壞 佛智亦如是
 如十方衆生 各取虛空相 諸法亦如是 世間妄分別
 爾時力林菩薩。承佛威力。普觀十方而說頌言。

一切衆生界 皆在三世中 三世諸衆生 悉住五蘊中
 諸蘊業爲本 諸業心爲本 心法猶如幻 世間亦如是
 世間非自作 亦復非他作 而其得有成 亦復得有壞
 世間雖有成 世間雖有壞 了達世間者 此二不應說
 云何爲世間 云何非世間 世間非世間 但是名差別
 三世五蘊法 說名爲世間 彼滅非世間 如是但假名

云何說諸蘊

諸蘊有何性

蘊性不可滅

是故說無生

分別此諸蘊

其性本空寂

空故不可滅

此是無生義

衆生既如是

諸佛亦復然

佛及諸佛法

自性無所有

能知此諸法

如實不顛倒

一切知見人

常見在其前

爾時行林菩薩。承佛威力。普觀十方而說頌言。

譬如十方界

一切諸地種

自性無所有

無處不周徧

佛身亦如是

普徧諸世界

種種諸色相

無住無來處

但以諸業故

說名爲衆生

亦不離衆生

而有業可得

業性本空寂

衆生所依止

普作衆色相

亦復無來處

如是諸色相

業力難思議

了達其根本

於中無所見

佛身亦如是

不可得思議

種種諸色相

普現十方刹

身亦非是佛

佛亦非是身

但以法爲身

通達一切法

若能見佛身

清淨如法性

此人於佛法

一切無疑惑

若見一切法

本性如涅槃

是則見如來

究竟無所住

若修習正念 明了見正覺 無相無分別 是名法王子
爾時覺林菩薩。承佛威力。徧觀十方而說頌言。

譬如工畫師 分布諸彩色 虛妄取異相 大種無差別

大種中無色 色中無大種 亦不離大種 而有色可得

心中無彩畫 彩畫中無心 然不離於心 有彩畫可得

彼心恆不住 無量難思議 示現一切色 各各不相知

譬如工畫師 不能知自心 而由心故畫 諸法性如是

心如工畫師 能畫諸世間 五蘊悉從生 無法而不造

如心佛亦爾 如佛衆生然 應知佛與心 體性皆無盡

若人知心行 普造諸世間 是人則見佛 了佛真實性

心不住於身 身亦不住心 而能作佛事 自在未曾有

若人欲了知 三世一切佛 應觀法界性 一切唯心造

爾時智林菩薩。承佛威力。普觀十方而說頌言。

所取不可取 所見不可見 所聞不可聞 一心不思議

有量及無量	二俱不可取	若有人欲取	畢竟無所得
不應說而說	是爲自欺誑	己事不成就	不令衆歡喜
有欲讚如來	無邊妙色身	盡於無數劫	無能盡稱述
譬如隨意珠	能現一切色	無色而現色	諸佛亦如是
又如淨虛空	非色不可見	雖現一切色	無能見空者
諸佛亦如是	普現無量色	非心所行處	一切莫能覩
雖聞如來聲	音聲非如來	亦不離於聲	能知正等覺
菩提無來去	離一切分別	云何於是中	自言能得見
諸佛無有法	佛於何有說	但隨其自心	謂說如是法

第五從初頌已下。有十段經。明十行之中。各申自行法門因果分。已下如名之義。各歎當位所行之法。達名知法可知。

十行品第二十一

將釋此品。約作三門分別。一釋品名目。二釋品來意。三隨文釋義。第一釋

品名目者。此品正說十種行門。名爲十行品。第二釋品來意者。此夜摩天宮本意說十行品。爲表此天蓮華開爲晝合爲夜。爲此天光自相照及。無有日月。但看蓮華開合而辨晝夜。名爲時分天。夜摩者梵語也。如此位菩薩。知衆生心欲開發時。應時引接。未應度者。與作得度因緣。以此處而表之。故於此處說十種行門。前之兩品。且明至此天處而稱歎之。此一品。正說十行門故。此品須來。明前之十住。猶依須彌之頂。此之十行。依空所行。表行無著也。第三隨文解釋中。約分爲二。一長科經意。二隨文解說。第一長科經意者。此之一品經。約作十四段長科。第一爾時已下。至是爲十。有二十五行經。明同號功德林佛。共加持功德林菩薩。正說十行。第二佛子已下。至第一歡喜行。有四十三行經。明正說初歡喜行之法門。第三佛子已下。至第二饒益行。有四十二行經。明饒益行。如是上下總一品。通偈頌。有十四段經。末後兩段長行。初一段。動地興供分。次一段。功德林觀衆說頌分。次二百二行頌。說頌歎法分。一品上下總通爲十四段。如經自有分劑。不煩科文。

爾時功德林菩薩。承佛神力。入菩薩善思惟三昧。入是三昧已。十方各過萬佛剎

微塵數世界外。有萬佛刹微塵數諸佛。皆號功德林。而現其前。告功德林菩薩言。善哉佛子。乃能入此善思惟三昧。善男子。此是十方各萬佛刹微塵數同名諸佛。共加於汝。亦是毘盧遮那如來往昔願力威神之力。及諸菩薩衆善根力。令汝入是三昧而演說法。為增長佛智故。深入法界故。了知衆生界故。所入無礙故。所行無障故。得無量方便故。攝取一切智性故。覺悟一切諸法故。知一切諸根故。能持說一切法故。所謂發起諸菩薩十種行。善男子。汝當承佛威神之力。而演此法。是時諸佛。即與功德林菩薩無礙智。無著智。無斷智。無師智。無礙智。無異智。無失智。無量智。無勝智。無懈智。無奪智。何以故。此三昧力。法如是故。爾時諸佛。各伸右手。摩功德林菩薩頂。時功德林菩薩。即從定起。告諸菩薩言。佛子。菩薩行不可思議。與法界虛空界等。何以故。菩薩摩訶薩學三世諸佛而修行故。佛子。何等是菩薩摩訶薩行。佛子。菩薩摩訶薩有十種行。三世諸佛之所宣說。何等為十。一者歡喜行。二者饒益行。三者無違逆行。四者無屈撓行。五者無癡亂行。六者善現行。七者無著行。八者難得行。九者善法行。十者真實行。是為十。

第一爾時已下。至是爲十。有二十五行經。明同號功德林佛。共加持功德林菩薩。正說十行分。於此分中。約作四門分別。一明三昧名。二明同號佛數。三明諸佛所以共入定菩薩同號。四明同號諸佛來加。第一明三昧名者。何以名善思惟三昧。三昧者。云離沈掉。定之異名。且約禪定中。有四種禪。一愚夫所行禪。二觀察義禪。三念真如禪。四如來禪。今云善思惟三昧者。是觀察義禪。爲審定其法。善須觀察。正念思惟。安立法門。爲後學者。而作法則故。第二明同號佛數者。舉萬佛刹微塵數佛。皆號功德林。明若迷其心境。無明與無限刹塵不殊。若了達心源。智慧功德等十方而無盡。第三明所以與入定菩薩而同號者。以自一心洞曉。與法界福智無差。今此菩薩入此定門。以與一切諸佛契同福慧。遂得同號佛來加持。明與十方諸佛。智慧解行同故。福德功德同故。第四明同號佛來加者。有六種加。一言歎加。以言歎譽故。二毘盧遮那願力加。乘往願故。三毘盧遮那神力加。契佛神力故。四諸菩薩衆善根加。同善根故。五諸佛與智加。得十種無礙智故。六諸佛以手摩頂加。安慰許說法故。已下明功德林菩薩。即從定起。正說十種行門。如下十種行中。以十波羅蜜爲體。

佛子。何等為菩薩摩訶薩歡喜行。佛子。此菩薩為大施主。凡所有物。悉能惠施。其心平等。無有悔吝。不望果報。不求名稱。不貪利養。但為救護一切衆生。攝受一切衆生。饒益一切衆生。為學習諸佛本所修行。憶念諸佛本所修行。愛樂諸佛本所修行。清淨諸佛本所修行。增長諸佛本所修行。住持諸佛本所修行。顯現諸佛本所修行。演說諸佛本所修行。令諸衆生離苦得樂。佛子。菩薩摩訶薩修此行時。令一切衆生歡喜愛樂。隨諸方土有貧乏處。以願力故往生於彼。豪貴大富財寶無盡。假使於念念中。有無量無數衆生。詣菩薩所。白言。仁者。我等貧乏。靡所資贍。飢羸困苦。命將不全。唯願慈悲施我身肉。令我得食以活其命。爾時菩薩即便施之。令其歡喜心得滿足。如是無量百千衆生而來乞求。菩薩於彼曾無退怯。但更增長慈悲之心。以是衆生咸來乞求。菩薩見之倍復歡喜。作如是念。我得善利。此等衆生是我福田。是我善友。不求不請。而來教我入佛法中。我今應當如是修學。不違一切衆生之心。又作是念。願我已作現作當作所有善根。令我未來於一切世界。一切衆生中。受廣大身。以是身肉充足一切飢苦衆生。乃至若有一小衆生未得飽足。願不捨命。所割身肉。亦無有盡。以此善根。願得阿耨

多羅三藐三菩提。證大涅槃。願諸衆生食我肉者。亦得阿耨多羅三藐三菩提。獲平等智。具諸佛法。廣作佛事。乃至入於無餘涅槃。若一衆生心不滿足。我終不證阿耨多羅三藐三菩提。菩薩如是利益衆生。而無我想。衆生想。有想。命想。種種想。補特伽羅想。人想。摩訶婆想。作者想。受者想。但觀法界。衆生界。無邊際法。空法。無所有法。無相法。無體法。無處法。無依法。無作法。作是觀時。不見自身。不見施物。不見受者。不見福田。不見業。不見報。不見果。不見大果。不見小果。爾時菩薩觀去來今一切衆生。所受之身尋即壞滅。便作是念。奇哉衆生。愚癡無智。於生死內受無數身。危脆不停。速歸壞滅。若已壞滅。若今壞滅。若當壞滅。而不能以不堅固身。求堅固身。我當盡學諸佛所學。證一切智。知一切法。為諸衆生說三世平等。隨順寂靜不壞法性。令其永得安隱快樂。佛子。是名菩薩摩訶薩第一歡喜行。

第一歡喜行中。檀波羅蜜為體。有四十三行經。分為五段。一佛子何等為歡喜行已下。至令一切衆生歡喜愛樂。有九行半經。明行檀波羅蜜。學佛所修行分。二隨諸方土有貧乏處已下。至不違一切衆生之心。有十行半經。明此位菩薩見貧

乏之處。誓願生彼富貴家悉捨資財及以身命饒益分。三又作如是念已下。至三藐三菩提。有八行半經。明菩薩於飢餓劫中。作廣大身。捨之濟乏。四菩薩如是已下。至不見大果不見小果。有六行半經。明知真無想分。補特伽羅想。此曰數數取趣。摩訶婆想者。此曰少年。亦曰儒童。意云不分別善惡老少。悉皆施與。五從爾時菩薩觀去來今已下。至第一歡喜行。有七行半經。明觀衆生不堅。自求堅固身。令永安隱分。

佛子。何等為菩薩摩訶薩饒益行。此菩薩護持淨戒。於色聲香味觸心無所著。亦為衆生如是宣說。不求威勢。不求種族。不求富饒。不求色相。不求王位。如是一切皆無所著。但堅持淨戒。作如是念。我持淨戒。必當捨離一切纏縛。貪求熱惱。諸難逼迫。毀謗亂濁。得佛所讚平等正法。佛子。菩薩如是持淨戒時。於一日中。假使無數百千億那由他諸大惡魔。詣菩薩所。一一各將無量無數百千億那由他天女。皆於五欲善行方便。端正姝麗。傾惑人心。執持種種珍玩之具。欲來惑亂菩薩道意。爾時菩薩作如是念。此五欲者。是障道法。乃至障礙無上菩提。是故不生一念欲想。心淨如佛。唯除方便教化衆生。而不捨於一切智心。佛子。

菩薩不以欲因緣故。惱一衆生。寧捨身命。而終不作惱衆生事。菩薩自得見佛已來。未曾心生一念欲想。何況從事。若或從事。無有是處。爾時菩薩但作是念。一切衆生於長夜中。想念五欲。趣向五欲。貪著五欲。其心決定耽染沈溺。隨其流轉。不得自在。我今應當令此諸魔及諸天女一切衆生。住無上戒。住淨戒已。於一切智心無退轉。得阿耨多羅三藐三菩提。乃至入於無餘涅槃。何以故。此是我等所應作業。應隨諸佛如是修學。作是學已。離諸惡行計我無知。以智入於一切佛法。為衆生說。令除顛倒。然知不離衆生有顛倒。不離顛倒有衆生。不於顛倒內有衆生。不於衆生內有顛倒。亦非顛倒是衆生。亦非衆生是顛倒。顛倒非內法。顛倒非外法。衆生非內法。衆生非外法。一切諸法虛妄不實。速起速滅。無有堅固。如夢如影。如幻如化。誑惑愚夫。如是解者。即能覺了一切諸行。通達生死及與涅槃。證佛菩提。自得度。令他得度。自解脫。令他解脫。自調伏。令他調伏。自寂靜。令他寂靜。自安隱。令他安隱。自離垢。令他離垢。自清淨。令他清淨。自涅槃。令他涅槃。自快樂。令他快樂。佛子。此菩薩復作是念。我當隨順一切如來。離一切世間行。具一切諸佛法。住無上平等處。等觀衆生。明

達境界。離諸過失。斷諸分別。捨諸執著。善巧出離。心恆安住無上無說無依無動無量無邊無盡無色甚深智慧。佛子。是名菩薩摩訶薩第一饒益行。

第二饒益行中。以戒波羅蜜爲體。有四十二行經。分爲五段。一佛子何等爲菩薩饒益行已下。至得佛所讚平等正法。有六行半經。明於五塵境界不著分。二佛子菩薩如是持淨戒時已下。至一切智心。有八行經。明魔將天女不能惑亂分。三佛子已下。至無餘涅槃。有八行半經。明菩薩不以五欲惱衆生分。四何以故已下。至令他快樂。有十三行半經。明善自調伏。方能說法令他得樂分。五佛子已下。至饒益行。有六行經。明得離世間行。入甚深智慧分。

佛子。何等爲菩薩摩訶薩無違逆行。此菩薩常修忍法。謙下恭敬。不自害。不他害。不兩害。不自取。不他取。不兩取。不自著。不他著。不兩著。亦不貪求名聞利養。但作是念。我當常爲衆生說法。令離一切惡。斷貪瞋癡。憍慢覆藏。慳嫉詭誑。令恆安住忍辱柔和。佛子。菩薩成就如是忍法。假使有百千億那由他阿僧祇衆生。來至其所。一一衆生。化作百千億那由他阿僧祇口。一一口。出百千億那由他阿僧祇語。所謂不可喜語。非善法語。不悅意語。不可愛語。非仁賢語。

非聖智語。非聖相應語。非聖親近語。深可厭惡語。不堪聽聞語。以是言辭毀辱菩薩。又此衆生。一一各有百千億那由他阿僧祇手。一一手。各執百千億那由他阿僧祇器仗。逼害菩薩。如是經於阿僧祇劫。曾無休息。菩薩遭此極大楚毒。身毛皆豎。命將欲斷。作是念言。我因是苦。心若動亂。則自不調伏。自不守護。自不明了。自不修習。自不正定。自不寂靜。自不愛惜。自生執著。何能令他心得清淨。菩薩爾時復作是念。我從無始劫。住於生死受諸苦惱。如是思惟重自勸勵。令心清淨而得歡喜。善自調攝。自能安住於佛法中。亦令衆生同得此法。復更思惟此身空寂。無我我所。無有真實。性空無一。若苦若樂。皆無所有。諸法空寂。我當解了廣為人說。令諸衆生滅除此見。是故我今雖遭苦毒。應當忍受。為慈念衆生故。饒益衆生故。安樂衆生故。憐愍衆生故。攝受衆生故。不捨衆生故。自得覺悟故。令他覺悟故。心不退轉故。趣向佛道故。是名菩薩摩訶薩第三無違逆行。

第三無違逆行。以忍波羅蜜爲體。有三十行經。分爲三段。一佛子已下。至忍辱柔和。有五行半經。明不害自他。忍辱柔和分。二佛子已下。至令他心得清

淨。有十三行半經。明菩薩身語加害堪忍分。三菩薩爾時已下。至無違逆行。有十行半經。明菩薩觀空成忍分。

佛子。何等為菩薩摩訶薩無屈撓行。此菩薩修諸精進。所謂第一精進。大精進。勝精進。殊勝精進。最勝精進。最妙精進。上精進。無上精進。無等精進。普遍精進。性無三毒。性無憍慢。性不覆藏。性不慳嫉。性無詭誑。性自慚愧。終不為惱一衆生故而行精進。但為斷一切煩惱故而行精進。但為拔一切惑本故而行精進。但為除一切習氣故而行精進。但為知一切衆生界故而行精進。但為知一切衆生生死此生彼故而行精進。但為知一切衆生煩惱故而行精進。但為知一切衆生心樂故而行精進。但為知一切衆生境界故而行精進。但為知一切衆生諸根勝劣故而行精進。但為知一切衆生心行故而行精進。但為知一切法界故而行精進。但為知一切佛法根本性故而行精進。但為知一切佛法平等性故而行精進。但為知三世平等性故而行精進。但為得一切佛法智光明故而行精進。但為證一切佛法智故而行精進。但為知一切佛法一實相故而行精進。但為知一切佛法無邊際故而行精進。但為得一切佛法廣大決定善巧智故而行精進。但為得分別演說一切佛法句義智故而

行精進。佛子。菩薩摩訶薩成就如是精進行已。設有人言。汝頗能為無數世界所有衆生。以一一衆生故。於阿鼻地獄經無數劫備受衆苦。令彼衆生一一得值無數諸佛出興於世。以見佛故。具受衆樂。乃至入於無餘涅槃。汝乃當成阿耨多羅三藐三菩提。能爾不耶。答言。我能。設復有人作如是言。有無量阿僧祇大海。汝當以一毛端滴之令盡。有無量阿僧祇世界盡抹為塵。彼滴及塵。一一數之。悉知其數。為衆生故。經爾許劫。於念念中。受苦不斷。菩薩不以聞此語故。而生一念悔恨之心。但更增上歡喜踊躍。深自慶幸得大善利。以我力故。令彼衆生永脫諸苦。菩薩以此所行方便。於一切世界中。令一切衆生。乃至究竟無餘涅槃。是名菩薩摩訶薩第四無屈撓行。

第四無屈撓行。以精進波羅蜜為體。有三十七行半經。分為三段。一佛子已下。至一切佛法句義故而行精進。有二十二行半經。明菩薩不求世利。為求佛一切智故行精進分。二佛子菩薩摩訶薩已下。至答言我能。有六行經。明菩薩為衆生入地獄受苦無辭勞分。三設復有人已下。至無屈撓行。有八行半經。明菩薩為饒益衆生故。多劫受苦不辭勞分。

佛子。何等為菩薩摩訶薩離癡亂行。此菩薩成就正念。心無散亂。堅固不動。最上清淨。廣大無量。無有迷惑。以是正念故。善解世間一切語言。能持出世諸法言說。所謂能持色法非色法言說。能持建立色自性言說。乃至能持建立受想行識自性言說。心無癡亂。於世間中死此生彼。心無癡亂。入胎出胎。心無癡亂。發菩提意。心無癡亂。事善知識。心無癡亂。勤修佛法。心無癡亂。覺知魔事。心無癡亂。離諸魔業。心無癡亂。於不可說劫修菩薩行。心無癡亂。此菩薩成就如是無量正念。於無量阿僧祇劫中。從諸佛菩薩善知識所。聽聞正法。所謂甚深法。廣大法。莊嚴法。種種莊嚴法。演說種種名句文身法。菩薩莊嚴法。佛神力光明無上法。正希望決定解清淨法。不著一切世間法。分別一切世間法。甚廣大法。離癡翳照了一切衆生法。一切世間共法不共法。菩薩智無上法。一切智自在法。菩薩聽聞如是法已。經阿僧祇劫。不忘不失。心常憶念無有間斷。何以故。菩薩摩訶薩於無量劫修諸行時。終不惱亂一衆生令失正念。不壞正法。不斷善根。心常增長廣大智故。復次此菩薩摩訶薩。種種音聲。不能惑亂。所謂高大聲。麤濁聲。極令人恐怖聲。悅意聲。不悅意聲。諠亂耳識聲。沮壞六根聲。此菩薩聞如

是等無量無數好惡音聲。假使充滿阿僧祇世界。未曾一念心有散亂。所謂正念不亂。境界不亂。三昧不亂。入甚深法不亂。行菩提行不亂。發菩提心不亂。憶念諸佛不亂。觀真實法不亂。化衆生智不亂。淨衆生智不亂。決了甚深義不亂。不作惡業故。無惡業障。不起煩惱故。無煩惱障。不輕慢法故。無有慢法障。不誹謗正法故。無有報障。佛子。如上所說如是等聲。一一充滿阿僧祇世界。於無量無數劫未曾斷絕。悉能壞亂衆生身心一切諸根。而不能壞此菩薩心。菩薩入三昧中住於聖法。思惟觀察一切音聲。善知音聲生住滅相。善知音聲生住滅性。如是聞已。不生於貪。不起於瞋。不失於念。善取其相而不染著。知一切聲皆無所有。實不可得。無有作者。亦無本際。與法界等。無有差別。菩薩如是成就寂靜身語意行。至一切智永不退轉。善入一切諸禪定門。知諸三昧同一體性。了一切法無有邊際。得一切法真實智慧。得離音聲甚深三昧。得阿僧祇諸三昧門。增長無量廣大悲心。是時菩薩於一念中。得無數百千三昧。聞如是聲心不惑亂。令其三昧漸更增廣。作如是念。我當令一切衆生。安住無上清淨念中。於一切智得不退轉。究竟成就無餘涅槃。是名菩薩摩訶薩第五離癡亂行。

第五離癡亂行。以禪波羅蜜爲體。有四十九行經。分爲六段。一佛子已下。至修菩薩行心無癡亂。有十行經。明以正念隨於生死中利生無亂分。二此菩薩已下。至心常憶念無有間斷。有九行經。明菩薩聞持正念不亂分。三何以故已下。至未曾一念心有散亂。有七行半經。明以正念於好惡音聲無散亂分。四所謂正念不亂已下。至而不能壞此菩薩心。有八行半經。明聞法及利生無餘障分。五菩薩入三昧中已下。至等無差別。有五行經。明觀聲無體堪忍分。六菩薩如是成就寂靜身語意行已下。至離癡亂行。有九行經。明身口意淨堪入諸法不離一性分。

大方廣佛新華嚴經合論卷第三十七終

大方廣佛新華嚴經合論卷第三十八

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

十行品第二十一之餘

佛子。何等為菩薩摩訶薩善現行。此菩薩身業清淨。語業清淨。意業清淨。住無所得。示無所得。身語意業。能知三業皆無所有。無虛妄故。無有繫縛。凡所示現。無性無依。住如實心。知無量心自性。知一切法自性。無得無相。甚深難入。住於正位真如法性。方便出生而無業報。不生不滅。住涅槃界。住寂靜性。住於真實無性之性。言語道斷。超諸世間無有所依。入離分別無縛著法。入最勝智真實之法。入非諸世間所能了知出世間法。此是菩薩善巧方便示現生相。佛子。此菩薩作如是念。一切衆生無性為性。一切諸法無為為性。一切國土無相為相。一切三世唯是言說。一切言說。於諸法中無有依處。一切諸法。於言說中亦無依處。

菩薩如是解一切法皆悉甚深。一切世間皆悉寂靜。一切佛法無所增益。佛法不異世間法。世間法不異佛法。佛法世間法。無有雜亂。亦無差別。了知法界體性平等。普入三世。永不捨離大菩提心。恆不退轉化衆生心。轉更增長大慈悲心。與一切衆生作所依處。菩薩爾時復作是念。我不成熟衆生。誰當成熟。我不調伏衆生。誰當調伏。我不教化衆生。誰當教化。我不覺悟衆生。誰當覺悟。我不清淨衆生。誰當清淨。此我所宜。我所應作。復作是念。若我自解此甚深法。唯我一人於阿耨多羅三藐三菩提獨得解脫。而諸衆生盲冥無目。入大險道。為諸煩惱之所纏縛。如重病人恆受苦痛。處貪愛獄。不能自出。不離地獄餓鬼畜生閻羅王界。不能滅苦。不捨惡業。常處癡闇。不見真實。輪迴生死。無得出離。住於八難。衆垢所著。種種煩惱覆障其心。邪見所迷。不行正道。菩薩如是觀諸衆生。作是念言。若此衆生未成熟未調伏。捨而取證阿耨多羅三藐三菩提。是所不應。我當先化衆生。於不可說不可說劫行菩薩行。未成熟者先令成熟。未調伏者先令調伏。是菩薩住此行時。諸天魔梵沙門婆羅門。一切世間乾闥婆阿修羅等。若有得見。暫同住止。恭敬尊重。承事供養。及暫耳聞一經心者。如是所作悉不唐捐。必定

當成阿耨多羅三藐三菩提。是名菩薩摩訶薩第六善現行。

第六善現行。以般若波羅蜜爲體。有四十行半經。分爲四段。一佛子已下。至方便現生相。有十行半經。明知生之無性。示現方便現生分。二佛子已下。至與一切衆生作所依處。有十行經。明菩薩達心境一切法無性無依。而教化衆生與作依處分。三菩薩爾時已下。至不行正道。有十一行經。明念度衆生分。四菩薩如是觀諸衆生已下。至善現行。有九行經。明度衆生未盡。不取自證涅槃分。

佛子。何等爲菩薩摩訶薩無著行。佛子。此菩薩以無著心。於念念中能入阿僧祇世界。嚴淨阿僧祇世界。於諸世界心無所著。往詣阿僧祇諸如來所。恭敬禮拜承事供養。以阿僧祇華。阿僧祇香。阿僧祇鬘。阿僧祇塗香料香。衣服珍寶幢幡妙蓋諸莊嚴具。各阿僧祇以用供養。如是供養。爲究竟無作法故。爲住不思議法故。於念念中見無數佛。於諸佛所心無所著。於諸佛刹亦無所著。於佛相好亦無所著。見佛光明。聽佛說法。亦無所著。於十方世界。及佛菩薩所有衆會。亦無所著。聽佛法已。心生歡喜。志力廣大。能攝能行諸菩薩行。然於佛法亦無所著。此菩薩於不可說劫。見不可說佛出興於世。一一佛所承事供養。皆悉盡於不可說劫心

無厭足。見佛聞法。及見菩薩衆會莊嚴。皆無所著。見不淨世界亦無憎惡。何以故。此菩薩如諸佛法而觀察故。諸佛法中。無垢無淨。無闇無明。無異無一。無實無妄。無安隱無險難。無正道無邪道。菩薩如是深入法界。教化衆生。而於衆生不生執著。受持諸法。而於諸法不生執著。發菩提心住於佛住。而於佛住不生執著。雖有言說。而於言說心無所著。入衆生趣。於衆生趣心無所著。了知三昧能入能住。而於三昧心無所著。往詣無量諸佛國土。若入若見若於中住。而於佛土心無所著。捨去之時亦無顧戀。菩薩摩訶薩以能如是無所著故。於佛法中心無障礙。了佛菩提。證法毘尼。住佛正教。修菩薩行。住菩薩心。思惟菩薩解脫之法。於菩薩住處心無所染。於菩薩所行亦無所著。淨菩薩道。受菩薩記。得受記已。作如是念。凡夫愚癡。無知無見。無信無解。無聰敏行。頑嚚貪著。流轉生死。不求見佛。不隨明導。不信調御。迷誤失錯。入於險道。不敬十力王。不知菩薩恩。戀著住處。聞諸法空。心大驚怖。遠離正法。住於邪法。捨夷坦道。入險難道。棄背佛意。隨逐魔意。於諸有中堅執不捨。菩薩如是觀諸衆生。增長大悲生諸善根。而無所著。菩薩爾時復作是念。我當為一衆生。於十方世界一一國

土。經不可說不可說劫教化成熟。如為一衆生。為一切衆生皆亦如是。終不以此而生疲厭。捨而餘去。又以毛端徧量法界。於一毛端處。盡不可說不可說劫教化調伏一切衆生。如一毛端處。一一毛端處皆亦如是。乃至不於一彈指頃執著於我。起我我所想。於一一毛端處。盡未來劫修菩薩行。不著身。不著法。不著念。不著願。不著三昧。不著觀察。不著寂定。不著境界。不著教化調伏衆生。亦復不著入於法界。何以故。菩薩作是念。我應觀一切法界如幻。諸佛如影。菩薩行如夢。佛說法如響。一切世間如化。業報所持故。差別身如幻。行力所起故。一切衆生如心。種種雜染故。一切法如實際。不可變異故。又作是念。我當盡虛空徧法界。於十方國土中行菩薩行。念念明達一切佛法。正念現前無所取著。菩薩如是觀身無我。見佛無礙。為化衆生。演說諸法。令於佛法發生無量歡喜淨信。救護一切心無疲厭。無疲厭故。於一切世界。若有衆生未成就未調伏處。悉詣於彼方便化度。其中衆生。種種音聲。種種諸業。種種取著。種種施設。種種和合。種種流轉。種種所作。種種境界。種種生。種種歿。以大誓願。安住其中而教化之。不令其心有動有退。亦不一念生染著想。何以故。得無所著無所依故。自利

利他清淨滿足。是名菩薩摩訶薩。第七無著行。

第七無著行。以方便波羅蜜爲體。有六十五行經。分爲六段。一佛子已下。至於於佛法亦無所著。有十二行半經。明菩薩嚴淨佛刹供養諸佛。心無所著分。二此菩薩已下。至能如是無所著故。有十五行經。明菩薩供佛無厭。處事法而常行中無所著分。三於佛法中心無障礙已下。至諸善根而無所著。有十一行經。明觀衆生苦。長自大悲分。四菩薩爾時已下。至何以故。有十行半經。明菩薩常住生死教化衆生無著分。五菩薩作是念已下。至心無疲厭。有九行經。明教化衆生觀法如幻分。六無疲厭故已下。至無著行。有七行半經。明菩薩見未調伏衆生而往彼生分。

佛子。何等為菩薩摩訶薩難得行。此菩薩成就難得善根。難伏善根。最勝善根。不可壞善根。無能過善根。不思議善根。無盡善根。自在力善根。大威德善根。與一切佛同一性善根。此菩薩修諸行時。於佛法中得最勝解。於佛菩提得廣大解。於菩薩願未曾休息。盡一切劫心無疲倦。於一切苦不生厭離。一切衆魔所不能動。一切諸佛之所護念。具行一切菩薩苦行。修菩薩行精勤匪懈。於大乘願恆不退轉。

是菩薩安住此難得行已。於念念中能轉阿僧祇劫生死。而不捨菩薩大願。若有衆生承事供養。乃至見聞。皆於阿耨多羅三藐三菩提得不退轉。此菩薩雖了衆生非有。而不捨一切衆生界。譬如船師。不住此岸。不住彼岸。不住中流。而能運渡此岸衆生至於彼岸。以往返無休息故。菩薩摩訶薩亦復如是。不住生死。不住涅槃。亦復不住生死中流。而能運渡此岸衆生置於彼岸。安隱無畏無憂惱處。亦不於衆生數而有所著。不捨一衆生著多衆生。不捨多衆生著一衆生。不增衆生界。不減衆生界。不生衆生界。不滅衆生界。不盡衆生界。不長衆生界。不分別衆生界。不二衆生界。何以故。菩薩深入衆生界如法界。衆生界法界無有二。無一法中。無增無減。無生無滅。無有無無。無取無依。無著無一。何以故。菩薩了一切法。法界無二故。菩薩如是以善方便入深法界。住於無相。以清淨相莊嚴其身。了法無性。而能分別一切法相。不取衆生。而能了知衆生之數。不著世界而現身佛剎。不分別法而善入佛法。深達義理而廣演言教。了一切法離欲真際。而不斷菩薩道。不退菩薩行。常勤修習無盡之行。自在入於清淨法界。譬如鑽木以出於火。火事無量而火不滅。菩薩如是化衆生事無有窮盡。而在世間常住不滅。非究

竟非不究竟。非取非不取。非依非無依。非世法非佛法。非凡夫非得果。菩薩成就如是難得心。修菩薩行時。不說二乘法。不說佛法。不說世間。不說世間法。不說衆生。不說無衆生。不說垢。不說淨。何以故。菩薩知一切法無染無取。不轉不退故。菩薩於如是寂滅微妙甚深最勝法中修行時。亦不生念我現修此行。已修此行。當修此行。不著蘊界處。內世間。外世間。內外世間。所起大願諸波羅蜜。及一切法。皆無所著。何以故。法界中。無有法名向聲聞乘。向獨覺乘。無有法名向菩薩乘。向阿耨多羅三藐三菩提。無有法名向凡夫界。無有法名向染。向淨。向生死。向涅槃。何以故。諸法無二。無不二故。譬如虛空。於十方中若去來今。求不可得。然非無虛空。菩薩如是觀一切法皆不可得。然非無一切法。如實無異。不失所作。普示修行菩薩諸行。不捨大願調伏衆生。轉正法輪不壞因果。亦不違於平等妙法。普與三世諸如來等。不斷佛種。不壞實相。深入於法。辯才無盡。聞法不著。至法淵底。善能開演。心無所畏。不捨佛住。不違世法。普現世間。而不著世間。菩薩如是成就難得智慧心。修習諸行。於三惡趣拔出衆生。教化調伏。安置二世諸佛道中。令不動搖。復作是念。世間衆生。不知恩報。

更相讎對。邪見執著。迷惑顛倒。愚癡無智。無有信心。隨逐惡友。起諸惡慧。貪愛無明種種煩惱。皆悉充滿。是我所修菩薩行處。設有知恩聰明慧解。及善知識充滿世間。我不於中修菩薩行。何以故。我於衆生無所適莫。無所冀望。乃至不求一縷一毫及以一字讚美之言。盡未來劫修菩薩行。未曾一念自為於己。但欲度脫一切衆生。令其清淨永得出離。何以故。於衆生中為明導者法應如是。不取不求。但為衆生修菩薩道。令其得至安隱彼岸。成阿耨多羅三藐三菩提。是名菩薩摩訶薩第八難得行。

第八難得行。以願波羅蜜為體。有七十行經。分為六段。一佛子已下。至一性善根。有四行經。明此位中十善根分。二此菩薩已下。至得不退轉。有八行半經。明處苦無疲厭分。三此菩薩了衆生非有已下。至何以故。有十行經。明不捨不著衆生界分。四菩薩深入衆生界已下。至非得果。有十三行半經。明菩薩入衆生界不著。而亦不廢常在世間現身度衆生分。五菩薩成就如是已下。至不著世間。有十九行半經。明不說而說法自在分。六菩薩如是已下。至第八難得行。有十四行半經。明行菩薩行不求果報分。

佛子。何等為菩薩摩訶薩善法行。此菩薩為一切世間天人魔梵沙門婆羅門乾闥婆等作清涼法池。攝持正法。不斷佛種。得清淨光明陀羅尼故。說法授記辯才無盡。得具足義陀羅尼故。義辯無盡。得覺悟實法陀羅尼故。法辯無盡。得訓釋言詞陀羅尼故。詞辯無盡。得無邊文句無盡義無礙門陀羅尼故。無礙辯無盡。得佛灌頂陀羅尼灌其頂故。歡喜辯無盡。得不由他悟陀羅尼門故。光明辯無盡。得同辯陀羅尼門故。同辯無盡。得種種義身句身文身中訓釋陀羅尼門故。訓釋辯無盡。得無邊旋陀羅尼故。無邊辯無盡。此菩薩大悲堅固普攝衆生。於三千大千世界。變身金色施作佛事。隨諸衆生根性欲樂。以廣長舌於一音中現無量音。應時說法皆令歡喜。假使有不可說種種業報。無數衆生共會一處。其會廣大充滿不可說世界。菩薩於彼衆會中坐。是中衆生。一一皆有不可說阿僧祇口。一一口。能出百千億那由他音。同時發聲。各別言詞。各別所問。菩薩於一念中悉能領受。皆為酬對。令除疑惑。如一衆會中。於不可說衆會中悉亦如是。復次假使一毛端處。念念出不可說不可說道場衆會。一切毛端處皆亦如是。盡未來劫。彼劫可盡。衆會無盡。是諸衆會。於念念中以各別言辭。各別所問。菩薩於一念中悉能領受。無怖無怯。

無疑無謬。而作是念。設一切衆生以如是語業俱來問我。我為說法無斷無盡。皆令歡喜住於善道。復令善解一切言辭。能為衆生說種種法。而於言語無所分別。假使不可說不可說種種言辭而來問難。一念悉領。一音咸答。普使開悟無有遺餘。以得一切智灌頂故。以得無礙藏故。以得一切法圓滿光明故。具足一切智智故。佛子。此菩薩摩訶薩安住善法行已。能自清淨。亦能以無所著方便。而普饒益一切衆生。不見有衆生得出離者。如於此三千大千世界。如是乃至於不可說三千大千世界。變身金色。妙音具足。於一切法無所障礙而作佛事。佛子。此菩薩摩訶薩成就十種身。所謂入無邊法界非趣身。滅一切世間故。入無邊法界諸趣身。生一切世間故。不生身。住無生平等法故。不滅身。一切滅言說不可得故。不實身。得如實故。不妄身。隨應現故。不遷身。離死此生彼故。不壞身。法界性無壞故。一相身。三世語言道斷故。無相身。善能觀察法相故。菩薩成就如是十種身。為一切衆生舍。長養一切善根故。為一切衆生救。令其得大安隱故。為一切衆生歸。與其作大依處故。為一切衆生導。令得無上出離故。為一切衆生師。令入真實法中故。為一切衆生燈。令其明見業報故。為一切衆生光。令照甚深妙法故。為一

切三世炬。令其曉悟實法故。為一切世間照。令入光明地中故。為一切諸趣明。示現如來自在故。佛子。是名菩薩摩訶薩第九善法行。菩薩安住此行。為一切衆生作清涼法池。能盡一切佛法源故。

第九善法行。以力波羅蜜爲體。於此段中。分爲五段。一佛子已下。至旋陀羅尼辯無盡。有十二行經。明十無盡辯分。二此菩薩已下。至悉亦如是。有九行半經。明大千界現身成佛辯才無礙分。三復次已下。至而作佛事。有十六行半經。明於一毛端處道場無盡。一切毛端處及不可說三千界示身成佛分。四佛子此菩薩已下。至善能觀察法相故。有六行半經。明十種自在身分。五菩薩成就如是十種身已下。至一切佛法源故。有十行半經。明與一切衆生所爲依處分。

佛子。何等為菩薩摩訶薩真實行。此菩薩成就第一誠諦之語。如說能行。如行能說。此菩薩學三世諸佛真實語。入三世諸佛種性。與三世諸佛善根同等。得三世諸佛無二語。隨如來學。智慧成就。此菩薩成就知衆生是處非處智。去來現在業報智。諸根利鈍智。種種界智。種種解智。一切至處道智。諸禪解脫三昧垢淨起時非時智。一切世界宿住隨念智。天眼智。漏盡智。而不捨一切菩薩行。何以故。

欲教化一切衆生悉令清淨故。此菩薩復生如是增上心。若我不令一切衆生住無上解脫道。而我先成阿耨多羅三藐三菩提者。則違我本願。是所不應。是故要當先令一切衆生得無上菩提無餘涅槃。然後成佛。何以故。非衆生請我發心。我自為衆生作不請之友。欲先令一切衆生滿足善根成一切智。是故我為最勝。不著一切世間故。我為最上。住無上調御地故。我為離翳。解衆生無際故。我為已辦。本願成就故。我為善變化。菩薩功德莊嚴故。我為善依怙。三世諸佛攝受故。此菩薩摩訶薩不捨本願故。得入無上智慧莊嚴。利益衆生悉令滿足。隨本誓願皆得究竟。於一切法中智慧自在。令一切衆生普得清淨。念念徧遊十方世界。念念普詣不可說不可說諸佛國土。念念悉見不可說不可說諸佛。及佛莊嚴清淨國土。示現如來自在神力。普徧法界虛空界。此菩薩現無量身普入世間而無所依。於其身中。現一切刹。一切衆生。一切諸法。一切諸佛。此菩薩知衆生種種想。種種欲。種種解。種種業報。種種善根。隨其所應。為現其身而調伏之。觀諸菩薩如幻。一切法如化。佛出世如影。一切世間如夢。得義身文身無盡藏。正念自在。決定了知一切諸法。智慧最勝。入一切三昧真實相。住一性無二地。菩薩摩訶薩以諸衆

生皆著於二。安住大悲。修行如是寂滅之法。得佛十力。入因陀羅網法界。成就如來無礙解脫。人中雄猛大師子吼。得無所畏。能轉無礙清淨法輪。得智慧解脫。了知一切世間境界。絕生死迴流。入智慧大海。為一切衆生護持三世諸佛正法。到一切佛法海實相源底。菩薩住此真實行已。一切世間天人魔梵沙門婆羅門乾闥婆阿修羅等有親近者皆令開悟歡喜清淨。是名菩薩摩訶薩第十真實行。

第十真實行。以智波羅蜜為體。於此段中。分為三段。一佛子已下。至悉令清淨故。有十行經。明此位菩薩學三世諸佛誠實身語智。得佛十種智分。二此菩薩復生如是增上心已下。至法界虛空界。有十六行半經。明以願力教化衆生。不取菩提分。三此菩薩已下。至第十真實行。可十七行經。明身含衆刹。知根利生自在分。

爾時佛神力故。十方各有佛刹微塵數世界。六種震動。所謂動。徧動。等徧動。起。徧起。等徧起。踊。徧踊。等徧踊。震。徧震。等徧震。吼。徧吼。等徧吼。擊。徧擊。等徧擊。雨天妙華。天香。天末香。天鬘。天衣。天寶。天莊嚴具。奏天樂音。放天光明。演暢諸天微妙音聲。如此世界。夜摩天宮說十行法。所現

神變。十方世界。悉亦如是。復以佛神力故。十方各過十萬佛刹微塵數世界外。有十萬佛刹微塵數菩薩俱。來詣此土。充滿十方。語功德林菩薩言。佛子。善哉善哉。善能演說諸菩薩行。我等一切。同名功德林。所住世界。皆名功德幢。彼土如來。同名普功德。我等佛所。亦說此法。衆會眷屬。言辭義理。悉亦如是。無有增減。佛子。我等皆承佛神力。來入此會。為汝作證。十方世界。悉亦如是。

已下動地興供分中。有十五行經。義分爲二段。一爾時已下。至天微妙音聲。有五行半經。明動地興供分。二如此世界已下。至悉亦如是。有一行半經。明都結十方同然分。三復以佛神力故已下。至十方世界悉亦如是。有八行經。明十方功德林菩薩來集作證分。如十方十萬佛刹微塵數世界外。有十萬佛刹微塵數菩薩皆名功德林者。爲明十行徧周故。佛號普功德者。爲明此十行徧周。即功德徧周。即是此位之中所得之果。以行徧周所招功德。故佛號普功德。舉十方各過十萬佛刹微塵爲數者。明智所達法。亦明行門之量廣大。即佛果功德廣大。已上十行。約十波羅蜜爲昇進。經自具分明。不煩更釋。如是十行。總是一時一念無前後之行門。莫作前後延促之見。皆須約法界智體用成進修之門。

爾時功德林菩薩。承佛神力。普觀十方一切衆會。譬於法界。欲令佛種性不斷故。欲令菩薩種性清淨故。欲令願種性不退轉故。欲令行種性常相續故。欲令三世種性悉平等故。欲攝三世一切佛種性故。欲開演所種諸善根故。欲觀察一切諸根故。欲解煩惱習氣心行所作故。欲照了一切佛菩提故。而說頌言。

如說頌歎法中。有七行經。明十種種性不斷故。以頌重申。如譬於法界者。譬者及也。云及於法界也。

一心敬禮十力尊	離垢清淨無礙見	境界深遠無倫疋	住如虛空道中者
過去人中諸最勝	功德無量無所著	勇猛第一無等倫	彼離塵者行斯道
現在十方諸國土	善能開演第一義	離諸過惡最清淨	彼無依者行斯道
未來所有人師子	周徧遊行於法界	已發諸佛大悲心	彼饒益者行斯道
三世所有無比尊	自然除滅愚癡暗	於一切法皆平等	彼大力人行此道
普見無量無邊界	一切諸有及諸趣	見已其心不分別	彼無動者行斯道
法界所有皆明了	於第一義最清淨	永破曠慢及愚癡	彼功德者行斯道
於諸衆生善分別	悉入法界真實性	自然覺悟不由他	彼等空者行斯道

盡空所有諸國土	悉往說法廣開喻	所說清淨無能壞	彼勝牟尼行此道
具足堅固不退轉	成就尊重最勝法	願力無盡到彼岸	彼善修者所行道
無量無邊一切地	廣大甚深妙境界	悉能知見靡有遺	彼論師子所行道
一切句義皆明了	所有異論悉摧伏	於法決定無所疑	彼大牟尼行此道
遠離世間諸過患	普與衆生安隱樂	能爲無等大導師	彼勝德者行斯道
恆以無畏施衆生	普令一切皆欣慶	其心清淨離染濁	彼無等者行斯道
意業清淨極調善	離諸戲論無口過	威光圓滿衆所欽	彼最勝者行斯道
入眞實義到彼岸	住功德處心永寂	諸佛護念恆不忘	彼滅有者行斯道
遠離於我無惱害	恆以大音宣正法	十方國土靡不周	彼絕譬者行斯道
檀波羅蜜已成滿	百福相好所莊嚴	衆生見者皆欣悅	彼最勝慧行斯道
智地甚深難可入	能以妙慧善安住	其心究竟不動搖	彼堅固行行斯道
法界所有悉能入	隨所入處咸究竟	神通自在靡不該	彼法光明行此道
諸無等等大牟尼	勤修三昧無二相	心常在定樂寂靜	彼普見者行斯道
微細廣大諸國土	更相涉入各差別	如其境界悉了知	彼智山王行此道

意常明潔離諸垢

於三界中無所著

護持衆戒到彼岸

此淨心者行斯道

智慧無邊不可說

普徧法界虛空界

善能修學住其中

彼金剛慧行斯道

三世一切佛境界

智慧善入悉周徧

未嘗暫起疲厭心

彼最勝者行斯道

善能分別十力法

了知一切至處道

身業無礙得自在

彼功德身行此道

十方無量無邊界

所有一切諸衆生

我皆救護而不捨

彼無畏者行斯道

於諸佛法勤修習

心常精進不懈倦

淨治一切諸世間

彼大龍王行此道

了知衆生根不同

欲解無量各差別

種種諸界皆明達

此普入者行斯道

十方世界無量刹

悉往受生無有數

未曾一念生疲厭

彼歡喜者行斯道

普放無量光明網

照耀一切諸世間

其光所照入法性

此善慧者行斯道

震動十方諸國土

無量億數那由他

不令衆生有驚怖

此利世者所行道

善解一切語言法

問難酬對悉究竟

聰哲辯慧靡不知

此無畏者所行道

善解覆仰諸國土

分別思惟得究竟

悉使住於無盡地

此勝慧者所行道

功德無量那由他

爲求佛道皆修習

於其一切到彼岸

此無盡行所行道

超出世間大論師

辯才第一師子吼

普使群生到彼岸

此淨心者所行道

諸佛灌頂第一法	已得此法灌其頂	心恆安住正法門	彼廣大心行此道
一切衆生無量別	了達其心悉周徧	決定護持佛法藏	彼如須彌行此道
能於一一語言中	普爲示現無量音	令彼衆生隨類解	此無礙見行斯道
一切文字語言法	智皆善入不分別	住於真實境界中	此見性者所行道
安住甚深大法海	善能印定一切法	了法無相眞實門	此見實者所行道
一一佛土皆往詣	盡於無量無邊劫	觀察思惟靡暫停	此匪懈者所行道
無量無數諸如來	種種名號各不同	於一毛端悉明見	此淨福者所行道
一毛端處見諸佛	其數無量不可說	一切法界悉亦然	彼諸佛子行斯道
無量無邊無數劫	於一念中悉明見	知其修促無定相	此解脫行所行道
能令見者無空過	皆於佛法種因緣	而於所作心無著	彼諸最勝所行道
那由他劫常遇佛	終不一念生疲厭	其心歡喜轉更增	此不空見所行道
盡於無量無邊劫	觀察一切衆生界	未曾見有一衆生	此堅固士所行道
修習無邊福智藏	普作清涼功德池	利益一切諸群生	彼第一人行此道
法界所有諸品類	普徧虛空無數量	了彼皆依言說住	此師子吼所行道

能於一一三昧中

普入無數諸三昧

悉至法門幽奧處

此月輪者行斯道

忍力勤修到彼岸

能忍最勝寂滅法

其心平等不動搖

此無邊智所行道

於一世界一坐處

其身不動恆寂然

而於一切普現身

彼無邊身行此道

無量無邊諸國土

悉令共入一塵中

普得包容無障礙

彼無邊思行此道

了達是處及非處

於諸力處普能入

成就如來最上方

彼第一力所行道

過去未來現在世

無量無邊諸業報

恆以智慧悉了知

此達解者所行道

了達世間時非時

如應調伏諸衆生

悉順其宜而不失

此善了者所行道

善守身語及意業

恆令依法而修行

離諸取著降衆魔

此智心者所行道

於諸法中得善巧

能入真如平等處

辯才宣說無有窮

此佛行者所行道

陀羅尼門已圓滿

善能安住無礙藏

於諸法界悉通達

此深入者所行道

三世所有一切佛

悉與等心同智慧

一性一相無有殊

此無礙種所行道

已抉一切愚癡膜

深入廣大智慧海

普施衆生清淨眼

此有目者所行道

已具一切諸導師

平等神通無二行

獲於如來自在力

此善修者所行道

徧遊一切諸世間

普雨無邊妙法雨

悉令於義得決了

此法雲者所行道

能於佛智及解脫	深生淨信永不退	以信而生智慧根	此善學者所行道
能於一念悉了知	一切衆生無有餘	了彼衆生心自性	達無性者所行道
法界一切諸國土	悉能化往無有數	其身最妙絕等倫	此無比行所行道
佛刹無邊無有數	無量諸佛在其中	菩薩於彼悉現前	親近供養生尊重
菩薩能以獨一身	入於三昧而寂定	令見其身無有數	一一皆從三昧起
菩薩所住最深妙	所行所作超戲論	其心清淨常悅樂	能令衆生悉歡喜
諸根方便各差別	能以智慧悉明見	而了諸根無所依	調難調者所行道
能以方便巧分別	於一切法得自在	十方世界各不同	悉在其中作佛事
諸根微妙行亦然	能爲衆生廣說法	誰其聞者不欣慶	此等虛空所行道
智眼清淨無與等	於一切法悉明見	如是智慧巧分別	此無等者所行道
所有無盡廣大福	一切修行使究竟	令諸衆生悉清淨	此無比者所行道
普勸修成助道法	悉令得住方便地	度脫衆生無有數	未曾暫起衆生想
一切機緣悉觀察	先護彼意令無諍	普示衆生安隱處	此方便者所行道
成就最上第一智	具足無量無邊智	於諸四衆無所畏	此方便智所行道

一切世界及諸法

悉能徧入得自在

亦入一切衆會中

度脫群生無有數

十方一切國土中

擊大法鼓悟群生

爲法施主最無上

此不滅者所行道

一身結跏而正坐

充滿十方無量剎

而令其身不迫隘

此法身者所行道

能於一義一文中

演說無量無邊法

而其邊際不可得

此無邊智所行道

於佛解脫善修學

得佛智慧無障礙

成就無畏爲世雄

此方便者所行道

了知十方世界海

亦知一切佛刹海

智海法海悉了知

衆生見者咸欣慶

或現入胎及初生

或現道場成正覺

如是皆令世間見

此無邊者所行道

無量億數國土中

示現其身入涅槃

實不捨願歸寂滅

此雄論者所行道

堅固微密一妙身

與佛平等無差別

隨諸衆生各異見

一實身者所行道

法界平等無差別

具足無量無邊義

樂觀一相心不移

三世智者所行道

於諸衆生及佛法

建立加持悉究竟

所有持力同於佛

最上持者行斯道

神足無礙猶如佛

天眼無礙最清淨

耳根無礙善聽聞

此無礙意所行道

所有神通皆具足

隨其智慧悉成就

善知一切靡所僞

此賢智者所行道

其心正定不搖動

其智廣大無邊際

所有境界皆明達

一切見者所行道

已到一切功德岸	能隨次第度衆生	其心畢竟無厭足	此常勤者所行道
三世所有諸佛法	於此一切咸知見	從於如來種性生	彼諸佛子行斯道
隨順言辭已成就	乖違談論善摧伏	常能趣向佛菩提	無邊慧者所行道
一光照燭無涯限	十方國土悉充徧	普使世間得大明	此破闇者所行道
隨其應現應供養	爲現如來清淨身	教化衆生百千億	莊嚴佛刹亦如是
爲令衆生出世間	一切妙行皆修習	此行廣大無邊際	云何而有能知者
假使分身不可說	而與法界虛空等	悉共稱揚彼功德	百千萬劫無能盡
菩薩功德無有邊	一切修行皆具足	假使無量無邊佛	於無量劫說不盡
何況世間天及人	一切聲聞及緣覺	能於無量無邊劫	讚歎稱揚得究竟

如下說頌分中。有二百二行頌。兩行一頌。如文具明。

大方廣佛新華嚴經合論卷第三十八終

大方廣佛新華嚴經合論卷第三十九

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

十無盡藏品第二十二

將釋此品。三門如前。一釋品名目者。爲此說十種藏。依法立名可知。第二釋品來意者。此位已說十種行。以此十無盡藏。成前十行之法。使令無盡。成後十迴向之法。使令進向。令使行門不滯。是故此品須來。第三長科經意者。分爲二門。一長科經意。二隨文釋義。一長科經意者。於此一品經中。大段隨十藏名目。總有十一段經。其文如下。

爾時功德林菩薩。復告諸菩薩言。佛子。菩薩摩訶薩有十種藏。過去未來現在諸佛。已說當說今說。何等爲十。所謂信藏。戒藏。慚藏。愧藏。聞藏。施藏。慧藏。念藏。持藏。辯藏。是爲十。佛子。何等爲菩薩摩訶薩信藏。此菩薩信一切

法空。信一切法無相。信一切法無願。信一切法無作。信一切法無分別。信一切法無所依。信一切法不可量。信一切法無有上。信一切法難超越。信一切法無生。若菩薩能如是隨順一切法生淨信已。聞諸佛法不可思議。心不怯弱。聞一切佛不可思議。心不怯弱。聞衆生界不可思議。心不怯弱。聞法界不可思議。心不怯弱。聞虛空界不可思議。心不怯弱。聞涅槃界不可思議。心不怯弱。聞過去世不可思議。心不怯弱。聞未來世不可思議。心不怯弱。聞現在世不可思議。心不怯弱。聞入一切劫不可思議。心不怯弱。何以故。此菩薩於諸佛所一向堅信。知佛智慧無邊無盡。十方無量諸世界中。一一各有無量諸佛。於阿耨多羅三藐三菩提。已得今得當得。已出世。今出世。當出世。已入涅槃。今入涅槃。當入涅槃。彼諸佛智慧。不增不減。不生不滅。不進不退。不近不遠。無知無捨。此菩薩入佛智慧。成就無邊無盡信。得此信已。心不退轉。心不雜亂。不可破壞。無所染著。常有根本。隨順聖人。住如來家。護持一切諸佛種性。增長一切菩薩信解。隨順一切如來善根。出生一切諸佛方便。是名菩薩摩訶薩信藏。菩薩住此信藏。則能聞持一切佛法。為衆生說。皆令開悟。

第一、從初爾時功德林菩薩已下。至為衆生說皆令開悟。有二十八行半經。明正舉十無盡藏名。并陳十種信法分。於此分中。復分為六。一爾時功德林已下。至是為十。有四行經。明正說十藏之名分。二佛子已下。至生淨信已。有五行半經。明初舉十種信法分。三聞諸佛法不可思議已下。至何以故。有七行半經。明聞法生信已。於法不怯分。四此菩薩已下。至無知無捨。有五行半經。明知一切諸佛出世入涅槃無遠近取捨分。五此菩薩入佛智慧已下。至一切諸佛方便。有四行半經。明入此信藏生在佛家。順諸佛善根方便分。六是名菩薩已下。一行半經。明總結信成能演法分。此信是十行之中位內之信。文殊師利覺首等。是十信位中信心故。

佛子。何等為菩薩摩訶薩戒藏。此菩薩成就普饒益戒。不受戒。不住戒。無悔恨戒。無違諍戒。不損惱戒。無雜穢戒。無貪求戒。無過失戒。無毀犯戒。云何為普饒益戒。此菩薩受持淨戒。本為利益一切衆生。云何為不受戒。此菩薩不受行外道諸所有戒。但性自精進。奉持三世諸佛如來平等淨戒。云何為不住戒。此菩薩受持戒時。心不住欲界。不住色界。不住無色界。何以故。不求生彼而持戒故。

云何為無悔戒。此菩薩恆得安住無悔恨心。何以故。不作重罪。不行詔詐。不破淨戒故。云何為無違諍戒。此菩薩不非先制。不更造立。心常隨順向涅槃戒。具足受持。無所毀犯。不以持戒惱他眾生令其生苦。但願一切心常歡喜而持於戒。云何為不惱害戒。此菩薩不因於戒。學諸咒術。造作方藥。惱害眾生。但為救護一切眾生而持於戒。云何為不雜戒。此菩薩不著邊見。不持雜戒。但觀緣起。持出離戒。云何為無貪求戒。此菩薩不現異相。彰己有德。但為滿足出離法故而持於戒。云何為無過失戒。此菩薩不自貢高。言我持戒。見破戒人。亦不輕毀。令他愧恥。但一其心而持於戒。云何為無毀犯戒。此菩薩永斷殺盜邪淫。妄語兩舌惡口及無義語。貪瞋邪見。具足受持十種善業。菩薩持此無犯戒時。作是念言。一切眾生毀犯淨戒。皆由顛倒。唯佛世尊。能知眾生以何因緣而生顛倒。毀犯淨戒。我當成就無上菩提。廣為眾生說真實法。令離顛倒。是名菩薩摩訶薩第二戒藏。

第二。佛子何等為菩薩戒藏已下。至是名菩薩第二戒藏。於中有二十八行半經。於此段中。復分為三。一佛子已下。至無毀犯戒。有三行半經。明正舉十種

戒名號分。二云何已下。至十種善業。有二十一行經。明正說十種戒之持犯分。三菩薩持此。至第二戒藏。有四行半經。明此十行菩薩持戒無毀犯分。

佛子。何等為菩薩摩訶薩慚藏。此菩薩憶念過去所作諸惡。而生於慚。謂彼菩薩心自念言。我無始世來與諸衆生。皆悉互作父母兄弟姊妹男女。具貪瞋癡憍慢諂誑。及餘一切諸煩惱故。更相惱害。遞相凌奪。姦淫傷殺。無惡不造。一切衆生悉亦如是。以諸煩惱備造衆惡。是故各各不相恭敬。不相尊重。不相承順。不相謙下。不相啓導。不相護惜。更相殺害。互為怨讎。自惟我身及諸衆生。去來現在行無慚法。三世諸佛無不知見。今若不斷此無慚行。三世諸佛亦當見我。我當云何猶行不止。甚為不可。是故我應專心斷除。證阿耨多羅三藐三菩提。廣為衆生說真實法。是名菩薩摩訶薩第三慚藏。

第三。佛子已下。至第三慚藏。有十三行半經。於此段中。復分為二。一佛子已下。至應專心斷除。有十二行經。明斷無慚行。具於慚行分。二有一行半經。明具足於慚。善為衆生說法分。

佛子。何等為菩薩摩訶薩愧藏。此菩薩自愧昔來於五欲中。種種貪求無有厭足。

因此增長貪恚癡等。一切煩惱。我今不應復行是事。又作是念。衆生無智。起諸煩惱。具行惡法。不相恭敬。不相尊重。乃至展轉互為怨讎。如是等惡無不備造。造已歡喜。追求稱歎。盲無慧眼。無所知見。於母人腹中。入胎受生成垢穢身。畢竟至於髮白面皺。有智慧者觀此但是從婬欲生不淨之法。三世諸佛皆悉知見。若我於今猶行是事。則為欺誑三世諸佛。是故我當修行於愧。速成阿耨多羅三藐三菩提。廣為衆生說真實法。是名菩薩摩訶薩第四愧藏。

第四·佛子已下。至是名菩薩愧藏。於中有十二行經。於中大意。復分為三。一佛子已下。至復行是事。有三行經。明自念於五欲境無始長貪求分。二又作是念已下。至我當修行於愧。有七行經。明念衆生愚癡。為於五欲互為怨讎。菩薩知之應自斷分。三速成菩提已下。一行半經。善為衆生說真實法分。

佛子。何等為菩薩摩訶薩聞藏。此菩薩知是事有故是事有。是事無故是事無。是事起故是事起。是事滅故是事滅。是世間法。是出世間法。是有為法。是無為法。是有記法。是無記法。何等為是事有故是事有。謂無明有故行有。何等為是事無故是事無。謂識無故名色無。何等為是事起故是事起。謂愛起故苦起。何等為是

事滅故是事滅。謂有滅故生滅。何等為世間法。所謂色。受。想。行。識。何等為出世間法。所謂戒。定。慧。解脫。解脫知見。何等為有為法。所謂欲界。色界。無色界。衆生界。何等為無為法。所謂虛空。涅槃。數緣滅。非數緣滅。緣起。法性住。何等為有記法。謂四聖諦。四沙門果。四辯。四無所畏。四念處。四正勤。四神足。五根。五力。七覺分。八聖道分。何等為無記法。謂世間有邊。世間無邊。世間亦有邊亦無邊。世間非有邊非無邊。世間有常。世間無常。世間亦有常亦無常。世間非有常非無常。如來滅後有。如來滅後無。如來滅後亦有亦無。如來滅後非有非無。我及衆生有。我及衆生無。我及衆生亦有亦無。我及衆生非有非無。過去有幾如來般涅槃。幾聲聞辟支佛般涅槃。未來有幾如來。幾聲聞辟支佛。幾衆生。現在有幾佛住。幾聲聞辟支佛住。幾衆生住。何等如來最先出。何等聲聞辟支佛最先出。何等衆生最先出。何等如來最後出。何等聲聞辟支佛。最後出。何等衆生最後出。何法最在初。何法最在後。世間從何處來。去至何所。有幾世界成。有幾世界壞。世界從何處來。去至何所。何者為生死最初際。何者為生死最後際。是名無記法。菩薩摩訶薩作如是念。一切衆生於生死中無有

多聞。不能了知此一切法。我當發意持多聞藏。證阿耨多羅三藐三菩提。為諸衆生說真實法。是名菩薩摩訶薩第五多聞藏。

第五。佛子已下。至多聞藏。有三十四行半經。明聞藏。於此段中。復分爲三。一佛子已下。至無記法。有四行經。明舉十事有無分。二何等爲是事有已下。至是名無記法。有二十六行半經。明正說十種事有無分。初從十二緣。說無明有故行有。識無故名色無。愛起故苦起。有滅故生滅。此上四事。識之與愛。皆從無明妄計諸有從生。今達有本無。即十二緣滅。十二緣滅。非智有生。非智有滅。但除其病。其智無依無形無爲。而靈通萬有。無思而現。無作而成。學之者。以止觀兩門功終方會。此之一辦。後之十法總終。聖教具陳。識相對治異解。已下如文具明。三菩薩已下。四行經。明菩薩念諸衆生無多聞慧。我求多聞藏廣爲說法分。

佛子。何等為菩薩摩訶薩施藏。此菩薩行十種施。所謂分減施。竭盡施。內施。外施。內外施。一切施。過去施。未來施。現在施。究竟施。佛子。云何為菩薩分減施。此菩薩稟性仁慈。好行惠施。若得美味。不專自受。要與衆生。然後方

食。凡所受物悉亦如是。若自食時。作是念言。我身中有八萬戶蟲。依於我住。我身充樂。彼亦充樂。我身飢苦。彼亦飢苦。我今受此所有飲食。願令衆生普得充飽。為施彼故而自食之。不貪其味。復作是念。我於長夜愛著其身。欲令充飽而受飲食。今以此食惠施衆生。願我於身永斷貪著。是名分減施。云何為菩薩竭盡施。佛子。此菩薩得種種上味飲食。香華衣服資生之具。若自以受用。則安樂延年。若輟已施人。則窮苦天命。時或有人來作是言。汝今所有悉當與我。菩薩自念。我無始已來。以飢餓故。喪身無數。未曾得有如毫末許。饒益衆生而獲善利。今我亦當同於往昔而捨其命。是故應為饒益衆生。隨其所有一切皆捨。乃至盡命亦無所吝。是名竭盡施。云何為菩薩內施。佛子。此菩薩年方少盛。端正美好。香華衣服以嚴其身。始受灌頂轉輪王位。七寶具足。王四天下。時或有人來白王言。大王當知。我今衰老。身嬰重疾。癯獨羸頓。死將不久。若得王身。手足血肉頭目骨髓。我之身命必冀存活。唯願大王莫更壽量。有所顧惜。但見慈念以施於我。爾時菩薩作是念言。今我此身。後必當死。無一利益。宜時疾捨以濟衆生。念已施之。心無所悔。是名內施。云何為菩薩外施。佛子。此菩薩年盛色

美。衆相具足。名華上服而以嚴身。始受灌頂轉輪王位。七寶具足。王四天下。時或有人來白王言。我今貧窶。衆苦逼迫。唯願仁慈。特垂矜念。捨此王位。以贍於我。我當統領。受王福樂。爾時菩薩作是念言。一切榮盛。必當衰歇。於衰歇時。不能復更饒益衆生。我今宜應隨彼所求。充滿其意。作是念已。即便施之。而無所悔。是名外施。云何為菩薩內外施。佛子。此菩薩如上所說處輪王位。七寶具足。王四天下。時或有人而來白言。此轉輪位。王處已久。我未曾得。唯願大王捨之與我。并及王身為我臣僕。爾時菩薩作是念言。我身財寶及以王位。悉是無常敗壞之法。我今盛壯。富有天下。乞者現前。當以不堅而求堅法。作是念已。即便施之。乃至以身恭勤作役。心無所悔。是名內外施。云何為菩薩一切施。佛子。此菩薩亦如上說處輪王位。七寶具足。王四天下。時有無量貧窮之人。來詣其前而作是言。大王名稱周聞十方。我等欽風故來至此。吾曹今者各有所求。願普垂慈令得滿足。時諸貧人從彼大王。或乞國土。或乞妻子。或乞手足血肉心肺頭目髓腦。菩薩是時心作是念。一切恩愛會當別離。而於衆生無所饒益。我今為欲永捨貪愛。以此一切必離散物。滿衆生願。作是念已。悉皆施與。心無悔恨。

亦不於衆生而生厭賤。是名一切施。云何為菩薩過去施。此菩薩聞過去諸佛菩薩所有功德。聞已不著。了達非有。不起分別。不貪不味。亦不求取。無所依倚。見法如夢。無有堅固。於諸善根。不起有想。亦無所倚。但為教化取著衆生成熟佛法而為演說。又復觀察過去諸法。十方推求都不可得。作是念已。於過去法畢竟皆捨。是名過去施。云何為菩薩未來施。此菩薩聞未來諸佛之所修行。了達非有。不取於相。不別樂往生諸佛國土。不味不著。亦不生厭。不以善根迴向於彼。亦不於彼而退善根。常勤修行未曾廢捨。但欲因彼境界攝取衆生。為說真實令成熟佛法。然此法者。非有處所。非無處所。非內非外。非近非遠。復作是念。若法非有。不可不捨。是名未來施。云何為菩薩現在施。此菩薩聞四天王衆天三十三天夜摩天兜率陀天化樂天他化自在天。梵天梵身天梵輔天梵衆天大梵天。光天少光天無量光天光音天。淨天少淨天無量淨天徧淨天。廣天少廣天無量廣天廣果天。無煩天無熱天善見天善現天色究竟天。乃至聞聲聞緣覺。具足功德。聞已。其心不迷不沒不聚不散。但觀諸行如夢不實。無有貪著。為令衆生捨離惡趣。心無分別。修菩薩道。成就佛法而為開演。是名現在施。云何為菩薩究竟施。佛子。

此菩薩假使有無量衆生。或有無眼。或有無耳。或無鼻舌。及以手足。來至其所。告菩薩言。我身薄祐。諸根殘缺。唯願仁慈以善方便。捨己所有令我具足。菩薩聞之。即便施與。假使由此經阿僧祇劫諸根不具。亦不心生一念悔惜。但自觀身從初入胎不淨微形。胞段諸根生老病死。又觀此身無有真實。無有慚愧。非賢聖物。臭穢不潔。骨節相持。血肉所塗。九孔常流。人所惡賤。作是觀已。不生一念愛著之心。復作是念。此身危脆。無有堅固。我今云何而生戀著。應以施彼充滿其願。如我所作。以此開導一切衆生。令於身心不生貪愛。悉得成就清淨智身。是名究竟施。是為菩薩摩訶薩第六施藏。

第六佛子已下。至施藏。有九十三行經。於比段中。復分爲二。一佛子已下。至分滅施。有三行半經。明都舉十種施藏分。二此菩薩已下。直至是名菩薩第六施藏。總說前十種施藏分。已上十種施。理事盡含。如文自具。

佛子。何等為菩薩摩訶薩慧藏。此菩薩於色如實知。色集如實知。色滅如實知。色滅道如實知。於受想行識集如實知。受想行識滅如實知。受想行識滅道如實知。於無明如實知。無明集如實知。無明滅如實知。無明滅道如

實知。於愛如實知。愛集如實知。愛滅如實知。愛滅道如實知。於聲聞如實知。聲聞法如實知。聲聞集如實知。聲聞涅槃如實知。於獨覺如實知。獨覺法如實知。獨覺集如實知。獨覺涅槃如實知。於菩薩如實知。菩薩法如實知。菩薩集如實知。菩薩涅槃如實知。云何知。知從業報諸行因緣之所造作。一切虛假。空無有實。非我非堅固。無有少法可得成立。欲令衆生知其實性。廣為宣說。為說何等。說諸法不可壞。何等法不可壞。色不可壞。受想行識不可壞。無明不可壞。聲聞法。獨覺法。菩薩法不可壞。何以故。一切法無作。無作者。無言說。無處所。不生不起。不與不取。無動轉。無作用。菩薩成就如是等無量慧藏。以少方便了一切法。自然明達不由他悟。此慧無盡藏。有十種不可盡故。說為無盡。何等為十。所謂多聞善巧不可盡故。親近善知識不可盡故。善分別句義不可盡故。入深法界不可盡故。以一味智莊嚴不可盡故。集一切福德心無疲倦不可盡故。入一切陀羅尼門不可盡故。能分別一切衆生語言音聲不可盡故。能斷一切衆生疑惑不可盡故。為一切衆生現一切佛神力教化調伏令修行不斷不可盡故。是為十。是為菩薩摩訶薩第七慧藏。住此藏者。得無盡智慧。普能開悟一切衆生。

第七。佛子已下。至開悟一切衆生。有三十行經。於此段中。復分爲五。一佛子已下。至涅槃如實知。有十一行經。且舉如實知世間法出世間法根末所集體相分。二云何知已下。至廣爲宣說。有三行經。明都舉前法從緣所生本無所有分。三爲說何等已下。至不由他悟。有六行經。明正說前受想行等無體成壞分。四此慧藏已下。至是爲十。有八行半經。明十不可盡分。五已下一行半經。明得法善說分。

佛子。何等爲菩薩摩訶薩念藏。此菩薩捨離癡惑。得具足念。憶念過去一生二生。乃至十生百生千生百千生無量百千生。成劫。壞劫。成壞劫。非一成劫。非一壞劫。非一成壞劫。百劫千劫。百千億那由他。乃至無量無數無邊無等。不可數不可稱不可思不可量不可說不可說劫。念一佛名號。乃至不可說不可說佛名號。念一佛出世說授記。乃至不可說不可說佛出世說授記。念一佛出世說修多羅。乃至不可說不可說佛出世說修多羅。如修多羅。祇夜。授記。伽陀。尼陀那。優陀那。本事。本生。方廣。未曾有。譬喻。論議。亦如是。念一衆會。乃至不可說不可說衆會。念演一法。乃至演不可說不可說法。念一根種種性。乃至不可說

不可說根種種性。念一根無量種種性。乃至不可說不可說根無量種種性。念一煩惱種種性。乃至不可說不可說煩惱種種性。念一二味種種性。乃至不可說不可說三昧種種性。此念有十種。所謂寂靜念。清淨念。不濁念。明徹念。離塵念。離種種塵念。離垢念。光耀念。可愛樂念。無障礙念。菩薩住是念時。一切世間無能擾亂。一切異論無能變動。往世善根悉得清淨。於諸世法無所染著。衆魔外道所不能壞。轉身受生無所忘失。過現未來說法無盡。於一切世界中。與衆生同住曾無過咎。入一切諸佛衆會道場無所障礙。一切佛所悉得親近。是名菩薩摩訶薩第八念藏。

第八。佛子已下。至念藏。有二十七行經。於中大意。復分爲二。一佛子已下。至不可說三昧種種性。有十八行經。明得無限正念諸法分。二此念有十種已下。至第八念藏。有九行經。明得十正念時。於一切法無過失分。如十二部經名中。祇夜。此云應誦。伽陀。此云諷誦。尼陀那。此云因緣經。優陀那。此云無問自說。

佛子。何等為菩薩摩訶薩持藏。此菩薩持諸佛所說修多羅。文句義理無有忘失。

一生持。乃至不可說不可說生持。持一佛名號。乃至不可說不可說佛名號。持一劫數。乃至不可說不可說劫數。持一佛授記。乃至不可說不可說佛授記。持一修多羅。乃至不可說不可說修多羅。持一衆會。乃至不可說不可說衆會。持演一法。乃至演不可說不可說法。持一根無量種種性。乃至不可說不可說根無量種種性。持一煩惱種種性。乃至不可說不可說煩惱種種性。持一二昧種種性。乃至不可說不可說三昧種種性。佛子。此持藏無邊難滿難至其底。難得親近。無能制伏。無量無盡。具大威力。是佛境界。唯佛能了。是名菩薩摩訶薩第九持藏。

第九。佛子已下。有十四行經。於中大意。復分爲二。一佛子已下。至不可說三昧種種性。有十一行半經。明聞持一切諸法無限分。二佛子已下。有三行經。明此位菩薩所說諸法無限。唯佛能了知故名持藏分。

佛子。何等為菩薩摩訶薩辯藏。此菩薩有深智慧。了知實相。廣為衆生演說諸法。不違一切諸佛經典。說一品法。乃至不可說不可說品法。說一佛名號。乃至不可說不可說佛名號。如是說一世界。說一佛授記。說一修多羅。說一衆會。說演一法。說一根無量種種性。說一煩惱無量種種性。說一二昧無量種種性。乃至說不

可說不可說三昧無量種種性。或一日說。或半月一月說。或百年千年百千年說。或一劫百劫千劫百千劫說。或百千億那由他劫說。或無數無量乃至不可說不可說劫說。劫數可盡。一文一句義理難盡。何以故。此菩薩成就十種無盡藏故。成就此藏。得攝一切法陀羅尼門現在前。百萬阿僧祇陀羅尼以為眷屬。得此陀羅尼已。以法光明。廣為衆生演說於法。其說法時。以廣長舌出妙音聲。充滿十方一切世界。隨其根性悉令滿足。心得歡喜。滅除一切煩惱纏垢。善入一切音聲言語文字辯才。令一切衆生佛種不斷。淨心相續。亦以法光明而演說法。無有窮盡。不生疲倦。何以故。此菩薩成就盡虛空徧法界無邊身故。是為菩薩摩訶薩第十辯藏。此藏無窮盡。無分段。無間無斷。無變異。無隔礙。無退轉。甚深無底。難可得入。普入一切佛法之門。

第十。佛子已下一段。有二十四行經。於中其意復分為三。一佛子已下。至何以故。有十二行經。明此位菩薩辯藏無盡分。二此菩薩成就十種無盡藏已下。至第十辯藏。有十行經。明正說十種辯藏分。三有兩行經。明辯藏無限分。佛子。此十種無盡藏。有十種無盡法。令諸菩薩究竟成就無上菩提。何等為十。

饒益一切衆生故。以本願善迴向故。一切劫無斷絕故。盡虛空界悉開悟心無限故。迴向有為而不著故。一念境界一切法無盡故。大願心無變異故。善攝取諸陀羅尼故。一切諸佛所護念故。了一切法皆如幻故。是為十種無盡法。能令一切世間所作。悉得究竟無盡大藏。

第十一段中。有八行經。明總舉前十藏。成後迴向法門分。此十種藏。爲成當位自分十行令成滿故。亦成後十迴向法門故。每位皆然。已上釋十行法門竟。

大方廣佛新華嚴經合論卷第三十九終

大方廣佛新華嚴經合論卷第四十

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

昇兜率天宮品第二十三

第五會。兜率天宮說十迴向法門。於此會中。序分正說流通者。從此初昇兜率天宮。是序分。已下兩品。是正說分。兩品中至下動地興供。是流通分。兜率天宮說十迴向法門。於此位中。有三品經。共成此位。第一從初昇兜率天宮品。三義如前。一釋品名目者。以昇天所至立名也。兜率天者。此云樂知足天也。二釋品來意者。明前十住十行二位。以彰出世已成如來智慧之業。今於此天。以明隨見道者。成如來大悲處世利生之業。會融世間出世間不一不二法門。是故此品須來。凡大悲門初發心時。以眞智慧進修中。悲有勝劣不同。十住十行。智慧兼修。仍出世心多。望此位大悲是理智位。出世心終。迴入生死智慈之悲。十地之

中。長養大悲。更令深厚。是故善財十地表法中。從初地已去。有九箇女天。一箇瞿波。是佛昔爲太子之時妻。表悲。十地位已終。法悅是妻義故。問。云何於此天處說迴向法。答曰。如須彌頂上說十住。明初生佛家。住佛智慧之頂。而無退動。夜摩天上說十行法。表行依法空。一切無著。至此兜率天宮。表雖不離欲界。處大悲門。而於欲境常行知足。無所染著。但爲饒益衆生處於世間。又此天處於欲界。自須彌已上五天之處中。以會智慧。令不偏故。如四天王。還依帝釋爲主故。是故而於此天說十迴向。明和會眞俗。成大慈悲。長處生死。而不廢涅槃。名爲迴向。從初發心住已來。如是和會位終。偏得其名。故名迴向。此爲以處表法昇進。亦即不曾身有上下去來。智慧恆偏故。無中邊故。但明寄處。表一生菩薩處此天中果行滿故。以明發心初始生如來智慧之家。以佛智慧行大悲門。即是圓滿如來果故。果復常滿。行復常行。果行常嚴。故號佛華嚴也。十地十一地。依此十住十行十迴向法。三法成其功用。更亦無別安立。以是他化天中說十地時。更不別作法事興供故。但長養此位大智大悲。令深固圓滿故。故名十地。三隨文解釋者。於此義中。復分爲二。此會中都會五位衆總在其中。如下諸

王菩薩等總是。一長科經意。二隨文解釋。第一長科經意者。從初至品末。約分爲十一段。第一爾時佛神力故已下。至悉皆同等。於中有七紙半經。明兜率天王遙見佛來。與諸天衆敷座莊嚴分。復科爲七段。

爾時佛神力故。十方一切世界。一一四天下閻浮提中。皆見如來坐於樹下。各有菩薩承佛神力而演說法。靡不自謂恆對於佛。

第一。爾時已下。至恆對於佛。有三行經。明智身恆圓滿分。隨文釋義者。此昇兜率天品中。云十方一切世界皆常對於佛者。明圓智徧周。

爾時世尊。復以神力。不離於此菩提樹下。及須彌頂夜摩天宮。而往詣於兜率陀天。一切妙寶所莊嚴殿。

第二爾時世尊已下。至妙寶莊嚴殿。可兩行經。明如來大智徧周。應感所見彼此無來去分。釋義云。不離菩提樹而昇夜摩兜率天者。爲菩提之智體本性無有依住。徧往十方。無去來今。性無可得。無有住處。無有遷變。不動不寂。無所造作。而隨根應十方世界。於一切衆生前對現色身。如應化度。

時兜率天王。遙見佛來。即於殿上敷摩尼藏師子之座。其師子座。天諸妙寶之所

集成。過去修行善根所得。一切如來神力所現。無量百千億那由他阿僧祇善根所生。一切如來淨法所起。無邊福力之所嚴瑩。清淨業報不可沮壞。觀者欣樂無有厭足。是出世法。非世所染。一切衆生咸來觀察。無有能得究其妙好。

第三。時兜率天王遙見佛來已下。至無有能得究其妙好。有七行經。明天王殿上敷座分。釋義云。時兜率天王遙見佛來者。明從前十行位向十迴向。爲遙見佛來。入殿敷寶座者。契會也。如十住。爲以方便三昧顯現如來智慧法流。即座有安置。十行之中。爲以法身無相而爲行體。座云化作。寶蓮華藏。爲表處行無染如蓮華故。今此十迴向位中。爲成大悲赴俗。座云敷座。敷者開發義。爲表大悲赴俗。開敷衆善之華。至菩提之妙果故。又敷者設義。爲表大悲赴俗。設法以利生故。不自求出世法故。座體摩尼者。明以大慈悲常在生死而無染汙。以表摩尼名離垢寶。座云師子者。依主義也。爲如來是無畏之主故。天諸妙寶之所集成者。明妙理智悲萬行報得故。是故經云。過去修行善根所得。一切如來神力所現者。明一切諸佛福智萬行。不異自佛神力故。但自心理智中。與一切諸佛同福智故。爲智同行同故。云無量百千億那由他阿僧祇善根所生者。明迴向中福智大悲

行周故報也。總云此座嚴飾是不可數無限善根所生。一切如來淨法所起。明以智起行。無法不淨。餘如文自具。從此已下。至第一段終。有一百九十八行半經。有一百八十四箇百萬億種諸莊嚴。寶座及寶地虛空悉皆徧滿。又有一百八箇百萬億種諸菩薩。并諸天八部王衆入法及合掌思惟讚頌持旛等衆。莊嚴寶地及虛空周徧圓滿。又有十箇百萬億善根之所嚴潔。

有百萬億層級周匝圍遶。百萬億金網。百萬億華帳。百萬億寶帳。百萬億鬘帳。百萬億香帳。張施其上。華鬘垂下。香氣普熏。百萬億華蓋。百萬億鬘蓋。百萬億寶蓋。諸天執持四面行列。百萬億寶衣。以敷其上。百萬億樓閣。綺煥莊嚴。百萬億摩尼網。百萬億寶網。彌覆其上。百萬億寶纓絡網。四面垂下。百萬億莊嚴具網。百萬億蓋網。百萬億衣網。百萬億寶帳網。以張其上。百萬億寶蓮華網。開敷光榮。百萬億寶香網。其香美妙稱悅衆心。百萬億寶鈴帳。其鈴微動出和雅音。百萬億栴檀寶帳。香氣普熏。百萬億寶華帳。其華敷榮。百萬億衆妙色衣帳。世所希有。百萬億菩薩帳。百萬億雜色帳。百萬億真金帳。百萬億琉璃帳。百萬億種種寶帳。悉張其上。百萬億一切寶帳。大摩尼寶以為莊嚴。百萬億妙寶華。

周匝瑩飾。百萬億頻婆帳。殊妙間錯。百萬億寶鬘。百萬億香鬘。四面垂下。百萬億天堅固香。其香普熏。百萬億天莊嚴具纓絡。百萬億寶華纓絡。百萬億勝藏寶纓絡。百萬億摩尼寶纓絡。百萬億海摩尼寶纓絡。莊嚴座身。百萬億妙寶繒綵。以為垂帶。百萬億因陀羅金剛寶。百萬億自在摩尼寶。百萬億妙色真金藏。以為間飾。百萬億毘盧遮那摩尼寶。百萬億因陀羅摩尼寶。光明照耀。百萬億天堅固摩尼寶。以為窗牖。百萬億清淨功德摩尼寶。彰施妙色。百萬億清淨妙藏寶。以為門闥。百萬億世中最勝半月寶。百萬億離垢藏摩尼寶。百萬億師子面摩尼寶。間錯莊嚴。百萬億心王摩尼寶。所求如意。百萬億闍浮檀摩尼寶。百萬億清淨藏摩尼寶。百萬億帝幢摩尼寶。咸放光明彌覆其上。百萬億白銀藏摩尼寶。百萬億須彌幢摩尼寶。莊嚴其藏。百萬億真珠纓絡。百萬億琉璃纓絡。百萬億赤色寶纓絡。百萬億摩尼纓絡。百萬億寶光明纓絡。百萬億種種藏摩尼纓絡。百萬億甚可樂見赤真珠纓絡。百萬億無邊色相藏摩尼寶纓絡。百萬億極清淨無比寶纓絡。百萬億勝光明摩尼寶纓絡。周匝垂布以為莊嚴。百萬億摩尼身。殊妙嚴飾。百萬億因陀羅妙色寶。百萬億黑栴檀香。百萬億不思議境界香。百萬億十方妙香。百萬

億最勝香。百萬億甚可愛樂香。咸發香氣普熏十方。百萬億頻婆羅香。普散十方。百萬億淨光香。普熏衆生。百萬億無邊際種種色香。普熏一切諸佛國土。永不歇滅。百萬億塗香。百萬億熏香。百萬億燒香。香氣發越普熏一切。百萬億蓮華藏沈水香。出大音聲。百萬億遊戲香。能轉衆心。百萬億阿樓那香。香氣普熏其味甘美。百萬億能開悟香。普徧一切。令其聞者諸根寂靜。復有百萬億無比香王香。種種莊嚴。兩百萬億天華雲。兩百萬億天香雲。兩百萬億天末香雲。兩百萬億天拘蘇摩華雲。兩百萬億天波頭摩華雲。兩百萬億天優鉢羅華雲。兩百萬億天拘物頭華雲。兩百萬億天芬陀利華雲。兩百萬億天曼陀羅華雲。兩百萬億一切天華雲。兩百萬億天衣雲。兩百萬億摩尼寶雲。兩百萬億天蓋雲。兩百萬億天幡雲。兩百萬億天冠雲。兩百萬億天莊嚴具雲。兩百萬億天寶鬘雲。兩百萬億天寶纓珞雲。兩百萬億天栴檀香雲。兩百萬億天沈水香雲。建百萬億寶幢。懸百萬億寶幡。垂百萬億寶繒帶。然百萬億香鑪。布百萬億寶鬘。持百萬億寶扇。執百萬億寶拂。懸百萬億寶鈴網。微風吹動出妙音聲。百萬億寶欄楯。周匝圍遶。百萬億寶多羅樹。次第行列。百萬億妙寶窗牖。綺麗莊嚴。百萬億寶樹。周匝垂陰。百萬億寶

樓閣。延袤綺飾。百萬億寶門。垂布纓珞。百萬億金鈴。出妙音聲。百萬億吉祥相纓珞。嚴淨垂下。百萬億寶悉底迦。能除衆惡。百萬億金藏。金縷織成。百萬億寶蓋。衆寶為竿。執持行列。百萬億一切寶莊嚴具網。間錯莊嚴。百萬億光明寶。放種種光。百萬億光明。周徧照耀。百萬億日藏輪。百萬億月藏輪。並無量色寶之所集成。百萬億香焰。光明映徹。百萬億蓮華藏。開敷鮮榮。百萬億寶網。百萬億華網。百萬億香網。彌覆其上。百萬億天寶衣。百萬億天青色衣。百萬億天黃色衣。百萬億天赤色衣。百萬億天奇妙色衣。百萬億天種種寶奇妙衣。百萬億種種香熏衣。百萬億一切寶所成衣。百萬億鮮白衣。悉善敷布。見者歡喜。百萬億天鈴幢。百萬億金網幢。出微妙音。百萬億天繒幢。衆彩具足。百萬億香幢。垂布香網。百萬億華幢。雨一切華。百萬億天衣幢。懸布妙衣。百萬億天摩尼寶幢。衆寶莊嚴。百萬億天莊嚴具幢。衆具校飾。百萬億天鬘幢。種種華鬘四面行布。百萬億天蓋幢。寶鈴和鳴。聞皆歡喜。百萬億天螺。出妙音聲。百萬億天鼓。出大音聲。百萬億天筌篥。出微妙音。百萬億天牟陀羅。出大妙音。百萬億天諸雜樂。同時俱奏。百萬億天自在樂。出妙音聲。其聲普徧一切佛刹。百萬億天變

化樂。其聲如響普應一切。百萬億天鼓。因於撫擊而出妙音。百萬億天如意樂。自然出聲音節相和。百萬億天諸雜樂。出妙音聲滅諸煩惱。百萬億悅意音。讚歎供養。百萬億廣大音。讚歎承事。百萬億甚深音。讚歎修行。百萬億衆妙音。歎佛業果。百萬億微細音。歎如實理。百萬億無障礙真實音。歎佛本行。百萬億清淨音。讚歎過去供養諸佛。百萬億法門音。讚歎諸佛最勝無畏。百萬億無量音。歎諸菩薩功德無盡。百萬億菩薩地音。讚歎開示一切菩薩地相應行。百萬億無斷絕音。歎佛功德無有斷絕。百萬億隨順音。讚歎稱揚見佛之行。百萬億甚深法音。讚歎一切法無礙智相應理。百萬億廣大音。其音充滿一切佛刹。百萬億無礙清淨音。隨其心樂悉令歡喜。百萬億不住三界音。令其聞者深入法性。百萬億歡喜音。令其聞者心無障礙。深信恭敬。百萬億佛境界音。隨所出聲。悉能開示一切法義。百萬億陀羅尼音。善宣一切法句差別。決了如來祕密之藏。百萬億一切法音。其音和暢克諧衆樂。

第四。有百萬億層級已下。至克諧衆樂。有一百一十一行半經。有一百八十四箇百萬億色類。莊嚴寶座及虛空分。釋義云。有百萬億層級周而圍繞者。十住

云百千。十行云百萬。十迴向云百萬億。明昇位階級也。百萬億金網者。爲善施教網明淨故。百萬億華帳者。以萬行含攝義故。百萬億寶帳者。觀一切衆生智可貴故。可含攝故。百萬億鬢帳者。大悲垂俗益衆生故。百萬億香帳張施其上者。明張施戒定慧解脫知見香之業報。華鬢垂下香氣普熏者。明忍嚴垂飾。百萬億華蓋者。萬行覆育含識義也。百萬億鬢蓋者。慈蔭義也。百萬億寶蓋者。以法寶蔭俗義也。諸天侍立者。明能行行人也。四面行列者。總云四攝四無量也。百萬億寶衣以敷其上者。明以大慈大悲之理智。常處生死衣覆衆生無有休息之業報故。百萬億樓閣綺煥莊嚴者。明觀樓智閣差別觀智分明。名綺煥莊嚴也。百萬億摩尼網者。明施教網漉諸惑垢故。百萬億寶網者。明教能護育衆生故。百萬億寶纒絡網四面垂下者。明以萬行爲纒絡。四攝攝衆生。報名四面垂下飾故。大要言凡隨智隨行。隨慈隨悲。隨波羅蜜。隨觀照。隨助道法。隨大願。所有報境。因果相似。今將此業果。將法表之。網表理智行教。樓閣表觀智。殿表正智利生。宮表含育無限。座表普印法空悲智萬行。帳表隨根含攝衆生。鈴表法音和悅。華表道眼開敷。亦表行華資果。十百千萬億。都該大數無限。但隨法准而知之。可見。

不煩更釋。如梵云頻婆帳者。此云身影也。謂此帳光明。能現一切影像於中現故。頻婆羅香。明此香光潔。能現一切影像故。亦以赤色光淨如頻婆果。阿樓那香。其色如日。赫奕光明。拘蘇摩華。此有總別義。總云一切草木華也。又有別者。其華白色。大小如錢。似此白菊也。樓閣延袤者。言寶閣相連長遠也。寶悉底迦。此云佛胸前億德之相。具云佉阿悉底迦。佉者樂也。阿悉底迦者。此云有也。明有此相者有大樂故。以座上莊嚴有此相樂寶。天牟陀羅。天鼓中之別名也。因於撫擊方能出聲。

有百萬億初發心菩薩纔見此座。倍更增長一切智心。百萬億治地菩薩心淨歡喜。百萬億修行菩薩悟解清淨。百萬億生貴菩薩住勝志樂。百萬億方便具足菩薩起大修行。百萬億正心住菩薩勤修一切菩薩道。百萬億不退菩薩淨修一切菩薩地。百萬億童真菩薩得一切菩薩三昧光明。百萬億法王子菩薩入不思議諸佛境界。百萬億灌頂菩薩能現無量如來十力。百萬億菩薩得自在神通。百萬億菩薩生清淨解。百萬億菩薩心生愛樂。百萬億菩薩深信不壞。百萬億菩薩勢力廣大。百萬億菩薩名稱增長。百萬億菩薩演說法義令智決定。百萬億菩薩正念不亂。百萬億菩薩生

決定智。百萬億菩薩得聞持力。持一切佛法。百萬億菩薩出生無量。廣大覺解。百萬億菩薩安住信根。百萬億菩薩得檀波羅蜜。能一切施。百萬億菩薩得尸波羅蜜。具持衆戒。百萬億菩薩得忍波羅蜜。心不妄動。悉能忍受一切佛法。百萬億菩薩得精進波羅蜜。能行無量出離精進。百萬億菩薩得禪波羅蜜。具足無量禪定光明。百萬億菩薩得般若波羅蜜。智慧光明能普照耀。百萬億菩薩成就大願。悉皆清淨。百萬億菩薩得智慧燈。明照法門。百萬億菩薩為十方諸佛法光所照。百萬億菩薩周徧十方演離癡法。百萬億菩薩普入一切諸佛刹土。百萬億菩薩法身隨到一切佛國。百萬億菩薩得佛音聲。能廣開悟。百萬億菩薩得出生一切智方便。百萬億菩薩得成就一切法門。百萬億菩薩成就法智猶如寶幢。能普顯示一切佛法。百萬億菩薩能悉示現如來境界。百萬億諸天王恭敬禮拜。百萬億龍王諦觀無厭。百萬億夜叉王頂上合掌。百萬億乾闥婆王起淨信心。百萬億阿修羅王斷憍慢意。百萬億迦樓羅王口銜繒帶。百萬億緊那羅王歡喜踊躍。百萬億摩睺羅伽王歡喜瞻仰。百萬億世主稽首作禮。百萬億忉利天王瞻仰不瞬。百萬億夜摩天王歡喜讚歎。百萬億兜率天王布身作禮。百萬億化樂天王頭頂禮敬。百萬億他化天王恭

敬合掌。百萬億梵天王一心觀察。百萬億摩醯首羅天王恭敬供養。百萬億菩薩發聲讚歎。百萬億天女專心供養。百萬億同願天踊躍歡喜。百萬億往昔同住天妙聲稱讚。百萬億梵身天布身敬禮。百萬億梵輔天合掌於頂。百萬億梵衆天圍遶侍衛。百萬億大梵天讚歎稱揚無量功德。百萬億光天五體投地。百萬億少光天宣揚讚歎佛世難值。百萬億無量光天遙向佛禮。百萬億光音天讚歎如來甚難得見。百萬億淨天與宮殿俱而來詣此。百萬億少淨天以清淨心稽首作禮。百萬億無量淨天願欲見佛投身而下。百萬億徧淨天恭敬尊重親近供養。百萬億廣天念昔善根。百萬億少廣天於如來所生希有想。百萬億無量廣天決定尊重生諸善業。百萬億廣果天曲躬恭敬。百萬億無煩天信根堅固。恭敬禮拜。百萬億無熱天合掌念佛。情無厭足。百萬億善見天頭面作禮。百萬億善現天念供養佛。心無懈歇。百萬億阿迦尼吒天恭敬頂禮。百萬億種種天皆大歡喜。發聲讚歎。百萬億諸天各善思惟而為莊嚴。百萬億菩薩天護持佛座。莊嚴不絕。百萬億華手菩薩雨一切華。百萬億香手菩薩雨一切香。百萬億鬘手菩薩雨一切鬘。百萬億末香手菩薩雨一切末香。百萬億塗香手菩薩雨一切塗香。百萬億衣手菩薩雨一切衣。百萬億蓋手菩薩雨一切蓋。百

萬億幢手菩薩雨一切幢。百萬億幡手菩薩雨一切幡。百萬億寶手菩薩雨一切寶。百萬億莊嚴手菩薩雨一切莊嚴具。百萬億諸天子從天宮出至於座所。百萬億諸天子以淨信心并宮殿俱。百萬億生貴天子以身持座。百萬億灌頂天子舉身持座。百萬億思惟菩薩恭敬思惟。百萬億生貴菩薩發清淨心。百萬億菩薩諸根悅樂。百萬億菩薩深心清淨。百萬億菩薩信解清淨。百萬億菩薩諸業清淨。百萬億菩薩受生自在。百萬億菩薩法光照耀。百萬億菩薩成就於地。百萬億菩薩善能教化一切衆生。

第五。有百萬億初發心菩薩已下。至百萬億菩薩善能教化一切衆生。有七十六行經。明菩薩入法諸天八部衆。都有一百八箇百萬億大衆海。莊嚴寶地及虛空中分。已下四十衆菩薩。明見座莊嚴。觀法倍倍入法昇進。以爲莊嚴之境。四十衆者。明十住十行十迴向十地位也。明此天蘊修此四位法。成普賢行自具故。已下從百萬億天王已下。至百萬億摩醯首羅天王。有十六王。總該已上欲界色界主。且總明此十迴向法門。徧於三界。以智隨悲。徧於六道利生自在如王故。都舉十六種王名。明彰此位。總徧攝人天六道。以智如王。教化衆生。自在無礙故。初

總百萬億天王。明天王最自在故。然別舉龍王諦觀。明知根雨法自在。夜叉王頂上合掌。守護自在。乾闥婆王起淨信心者。明以法樂悅樂衆生自在。百萬億阿修羅王斷僞慢者。明以大悲入生死海。謙下同事自在。百萬億迦樓羅王口銜繒帶者。大悲垂俗引接自在義故。百萬億緊那羅王歡喜踊躍者。明能以法歌樂悅衆生。令歡喜自在故。百萬億摩睺羅伽王歡喜瞻仰者。明是腹行。表恭敬義自在故。百萬億世主稽首作禮者。明四天王主導衆生軌則義故。此是主人及神龍鬼等。乃至地獄。總攝在位。百萬億忉利天王瞻仰不瞬者。十住之位。修方便進求之定義。百萬億夜摩天王歡喜讚歎者。如世間樂以歌頌之。法樂以讚歎之。明此天以十行法樂故。百萬億兜率天王布身作禮者。明此天大慈悲心。布身如地。荷負無倦義故。百萬億化樂天王頭頂禮敬者。明下心徹到大悲屈智至悲之極義也。百萬億他化自在天王恭敬合掌者。明會智悲生死涅槃無一異故。百萬億梵天王一心觀察者。明除細習義故。百萬億摩醯首羅天王恭敬供養。明智慧法身大悲圓滿。可恭敬供養故。此已上十六天王龍王等。明智悲圓滿。三界六道。自在如王義故。皆百萬億者。表大願智悲行具足也。百萬億菩薩發聲讚歎者。明已上十六王。總攝菩薩行

徧。皆可讚歎故。百萬億天女專心供養者。明前十六王等行無染大慈悲徧三界故。百萬億同願天踊躍歡喜。此欲界中天往昔同願。亦明此位之中總同佛願行。百萬億往昔同住天。於往昔同住。明此十迴向位菩薩。皆同一切諸佛大悲願行住。已下百萬億梵身天布身敬禮。下至阿迦尼吒天恭敬頂禮。明色界初禪已上行徧。總有二十衆天。總收色界諸衆。初十六王等一時包含。今次第別列。無色界天定沈。未堪現世發心。化儀不及其境。如此一段可十六行經。自梵身天已下。至阿迦尼吒天。有二十衆天。阿迦尼吒天。是色究竟天。此天是色界頂。此已上二十衆天。表此十迴向中大悲之行。天者淨也。明以大悲大智。常處生死教化衆生。如天自在而無垢染。如梵身天布身敬禮者。有二義。一恭敬如來。二表法。大悲謙下如地。百萬億梵輔天合掌於頂。亦有二義。一敬佛。二表法忻進。百萬億梵衆天圍遶侍衛。亦有二義。一敬順於佛。二表順正念度衆生故。百萬億大梵天讚歎稱揚無量功德。亦有二義。一敬歎於佛。二表法。歎衆生有佛功德。百萬億光天五體投地。亦有二義。一敬佛。二表法。望此位以大悲爲地。明以戒定慧解脫解脫知見。投於生死慈悲之地。百萬億少光天宣揚讚歎佛世難值。亦有二義。一敬世尊

難遇。二表法。歎衆生菩提難發。百萬億無量光天遙向佛禮。亦有二義。一敬佛。二表法。明教化一切衆生使令信解故。稱爲遙見。百萬億光音天讚如來甚難得見。亦有二義。一難遇難見。二表法。歎自心難知正法。百萬億淨天與宮殿俱而來詣佛。此亦有二義如前。一敬佛。二表法。明悲宮智殿圓滿含攝衆生。百萬億少淨天以清淨心稽首作禮。二義如前。一敬佛。二表法。明理事恭敬。百萬億無量淨天願欲見佛投身而下。二義如前。一敬佛。二表法。明垂慈救俗。已下准義知之。而以行行之。如百萬億種種天皆歡喜者。此天衆是色界欲界中雜類天故。故云種種也。是都稱。表衆行具足。言種種行饒益衆生故。百萬億諸天各善思惟。總言色界欲界天內天也。都稱百萬億菩薩天護持佛座莊嚴不絕。此但兜率天故。亦是表法。以法界爲座體。萬行爲莊嚴。此已上三衆。通前有二十三衆。從百萬億華手菩薩已下。至百萬億灌頂天子舉身持座。有十一衆菩薩。四衆諸天子。通爲十五衆。初百萬億華手菩薩雨一切華。有三義。一處空雨華供養佛。二以空起行。三明往世造華爲因。百萬億香山菩薩雨一切香。亦有二義。一雨香供養佛。二明五分法身香。三明往因之行以香供養。百萬億鬘手菩薩。亦有二義。一雨鬘供養。

二以忍爲鬢。三明往因造鬢供佛。已下准義知之。如百萬億諸天子從天宮出至於座所。有二義。一出宮供佛。二明以智會悲。百萬億諸天子以淨信心并宮殿俱。亦有二義。一并宮殿供佛。二表悲智圓融。百萬億生貴天子以身持座。亦有二義。一持座供佛。二表法。此生貴住主第四波羅蜜。以精進是持座義。百萬億灌頂天舉身持座。亦有二義。一舉身持座供佛。二表十住中灌頂智慧力用增強。此四種天子者。即是欲界兜率天中諸天子。以經言略計次第。十住合足。亦明子者慈名。爲表修慈故。彌勒號慈也。已次百萬億思惟菩薩已下。至善能教化一切衆生者。此一段有十箇菩薩。以淨三業。或入住地。莊嚴法會。皆名義可解。

百萬億善根所生。百萬億諸佛護持。百萬億福德所圓滿。百萬億殊勝心所清淨。百萬億大願所嚴潔。百萬億善行所生起。百萬億善法所堅固。百萬億神力所示現。百萬億功德所成就。百萬億讚歎法。而以讚歎。

第六百萬億善根所生已下。至百萬億讚歎法而以讚歎。有五行經。明十種善根莊嚴宮殿及寶座分。釋義云。自百萬億善根所生已下。至而以讚歎。有十百萬億衆善行所嚴。如經具明。

如此世界兜率天王。奉為如來敷置高座。一切世界兜率天王。悉為於佛如是敷座。如是莊嚴。如是儀則。如是信樂。如是心淨。如是欣樂。如是喜悅。如是尊重。如是而生希有之想。如是踊躍。如是渴仰。悉皆同等。

第七如此世界已下。至悉皆同等。有五行經。明都結十方同然分。已上徒衆。有一百十八種百萬億衆。已上莊嚴。有一百八十四種百萬億莊嚴。爲此段都數已上莊嚴。及菩薩神天天女。色類間雜。或次或不次者。意表此十迴向位。是以智從悲。成大悲海。於人天六道中。以無限徧周法界行門。一時等化。逐根與法。或次或超。或住或信。或位階十地。或人天善根。無有一向次第安立。以此莊嚴。及菩薩神天。表法間雜。不依次第。或菩薩衆有諸天。或諸天衆中有龍神。如是准義思之。可見經意。問曰。十住但有諸天衆來迎世尊。十行徒衆即有諸天及菩薩衆。此會何故八部王衆大衆廣博莊嚴色類甚多。十地中不敘致天王及衆來迎入殿莊嚴高座等事。何意其位高昇不陳廣供。答曰。十住有天無菩薩來迎如來所施供養者。爲十住位。且明其初生佛智慧家。未有先見道者。但列諸天。未有菩薩。爲初始從信位凡夫。未得入聖位故。以此初昇須彌頂品。不列菩薩之衆。但有諸

天奉迎如來故。明從此位方入聖流。如昇夜摩天宮品。即有諸天及菩薩衆稱揚讚歎者。即明十住位。已有見道入位故。十行位昇進中。即有諸菩薩衆而迎佛。會入十行法門。以十住十行。設行衆行。出世心多。處世大悲猶未自在故。所以衆不圓滿故。如此兜率天宮諸天菩薩及莊嚴色類多者。明此迴向之門。會融悲智。出世與世間一體。成就大悲。普育含識。徧周利物不棄微生。是故天王龍王。八部諸王。菩薩法王。其衆無量。莊嚴境界。色相無邊。表明悲位含弘。濟生無限。利物廣大。獲益無窮。是故此天莊嚴廣大。如十地之位。但約此十迴向大悲之際。智育週周之門。長養大悲使令堅厚。更無餘法別有進求。設復智有奇途。只是此位之中微細。是故佛昇他化。更不別有徒衆承迎座體。進修不論別加層級。可知。爾時兜率天王。為如來敷置座已。心生尊重。與十萬億阿僧祇兜率天子。奉迎如來。以清淨心。雨阿僧祇色華雲。雨不思議色香雲。雨種種色鬘雲。雨廣大清淨栴檀雲。雨無量種種蓋雲。雨細妙天衣雲。雨無邊衆妙寶雲。雨天莊嚴具雲。雨無量種種燒香雲。雨一切栴檀沈水堅固末香雲。諸天子衆。各從其身出此諸雲。時百千億阿僧祇兜率天子。及餘在會諸天子衆。心大歡喜。恭敬頂禮。阿僧祇天

女。踊躍欣慕。諦觀如來。兜率宮中不可說諸菩薩衆。住虛空中。精勤一心。以出過諸天諸供養具。供養於佛。恭敬作禮。阿僧祇音樂一時同奏。

第二爾時兜率天王已下。至音樂一時同奏。一段經。明兜率天王爲佛敷座已。與諸天衆以淨心興供養雲。及諸菩薩奉迎如來分。釋義云。與十萬億阿僧祇兜率天子奉迎如來。有二義。一請佛入宮殿。二表法。以解脫無依住之大智。處一切生死饒益衆生。即迎佛義。又一釋。如創入聖位。以方便三昧而入眞門。如此十迴向。以取十住十行中無垢正智。入大悲方便。爲迎佛入宮殿。如三乘中。地前三十心爲方便。十地見道。如此經。十信心爲方便資糧。十住初心爲見道成佛。十行十迴向十地十一地爲資糧。資糧十住初正見心成。令慣習自在故。爲三乘教於三僧祇劫方成佛故。設十地菩薩。得三種意生身。非是得佛智生身故。以是十地向前三賢菩薩。是資糧位。十地見道。爲加行位。十一地等覺位中。普賢行方終。十二地是妙覺佛果。此佛華嚴。其義先佛而後行。以先覺佛果。方以悲願之行。用資覺體。使悲智齊均。以此義故。號佛華嚴也。是故今此兜率天王。以將大悲之方便。用資十住十行之中大智佛果。爲迎佛義故。今此位教表法大體。以

將大悲之海。用資十住十行之中佛智慧正覺故。號之爲迎佛故。夫法無始終。一念齊等。萬行悲智。當體圓終。設教名言。不可並立。名詮敘致。似有前後義生。體名者名無始末。達教者境智不移。此教意明混今古之爲一際。破情塵於當即也。終不可作延促解。始終見。總不出無時之理。和會一多差別之門也。凡以前位向後位。爲遙見。正契。爲佛來入宮。以清淨心兩阿僧祇色華雲。有二義。一供佛。二表法。明大悲萬行徧周。其雲具十種。明法行圓滿。皆從天身出者。明智身興萬行也。大衆天子天女歡喜頂禮者。明以軌度法則利生令得樂故。明菩薩大悲。令衆生得樂。是菩薩樂故。如世人母。其子樂者。其母樂也。兜率宮中不可說諸菩薩住虛空中精勤一心供養出過天者。明以法空成行。出勝世間有爲行也。此一段有十三種衆。

大方廣佛新華嚴經合論卷第四十終

普為出資及讀誦受持

輾轉流通者回向偈曰

願以此功德

消除宿現業

增長諸福慧

圓成勝善根

所有刀兵劫

及與饑饉等

悉皆盡滅除

人各習禮讓

讀誦受持人

輾轉流通者

現眷咸安樂

先亡獲超昇

風雨常調順

人民悉康寧

法界諸含識

同證無上道

佛曆二五五八年／西元二〇一四年七月

恭印：一〇〇〇套

流水號：12447
書號：0342-01

大方廣佛新華嚴經合論（上冊）

發行人：簡豐文

出版者：財團法人佛陀教育基金會

地址：100台北市杭州南路一段五十五號十一樓

網址：<http://www.budaedu.org>

E-mail：budaedu@budaedu.org

電話：(011)三三九五一一一九八

傳真：(011)三三九一一三四一五

劃撥戶名：財團法人佛陀教育基金會

郵局劃撥帳號：〇七六九九四九九

銀行名稱：台灣銀行城中分行（請於電匯或轉帳後告知本會用途）

銀行帳號：〇四五〇〇〇四五九七五〇三

本會經書免費結緣之請取方式如下：

(一)親臨本會二樓講堂。(二)利用傳真：(02) 23965959

(三)撥打電話：(02) 23951198 分機：11、12

(四)網址：<http://www.budaedu.org/books/>。(五)寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎本會經書，歡迎翻印（請勿增刪），贈送流通，功德無量。

◎本會交通：

※捷運：善導寺站5號出口，至杭州南路右轉，過兩個紅綠燈。

※公車站牌：審計部站→212、299、232、205、276、605、257、262

台北商業技術學院→253、297、237 仁愛路二段→253、297 開南商工→208

仁愛路、杭州南路(紹興街)口→630、270、263、245、621、651、37、261

行政院新聞局出版事業登記證局版臺業字第三八六九號



